

१२

(राजस्थानी गद्य पद्य संग्रह)

कक्षा
12

साहित्य सुजास

भाग-2



साहित्य
सुजास

साहित्य-सुजस

भाग-2

(राजस्थानी गद्य-पद्य संग्रे)

कक्षा 12 रै राजस्थानी साहित्य विसय सारू
स्वीकृत पाठ्यपोथी



माध्यमिक शिक्षा बोर्ड, राजस्थान, अजमेर

पाठ्यपुस्तक निर्माण समिति

पुस्तक : साहित्य सुजस भाग-II (राजस्थानी गद्य पद्य संग्रह)
कक्षा – 12

संयोजक :—

डॉ. (श्रीमती) प्रकाश अमरावत, अध्यक्ष राजस्थानी विभाग
राजकीय डूँगर महाविद्यालय, बीकानेर

लेखकगण :—

1. डॉ. मदन सैनी, वरिष्ठ व्याख्याता, हिंदी विभाग
मांगीलाल बागड़ी स्नातकोत्तर महाविद्यालय
नोखा, बीकानेर
2. डॉ. गजेसिंह राजपुरोहित, सहायक आचार्य, राजस्थानी विभाग
जयनारायण व्यास विश्वविद्यालय, जोधपुर
3. विक्रमसिंह चौहान, व्याख्याता राजस्थानी
राजकीय मोहता मूलचंद उ. मा. विद्यालय, बीकानेर

पाठ्यक्रम समिति

पुस्तक : साहित्य सुजस भाग-II (राजस्थानी गद्य पद्य संग्रह)
कक्षा – 12

संयोजक :—

डॉ. (श्रीमती) प्रकाश अमरावत, अध्यक्ष राजस्थानी विभाग
राजकीय डूँगर महाविद्यालय, बीकानेर

सदस्य :—

1. डॉ. लक्ष्मीकांत व्यास, व्याख्याता
सम्राट पृथ्वीराज चौहान राजकीय महाविद्यालय, अजमेर
2. विजय कुमार पारीक, प्रधानाध्यापक
राजकीय उच्च माध्यमिक विद्यालय काम्बा, आहोर, जिला—जालोर
3. डॉ. शिवराज भारतीय, प्राध्यापक
राजकीय उच्च माध्यमिक विद्यालय बिरकाली, नोहर जिला—हनुमानगढ़
4. नरसिंह सोढा, वरिष्ठ अध्यापक
राजकीय उच्च माध्यमिक विद्यालय बज्जू कोलायत जिला—बीकानेर

संयोजकीय

राजस्थानी साहित्य सूरां, सतवादियां, सामधरमियां रौ साहित्य। मरण-तिंवार मनावण वाले इन प्रदेस री भासा राजस्थानी में बीरता, भक्ति अर सिणगार री रस-त्रिवेणी कर्दै खल्खलाट करती घणै वेग सूं तौ कर्दै मधरी-मधरी बैंवती निजर आवै।

आद-जुगाद जूना इण साहित्य में जीवण रा सगळा पखां रौ वरणाव होयौ है। जुग री थितियां मुजब अठै रौ साहित्यकार घणी सावचेती सूं कलम री कोरणी मांडी अर समाज नैं हरेक जुग में चेतावतौ रैयौ है। देस अर समाज री राजनीतिक, सांस्कृतिक, आर्थिक, सामाजिक आद सगळी थितियां साहित्य-सिरजक सूं अदीठ नॊं रैयी। राजस्थानी साहित्य रा अखूट भंडार रा कीं मूँवा माणक-मोती इण पोथी में जड़ीज्या है। इण पाठ्यपोथी में गद्य अर पद्य री दोनूं विधावां सूं जूना अर नूंवा साहित्य रा दाखला सरूप टाळ्वीं रचनावां लिरीजी है।

बदलता बगत में राजस्थानी साहित्य लेखन री दीठ ई चौनिजरां होयी है। आं रचनावां सूं इण बात रौ ग्यान होवै कै राजस्थानी लेखन आपरा नूंवा सिल्पगत, विसयगत, बिम्ब विधान अर प्रतीक विधान अंगेजतां आगै बध्यौ है। जैन सैली, संत सैली, चारण सैली अर लौकिक सैली री रचनावां रौ लेखन हरेक जुग में होयौ है। इण सिमरथ परंपरा री इधकाई री बात करां जिती ई थोड़ी।

माध्यमिक शिक्षा बोर्ड राजस्थान, अजमेर रै निरदेसन अर रीति-नीति मुजब आ पोथी त्यार करीजी है। राजस्थानी भासा, साहित्य अर संस्कृति री अंवेर सारू माध्यमिक शिक्षा बोर्ड सूं जिकी अपणायत मिळी, उणसूं पोथी संपादन में हूंस अर हुलास बध्यौ। इण पोथी रै पाठां रौ संकलन करणिया, सहयोगी लेखकां अर संपादक-मंडल रै साथै बोर्ड कानी सूं मिळ्या सहयोग सारू आभार। पूरै पतियारौ है कै राजस्थानी साहित्य री आ पोथी 12वीं कक्षा वास्तै घणी उपयोगी होवैला। इणनैं पढनै पढेसरी आपरी संस्कृति अर परंपरावां सूं जुड़नै भावी जीवण में संस्कारां अर नूंवी ऊर्मा रै साथै आगै बधैला। इणी मंगळ कामनावां साथै—

सारद माता सीस नमावूं ओ वर दीजै।

सबदां में जीवूं मर जावूं सबदां रौ आगोतर दीजै॥

—डॉ. (श्रीमती) प्रकाश अमरावत

विषय— साहित्य सुजस भाग—2 (राजस्थानी गद्य पद्य संग्रह)

समय: 3.15 घंटा

पूर्णांक : 80

1. राजस्थानी पाठ्य पुस्तक (गद्य— 28, पद्य — 28)	56
2. राजस्थानी साहित्य रो इतिहास	6
3. निबन्ध रचना	6
4. काव्य शास्त्र— छंद— अलंकार	12
	कुल 80

क्र.सं.	पाठ्य वस्तु	कालांश	अंकभार
1. गद्य भाग			
1. गद्यरी सप्रसंग व्याख्या अर आलोचनात्मक सवाल सप्रसंग व्याख्या (3) आलोचनात्मक सवाल (4)	100	28	
2. राजस्थानी साहित्य रो इतिहास – प्राचीन काल, मध्यकाल एवं आधुनिक काल	20	6	
3. निबन्ध लेखन (साहित्यिक, भावनात्मक, देशभक्ति सामाजिक) राजस्थानी भासा मायं	10	6	
2. पद्य भाग			
1. पद्य री सप्रसंग व्याख्या अर आलोचनात्मक सवाल सप्रसंग सप्रसंग व्याख्या – 3, आलोचनात्मक सवाल— 4	100	28	
2. काव्य शास्त्र			
(i) काव्य री परिभाषा, भेद, तत्व अर प्रयोजन	10	4	
(ii) छंद— कुण्डलियों, छप्पय, वेलिया, त्रिबंकड़ो	15	4	
(iii) अलंकार – अनुप्रास, यमक, उपमा, रूपक	15	4	
	कुल 270		

विगत

मंडाण पोथीमाळ रा पुहुप डॉ. (श्रीमती) प्रकाश अमरावत 7

गद्य-खंड

इकाई : ओक

वात	राणी चौबोली री वात	11
वचनिका	अचलदास खीची री वचनिका	17
विगत	मारवाड़ रा परगनां री विगत	22

इकाई : दो

कथा	वैताल पचीसी री अकवीसमी कथा	28
लोकगाथा	हर्ष-जीण री लोकगाथा	32
उपन्यास-अंस	कनक-सुंदर	39

इकाई : तीन

कहाणी	अलेखूं हिटलर	45
	बंटवारौ	55
	गाय कठै बांधूं	60

इकाई : चार

लघुकथा	आज रै सरवण	66
	माटी री मनस्या / बांझ	68
निबंध	सुख-दुख	71
रेखाचित्राम	चामळ का घाट पे	78

इकाई : पांच

व्यंग्य	सवाल शुद्धता रौ	82
	मित्युरासौ	88
गद्य-काव्य	नुकती-दाणा	94
	गळगाचिया	95
उल्थौ	साहित्य रौ मकसद (प्रेमचंद)	98

पद्म-खंड

इकाई : अेक

जूनौ काव्य	रणमल्ल छंद	श्रीधर व्यास	106
लोक-काव्य	ढोला-मारू रा दूहा		110
रास	वीसलदेव रास	नरपति नाल्ह	114

इकाई : दो

सबद-वाणी	सबद	सिद्धाचार्य जसनाथ	121
भक्ति-काव्य	देवियांग	ईसरदास बारठ	126
रासौ-काव्य	राम रासौ	माधवदास दधवाड़िया	132

इकाई : तीन

डिंगळ-गीत	आयौ इंगरेज मुलक रै ऊपर	बांकीदास आसिया	140
अध्यात्म-पद	आतम-संबोध	श्रीमद् जयाचार्य	143
पद	भक्ति रा पद	भक्त कवयित्री समान बाई	147
डिंगळ-छंद	तमाखू री ताड़ना	ऊमरदान लाल्स	155

इकाई : चार

कविता	सपनौ आयौ	हीरलाल शास्त्री	160
	मरण-पंथ रा पंथी	सुमनेश जोशी	164
	लिछमी	रेवतदान चारण	168
	कतनी बार मरुं / काजळी तीज	रघुराजसिंह हाड़	172
	भासा सूं अरदास / ओळबौ	चंद्रप्रकाश देवल	177
	दूटी ओदणिये / अेक वाटली आटा नु हगु	डॉ. ज्योतिपुंज	183

इकाई : पांच

परिशिष्ट

साहित्य-इतिहास	राजस्थानी साहित्य रौ इतिहास	190
काव्य-सास्त्र	काव्य री परिभासा, तत्त्व, भेद, प्रयोजन अर राजस्थानी छंद अर अलंकार	208
निबंध-लेखण	राजस्थानी निबंध लेखण	224

મંડાણ

પોથીમાળ રા પુહુપ

માયડેરૈ હેજ જૈડી હેજાવી, કાલ્જાઈ હિંવલાસ દેવળ વાવી માયડે ભાસા રાજસ્થાની રી બાત કરતાં કંઠાં રૈ મારગ અંતસ તાઈ મીઠાસ પૂગૈ।

રાજસ્થાની ભાસા જુગાં જૂની અર ઘણી સિમરથ હૈ। રાજસ્થાની રી અખૂટ સાહિત્ય-સંપદા, ભાસા રી વ્યાકરણ, ઉણરી ન્યારી-ન્યારી વિસેસતાવાં, સબદ ભડાર જિણમેં દો લાખ નૈડા સબદાં રા અરથ હૈ। અરથ ઈ નીં, એક સબદ રા અનેક અરથ અર એક અરથ વાળા ઘણા ઈ સબદ ઇણરી અખૂટ થાતી હૈ। સાત કરોડ સું બેસી તૌ રાજસ્થાન રી જનસંખ્યા હૈ, ઇણરૈ બારે ઈ પૂરા ભારત મેં જઠૈ-તઠૈ રાજસ્થાની બોલણ વાળા રૈવૈ, રાજસ્થાન અર આસૈ-પાસૈ જઠૈ આ ભાસા બોલીજૈ, ઉણ રા ભૂખેત્રાં નૈં મિલાવાં તૌ રાજસ્થાની વિસાલ ભૂખેત્ર મેં બોલીજણ વાળી ભાસા હૈ। જૂની મુડિયા લિપિ રૈ પછૈ દેવનાગરી લિપિ ઇણરૈ કનૈ હૈ। સબ સું મોટી બાત જિકી ઇણ ભાસા નૈં સાંવઠી કરૈ વા હૈ ઇણરી બોલિયાં અર ઉપબોલિયાં। મારવાડી, મેવાડી, હાડોડી, ઢૂંઢાડી, મેવાતી, વાગડી, સેખવાટી, તોરાવાટી, ગોડવાડી આદ ઇણરી બોલિયાં અર ઉપબોલિયાં હૈન। રાજસ્થાની મેં આ કૈવત ઈ ચાવી હૈ કે ‘બારા કોસાં બોલી બદલૈ’, પણ આં બોલિયાં મેં બરતીજણ વાળા આંચલિક સબદ રાજસ્થાની રી સબદ-સંપદા નૈં બધાવૈ। ભાસાવિદાં રૌં ઔડાં માનણૌ હૈ કે જિણ ભાસા મેં જિતી જ્યાદા બોલિયાં હોવૈ વા ભાસા બિતી ઈ સિમરથ અર સિમરથ બણૈ। રાજસ્થાની એક સ્વતંત્ર અર સંપત્ત્ર ભાસા હૈ।

માધ્યમિક શિક્ષા બોર્ડ રા પાઠ્યક્રમ મેં રાજસ્થાની પઢાઈ જાવૈ, ઇણરૌ મ્હાનૈ અંજસ હૈ। બારવીં કક્ષા વાસ્તે ‘સાહિત્ય-સુજસ’ (ભાગ-2) મેં રાજસ્થાની ભાસા રી ટાલ્વાં રચનાવાં લિરીજી હૈ। આં રચનાવાં સું રાજસ્થાની સાહિત્ય રી કૂંત તૌ કરીજૈ ઈ હૈ, સાથૈ ઈ આંનૈં પઢણ વાળા ટાબરાં રૈ ચરિત્ર નૈં ઊજલૈ બણાવણ અર સંવારણ રૌં કામ ઈ ઔ રચનાવાં કરૈલા।

ટાબરપણૈ મેં નાની-દાદી સું જિકી બાતાં સુણતા હા ઉણાં રી ઓછૂં અંતસ રૈ કિણી ખૂણૈ મેં અજેસ ઈ લુક્યોડી બૈઠી હૈ। ‘વैતાલ પચીસી’ રી બાતાં હિતોપદેસ અર પંચતંત્ર રી કથાવાં જૈડી હૈ। વિક્રમ-વैતાલ રી કથાવાં સું કુણ અણજાણ હૈ। આં કથાવાં સું વિદ્યાર્થ્યાં રૌં ચિંતન ખિમતાવાન બણૈ। ઇણી દીઠ સું જૂનૌ ગદ્ય અર પદ્ય ઇણ પોથી મેં રાખીજ્યા હૈ। રાજસ્થાની રૈ સાંવઠૈ સાહિત્ય ભંડાર સું કોં ટાલ્વાં રચનાવાં ઇણ પાઠ્યપોથી મેં લિરીજી હૈ। રાજસ્થાની સાહિત્ય રૈ આદિ, મધ્ય અર આધુનિક કાલ સું વિદ્યાર્થી રૂબરૂ વ્હૈ સકૈ, ઇણ વાસ્તૈ પંચતંત્ર, હિતોપદેસ જૈડી કથાવાં મેં ‘વैતાલ પચીસી’ રી કથાવાં આપરી ન્યારી ઠોડું રાખૈ। ‘ભણિયા પણ ગુણિયા કોની’ કહાવત નૈં ચરિતાર્થ કરણ વાળી ‘વैતાલ પચીસી રી અકવીસમી કથા’ જીવણ રૌં ગુર સિખાવૈ। ‘ચૌબોલી રી બાત’ અર ‘મારવાડું રા પરગના રી વિગત’ રાજસ્થાની રૈ પ્રાચીન ગદ્ય રી ઓછ્યાખાણ કરાવૈ।

આજ રૈ બગત મેં મિટતા માનવી મૂલ્ય, જીવન-આદર્શ, ટૂટતા પરિવાર અર એકલપૈ મિનખ નૈં હેત અર અપણાયત રી દરકાર હૈ। ભાઈ-બૈન રા સંબંધાં રી લૂંઠી બાનગી હૈ— ‘હર્ષ-જીણ રી લોકગાથા’। આ ગાથા માનવી સંવેદનાવાં નૈં જંઝેડ દેવૈ। રાજસ્થાની-સાહિત્ય મેં ત્યાગ, સમરપણ, બિલ્દાન રી કથાવાં ચાવી હૈ, જકી અઠૈ રી સંસ્કૃતિ રી ઓછ્યાખાણ હૈ। વીર સાંસ્કૃતિક પરંપરા અર સ્વાતંત્ર્ય ભાવના રી નિકેવલી રચનાવાં મેં ‘અચલદાસ ખીચી રી વચનિકા’ જૂનૈ ગદ્ય રૌં નામી દાખલો હૈ।

विकसाव रै मारग माथै केर्द पड़ाव पार करती राजस्थानी रै आधुनिक गद्य री सगळी विधावां में सिरजण री साख भरती रचनावां में ‘कनक-सुंदर’ राजस्थानी रौ पैलौ उपन्यास है। इणरौ कीं अंस पोथी में राखीज्यौ है। पाठ्यपोथी में कहाणियां, लघुकथावां, निबंध, रेखाचित्राम, व्यंग्य, गद्यकाव्य आद सगळी विधावां लेवण रा जतन करीज्या है।

आज रै भोगवादी जुग में मिनख खुद मिनख सूं आंतरै जीवण लागौ है। वौ आज री भागदौड़ वाळी जीवाजून में गम्योड़ौ, खुद चमगूंगौ होयोड़ौ रात-दिन आफळीजतौ रैवै, जाणै किणी गम्योड़ी चीज नैं सोधतौ व्है। खुद रै माथै गाडां-गाडां भार ऊंचायोड़ौ बेवूलौ होयोड़ौ फिरै। वौ आपरा गाढा संबंधां री साख नैं ई बचायनै नीं राख सक्यौ। आज ठौड़-ठौड़ बण्योड़ा वृद्धाश्रम, अनाथालय इण बात री पिछाण करावै कै आधुनिक दीठ सूं तौ आपां आगै बधता जावां हां, पण मूळ सूं कटता जा रैया हां। जड़ सूखगी तौ रुंख जावैला, पछै डालियां अर पानडां रौ लेखौ करणौ मूरखता है। आपां री जड़ां हैं आपण माईत, आपण बडेरा अर पान-फूल हैं आपण टाबर। परिवार री इकाई सूं इज समाज बणै अर समाज तद ई रातौ-मातौ बण सकै जद आपां में संस्कार जीवता रैवैला।

आज रै आपा-धापी रै जुग में मिनख खुद नैं मोटौ समझै। आपारा अहम नैं राखण वास्तै वौ दूजां नैं कीड़ा-मकोड़ा समझण लाग जावै। अहम रौ राकस इत्तौ बल्वान बण जावै कै समाज में विणास रौ कारण बणै। जबरां री रोज दिवाळी व्है। समाज री विसंगतियां, विडरुपतावां सूं अरू-बरू करावण वाळी रचनावां इण पोथी में राखीजी है। मानखो सहज-सरल भासा में समझ जावै तौ आछौ, नीं तौ व्यंग्य-बाण सूं उणनैं सावचेत करणौ साहित्यकार रौ फरज बणै। बात नैं मांडनै कैवणी अेक कला है, तौ थोड़ै में घणौ कैवण री हटोटी ई साहित्य में है। ‘छोटी तुक रौ दोहलौ, सब कवितन को भूप’ ज्यूं ‘गळगचिया’ अर ‘नुकती-दाणा’ ई पढण में सौरा, मनोरंजक होवण रै साथै जीवण-दरसण री पिछाण करावण वाळा है। ‘गागर में सागर’ री खिमता आं मांय है। प्रेमचंद रै आलेख ‘साहित्य का उद्देश्य’ रौ उल्थौ ‘साहित्य रौ मकसद’ राजस्थानी में अनुसिरजण री साख नैं सर्वाई करै।

राजस्थानी रै प्राचीन पद्य साहित्य में वीर रस री रचनावां री आपरी परंपरा रैयी है। इण परंपरा में ‘रणमल्ल छंद’ वीर रसात्मक औतिहासिक खंडकाव्य है। औ अेक चरित-काव्य ई है। रणमल्ल री वीरता अर दरप राजस्थानी वीर संस्कृति री ओळखाण करावै।

राजस्थानी संस्कृति में वीरता, सिणगार, भक्ति रा सुर अेकण सागौ गूँजिया। वीर भोग्या वसुंधरा में जठै मरण-तिंवार मनाईज्या—‘मरणा नूं मंगळ गिणौ, समर चढै मुख नूर’ अर ‘चूंडावत मांगी सेनाणी, सिर काट दे दियो क्षत्राणी’। अेक दूजै रूप में यूं कहीजै—

सत री सहनाणी चही, समर सलुंबर धीस।

चूङ्गामण मेली सिया, उण धण मेल्यौ सीस॥

वीरता में त्याग अर बल्लिदान रा भाव है। पण जठै प्रेम होवै बैठै समरपण-भाव रौ होवणौ ई घणौ जरूरी है। जुद्धां रा रीझालू प्रीत निभावण में ई पाछ नीं राखता। जे कर्तव्य रै आडी प्रीत आयगी तौ पाबूजी राठौड़ रै ज्यूं ब्याव रा तोरण सूं सदैव रण-तौरण वाल्हौ हौं वीरां नैं—

परणी छोडी बिलखती, माथै जस रौ मोड़।

बणियौ गायां बाहरू रंग पाबू राठौड़॥

प्रेम सिणगार अर उणमें ई विरह सिणगार में मानवी संवेदनावां उफणन लागै। जूना काव्य जिका प्रेमाख्यान ई है। इणां में लोक-सैली री घण महताऊ कृतियां हैं—‘ढोला-मारू रा दूहा’ अर ‘वीसलदेव रास’। नायिका रौ विरह वरणन, मानसिक दसावां, आपरी संवेदनावां नैं पंखेरुवां साथै बांटणी अर पंखेरुवां री पीड़ नैं

आत्मसात करणी, बारहमासा वरणन सूं नायिका रै विरह सूं उपजी वेदना रौ मरमपरसी वरणन आं दोनूं काव्यां में होयौ है।

मिनख रै हिरदै में प्रेम-तत्त्व रौ होवणौ घणौ जरुरी है। प्रेम रै ओळै-दोळै इज सगळा भाव फिरै। देसप्रेम है तौ वीरता रौ भाव अपणै आप आय जावैला। प्रेम तत्त्व है तौ भगवान रै प्रति प्रेम होवण सूं ई भक्ति री भावना जागै। भक्ति में विस्वास अर आस्था जुङ्योड़ी है। सक्ति री भक्ति रै रूप में 'देवियां' जठै सक्ति री सरब व्यापकता नैं बतावै, बठै ई जीवण-आदरसां रा रुखाव्य श्रीराम रै चरित्र नैं उजागर करण वाव्यै महाकाव्य 'राम रासौ' है। समाज में जीवण-आदरसां नैं जींवता राखण सारू राम जैड़ा चरित्रां री दरकार है। कृष्ण भक्ति काव्य में समान बाई रौ काव्य महिला-सिरजण री साख भरै। जुग बदलै ज्यूं जुग रा मानदंड ई बदलै, थितियां ई बदलै अर हरेक जुग में कवि या साहित्यकार आपरै फरज निभावण सारू समाज नैं चेतावतौ दीखै। साहित्यकार जुगदस्टा अर स्त्रस्टा दोनूं है। जैड़े देखै वैड़ै ई लिखै। औड़ा ई जुगबोध करावण वाला कवियां में संधिकाळ रा कवि बांकीदास आसिया रौ नांव आवै। आप अंग्रेजी सत्ता रौ विरोध करतां उणरै खिलाफ डिंगल गीत 'आयो इंग्रेज मुलक रै ऊपर' रचनै जनमानस नैं सावचेत कर्हौ। जातीय अंकता ई इण गीत में निजर आवै। जिकौं वीर रजपूती निभावै वौ राजपूत है। वरण व्यवस्था में क्षत्रियां नैं देस री रिछ्या रौ भार सूंपीज्यौ, पण बांकीदासजी हर मिनख नैं देस-रिछ्या रौ भार सूंपणी चावै।

देस आजाद होयां पछै ई मानखै रै साथै न्याय होवतां नौं देखनै कवियां रा मन घणा कळपता। वै साची बात कैवण में पाछ नौं राखी। ऊमरदान लाळस खंडन परंपरा री सरुआत करतां सामाजिक बुरायां रौ जिकौं खुलासौ करै, वौ राजस्थानी काव्य पेटै उण बगत में साव नूंवौ दीसै। नसा-मुगती रै वास्तै कवि रा जतन औळा नौं जावै, इण वास्तै वौ भांत-भांत सूं मानखै नैं उबारण खातर थुड़ै। समाज रौ पतन होवतां कवि कीकर देख सकै। आज रा मोट्यारां वास्तै औं पाठ महताऊ है। जनता नैं उणरा अधिकार मिळै, न्याय मिळै, भासा रै साथै अन्याय अर उणरै आधमान में जिकी पीड़ कवि रै हियै में है वा हरेक भासा-भासी रै हिरदै री पीड़ होवणी चाईजै। आपरी भासा नैं मान मिळै, पिछाण मिळै, इण वास्तै 'मरण-पंथ रा पंथी' बण त्याग, समरपण करण री जरुरत है।

रेवतदान चारण री कविता 'लिछ्मी' करसै अर मजूर री हिमायत करै अर अंत में उणां री सावचेती अर जागरण री बात ई कवि कर देवै। अधिकार कोई देवै कोनी, उणरै खोसनै लेवणौ पड़ै। इणीज भाव री आ रचना सोसित-वरग अर सोसक-वरग रै बिचाळै ऊभी लिछ्मीरूपी अधिकार संपदा जनमानस नैं सूंपण री कविता है।

समाज में आपरी जीवाजून नैं जींवता, जीवन रूपी मांचै री बदाण नैं ताणण वाल्यां री संख्या घणी है। जीवण रा अभाव, समाज री विसंगतियां बदलती वैचारिक मान्यतावां नैं साम्हूं राखै— ज्योतिपुंज री रचनावां। आधुनिक कविता में रूपगत, सिल्पगत नूंवा प्रयोग आप कर्ह्या है। बोलण अर लिखण सारू भासा अेक ठोस माध्यम है। जद भासा ई नौं होवैला तौं सोचौं कै आपां रौ कांई आपौ रैवैला। आज तौं गूंगा-बोल्यां रै कनै ई भासा है, जिणसूं वै आपरा विचार राख सकै। आपां साजा-ताजा होवता थकां ई बिना भासा नैं अंगोजिया गूंगा हां अर उणरी (भासा री) पीड़ नैं बिना सुण्यां बोल्या हां। औड़ी बातां कवि अर साहित्यकार ई समझ सकै। चंद्रप्रकाश देवल री कवितावां 'भासा सूं अरदास' अर 'ओळबौ' भासा री इणीज पीड़ नैं प्रगटावै।

साहित्यकारां रै लेखन-कला री बात करतां बार लागै, राजस्थान री इण माटी अर माटी रा जायोड़ा रचनाकारां री खिमता नैं घणा रंग।

-डॉ. (श्रीमती) प्रकाश अमरावत

□ वात

राणी चौबोली री वात

पाठ परिचय

राजस्थानी लोककथावां (बातां) मायं ‘राणी चौबोली री वात’ घणी गीरबैजोग है। इणमें लोकतत्वां री भरमार है। कथानक रूढ़ियां— जीव-जंतुवां री बोली समझाँौ, मोसा बोलणौ, रूप बदल्णौ, जादू री लकड़ी, राजकंवरी रौ फूलां सूं तुलणौ इत्याद रौ सांतरौ संयोजन इण वात में होयौ है। आ ‘वात’ साहित्य अकादेमी, नई दिल्ली सूं मनोहर शर्मा अर श्रीलाल नथमल जोशी रै संपादन में छपी पोथी ‘राजस्थानी वात-संग्रह’ सूं लिरीजी है।

कथासार

उज्जैण नगरी रौ राजा भोज जीव-जंतुवां री बोली समझै, पण उणनैं किणी नैं बतायां उणरी मौत होय सकै। अेक दिन जीमती वेवा उणरी थाळी सूं अेक कीड़ी चावल रौ दाणौ लेयनै चालै। मारग में दूजी कीड़ी उणसूं कैवै कै म्हरै पांवणा आयोड़ा है, सो औं चावल रौ दाणौ म्हनैं देय दै। कीड़ियां री बंतल सुणनै राजा भोज नैं हंसी आवै, तद उणरी राणी भानुमती हंसी रै कारण जाणण सारू हठ पकड़ै। राजा उणनै लेयनै गंगा रै कांठे सिंहकर स्हैर में डेरै देवै, जठै अेक बकरी-बकरै री बंतल सुणनै उणरै मत बदल जावै। राणी रौ मोसौ सुणनै वौ चौबोली सूं ब्यांव करण री तेवडै, जिणरै हठ होवै कै उणनैं जकौ च्यार बार बोलासी उणरै सागै ई वा ब्यांव करसी। राजा भोज औं बीड़ै उठावै पण मारग में अेक राखसणी रै चंगुल में फंस जावै। वौ आपरा करामाती भायलां—आगीयौ बैताल, कवडीयौ जुवारी, खापरौ चोर अर माणकदे मदवांण नैं याद करै। औं च्यारूं भोज नैं राखसणी री कैद सूं छुडावै अर सगळा माखी बणनै राणी चौबोली रै ढोलीयै माथै कवडीयौ जुवारी, झारी माथै माणकदे मदवांण, दीवै माथै आगीयौ बैताल अर राणी रै हार माथै खापरौ चोर जाय बैठै। पछै राजा भोज पैलै पौर में ढोलीयै नैं, दूजै पौर में झारी नैं, तीजै पौर में दीवै नैं अर चौथै पौर में हार नैं हुंकारै भरावतां थकां कथावां कैवै अर वांसूं जुङ्या सवाल पूछै, पण उणरा भायला गलत पट्टर देवै, जिणसूं रीसां बळनै चौबोली सही जबाब देवती थकी च्यार बार बोल जावै। राजा रा भायला बराती बणै अर राजा भोज चौबोली नैं परणीज जावै। महल में पूग्यां पछै भानुमती वांरै आरतौ उतारै।

राणी चौबोली री वात

उजेण नगरी, राजा भोज राज्य करै। नव वारी नगरी। चौरासी चौहटा, छतीस पोळी। च्यार धरण रहै। छतीस पवन जाति लोक बसै। कोड़ीधज व्यापारी रहै। घटदरसणी रहै। तिण नगरी रै विषै राजा भोज राज्य करै। छतीस राजकुळी राजा री सेवा करै। तिण राजा रै च्यारि मित्र। आगीयौ वेताल। कवडीयौ जुवारी। माणिकदे मदवांण। खापरौ चोर। सु राजा भोज रै घरे आया। घणा कायदा किया। अनेक भाँति री भक्ति हुई। घणा सनमान दे नै कह्हौ—पनरहवीं विद्या मोनुं जिण भांत आवै, तिम करै। ताहरां च्यारां ही कह्हौ—जु बाराही देवी रै जाइ नै पूजा आहवांन करि देवी आराहिस्यां। पिण हेक थोक माहाराज करणो छै। पण राणीजी अर थां गाढो सुख छै। कोई बात पूछै तो नटो मतां। अर नटो तो कहो मतां। अरु बात नटि ने कहीसौ तो थांरो मरण हुसी।

राजा कह्हौ—म्हे क्यां ही नुं कहिस्यां? एक दिन राजा आरोगतो हुतो और राणी जी माख्यां उङ्गावता हुता। गछगरी रौ आंगणौ थौ, तितरै एक कीड़ी चावल ले हाली हुती, तितरै बीजी आइ खोसण नुं झूंबी। ताहरां कीड़ी

बोली—मो आगा कासूं खोसै ? ऐ चावळ राजा भोज री थाली माहे घणा ही पड़िया छै । तूं ओर ले जाह । ताहरां कीड़ी कह्यौ—म्हरे पाहूणा आया छै, ले जावण दे मोनुं । इसी बात सांभळि नै राजा भोज हंसीयौ । राजा जीवभाषा सरब जाणतौ । ताहरां राणी पूछीयौ—जु महाराज, कुण वासते हंसीया । राजा नटीयौ । राणी बहुत गाढ करि पूछण लागा, जु महाराज, मोनुं हंसीया रै विरतं कहीजै । राजा मन में विचारीयो—नटीयो तो कहण रौ मैं नहीं । कहीजै तो मरण हुवै । राणी दांतं फाड़े नहीं । ताहरां राजा कह्यौ—बात गंगा जी रै तट कहीजसी । राजा चालीयो ।

गंगाजी रै कांठे सिंहकर सहर हुतौ । बाहिर जाइ उतरीया । उवां सूं कोस पांचै एकै नदी रै कांठे जंगल मांहे डेरा हुया । नदी री हवा देख अर जंगल पधारीया । एकांत पधारीया, आगै एक कूवौ छै । कूवै माहे काचरां री बेल बहुत फळी छै । कूवै कांठे एवड़ चैरे छै । एक छाली बाकरै नुं कहै छै—कूवै माहि काचर ले दै तो तोनुं वरूं । ताहरां बाकरो बोलीयौ—म्हारी अकल राजा भोज भिळी नहीं छै । बायर रै कहीयै मरण नुं जाइ छै । सिर साबत तौ व्याह घणां । तिका बात सांभळि नै राजा—विचारीयौ, जु हूं चौदह विद्या रौ निधान, सु म्हारी मति बाकरै कही । राजा पाढ़ी डेरे आयौ । राणी आय हजूर बैठी छै । राणी कहै—रावळे गंगा री जाति काइ करणी छै नहीं । रावळे विमाह करणी छै । राजा कहै—“राणीजी, म्हारै विमाह कोई करणी छै नहीं ।” “महाराज विमाह अवस्य करिस्यौ । वीमाह करौ तो चौबोली परणीजिस्यो । ज्यूं हुं ई जाणे सोक आई ।” राजा जाणीयौ, राणी म्हारै कयै नहीं । ताहरां घोड़े मंगाई, तोसदान मुहरां भरि, सूतै कटक एकलौ चढिं खड़ीयौ । जावतां-जावतां देखे तो कासूं एक पाहाड़ मांहे राखस राखसणी रै गोडै माथौ दे सूतौ छै ।

तेल रौ कडाहो उकळै छै । अगर रा लाकड़ हेठे धुखै छै, राजा अगर री वास सुं मन में विचारीयौ—जे एथ कोई हस्तबंध राजा छै, कै पवनबंध योगी छै । तेरे अगर बळै छै । राजा भोज अगर री वास सुं उथ आयौ । राखसणी राजा नुं देखिनै साड़ी रौ पल्लो फेरियौ । समस्या कीवी, तूं एथ क्यूं आयौ । तोनुं राखस खासी । राखसणी सोवनमाखी राजा नुं करि नै जटा माहे राखीयौ । राजा च्यारे ही धरम भाई समरीया—आगीयौ, कवडीयौ, खापरौ, माणिकदे । धरम-भाई च्यारे ही कह्यौ हुतो, राजा तोनुं काई दोहरी वरीयां हुवै, तेथ म्हानुं समरे । आइ हाजिर हुस्यां । राजा राखसणी री जटा माहे विमासै छै । म्हारी अकल चूक, जु गंगाजी रै कंठ मरण हुवै हंत तौ मुगति जावंत । तेथि न गयौ । हिवै म्हारा धरम-भाई हुता, तांहनुं समरीस ज्युं मखी हुवौ नीसरीस । सु उवै च्यारे ही वीर काई पातिसाह री चोरी गया हंता ।

सु घणौ ही माल ल्याया हुता, सु वाराही देवी री पूजा करै छै । ताहरां उवां जाणीयौ—राजा सांकड़े पड़ीयौ । म्हानुं समरै छै । ताहरां घोड़े चढि अर खड़ीया । राखस हुतौ, तेथ आया छै । ताहरां आपस माहे विचार मांडीयौ—आपां कासूं करिस्यां ? ताहरां खापरौ बोलीयौ, मो कन्हे उपाव भलो छै । वेश्या री कोपरी में काजळ पाड़ीयौ छै, तिकौ काजळ इण में घातिस्यां । नाख्यौ । घाततां ही मूरळा गति हूवौ । ताहरां राखसणी रै माथै में सोवनमाखी रै रूप राजा हुतौ, सु काढि उरहौ लीयौ । ताहरां राजा नुं पूछीयौ—जु थां कासूं विचार कियो ? म्हां तो थानुं कह्यौ हूतौ । ताहरां राजा कहै—आ बात परमेश्वर री चाही हुई । राणी म्हानुं बोलीया—जु चौबोली परणीया । सु परणी चाहीजै । ताहरां उवै कहै, राजा चौबोली री बात महा कठिन छै । पिण थारै भाग बडौ छै, सु उपाय सखरै करिस्यां । ताहरां भेवा हुइ नै पैंडै चालीया छै । धरती लोपि अर चौबोली रै सहर पधारीया छै ।

माळी रै घरै सखरी जाइगा बागीचा माहे डेरौ लीयौ । मालिण नुं मोहर दीधी । जीमण करायौ । डेरै सर्व जाबतो कीधो । तद मालण नुं पूछै छै—चौबोली नुं बोलावण आवै छै सु किसी भांत बोलावै छै । जे राति चौबोली न बोले तो परभात हुवै आगां पाणी ढोवावै छै । तै सारु थेह विचारि जाइ बैसिया । तै ऊपर राजा भोज, आगीयौ बैताल, कवडीयौ जुवारी, खापरौ चोर, माणिकदे मदवांण पांचै ही बैसि विचार कीयौ—आपां किस्यां भांति बोलाविस्यां ? सु कूड़ सूहाइसी नहीं । ताहरां च्यारे ही बोलीया—तूं तो राजा जाइसी तारै बैसीस, ताहरां म्हारौ जोर कोई चालिसी नहीं । पिण म्हे छां वीर, काया भांज करि विहू ठिकाणौ जाइ बैसिस्यां । ताहरां थे बाति कहि नै म्हानुं पूछीया । म्हे कूड़

बोलिस्यां। ताहरां राणी बोलसी। ताहरां खापरौ चोर हार में आइ बैठो। कवडीयौ जुवारी ढोलीयै में जाइ बैठो। माणिकदे मदवांण झारी ऊपर जाइ बैठो। आगीयौ बैताल दीवै जाइ बैठो। ए च्यारे वीर माखी रौ रूप करि चिहुं ठिकाणै जाइ बैठा।

राजा भोज जाइ दरबार उभौ रह्यौ। ताहरां आगै दरबार माहें ठाकुर उमराव ऊभा हुता, सु राजा नूं पूछुण लागा—राजा, चौबोली नु बोलाविस्यौ? राजा बोल्यौ, मनछा छै, बोलाविस्यां। ताहरां उवे ठाकुर बोलीया, अगला राजा बारह बरस हुवा पाणी भरतां। जे राति न बोली तौ परभाति थे ई उवां भेळा हुस्यौ। पिण एकर सों इयांनुं बोलाविस्यां। ताहरां माहि गिलमां बिछायां। ऊपर चादरा बिछाया। ताहरां राजा नुं ले गया। आडी पीछतांणी हुती नै बाहिर राजा नुं बैसारीयौ। भीतर राणी चौबोली बैठी छै। बीजो लोक दासी खवास सरब बहुड़ाया। राजा अरु राणी बीच प्रीछ दियां महलां माहे बैठा छै। च्यारे वीर चहुं ठिकाणै माखी रूप बैठा छै।

इम करतां राजा भोज बोलीयौ, जु महल री धणियाणी बोलै नहीं, च्यार पहर राति किसी भाँति वितीत हुसी। तै ऊपर कबडीयौ जुवारी ढोलीयै ऊपर माखी रूप बैठो हुतौ, सु बोलीयौ—हे राजा, सुणि। पहिलौ तौ पहाड़ में काठ हुतौ, सु सकाइ नै सुथार ढोलीयौ घड़ीयौ। आठे ठोडे बांधीयो। नवार सु बणीयो। ऊपरि साढा तीन मण री देही चौबोली तपस्या करै। बात तौ कहि सगुं नहीं। जे तुं बात कहै तौ हुंकारौ द्युं। राजा कहे, साबास रे ढोलीया, साबास। हुंकारो देवे तौ तो सारीखौ कासूं छै? ताहरां राजा भोज बात कहै छै।

अेक हुतौ ब्राह्मण रौ बेटो। एक हुतौ सिलावटे रौ बेटो। अेक हुतौ सूजी रौ बेटो। एक हुतौ सुनार रौ बेटो। यां चारे ही मित्राचारौ थौ। सु भेळा हुइ देसावर नुं हालीया। जावतां-जावतां एकै उद्यान वन विषे आथुण हुवौ। ताहरां चारे बोलीया—रोही रौ समीयौ छै। पुहरै-पूढ़ी सावचेत रहणौ। पहले पहर सिलावटे रौ बेटो बैठो। ताहरां सिलावटे मन में विचारीयो, निकमां नुं राति कटै नहीं। कोई आवध कीजै। तद एक पथर दीठो।

ताहरां पूतवी निकूंती। तितरै पहर वितीत हुवौ। ताहरां सूजी नुं जगायौ। ताहरां सूजी पूतवी देखि विचारीयौ—साथी घड़ी। ताहरां सूजी कपड़ा सीवि पहिराया। इतरै दोइ पहर वितीत हुवा। ताहरां सोनी नुं जगायौ। सोनी पूतवी देखि अर गहणां घड़ि पहिराया। तितरै तीजौ पैहर वितीत हुवौ। ताहरां ब्राह्मण नुं जगायौ। ब्राह्मण पूतवी देखि नै मन में विचारीयौ, आगलै साथीये पूतवी तैयार कीवी। हिवै श्री परमेश्वर रौ भजन करूं, ज्युं जीव पड़ै। ताहरां पूतवी फिरण लागी। तद उवै च्यारे ही विरड़ीया। ऊ कहै, म्हारी बाइर, ऊ कहै, म्हारी बाइर। ढोलीया, उवा कैरी बाइर? ताहरां ढोलीयौ बोलीयौ—कपड़ा पहिराया तैरी बाइर। ताहरां राणी चौबोली ढोलीयै नुं लात बाही। ढोलीयौ चूर-चूर हुवौ। ताहरां कहै—क्युं रे कुकाठ कपूत? कपड़ा तउ बेटी नुं बाप पहिरावै। गहणां पहिराया तैरी बाइर। ताहरां बडा नीसाण पड़ीया। तां उपरि राजा भोज एक डंकौ दीयौ। ताहरां चौबोली रा मावीत सहर लोक सर्व खुसी हुवा।

आज कोई राजा बैठौ थौ, सु हेक बरीयां बोलाई। इतरै एक पहर वितीत हुवौ। हिवै बीजै पहर रै अमल माहे राजा भोज बोलीयौ—तीन पहर रात महल री धणीयाणी बोलै नहीं, राति किसी भाँति वितीत हुसी? ताहरां माणिकदे मदवांण झारी में बैठो हंतो, सु बोलीयौ—राजा सुणि, हूं झारी घड़ी अर पाणी सुं भरी हुं। किसी भाँति बोलूं। बात कहीस तो हुंकारौ द्युं। हुंकारो देवे तौ तो सारीखौ बीजौ कोई नहीं। ताहरां झारी हुंकारौ दै छै। राजा बात कहै छै।

एक हुतौ ब्राह्मण। तैरे बेटी बडकुमार हुती। भलावण च्यार ठोडे घाती हुती। च्यारै ही ठोड़े सगाई करि एक साहौ थापि दीयौ। च्यारै ही जानां आइ उतरीयां। ब्राह्मण नुं विचार उपनौ। बेटी एक, नै जानां च्यारि आयां। हिवै कासूं कीजसी? ताहरां बेटी बोली—बाप चिंता मति करौ। हूं म्हारी आपै निवेड़ीस। ताहरां ब्राह्मण चिहुं नुं सीधा पाणी दीया। कह्यौ—केसरीया बागा करि नै तोरण आवौ। गाडा च्यारि चंदण मंगाइ अरु आरोगी बणाई नै माहे ब्राह्मण री बेटी जाइ बैठी।

ऐ च्यारै बींद तोरण आय ऊभा रह्या। ताहरां ब्राह्मणी बोली—मौ सुं हथलेवौ जोड़े सु आवौ। ताहरां एक बींद घोड़े हुं उतरि हथलेवो जोड़ि बैठो। बीजा ऊभा हीज रह्या। ताहरां उवां नुं अगनि लगाय दीवी। ताहरां बींद उतरि नै

चाल्या अर फकीर हुवा। जानां आपरे घरे गयां। ताहरां एक तौ श्री गंगाजी फूल ले गयौ। बीजौ देसावर चलतौ रह्यौ। तीजौ मसाण सेवण बैठौ। जिकौ देसावर नुं उतरीयौ, सु एके गरढै अतीत रै चेलौ हुवौ। ताहरां खंथा मेखळी घालि अरु भिख्या मांगि लावै। मेखळी माहै एक लाकड़ी, सु मंगरा लागै। ताहरां गुरु नुं कह्यौ—मेखळी बीच लकड़ी है, सु डाल देवां। ताहरां गुरु बोलीयौ, लकड़ी बहुत गुणं री है, डालण री नहीं। ताहरां कह्यौ—बाबाजी, लाकड़ी माहै गुण जो कहौ तौ रखां, नहीं तौ डाल देवां। कह्यौ, तौ इस लकड़ी को गुण है जो जू आदमी की हाड़ी कूं लगाइ तौ आदमी मूवौ जीवै। ताहरां एक समझ्यै लाकड़ी ले चलतौ हुवौ! मासे ३-४ समसाण आयौ। गंगा फूल परवाहण गयौ हुतौ, सु ई आयौ। उवै लकड़ी आणि मसाण सुं लगाइ।

सू बेत उठि बैठा हुवा। ताहरां चिहुं आप बीच झगड़ै हुवौ। ऊ कहै—म्हारी बाइर। ऊ कहै म्हारी बाइर। ताहरां झारी बोली—मसाण सेवीयौ, तैरी बाइर। ताहरां चौबोली रीस करि अर चमकि झारी फोड़ी अर कहण लागी—तैरी बाइर, जो साथ बल्यौ। ताहरां राजा नीसांण घाव दीयौ। दोइ वेळा चौबोली बोली। राति पहर दोइ वितीत हुई! हिवै तीजी बात कहै छै। हिवै तीजै पहर रै अमल राजा बोलीयौ। दोइ पहर रात रहै छै। महल री धणीयांणी बोलै नहीं। राति किसी भांति वितीत हुवै? ताहरां दीवै ऊपरां आगीयौ बैताल बोलीयौ—पहिलै लोह रौ घड़ीयौ दीवौ। माहि घातीयौ तेल। रुई री बाती जगाई। बोल सकूं नहीं। वात कहै तौ हूंकारौ ढूं। साबास रै साबास दीवा! हुंकारौ दै तौ साबास छै। ताहरां राजा भोज कहै छै।

एक हुंती राजा री कुंवरी, एक हुतो मुहतै रौ बेटो। एक हुतौ ब्राह्मण रौ बेटो। मुहतै रौ बेटो पढि विद्वान हूवौ। ब्राह्मण रौ बेटो मूरख रह्यो। ताहरां सर्ब लेसालीया ब्राह्मण नुं मूरिखो बोलावै। ताहरां राजा री बेटी नै मुहतै रै बेटै मतौ कीयौ—तुं मोनै ले नीसरै तौ हूं थारै साथै हालूं।

ताहरां मुहतै रै बेटै कह्यौ—हुं घरे जाइ तैयार हुइ आऊं छूं। कुंवरी नै कह्यौ—थे राजा रै पाइगह रा घोड़ा २ जय-विजय नाम छै, सु ले मरदानौ बागौ पहर खरची लेनै बाग में आयो। मूरिखै नुं मेल्हि समस्या कराविज्यौ। जिम म्हे पिण खरच लै आवां। ताहरां राजा री कुंवरी महल में गई। जाइ आगला कपड़ा उतारि, मरदानगी कपड़ा पहिर, मुंहरां सुं तोसदान भर, छोकरी १ ले नै पाइगह गई। पाइगह जाइ राति रै समझ्यै जय-विजय घोड़ा छोडाया। घोड़े चढि बाग में आया। ताहरां कुंवरी मुरखै नुं मेल्हीयौ—‘जु मुहतै रे बेटै नुं कहै, ज्युं वेगो आवै। ताहरां मुरखो दौड़तौ आवतौ, देवी सारदा साम्ही आई। ताहरां पूछीयौ—तूं कुण छै? ताहरां कह्यौ—हुं देवी सारदा ढूं। ताहरां मूरखो भाठो ले सिर फोड़ण लाग्यौ। हुं बामण रौ बेटो अर मूरख! का विद्या दे, का लोही बांटीस। ताहरां सारदा बोली—मुंह मांडि। ताहरां मुंहडै मांहि राख मेली। ताहरां मूरिखै नुं तीन लोक सूझण लागा।

मूरखौ पाधरो मुंहतै कन्है गयौ। मुंहतै नुं कह्यौ सारो ज कीयो। मूरखै नुं कपडा पहराय, हथीयार बंधाय, तोसदान मुंहरा दे मुंहतै कह्यौ—तुं ले जाह। मूरखौ राजा री कुंवरी कहै आयौ। कुंवरी जांणीयो—मुंहतै रौ बेटौ आयौ। हेकै घोड़े मूरिखौ चढियौ। हेकै घोड़े कुंवरी चढी। चढि खड़ीया। जावतां-जावतां प्रभाति हुवौ। ताहरां कुंवरी बोली—मुंहता रा बेटा, राति च्यार पहर मारिग चालीया, पिण बोलीया काहे नहीं, सु किसी सचिंताई? ताहरां मूरिखौ बोलीयौ—हुं मूरिख छूं। मुंहतै रौ बेटौ मुंहतै राखीयौ। ताहरां राजा री कुंवरी सचींत हुई। जो पाढा जाईजै तौ ठौड़ नहीं। हिवै मूरख गति। ताहरां मूरखौ बोलीयौ—जो देवी सारदा मोनुं वर दीयौ, हिवै हूं मूरिख नहीं। सचींत मतां हुवौ। इम करतां एके सहर जाइ ठिकाणौ ले नै जाइ उतरीया। मासे २-३ तिहां रह्या। तितरै सहर विखै एक तळाव खणीजतौ थौ, तिण में कीरतथम नीसरियौ। तिण ऊपर एक नामौं, सु किण ही बचै नहीं। एके दिन मूरिखौ जाइ निसरीयौ, सु मूरिखै नामो बांचीयौ। तै नीचे सवा कोड़ वित बतायौ। ताहरां राजा खुणाय वित कढायौ।

ताहरां मूरिखै रौ नाम रतन-पारखू दीयौ। रतन परखावण लोक आवै। खोटै-खरै री खबरि करि दे। ताहरां कुंवरी कही सिद्ध आगा इसी राखड़ी कराई, जे बांधीजै तौ आदमी सूवो हुवै। एक समै सूवटौ करि बैसारीयौ हुतौ, सु ख्याल करतां उडीयौ। जाइ सहर रै राजा री कुंवरी पंचकळी नै मिल्यौ। चंपे री कळी सुं तुलती। तेरौ नाम पंचकळी कहावती। तैरै मौहल जाइ बैठो। पंचकळी पकड़ि लीयौ। अर ख्याल करतां देखै तौ राखड़ी छै। छोडै तो मनिख

हूवौ। राति मनिख करै। दिनै सूवटौ करै। इम करतां उवै सुं चूकी। सू मालण फूल ल्याई झुसै—सु जुखै नहीं। मालण जाय राजा सुं वीनती की। कुंवरी फूलां सुं बंधी सु कुं...। ताहरां राजा नगर-नाइका तेड़ी। तूं कुंवरी रै महल में निगह कर। ताहरां नगर-नाइका ‘चोर-चोर’ कर पुकारी। ताहरां राजलोक सही दौड़ीया। ताहरां मूरिखौ राजा री कुंवरी रै मेहल हेठे साह री घर हुतौ, तै माहें कूद पड़ीयौ। साह नुं कह्हौ—हूं राजा री चोर हूं, उबारै। साहूकार रै बड़कुमार बेटी सूती छी। तै भेळौ सुवाणीयौ। राजा रा आदमी आई फिर गया।

चोर नास गयौ। प्रभाति साह री बेटी कहै—च्यारि पहर इण भेव्ही सूयी। मोनुं औं हीज परणाइ। ताहरां साह औं हीज परणायौ। एक दिन मूरखौ बाजार गयौ हुतौ। ताहरां पहिल की कुंवरी री छोकरी उल्खीयौ। ताहरां उवा कुंवरी पिण उथ आई। पंचकली पिण आइ भेळी हुई। ताहरां तीने कहै—उवा कहै म्हरौ भरतार। उवा कहै, म्हरौ भरतार। काहे दीवा! वो कैरो भरतार? ताहरां दीवौ कहै—जिका ले नीसरी, तीयै रौ भरतार। ताहरां चौबोली रीस करि दीवो फोड़ि दीयौ। अर कहै, मांटी जीयै रौ जीयै मारीजतौ राखीयौ। साह री बेटी रौ भरतार। ताहरां वळे राजा भोज निसाण घाव दीयौ। तीन फेरा चौबोली बोली। तीन पहर वितीत हुवा।

चौथे पहर रै अमल राजा बोलीयौ, पाछिली राति अर महल री धणियांणी बोलै नहीं। राति किण भाँति वितीत हुवै? ताहरां खापरौ चोर हार में बैठौ हुतो, सु बोलीयौ। सुणि ही राजा भोज, चौबोली रा भरतार। हार इसौ कह्हौ, ताहरां चौबोली रीस करि सवा कोड़ रौ हार हुतौ, सु तोड़ियौ। तोड़ि नै बोली—क्युं रे बेसरम! राजा भोज चौबोली कद परणी हुती? ताहरां राजा भोज नीसाणौ घाव दीयौ।

ताहरां धाय बडारण खवासां सहेल्यां चौबोली आगै आइ उभ्यां रह्यां। थारौ बडो भाग, जु थारो नेम ही रह्यो अर राजा भोज भरतार पायो। ताहरां चौबोली कहै—मोनुं रीस सूं बोलाई। ताहरां बडारण समझाइ अर कह्हौ—थारै भाग में हुतो सु वर आयो। ताहरां राजा रै विवाह री साजत हुई। ताहरां च्यारे वीर जानी हुवा। राजा भोज आइ तोरण ढूकौ। आला-नीला कल्स करि राजा भोज चौबोली परणीयौ। सवांरे राजा जितरा पाणी भरता, सरब छोड़ीया। जावौ, आपरै देस बसावौ। हाथी घोड़ा सिजवाला छोकर्यां घणौ दाइजौ दे अर हलाया। राजा भोज राणी चौबोली नुं ले अर घरै आयौ। घणौ उछाह कर राणी भानमती बधाया। बोल बोलीया हुता, सु राणी भानमती पासै राणी चौबोली आंणी बैसाणी।

⌘⌘

अबखा सबदां रा अरथ

नीसरी=निकली। उल्खीयौ=पिछाण्यौ। कैरो=किणरौ। मांटी=मोट्यार, भरतार। जीयै रौ=उणरौ। फेरा=बार, दफै। परणी=ब्याही। विमाह=ब्यांव। तिम=बियां, जियां। एवड=रेवड़। छाल्ली=बकरी। गरढे=बूढ़े। बडारण=प्रमुख दासी, बांदी। मसाण=समसाण, भोमका। आरोगी=चिता। बीजौ=दूजौ। मूवौ जीवै=मर्योड़ौ जी जावै। राखड़ी=डोरै, ताबीज। रोही=जंगल। सिलावट=सिल्पी, मूरतीकार, भाठां रौ कारीगर। सूजी=दरजी। खवास=नाई, नेवगी। खंथा मेखल्ली=चोल्लौ झोल्ली।

सवाल

विकल्पाऊ पडूत्तर वाळा सवाल

1. उजेण नगरी में कित्ती पवन जाति रा लोग बसै?
- | | |
|------------|------------|
| (अ) छत्तीस | (ब) बत्तीस |
| (स) तीस | (द) चौतीस |

()

2. राजा भोज किण नगरी रौ राजा हो ?

- | | |
|-------------|----------|
| (अ) द्वारका | (ब) धारा |
| (स) अमरावती | (द) उजेण |

()

3. राखसणी राजा भोज नैं काँई बणायनै आपरी जटा में लुकोय लेवै ?

- | | |
|---------|----------|
| (अ) लीख | (ब) माखी |
| (स) जूं | (द) माछर |

()

4. राणी चौबोली टाळ भोज री दूजी राणी रौ काँई नांव हो ?

- | | |
|-------------|-------------|
| (अ) कलावती | (ब) मधुमती |
| (स) तारामती | (द) भानुमती |

()

साव छोटा पडूतर वाला सवाल

1. राजा भोज रा करामाती भायलां रा नांव बतावौ।

2. राणी चौबोली री बात में अेक कीड़ी दूजी सूं काँई कैवै ?

3. पैली कथा पूरी हुयां राणी चौबोली पूतली री भरतार किणनैं बतावै ?

4. मूरख नैं बुद्धि देवण सारू मारग में कुण मिलै ?

छोटा पडूतर वाला सवाल

1. राजा भोज रा करामाती भायला किण-किण कला में पारंगत हा ?

2. चौथी कथा सरू कस्यां पैली ई राणी चौबोली क्यूं बोली ?

3. दूजी कथा में ब्राह्मण री बेटी परणीजण नै कित्ती बरातां आई अर बेटी आपरै बाप नैं काँई कैयौ ?

4. राणी चौबोली रै म्हैल में राजा भोज रा च्यारूं भायला किण रूप में कठै-कठै बैठ्या ?

लेखरूप पडूतर वाला सवाल

1. 'राणी चौबोली री वात' रौ कथासार आपरै सबदां में लिखौ।

2. 'राणी चौबोली री वात' में आयोड़ी कथानक रुदियां रौ खुलासौ करौ।

3. राजस्थानी गद्य-साहित्य रै विगसाव में 'राणी चौबोली री वात' री भासा-सैली री दीठ सूं कूंत करौ।

नीचै दिरीज्या गद्यांसां री प्रसंग समेत व्याख्या करौ।

1. तिण नगरी रै विषै राजा भोज राज्य करै। छतीस राजकुली राजा री सेवा करै। तिण राजा रै च्यारि मित्र। आगीयौ वेताल। कवडियौ जुवारी। माणिकदे मदवां। खापरौ चोर। सु राजा भोज रै घरे आया। घणा कायदा किया। अनेक भाँति री भक्ति हुई। घणा सनमान दे नै कह्यौ—पनरहर्वी विद्या मोनुं जिण भांत आवै, तिम करौ।

2. ताहरां खापरौ चोर हार में बैठौ हुतो, सु बोलीयौ। सुणि ही राजा भोज, चौबोली रा भरतार। हार इसौ कह्यौ, ताहरां चौबोली रीस करि सवा कोड़ रौ हार हुतौ, सु तोडियौ। तोड़ि नै बोली—क्युं रे बेसरम ! राजा भोज चौबोली कद परणी हुती ? ताहरां राजा भोज नीसाणौ घाव दीयौ।

□ वचनिका

अचलदास खीची री वचनिका

शिवदास गाडण

वचनिकाकार परिचै

शिवदास गाडण रौ जलम 14वीं सदी रै उत्तराद में होयौ। सिवदास गाडण साखा रा चारण हा। गागरोन गढ़ (झालावाड़) रा राजा अचलदास खीची रा आप राजकवि हा। लेखक री दूजी रचनावां अर जीवण परिचै शोध रौ विसय है। शिवदास गाडण आदिकाळ अर मध्यकाळ रै संधिकाळ रौ रचनाकार है। चारणी साहित्य मुजब वीर रस रौ घणौ उम्दा वरणन इण वचनिका में कस्तौ है। रचनाकार उण जुग री सांस्कृतिक, सामाजिक अर राजनीतिक परिस्थितियां रौ आछौ जाणकार है। वचनिका रौ इण पाठ में लिरीज्यौ अंस इण बात री साख भरै। शिवदास अचलदास सागै बरोबर जुद्ध में मौजूद रैयौ पण घणौ विनय करण रै बाद पालहणसी सागै भावी नीति सारू जुद्ध सूं बहीर होयौ। आ रचना आंख्यां देखी विगत है। अचलदास खीची नैं अमर करण सारू शिवदास गाडण इण वचनिका री रचना करी। चंपू काव्य-सैली नैं अंगेजता थकां मौलिकता सागै इण वचनिका में तुकांत गद्य सागै पद्य रौ निभाव इण रचना में है। वचनिका सैली री रचनावां में अचलदास खीची री वचनिका भाव, भासा, अभिव्यंजना अर मौलिकता रै पाण राजस्थानी साहित्य में ‘मील रौ पत्थर’ मानीजै।

पाठ परिचै

अचलदास खीची री वचनिका राजस्थानी री मध्यकालीन गद्य विधावां में हरावळ री रचना मानीजै, जिणमें अचलदास खीची रै अचल, अनमी, स्वतंत्रताप्रेम, आन-बान अर राजपूती शान लारै मरण नैं मंगळ गिणण रै सुभाव रौ वरणन है। स्वाभिमान, स्वतंत्रता अर धरम नैं राखण सारू आपरा प्राण न्यौछावर करण री ‘शाका रीत’ रौ सांगोपांग वरणन इणमें होयौ है। गागरोन गढ़ (झालावाड़) रा धणी अचलदास खीची अर मांदू (माळ्वै) रा मांदूपति सुल्तान आलमशाह गौरी (होसंगशाह) रै बिचाळै वि. सं. 1485 में होयोड़े जुद्ध रौ ओजस्वी वरणन है। होसंगशाह री गुलामी री सरत स्वीकार नीं करण रै कारण अलचदास माथै चर्दाई करै। दोनां रै बिचाळै घमासाण जुद्ध होवै। धरती, धरम अर स्वतंत्रता सारू अचलदास खीची अदम्य साहस सागै लड़ै। गुलामी नैं धिक्कारता वीरता सागै रणखेत होय जावै। औं जुद्ध फगत अचलदास ही नीं लडै, बल्कै उणरै सागै सगळी कौम री प्रजा भी आहूति देवै। पाठ में आयोड़ा वचनिकां रै अंसां में होसंगशाह री विसाल सेना री जाणकारी मिळै। राजस्थान अर आसै-पासै रै रजवाड़ां रै अनमी राजावां रै वरणन सागै नरसिंहदास जैड़ा वीरां रौ भी कीर्ति वरणन है। शेर अर हाथी रै ताण स्वतंत्रता रौ मोल दरसाईज्यौ है। गद्य रै सागै पद्य रौ प्रयोग ई वचनिका सैली री खास विसेसता है। होसंगशाह री मोटी अर विडराळ सेना देखनै ई अनमी अर अचल अलचदास खीची उण सूं खांडौ लेवण सूं लारै नीं हटै। अचलदास रै सुभाव अर कीरत रौ बखाण करता थकां कवि उणरै अचल सुभाव नैं घणै मान सरावै। औंडा मायड़ रा सपूतां सूं धरती धिन-धिन होयगी।

अचलदास खीची री वचनिका

(1)

इसी परित्या खउदाळम गोरी राजा बारह लख मालवा-रु चक्रवरती । तइ-रइ तेवाणूं लाख मालवा-रा कटक-बंध रु आरंभ-पारंभ गरवातन गडावरउ ।

तइ कटक-बंध माहि तउ कहइ दिखाळउं, महाधर तउ कवण-कवण ?

उसमाखान फतेखान गजनीखान उमरखान हइबतिखान । खान तउ मुगीस सारिखा ।

हिन्दू राजा कवण-कवण ? सकळ ही सक-बंधी, सगळ कळ्या-संपूरण, राजा नरसिंघ सारीखा । तइ नरसिंघदास-का कटक-बंध चालितां सातरि आगलइ दळि पाणी, पाछिलई दळि कादम । तइ कादम-कइ ठाहि खेह उडती जाइ । दूसरउ विकमाईत ।

दूहो

ऐकइ वन्नि वसंतडा, ऐवड अंतर काइ ? ।

सीह कवड्डी नह लहइ, गइवर लक्खि विकाइ ॥

कुंडलियो

गइवर-गळइ गळतिथ्यउ, जहं खंचइ तंह जाइ ।

सीह गळत्थण जइ सहइ, तउ दइ लक्खि विकाइ ॥

तद दइ लक्खि विकाइ, मोल जाणणि मुहंगेरा ।

कड्वा कारणि कथिन कोपि खडंदाळिम केरा ॥

वेढ़ कीध पड़ियार, निहसि कट्टारउ दुहुं करि ।

राइ न ग्रहउ नरसिंघ गळइ गळहथ जउं गइवरि ॥

ते राजा नरसिंघदास सारीखा । बतीस सहस्र साहण रिण-खेति मेल्हि चाल्यउ । मदोनमत हस्ती मेल्हि चाल्मउ । आपण जाइ समंदइ घाल्यउ । समंद जाइ खांडउ पखाल्यउ । अनेक राइ मद-गलित कर मेहल्या ।

ते राजा नरसिंघदास सारीखा । ते राजा नरसिंघदास का कुंवर तउ चांदजी खेमजी सारिखा । मानंगपुरी-का चक्रवरती लखमराव सारिखा । देवीसाह सारिखा । बूदी-का चक्रवरती अवर देवडा हिंदू-राइ । बंदि-छोड, दूसरा मालदे-समरसीह सारिखा ।

देस तउ कउण-कउण ? सतियासी, नमियाड़, जुग मानधाता, आसेरि, दूगउर, सिलारपुर लगई-का-कटिबंध । मझ-देस तउ मांडव, धार, उजीण, सीहउर, खंड-खंड का, नगर-नगर का, खान-मीर-अमराव चतुरंग दळ चाल्या, पातसाह आपुणपठ घाल्या ।

××

इसउ हिंदू राजा उपकंठि कउण छइ, जिकइ मनि पातिसाह-की रीस वसी ? कवण का माथा-तई खिसी कवण हइ दई रूठव । कउण-की माई विवाणी, जू सामउ रहइ अणी-पाणी ? आज तउ सोम-सातळ कान्हड़े नहीं सीहउरि रउलू नहीं । तिलकछपरि गहिल-उत नहीं, सीहउरि रउलू नहीं, हठ-कठ राउ हमीर आथम्यउ ।

अउर पातिसाह हुवा वाभा आभा आलिगेरा, अर भला-भलेरा; त्यां तउ-चउ-रासी दुग लिया था, ऐकइ दिहाड़ि ।

तेणि पातिसाहि आयां सांतरि कुण सहइ ? कुणइ सहिजइ ? कुण-की जुक्ती ! कुण-की प्राप्ती ? कुण-की माइ वियाणी, जू सामउ रहइ अणी-पाणी ?

यउ तउ पातिसाह उतर-दक्षिण-पूरब-पच्छिम कउ जइतवार, इ-का पुरुखारथ-प्रवाड़ा नाहि पार। धन-धन हो राजा अचल्लेसर! थारउ जियउ, जिणि पातिसाह-सउ खांडउ लियउ।

तेणि पातिसाह आयां सांतरि सत छांडइ नहीं, खत्र खांडइ नहीं, दीण न भाखइ, पागार-लंघित न होयइ। ते राजा अजल्लेसर सारिखा अचल नइ अचल्लेस-ही होयइ।

अचल्लेसर तउ किसउ उतर-दक्षिण-पूरब-पच्छिम-कउ भड़-किंवाड़, आइन्यां अजरपाळ, अहंकारि रावण, दूसरउ धारू, तीसरउ सिंघण; छइ दरसण छयावइ पाखंड-कउ अधार। बाल्ड चक्रवरती। धन-धन हो राजा अचल्लेसर। थारउ जिसउ जिणि हइ पातिसाह सउ खांडउ लियउ।

पाठ रौ भाव-अरथ

इण भांत वौ लोक रौ भार उठावणियौ गौरी वंसीय राजा। बारह लाख आय वाल्डौ मालवा खंड रौ चक्रवर्ती राजा है। उणरै तेराणवैं लाख मालवा री सेना रौ दल है। उण सेना दल रौ आरंभ-प्रारंभ बडप्पन है।

उण सेना-दल में जका जोधा है, वारंगौ कैयनै वरणन करूं हूं। मोटा थंभ, वा में कुण-कुण— उसमाखान, फतेखान, गजनीखान, उमरखान, हैवतखान। खान भी मुगसीखान जैड़ा।

हिंदू राजा कुण-कुण? सगळा ही साका-बंध (साकौ करणिया) सगळी कल्वां सूं परिपूरण राजा नरसिंहदास जैड़ा। उण नरसिंहदास री सेना-दल नैं चालतां हरावळ नैं पाणी मिलै तौ लारलै दल्वां नैं कीचड़ अर सैन्य-दल्वां रै चालण सूं धूड़ उडण लागै। इसी विसाल सेना रौ दल है। औ दूजौ विक्रमादित्य हैं।

दोनूं ओक इज वन में बसै पण फेरूं भी इत्तौ अंतर क्यूं है? शेर नैं तौ कोई भी कोडी में भी नीं लेवै, जदकै हाथी लाखां में बिकै।

हाथी रै गळै में गळबंधण होवै। उणनैं जठै खेंचा, बठै जावै। जे सिंघ इण गळबंधण नैं स्वीकार कर लेवै तौ वौ दस लाख में बिकै। उणरौ मोल ऊंचौ है। बादशाह रै आकरै बोल रै कारण रीस करनै पड़िहार (नरसिंहदास) जुद्ध कस्तौ। दोनूं हाथां कटार थामी। पण हाथी रै दाँई गळै में सांकळ घालनै राजा नरसिंहदास नैं नीं पकड़ौ।

उण राजा नरसिंहदास जैड़ा बत्तीस हजार घोड़ा रणखेत में राखनै चाल्या। मदगैला हाथी राखनै चाल्यौ। खुद जायनै (कटन नैं) समदर ताँई पुगा दियौ अर समदर में जायनै खाग नैं धोयी। अनेकूं राजावां रौ मान-मरदन कस्तौ।

वै राजा नरसिंहदास जैड़ा। वै राजा नरसिंहदास रा बेटा चांदजी-खेमजी जैड़ा। मातंगपुरी रा चक्रवर्ती लखमराव जैड़ा। देवीशाह जैड़ा। बृंदी रा चक्रपति अर देवड़ा जैड़ा। हिंदू राजावां नैं बंदीखानै सूं छुडावण वाल्डा। दूजै मालदेव अर समरसिंह जैड़ा।

××

ऐडौ हिन्दू राजा आसै-पासै कुण है, जिणरै मन में बादशाह रै बराबरी री रीस बसै? किणरै माथै सूं बुद्धि निसरी? किण सूं भाग अपूर्ठौ होयौ। किसी मां ऐडौ पूत जण्यौ जकौ साम्हीं छाती मुकाबलै सारू टिकै। आज तौ सातळ, सोम अर कान्हड़े भी धरती माथै कोनी। तिलकछापर में गुहिलोत भी नीं है। सिहोर में रावळ भी नीं है। हठी राजा हमीर भी आथमग्या।

अर बादशाह हुया आला अलिगोरा (पैलै दरजै रा) भल-भलेरा होया। वां तौ चौरासी दुरग लिया हा अर औ सुल्तान तौ दूजौ अलाउद्दीन है, जिकौ ओक ई दिन में चौरासी दुरग लिया हा।

उण बादशाह रै आयां या आवण माथै कुण भार झेलै? अर किणसूं सह्यौ जावै? किणरी युक्ति, किणरी पावती? किणरी मां ऐडौ पूत जण्यौ जिकौ साम्हीं जमै। औ बादशाह उतरादी, दिखणादी, आथूणी अर अगूणी— च्यारूं दिसावां नैं जीतण वाल्डौ है। इणरै पौरुस रौ, गाढ रौ, वीरत्व रा कामां रौ पार नीं है। धिन-धिन है राजा अचलेस्वर थानै जिकौ बादशाह सूं लोहौ लियौ। साम्हीं तलवार दिखाई।

जकौ बादशाह रै आयां उपरांत ई आपरौ सत नीं छोडै। रजपूतपणै नैं खंडित नीं करै। दीन बोल बोलै नीं। दुरग अर परकोटै नैं छोडनै नीं जावै। राजा अचलेस्वर जैड़ा अचल मिनख ही अचलसिंह ई होय सकै है।

अचलेस्वर भी किसौ जकौ उतरादै, दिखणादै, अगूणै अर आथूणै रौ भड़-किंवाड़। अजयपाल जिसौ। अहंकार में रावण जैड़ौ। दूजौ धारू (चौहान वीर), तीसरौ सिंघण (चौहान वीर)। घट् दरसण, साधू (जंगम सेवड़ा संन्यासी) अर छियांवैं पाखंड रौ आधार धिन-धिन है। अचलेस्वर, थारौ काळजौ मोटौ, कै थूं बादशाह सूं खांडौ लियौ।

6

अबखा सबदां रा अरथ

इसी परि-इण भांत । कटक-सेना । बंधि-दल । महाधर-मोटौ थंभ । कवण-कवण=कुण-कुण । सकळ-सगळा । सकबंधी-केसरिया बागा पैरनै आर-पार रौ जुद्ध करणिया, मरणवावा । सारीखा-जैड़ा, जिसा । खेह-धूड़ । वन्नि-वन । अवेड़-इत्तौ । काइ-क्यूं । सीह-शेर । गडवर-हाथी । विकाइ-बिकै । वेढ-जुद्ध, राड़, रणरौळ । करि-हाथ । उपकंठि-नैड़ै । छह-है । दई-देवता । रुठउ-रुसायौ । विवाणी-जाण्यौ है । आथम्यउ-आथमग्यौ, बिसूंजग्यौ, अस्त होयग्यौ । अउर-दूजा । आलिगेरा-पैलै दरजै रा । दिहाड़ि-दिन में । खाउंड लियउ-जुद्ध करणौ । खत्र-क्षत्रीयपणौ, रजपूती । खांडड़ि-खांडौ, तोड़ै । भड़-किंवाड़-वीर री उपाधि है, जकौ बैरी मैं किंवाड़ दर्दि बारै इज रोक्यां राखै । सूर-सूरज । खेह-खंख, रंजी, धूड़ौ, गरद । सिरि-ऊपर माथै । भागा-टूटग्या ।

सवाल

विकल्पाऊ पड़तर वाळ सवाल

1. 'अचलदास खीची री वचनिका' किण सैली री रचना है—
(अ) ख्यात (ब) दवावैत
(स) वचनिका (द) वार्ता ()

2. 'अचलदास खीची री वचनिका' रै रचयिता रौ नांव कांई है—
(अ) ईसरदास बारठ (ब) पृथ्वीराज राठोड़
(स) नरपति नाल्ह (द) शिवदास गाडण ()

3. किणरौ मोल लाख रुपिया आंकीजै—
(अ) गाय रौ (ब) हिरण रौ
(स) हाथी रौ (द) सिंघ रौ ()

4. अचलदास खीची किणरै सागै जुद्ध करौ—
(अ) औरंगजेब (ब) अलाउद्दीन
(स) अकबर (द) आलमशाह गौरी ()

साव छोटा पडूत्तर वाला सवाल

1. बादशाह रै साम्हीं कुण आपरौ सत नीं छोडै ?
2. हाथी अर सिंघ रौ मोल काँई है ?
3. हिंदू राजा में सबसूं मोटौ राजा कुण हौ ?
4. अचल कुण रैवै ?

छोटा पडूत्तर वाला सवाल

1. 'साकौ' काँई होवै ?
2. बादशाह रै साम्हीं कुण आपरौ खांडौ उठावै अर क्यूं ?
3. अचलदास खीची सेना रा चार सेनानायकां रा नांव बतावौ।
4. अचलदास खीची रै वीर चरित्र रा चार गुण लिखौ।

लेखरूप पडूत्तर वाला सवाल

1. अचलदास खीची रै चरित्र-चित्रण करौ।
2. वचनिका रै मूळ सदेस नैं विस्तार सुं बतावौ।
3. वचनिका में हाथी अर सिंघ में काँई अंतर बतायौ है ? साथै ई इण संदर्भ में अचलदास खीची रै सुभाव नैं दरसावौ।

नीचै दिरीज्या गद्यांसां री प्रसंगाऊ व्याख्या करौ।

1. ते राजा नरसिंधास सारीखा। ते राजा नरसिंधास का कुंवर तउ चांदजी खेमजी सारिखा। मानंगपुरी-का चक्रवरती लखमराव सारिखा। देवीसाह सारिखा। बूंदी-का चक्रवरती अवर देवड़ा हिंदू-राइ। बंदि-छोड, दूसरा मालदे-समरसीह सारिखा।
2. सउ हिंदू राजा उपकंठि कउण छइ, जिकइ मनि पातिसाह-की रीस वसी ? कउण-का माई विवाणी, जू सामउ रहइ अणी-पाणी ? आज तउ सोम-सातळ, कान्हड़े, नहीं तिलकछपरि गहिल-उत सोम-सातळ कान्हड़े, नहीं तिलकछपरि गहिल-उत नहीं, सीहउरि रउलु नहीं, हठ-कउ राउ हमीर आथम्यउ।
3. अचल्लेसर तउ किसउउ उत्तर-दक्षिण-पूरब-पच्छिम-कउ भड़-किंवाड़, आइन्यां अजरपाळ, अहंकारि रावण, दूसरउ धारू, तीसरउ सिंघण; छइ दरसण छयावइ पाखंड-कउ अधार। बालउ चक्रवरती। धन-धन हो राजा अचल्लेसर। थारउ जिसउ जिणि हइ पातिसाह सउ खांडउ लियउ।

□ विगत

मारवाड़ रा परगनां री विगत

मुहणोत नैणसी

लेखक परिचै

मुहणोत नैणसी जोधपुर रा महाराजा गजसिंह प्रथम अर जसवंत सिंह प्रथम रै राज (1638-1678 ई.) में हाकिम अर देस-दीवाण रे ओहदै माथै काम कर्खौ। इण वजै सूं नैणसी नैं राजकाज अर शासन चलाणै रा तौर-तरीकां रै सागै-सागै वित्तीय मामलात री ई सांगोपांग जाणकारी ही। नैणसी जुद्धां में भी सेना सागै जाया करता हा। औ इज कारण हौ कै नैणसी आपरा ग्रंथ 'ख्यात' अर 'विगत' (इतिहासू विवरण) मांय मारवाड़ रै इतिहास अर भूगोल रा जींवता-जागता चित्राम मांड्या है। नैणसी रा ऐ दोनूं ई ग्रंथ राजस्थान रै मध्यकाळ रै इतिहास रा महताऊ स्रोत है। किणी घटना रौ पुख्ता प्रमाण नीं मिल्ण माथै नैणसी आपरा ग्रंथां मांय 'एक बात यूं सूनी छै' लिखनै उण बात रौ विवरण दियौ है। मारवाड़ रै लूठे इतिहास लेखक रै रूप में नैणसी रौ जस जुगां-जुगां अमिट रैवैला।

नैणसी रा पिता जयमल कुशल प्रशासक अर वीर जोद्धा हा, जिका जोधपुर महाराजा सूरसिंह अर महाराजा गजसिंह प्रथम री सेवा में रैया अर उणां नैं 'देस-दीवाण' रौ ओहदौ दिरीज्यौ है। नैणसी री शिक्षा-दीक्षा अर बाल्पर्णै रै बारै में कठई कोई जाणकारी नीं मिलै। पण इणां री साहित्य-रचना अर प्रशासन-दक्षता सूं औ सैज ई अनुमान लगायौ जाय सकै कै वारी शिक्षा-दीक्षा रौ इणां रा पिता समुचित प्रबंध कर्खौ होवैला। नैणसी असाधारण व्यक्तित्व रा धणी हा। वां मारवाड़ रा घणकरा जुद्धां अर आक्रमणां रौ बौत ई दक्षता अर सफळता रै साथै संचालन कर्खौ। पण राजनीतिक कै सैनिक जीवण री तुलना में इणां रौ साहित्यिक जीवण घणौ महताऊ रैयौ। 'नैणसी री ख्यात' अर 'मारवाड़ रा परगनां री विगत' आं रा दो काळजयी ग्रंथ है, जिका इतिहास रा प्रामाणिक स्रोत मानीजै। इणी कारण नैणसी मारवाड़ रा 'अबुल फजल' बाजै। नैणसी अर इणां रा भाई झूठे आरोपां में कैद करीजग्या, जिण सूं दुखी होयनै दोनूं भाई सन् 1670 में प्राण त्याग दिया।

पाठ परिचै

'मारवाड़ रा परगनां री विगत' 17वैं सईकै रै मारवाड़ राज्य रै इतिहास रौ महताऊ ग्रंथ है। तीन भागां में छप्योडै इण ग्रंथ रौ संपादन डॉ. नारायणसिंह भाटी कर्खौ। इणरै पैलै भाग (1967) में जोधपुर, सोजत अर जैतारण रौ विवरण है। दूजै भाग (1968) में फलोदी, मेड़ता, सिवाना अर पोकरण रौ विवरण है। तीजै भाग (1974) में सात परगनां रौ (हिंदी मांय) सार रूप में विवरण है। इणमें केई खांप-सरदारां माथै टिप्पणियां, तकनीकी सबदां री व्याख्या, इतिहासपुरसां री जलमपत्रियां अर परिशिष्ट है।

महाराजा गजसिंह रै देवलोक होयां पछै जसवंत सिंह नैं साहजहां मारवाड़ रौ टीकौ दियौ (सं. 1695), उण समै जोधपुर, सोजत, फलोदी, मेड़ता अर सिवाना रा परगनां इज दिया हा। पछै जैतारण रौ परगनै अर फेर बादसाह री मंजूरी सूं सं. 1707 में पोकरण रौ परगनौ ई महाराजा आपरै अधिकार में कर लीन्यौ। आं इज सात परगनां रौ विवरण इण ग्रंथ में नैणसी दियौ है। इण पाठ में मारवाड़ रा परगनां री विगत रै दूजै भाग सूं 'वात परगने मेड़ते री' रा सरुआती अंस बानगी सरूप दिरीज्या है।

मारवाड़ रा परगनां री विगत

(५) वात परगने मेड़ते री

१. परगनौ मेड़तो आद सहर छै, राजा मानधाता रौ बसायौ, यूं सको कहै छै। केहीक दिन युं पण सुणीयौ छै। राव कान्हड़े रै घणी धरती हुती तद कै छै एक बार कान्हड़े रौ अमल हुवौ छै। तठा पछै घणा दिन आ ठौड़ षाली सूनी रही छै। सु अठै झाड़-झंगी घणी हुय रही थी।

२. पछै राव जोधो मारवाड़ लीवी, संमत १५१५ जेठ सुदी ११ जोधपुर बासीयौ, तरै भायां बेटां नुं धरती दैण रौ विचार कीयौ, तरै सोनगरी चांपा खींचावत री बेटी तिण रै पेट रा राव जोधा रा बेटा २ बरसिंघ दूदो सगा भाई था। तिणां नुं राव कह्हौ—म्है थानु मेड़तो दां छां, थे जाये बसौ। तरै इण कबूल कीयौ। इणनुं घोड़ौ सिर पाव दे सीष दीवी। औ आपरा गाडा लेनै चोकड़ी आण डेरौ कीयौ। चोकड़ी रौ भाषर देषण गया था, तिण समै रा. उदौ कान्हड़ेओत जैतमाल नागौर था छोड गगडाणै आंण गाडा छोडीया छै। रा. उदैसिंघ सिकार चारूं तरफ रमण पिण जायै नै धरती नै पिण सारी देषतौ फिरै। सु उदो कान्हड़ेओत फिरतौ-फिरतौ आ ठौड़ मेड़ता री दीठी थी सु उदा नुं किणीहीक षबर कही—राव जोधै रा बेटा २ आण धरती बसण आया छै सु चौकड़ी रै पहाड़ गढ़ करावण रौ मतौ छै। तळहटी सेहर बसावण रौ मन धरै छै।

३. तरै रा. उदौ कान्हड़ेओत आप चढ़ नै रा. बरसिंघ दूदा कन्है गयौ, दिन २ तथा ४ मुजरौ कीयौ। सेँधौ हुवौ। तरै रा. बरसिंघ जोधावत नुं कह्हौ—म्हैं सुणां छां राज आ धरती बासण मतौ छै। कठै ही ठौड़ बीचार छै? तरै बरसिंघ कहौ— मन तौ धरां छां। तरै उदै कहीयौ—राज काईं ठौड़ बीचारी छै। तरै बरसिंघ दूदौ आय चढीया रा. उदा नुं चोकड़ी रौ भाषर दीषाळीयौ। तरै उदै नुं पूछीयौ—आ ठौड़ किसडी छै? तरै उदै कहीयौ— ठौड़ भली चंगी छै। ठौड़ १ म्हें सषरी दीठी छै राज एक वेळा उठै पधारौ। रा. उदौ रा. बरसिंघ दूदै जोधावत नुं मेड़तौ सेहर बसै छै तठै ले आयौ कुंडल बेजपो तळव आद थौ सु दीठा। पछै जठै हिमार मेड़तै कोटड़ी छै आ ठौड़ दीठी। रा. बरसिंघ दुदा राजी हुवा। गाडा अठै आंण नै कोट री रांग दीवी।

४. रहण नुं इण ठौड़ आया तरै कोटड़ी री ठौड़ दुय नाहर ऊभा छै, तिण माहै वडो नाहर छै, एक उण था छोटौ नाहर छै। सु वडो नाहर उठै गाजीयौ, ताड़ीयौ पछै उठा थी परै गयौ। नै छोटौ नाहर छै सु उठै गुफा थी तिण माहै बैठौ। तरै सांवणी साथे हुतौ सु विण माथौ धूणीयौ। तरै इण वेळा बरसिंघ दीठौ। कहीयौ थें केण आटे माथौ धूणीयौ। तरै ई वेळा दोय चार उजर कीयौ, पिण बरसिंघ हठ कर पूछीयौ। तरै सांवणी कहौ—सीवण एकण भांतरै हुवौ छै। तरै बरसिंघ कहौ—इण सांवण रौ कासुं विचर छै? तरै सांवणी कहौ—राज जीवसौ तठा सुधी आ ठौड़। राज भोगवसो तठा पछै आ ठौड़ दुदा रौ पेट रहसी, रावला बेटा पोतां नुं आ ठौड़ नहीं रहै। तद दुदो बरसिंघ एक था, माहे जीव जुदा न था तरै बरसिंघ कहौ—म्है दुदौ एक हीज छां। पछै इण कोटड़ी ठौड़ रांग कोटड़ी री भराई। राव बरसिंघ दुदै आ ठौड़ संमत १५१८ चैत्र सुदी ६ नुं हसत नषतर कहै छै बासी।

५. रा. उदो कान्हड़ेओत नुं पराधांन कीयौ। सारी मदार उदा रै माथै छै। तिण समै धरती सारी मेड़ता री उजड़ छै। सु रजपूत आवै छै सु बसता जाय छै। तिण समै नागौर सवाल्लष दिसा डींगा था राज देला रौ कठोती जायेल री रहौ थो उठै वैर पड़ीयौ। तरै घर राज डंगो राव बरसिंघ दुदा कनै आयौ। कहौ—मोनुं आंणौ तौ म्हे सारा षेड़ा बसावां। तरै थीर राज कहौ, तिण भांत दिलासा कीया छै। मेड़तै हीज पुराणा डांगावास री ठौड़ थीर राज नुं देस मुष चौधरी सारा देस रौ कर बासीयौ। थीर राज सबव्यै आदमी थौ। पछै सवाल्लष रा जाट दिलासा कर करनै आंण-आंण मेड़ता रा गांवां बसता गया। पछै मेड़ता रा सारा गांव बसीया, धरती आवा-दांन हुई।

६. श्री फल्लोधी पारसनाथजी रौ देहूरौ संमत ११९१ जारौड़े साह श्रीमल करायौ तठा पछै संमत १५५५ सु राणे हेमराज देवराज रै बैटै उधुर करायौ। ‘जात सुराणे धरम धोष सुरप्रतबोधीया जात पुंवार।’

७. रा. बरसिंघ उदौ केहीक सांघला मार नै चौकड़ी बसीया । कोसांगो मादल्लीयो पिण सांघला के मारीया ।
८. इण गांव ईण ठौड़ां रा जाट आण इण गांवां बसायौ । डागा कठौती रा—
डांगावास, लोहड़ोयाह, रायसल बास, इतीवे । थीरोदा थीरो नागौर रा—सातलवास ।
- वडीवारा रताऊरा
फालो बडगांव
चांदलीयां चुवो
महेवडो
दुगसता दुसताऊ रा
भोवाली
डीडेल रावणा बुगरड़ा रा
लांबीयां
कमेडीया भादु
कलरो
रेयां कासणीया कसणा रा
रेयां
रडु ग्वालरां तगो नागौर रा
राहण
तेतरवाल तीतरी नागौर री
झड़ाऊ
गोदारो पांडो रौ बोकानेर रौ
झीथीया वडाली
सोमडवाल सोमडी नागौर री
रोहीयो
बोहड़ीया कठोती था डागा साथ आया
मोकालै अणीयाळै सहेसड़े
गोरा
पादुबड़ी तांबडौली
लटीयाळ थीरोदा नागौर
लापोल्लाई काकड़वी
चोहीलां संवो नागौर रौ
मोडरी
वात गोहीलोत अजमेर रा
नीलीया
९. इतरा गांव सारा आजणा जाट छै—
डांगा आद चहुवांण राजपूत था । पछै इण रौ बडैरो जगसी छाजु रौ जाट हुओ ।
- १ माहारीष २ संम ३ फोकट ४ वीलायो ५ छाजु ६ देलू ७ जगसी ८ दुलोहराव ९ थीराज १० डुंगर
११वीको १२ छीतर १३ हेमो १४ जालप १५ घींवराज ।

१०. श्री फलोधीजी री माताजी रै देहरौ आद तौ राजा मानधाता रै करायौ तठा पछे संमत १०८३ थंभ संवत १५५५ उधोर करायौ ।

११. धरती सारी बसी रजपूत पण घणा साष-साष रा बसीया । मुदौ जैतमाल माथै मंडीयौ । उदावदु सारा राज रै कांम छै । पछे कितराहक दिन रा. बरसिंघ नै रा. दुदै अणवत हुई । रा. दुदौ छांड नै बीकानेर गयौ । बांसै दुकाळ पड़ीयौ । घाण नु घणौसो कुं जुडै नहीं । तरै जोधपुर सूं बरसिंघ साथे चाकर बाबर हीड़गर परज लोग आया था सु सारा परा जाण लागा । तरै रा. बरसिंघ दीठौ, यु कुंही मरां, तरै रा. बरसिंघ साथै भेळो कर नै सैंभर नवलधी मारी । घणा माल लूटीया । सोवन मोर उडीया । तिण दिन अजमेर मांडव रै बादशाह रै दाषल थी, मलूषान अठै अजमेर रै सोबे ऊपर थौ । सु बुरौ घणौ ही मानीयौ । पिण बैस रहौ । सैंभर मारी तिण साष रै कवित—

ताण चौर तब्हुटी घणौ कीयौ धाटौ ।
माटौ फोड़ कोट घाघरौ फाड़ कंचुओ ।
चौहटो कर मदा गाल्लिया अहर भड़ अमरीस ।
कूट लूटिया कनक हीरा मोती ।
विपरीत चिरत तह रंग रमी, भार भरत जोबन भरो ।
बरसिंघ काह गुवाल्लियो गोपी संभर ज्यरी ॥

१२. तौ ही अजमेर रै सुबायत बैस रहौ । तिण समै राव सातल नै कंवर बरसिंघ अणवत हुई । बरसिंघ सातल नुं कहै—कुंही जोधपुर बाप की मांहै म्हे ही पावां, तरै बेऊ यांरा परधान अजमेर गया । मलुषान कहौ—दोनूं अठै आवौ, म्है समझाई देस्यां । एक तो बात युं सुणी छै—राव सातल नै रा. बरसिंघ अजमेर गया । रा. बरसिंघ मलुषान सुं काहाव कीयौ—मोनुं जोधपुर दौ, हुं रु. ५०००० पेसकसी रा दूं । पछै बीच राठोड़े फिर नै राव सातल नै राव बरसिंघ नुं एक कीया । उठी थी मलुषान सुं बिगर मिळीयौं उठै आया ।

१३. के कहै छै आप न आया । परधान आया, आ वात परधान की थी पण मलुषान बरसिंघ सुं लागतो थौ हीज कहै—एक तौ मांहरी सैंभर मारी, तिण रौ मांहारौ म्है बित मांगां । दूजौ मांहानुं पेसकसी कबूली थी, म्है ऊपर कीयौ । तरै केहीक गांवां राव सातल केलावा सुं बरसिंघ नुं जोधपुर रा दीया तिकै सुणीया, कहौ—आपरौ मकसद कीयौ, मांहरी पेसकसी आही राषी सु कुण वासतै । म्हानुं कबूलीयो थौ, सुदो मलुषान मारीयो । इण उजर कियौ । मलुषान कटक भेळो कीयौ । मेड़ता री गाडा संध आया । तरै इणै जोधपुर राव सातल नुं खबर मेली । राव कहौ—थेई उठै लड़ाई मत करौ । मांणस लेनै जोधपुर आवौ बेगा । तरै बरसिंघ तौ जोधपुर आयौ । बांसै हुओ मुलुषान आयौ । मेड़ते री धरती बिगाड़ नै जोधपुर री धरती पिण बिगाड़ी । पींपाड़ डेरो कर नै सथलांण सुधी धरती सारी मार नै बंध की ।

॥४॥

अबखा सबदां रा अरथ

यूं सको कहै छै=सगवा लोग कैवै । मतौ छै=विचार है । सैंधो हुओ=जाण-पिछाण काढी, ओळखाण करी । कठै ही ठौड़ बीचार छै=कठै बसण रौ विचार है । दीषाळीयौ=देखायौ । सपरी=आछी, चोखी । आद थौ=पुराणौ बण्योड़ौ हौ । कोट री रांग=गढ़ री नींव । सांवणी=सुगन जाणिण्यौ, सुगनी । उजर कीयौ=टाळमटोळ करी । सीवण=सुगन । राज जीवसौ=आप जींवता रैसौ । दुदा रौ पेट रहसी=राव दूदा रा वंसज अठै रैवैला । माहे जीव जुदा न था=मन में कोई भेदभाव नीं । हसत नष्टर कहै छै बासी=हस्त नक्षत्रमें नींव लगायनै बसायी । सवाळष=नागोर पट्टी रौ जूगौ नांव । वैर पड़ीयौ=बैर-भाव होयग्यौ । मोनुं आंणौ=म्हनै आवण रौ मौकौ देवौ, बुलावौ । देस मुष चौधरी=देस रौ प्रमुख चौधरी । सबल्यौ=बलवान, सबल । देहरौ=देवरौ, मिंदर । उधुर करायौ=जीर्णोद्धार करवायौ । अवणत=अनबन, अदावत । दुकाळ=भयंकर काळ, दोवड़ी काळ । हीड़गर=सेवा-चाकरी करणिया । परज=प्रजा, रैच्यत । सोवन मोर उडीया=मोकळौ धन-माल हाथ लागणौ । बैस रहौ=बैठ्यौ रैयौ । बित=धन, माल । कटक=सेना, फौज । बांसै हुओ=लारौ करतौ, पीछौ करतौ ।

सवाल

विकल्पाऊ पडूत्तर वाला सवाल

1. 'मारवाड़ रा परगनां री विगत' रा लेखक कुण हा ?

(अ) नैणसी	(ब) जयमल
(स) दयालदास सिंधायच	(द) अबुल फजल

()

2. नैणसी सूं पैलां वांग पिता जयमल मारवाड़ राज में किण ओहदै माथै काम कर्ह्यौ ?

(अ) कामदार	(ब) कोठारी
(स) देस-दीवाण	(द) भंडारी

()

3. नागौर पट्टी रौ जूनौ नांव कांई हौ ?

(अ) नागौरण	(ब) सवाळष
(स) नागरवाळ	(द) नागधरा

()

4. मेड़ता परगनै किण रियासत में हौ ?

(अ) मेवाड़	(ब) मारवाड़
(स) शेखावाटी	(द) बीकानेर

()

साव छोटा पडूत्तर वाला सवाल

1. नैणसी किण महाराजा रै शासनकाल में मारवाड़ रा देस-दीवाण हा ?
2. इण पाठ में मारवाड़ रै किण परगनै री विगत दिरीजी है ?
3. 'सोवन मोर उडीया' इण मुहावरै रौ कांई अरथ है ?
4. नैणसी री तुलना देस रै किण इतिहासकार सूं करी जावै ?

छोटा पडूत्तर वाला सवाल

1. नैणसी रै पिता जयमल रै व्यक्तित्व री विसेसतावां लिख्यौ।
2. नैणसी रा चार चारित्रिक गुण बतावौ।
3. नैणसी रै रच्योड़ा महताऊ ग्रंथ कुण-कुणसा है।
4. मारवाड़ में किता परगना हा, वांग नांव लिख्यौ।

लेखरूप पडूत्तर वाला सवाल

1. “‘राजनीतिक कै सैनिक जीवण री तुलना में नैणसी रै साहित्यिक जीवण घणौ महताऊ रैयौ।’” इण कथन नैं दाखला देयनै सिद्ध करौ।
2. ‘मारवाड़ रा परगनां री विगत’ सूं सामल ‘वात परगने मेड़ते री’ नैं आपैरे सबदां में लिख्यौ।

3. “नैणसी राजस्थानी में गद्य लेखन रौ सांतरौ काम कर्खौ है।” नैणसी री भासा-सैली रै आधार माथै इण कथन नैं पुख्ता करौ।

नीचै दिरीज्या गद्यांसां री प्रसंगाऊ व्याख्या करौ।

1. परगनौ मेड़तो आद सहर छै, राजा मानधाता रौ बसायौ, यूं सको कहै छै। केहीक दिन युं पण सुणीयौ छै। राव कान्हड़दे रै घणी धरती हुती तद कै छै एक बार कान्हड़दे रौ अमल हुवौ छै। तठा पछै घणा दिन आ ठौड़ घाली सूनी रही छै। सु अठै झाड़-झांगी घणी हुय रही थी।
2. रहण नुं इण ठौड़ आया तरै कोटड़ी री ठौड़ दुय नाहर ऊभा छै, तिण माहै वडो नाहर छै, एक उण था छोटौ नाहर छै। सु वडो नाहर उठै गाजीयौ, ताड़ीयौ पछै उठा थी परौ गयौ। नै छोटौ नाहर छै सु उठै गुफा थी तिण माहै बैठौ। तरै सांवणी साथे हुतौ सु विण माथौ धूणीयौ। तरै इण वेळा बरसिंघ दीठौ। कहीयौ थें केण आटे माथौ धूणीयौ।
3. रा. उदो कान्हड़देओत नुं पराधांन कीयौ। सारी मदार उदा रै माथै छै। तिण समै धरती सारी मेड़ता री उजड़ छै। सु रजपूत आवै छै सु बसता जाय छै। तिण समै नागौर सवाल्ष दिसा डीगा था राज देला रै कठोती जायेल री रहौ थो उठै वैर पड़ीयौ। तरै घर राज डंगो राव बरसिंघ दुदा कनै आयै। कहौ—मोनुं आंणौ तौ म्हे सारा षेड़ बसावां।

□कथा

वैताल पचीसी री अकवीसमी कथा

उल्थाकार : देईदान नाइता

उल्थाकार परिचै

‘वैताल पचीसी’ चावै संस्कृत कथा-ग्रंथ ‘वैताल पंचविंशतिका’ री राजस्थानी उल्थौ है। इणरौ उल्थौ बीकानेर महाराजा करणसिंह रै राज्यकाळ मांय होयौ अर युवराज अनूपसिंह रै कैवण सूं होयौ। युवराज अनूपसिंह देईदान नाइता नैं बुलायनै इण काम सारू हुकम दियौ है, जिणरौ जिकर इण भासा-टीका रै सरू में ई करीज्यौ है। बियां अेक पद्य सूं आ बात ई साम्हीं आवै कै अनूपसिंह री आग्या सूं देईदान अेक दूजै संस्कृत कथा-ग्रंथ ‘सिंहासन-द्वात्रिंशिका’ रौ उल्थौ ई कस्यौ हौ।

देईदान नाइता रै जलम अर जीवण बाबत कीं खास जाणकारी कोनी मिळै। पण युवराज अनूपसिंह, जिका बाद में बीकानेर रा महाराजा बण्या, वांरौ रौ जलम 11 मार्च 1638, राजतिलक 1669 में अर सुरगवास 7 मार्च, 1671 नैं होयौ, सो उल्थाकार देईदान नाइता रै जलम अर रचनाकाळ ईस्वी 17वीं सदी मान्यौ जाय सकै। उल्था सूं आ बात साफ है कै देईदान कवि ई हा, क्यूंकै औं उल्थौ कविता-मिश्रित गद्य में है। साथै ई वै भासा रा कुसळ अधिकारी अर पारखी ई हा। इण उल्था री भासा में संस्कृत रा तत्सम, तद्भव अर देसज सबदां रै साथै ई चालू अरबी-फारसी रा सबदां रौ अेकदम सुभाविक प्रयोग होयौ है। उल्थाकार सबद-रूप विभक्ति अर क्रिया आद में भासा रै सरूप री रिछ्या करता थकां उणनैं सरल, सरस, आदर्श अर आकर्षक रूप देवण रा जतन कर्या है।

पाठ परिचै

‘वैताल पचीसी’ री इण इक्कीसवीं कथा मांय विस्णु स्वामी नांव रै अेक बामण रै चार बेटां री कहाणी है, जिका गळत रस्ते पड़योड़ा हा अर बाप रै सीख दियां पछै वाराणसी विद्या प्राप्त करण नै गया। वै च्यारूं वाराणसी मांय रैयनै विद्या हासल करी अर पछै आपैरे घरै बावड़ण लाग्या। मारग मांय वै आपरी विद्यावां रौ उपयोग करता थकां अेक सिंघ नैं जीवाय देवै। सिंघ जींवतौ होवतां ई वां च्यारूं नैं आपरौ भख बणाय लेवै। सो विद्या सीख लेवण सूं ई कोई बुद्धिमान नौं होय जावै। विद्यावां सीखनै वै मूरख हा, जिका औं ई नौं सोच सक्या कै सिंघ जीवतौ होवतां ई उणां नैं गटकाय जावैला। कैवण रौ मतळब औं कै विद्या नैं समै माथै उपयोग लेवण सारू बुद्धि होवणी ई जरूरी है।

वैताल पचीसी री अकवीसमी कथा

फिर मडै नुं ले आवतां वैताल कहै छै। राजा सांभळि।

पवनस्थान नगर। तीयै रो धणी बीरबल राजा। तीयै रइ विष्णुस्वामि व्राह्मण। तीयै रइ च्यारि पुत्र। एक द्युतकारी। बीजो वेश्यारत। तीजो सुरापांन। चोथो परस्त्रीरत। तीयां नुं विष्णुस्वामि सीख द्यै छै।

जुवारी नुं कहै छै—

दूहा

अति अनर्थ जुवौ करइ, शील धर्म न रहाइ ।
 जइसइ मानवलोक कौ, विष पीयै जीव जाइ ॥1॥
 जुवारी लिषमी तजै, ज्युं वैश्या धन हीन ।
 कूड़ कपट कर्कस चवै, हास्यो दीसै दीन ॥2॥
 जूवै दोष घणा कह्या, वेचै त्रीय घर बार ।
 उत्तम होइ न घेल ही, अधम एह आचार ॥3॥

अथ वेश्यारत नुं सीष दीयै छइ—

दूहा

साच सील संयम नियम, सुचि सोभाग गरब्ब ।
 नर पैसै वेस्या सदन, बाहिर रहइ सरब्ब ॥1॥
 मात पिता बंधव सुतन, बैर बहिन अन्न धन ।
 तिण नुं ए वल्लभ नही, जिहि वाल्हो वेस्या तन ॥2॥
 न सुंहावइ तीयनुं बडा, सुणै न हित के बोल ।
 जो वेस्या सुं प्यालो पीयै, तिणरो केहो तोल ॥3॥

सुरापांनी नूं सीष द्यइ छै—

दूहा

सुरापांन जो जो करै, सो सब भक्ष करेइ ।
 दुष पावइ गहिलो हुवइ, पिण फिर पात्र भरेइ ॥1॥
 काम काज हूंती रहइ, करइ अगमिय गोण ।
 ज्ञान नष्ट हुइ जाइ सो, नरक पातियो होण ॥2॥
 जूवइ घेलि दारू पीयै, फिर वेस्या घरि जाइ ।
 भी परदारा सूं रमइ, च्यारे विनासइ आइ ॥3॥

पर स्त्रीरत नूं सीष द्यइ छै—

दूहा

जीवा मारै पर त्रीया, पाडै नरकि अघोर ।
 गमइ बडाई जन हसइ, दुष पावइ घरि अउर ॥1॥
 बिलीषाइ सुत आंपणउ, सा किम छोडै मांस ।
 मारै अपणइ षसम कुं, तो नारी कौण वैसास ॥2॥
 परत्रीत इ गहि बंधीयइ, अरु धन जांतो जोइ ।
 ठोड़-ठोड़ संकत रहइ, कलह मृत्यु पिण होइ ॥3॥
 अप्रिय मैथुन सोचियै, अरु विड केरो साथ ।
 वुरइ कहत मन सोचियै, सोचिय रहत अनाथ ॥4॥
 बालापण पढीया नही, योवन व्यर्थ गमाइ ।
 वृद्ध भयइ कछु होइ नहि, मन पछतावो थाइ ॥5॥

वार्ता

ताहरां विष्णुस्वामि रा च्यार बेटा छा । एरा वचन अवधारि विद्या पढण नुं वणारसी गया ।

तेथ केतै एक कालि विद्या पढि आवतां विचारीयउ जो वा विद्या फुरइ कि नही । इसो जांण जंगळ माहे एक करंक पडीयो दीठउ सीह रौ । तिण नुं प्रथम विद्या कर हाड जोडिया । बीजै विद्या रइ बलि मांस-पंड कियो । तीजै रोम सहित तुचा कीधी । ताहरा बोलीयो । ईर्यई नुं जीवाडीयइ मारसी कुण ।

तरै चौथऊ बोलीयो । न जीवाडूं तो म्हारी विद्या री घबरि क्युं पडइ । तरै विद्या करि सिंघ जीवाडीयौ ।

ताहरां सिंघ भूषो ऊठियो । मुह आगै ऊभो तो तिण नुं मारियो । बीजा नाठा । तरै सिंघ सगळा मिरग भेळा करि घांण लागो ।

वेताल पूछीयौ । महाराज इयां पढीयां मांहि महामूरख कुण ।

राजा कहीयउ । पहिली पूछै तिको मूरख, जो इतरो ही न जांणइ । पाछइ पढीया तो च्यारै मूरख । पीण जीयै सिंघ नुं जीवाडियो सो महामूरख ।

द्वाहो

बुद्धि वडी विद्या हुंतइ, धूतावे विण बुद्धि ।

बुद्धि विहीना पंडितां, याधा सिंहइ क्रुद्धि ॥१॥

वार्ता

एती राजा रा मुष थी सांभळि मडो डाल जाइ विलगउ । राजा जाइ मडै नुं ले आवतउ हूवउ ।

इति श्री वैताल पचीसी री अकवीसमी कथा ।

⌘⌘

अबखा सबदां रा अरथ

उल्थौ=अनुवाद, अनुसिरजण । उल्थाकार=अनुवादक, अनुसिरजक । मडै=मुड्डौ, लोथ, शव । सांभळि=सुण्यौ । तीयै=उण । द्युतकारी=जुआरी, द्यूतक्रीड़ा करण वाळौ । तीयां नुं=वानें, उणां नैं । जुवारी=जुआरी । शील=चरित्र । लिषमी=लक्ष्मी । वेश्या=छिनाळ । अधम=अधरम । सुभाग=सौभाग्य । विनासइ=विणास । त्रीया=स्त्री, लुगाई । सुत=बेटा । घसम=धणी, पति । बालापण=टाबरपणै, बाळपणै । अवधारी=आतमसात करनै । तेथ=बठै । केत=कित्ता ई, केई । कालि=काळ । विचारीयउ=विचार करूऱ्यौ । करंक=कंकाळ । दीठउ=दीख्यौ । सीह=सिंघ, शेर । तुचा=चामडी, त्वचा । ताहरां=तद, जणै । बीजा=दूजा, दूसरा । नाठा=भाजग्या, दौड़ग्या । कहीयउ=कैयौ । तिकौ=वौ । क्रुद्धि=रीस में आयोडौ, किरोध करस्योडौ । विलगउ=विलूंबाग्यौ । अकवीसमी=इक्कीसवां ।

सवाल

विकल्पाऊ पडूत्तर वाळा सवाल

1. 'वैताल पचीसी' रा राजस्थानी उल्थाकार है—

- | | |
|------------|-------------|
| (अ) खेमदान | (ब) करणीदान |
| (स) देईदान | (द) सैणीदान |

()

2. 'वैताल-पचीसी' रौ राजस्थानी उल्थौ होयौ तद बीकानेर रा महाराजा कुण हा ?

- | | |
|---------------|--------------|
| (अ) अनूपसिंह | (ब) करणसिंह |
| (स) सादूलसिंह | (द) गंगासिंह |

()

3. विष्णु स्वामी रै कित्ता बेटा हा ?

- | | |
|---------|----------|
| (अ) दो | (ब) चार |
| (स) तीन | (द) पांच |

()

4. विष्णु स्वामी रा बेटा आपरी विद्या सूं किणनैं जींवतौ कर्खौ ?

- | | |
|---------------|---------------|
| (अ) मिराँ नैं | (ब) घोड़े नैं |
| (स) सिंघ नैं | (द) हाथो नैं |

()

साव छोटा पडूत्तर वाळा सवाल

1. 'वैताल पचीसी' री कित्तर्वीं कथा रौ राजस्थानी उल्थौ पाठ में सामल है ?

2. विष्णु स्वामी रा बेटा विद्या हासल करण सारू कठै गिया हा ?

3. 'वैताल पचीसी' री इण कथा सूं काईं सीख मिळै ?

4. विद्या हासल करण सूं पैलां विष्णु स्वामी रै बेटां में काईं दुर्गुण हा ?

छोटा सवालां रा पडूत्तर

1. विष्णु स्वामी रा बेटा आपरी विद्या री पारख किण भांत करी ?

2. विद्या रौ उपयोग कर्खां पछै च्यारूं भाई काईं फळ पायौ ?

3. विद्या हासल कर्खां पछै आपनैं सबसूं बत्तौ मूरख किसौ भाई लाग्यौ अर क्यूं ?

4. देईदान नाइता 'वैताल पचीसी' रौ राजस्थानी उल्थौ कठै, कद अर किणरै शासनकाळ में कर्खौ ?

लेखरूप पडूत्तर वाळा सवाल

1. विष्णु स्वामी रै च्यारूं बेटां सिंघ नैं किण भांत जीवाडै ? विस्तार सूं लिखौ।

2. देईदान नाइता रौ परिचै देवता थकां 'वैताल पचीसी' री इण कथा रै राजस्थानी उल्थै बाबत आपरा विचार लिखौ।

3. 'वैताल पचीसी' री इण कथा रौ सार लिखौ।

4. " 'वैताल पचीसी री कथा सीख देवै कै खाली विद्या हासल करण सूं कीं नीं होवै, उणरौ उपयोग सावळ अर बगतसर करणौ चाईजै।'" इण कथन रै पख में आपरा विचार प्रगट करौ।

□लोकगाथा

हर्ष-जीण री लोकगाथा (अंस)

पाठ परिचै

राजस्थान रै सीकर जिलै रै मांय लूठा पहाड़ां माथै हर्ष अर जीण माता रा जगचावा मिंदर है। जीण रौ मूळ नांव जीवणी हौ, जिकी घंघराय री बेटी ही। घंघराय चूरू जिलै रै घांघू गांव रा राजपूत सरदार हा। आं रै ओक बेटी अर ओक बेटी जलम्या। बेटै रौ नांव हर्ष हौ अर बेटी रौ जीण। जीण रौ बाल्पणै रौ नांव जीवणी हौ। दोनूं भाई-बैन में अणूतौ हेत हौ। हर्ष अर जीण रा मां-बाप आं रै बाल्पणै में ई सुरग सिधारग्या, पण सुरगधाम जावण सूं पैलां हर्ष नै भोळावण देयनै गया कै जीण नै किणी भांत रौ दुख नौं होवणौ चाईजै। पर-घर सूं आवण वाळी भावज (भोजाई) उणनै किणी भांत रा फोड़ा नौं भुगतावै। म्हां दोन्यां रा जीव इणी भोळी चिड़कली री चिंत्या में अटक्योड़ा है। तद हर्ष आपरे मां-बाप नै पतियारौ दिरावै कै थे नचींता रैवौ, म्हैं म्हारी बैन नै फूल री दाईं राखूंला, इणमें किणी भांत रा फोड़ा नौं पड़ण देवूंला।

मां-बाप रै सुरगवास पछै हर्ष रौ व्यांव होवै। केई दिनां ताई तौ नणद-भावज में हेत-हिंवल्लास बण्यौ रैवै, पण फेर भावज रै मन मांय खोट बापै अर वा नणद नै आडा-टेढा बोल बोलती रैवै। जीण घुटती-अमूळती रैवै, पण भाई नै कीं नौं बतावै। ओक दिन तव्यब सूं पाणी रा मटका लावती वेळा भावज आपरी नणद जीण सूं कैयौं कै थूं म्हनैं मटकौ ऊंचादै, थनैं दासी ऊंचा देसी। जीण बोली, “थाँैं घणौ गुमान है म्हरै भाई माथै, जद इज औड़ा बोल बोल्या हौ, म्हैं तौ दासी रै हाथां मटकौ आज ऊंचूं न काल!” भावज बोली, “म्हारा इज काव्य चाब्योड़ा हा, जिकौं औड़ी आफत सूं भेंटा होया, ठाह नौं, कद आगलै घरै जासी, कै भाई इज रैयसी?” भावज रा औड़ा बोल सुणनै जीण उणी खिण खण ले लीन्यौ कै नौं तौ म्हैं करदैइ व्यांव करूंली अर नौं पाछी घरां बावडूंली। जीण नै बठै इज छोडनै भावज दासी सागै पाछी घरां आयगी। जीण नै नौं देखनै हर्ष नै चिंत्या होयी तौ जीण री भावज कैयौं कै जीण तौ रूसणौ करनै सरवर रै काठै ई रैयगी है। हर्ष इत्तौ सुणतां ई भाजतौ-न्हासतौ सरवर पूर्यौ तौ बठै जीण नौं ही। उण रा पण दिखणादी दिस कानी मंड्योड़ा दीठा तौ वौ उणरै पगां-पगां सरपट्यौ। थोड़ी दूर गयां पछै उणनैं जीण निगै आई। वौ उणनैं मनावतौ थकौ पाछी घरां चालण री मनवारां करी, पण जीण कैयौं कै चायै परकत आपरा नेम-कायदा बदल देवै, पण म्हैं म्हरै कौल-बचन सूं पाछी नौं टबूं। इणी सरवर रै काठै भावज साम्हौं सूरज भगवान री साखी में म्हैं जकौ खण लियौ है, उणनैं निभावूंली। हर्ष उणनैं घणी ई समझायी अर कैयौं कै मां-बाप नै मरती वेळा म्हैं बचन दियौ हौ कै जीण नै करदैइ कोई दुख नौं होवण देवूंला। थारै वास्तै ऊज़ा चावळ, हरिया मूंगां री दाळ अर भूरी भेंस रै घी रौ जीमण परोसूंला। रतनां सूं जड़योड़ी चौकी माथै सोनै रौ थाळ अर पालर पाणी सूं भरवायनै झारी रख देवूंला। पछै आपां बैन-भाई सागै जीमांला अर बीच-बीच में गासिया ई बदल्लांला।

जीण कैयौं कै अबै तौ जे आगलै जलम में ओक ई मां रै पेट सूं जलम लेवांला, तौ भलां ई सागै जीमांला, इण जलम में तौ औड़ौ कीं ई नौं होवैलौ। औड़ौ सरंजाम तौ अबै भावज सारू ई करै। चायै सिखर चढ़योड़ौ सूरज पाछौ मुड़ जावै, पण म्हैं तौ अबै पाछी नौं चालूं। जीण रौ पककौ निस्त्वै जाणनै हर्ष ओकर फेरूं मनावणौ चायौ, तौ जीण कैयौं कै भाई हर्ष, थूं म्हनैं काई मनावै, म्हनैं तौ आखी दुनिया मनावैली, राजा-बादसाह मनावैला। थूं पाछौ घरां बावड़ा। भोजाई थारी बाट देख रैयी होसी। हर्ष ई मन में धार लीनी कै जे जीण नौं मुड़ तौ म्हैं ई पाछौ नौं मूळूं। जीण रै सागै हर्ष ई दिखणादी दिस आगै बधतौ रैयौ अर सीकर कनै दो लूठा भाखरां माथै जायनै तप करण लाग्या। जीण कैयौं कै बैन-भाई आम्हौं-साम्हौं नौं बैठ्या करै, तद हर्ष जीण नै पीठ देयनै तप में लीन होयग्यौ। दोनूं भाखर

हर्ष-जीण रै नांव सूं ओळखीजण लाग्या । बठै हर्ष अर जीण रा मिंदर बणग्या । जीण माता रौ जस दिल्ली रै बादसाह ताई पूग्यौ तौ वौ मिंदर माथै चढाई कर दीनी । जीण माता आपरै भौंरां री सेना बादसाह रा तंबुआं में भेज दी । बादसाह रा सिपायां रा डील सूजग्या । वै डरता पाछा बावडग्या । दिल्ली रै बादसाह जीण माता नै धोकण लाग्या । हर्षनाथ रै मिंदर कनै वि. सं. 1030 (बुधवार, 18 जनवरी, 973 ई.) रौ अेक सिलालेख मिल्यौ, जिकौ सीकर रै संग्रहालय मांय है । इणमें केई चौहान राजावां रा नांवां रौ जिकर है । जीण माता रै मिंदर रा पुजारी पारासर गौत रा बिरामण अर सांभरिया खांप रा राजपूत है । अठै आयै बरस चैत अर आसोज रै च्यानण-पख में मेठौ भरीजै अर जात-झड़लै सारू सैंग जात रा लोग आवता ई रैवै । कैबत है कै 'जिण न देखी जीण, वौ जग में के कीण ?' मतलब कै जकौ जीण माता रा दरसण नीं करूऱा, वौ जग में आयनै काई करूऱा ?

हर्ष-जीण री लोकगाथा (अंस)

(सरवर काठै सूं दर-कूचां—दर-मजलां दिखणद कानी जावती जीण आपरै भाई नैं झूरै ही—)

हरसा बीर मेरा रे, मा बाबल खोस्या मेरा राम ।
जामण का रे जाया, जलमी को जायो भावज खोसियो ॥
हरसा बीर मेरा रे, मेरा कुळ में कोई साथी नांय ।
जामण का रे जाया, अंबर तो पटकी रे धरती सांभन्नी ॥
हरसा बीर मेरा रे, जे मेरी होती जुग में माय ।
जामण का रे जाया, अखन कंवारी नै नांय बिडारती ॥
हरसा बीर मेरा रे जे मेरो जीतो होतो बाप ।
जामण का रे जाया, अखन कंवारी नै कदियेन काढतो ।
हरसा बीर मेरा रे, राव गढां रे करतो ब्याव ।
मेरी मा का रे जाया, घुड़ला तो हसती रे देतो घूमता ॥
हरसा बीर मेरा रे, मा बाबल आवै म्हरै याद ।
जामण का रे जाया, नैणां चौमासो रे म्हरै लग रह्यो ॥

(हे भाई हर्ष ! मा-बाप नैं तौ भगवान खोस लिया अर सागी भाई नैं भावज / अबै इण घर में म्हारौ कुण है ? म्हनैं तौ आभौ पटकी अर धरती झेली / हे भाई, जे आज मा जींवती होवती तौ आपरी अखन कंवारी बेटी नैं इयां नैं बिसारती अर जे बापू होवता तौ घर सूं कदैइ नीं काढता / वै किणी गढपति सागै म्हारौ ब्याव करनैं हाथी-घोड़ा दायजै में देता / हे म्हारा मा-जाया भाई हर्ष ! म्हनैं मा-बाप याद आय रैया है अर आंख्यां सूं सावण-भादवै री झड़ी लाग रैयी है)

हरसा बीर मेरा रे, के थारै घर में रै पांती मांगती ?
के थारो लेती राज बंटाय ?
जामण का रे जाया, किस विध बिडारी रै छोटी भाण नै ॥
हरसा बीर मेरा रे, कै तो मैं लेती धरम की चूनड़ी ।
के तो मैं लेती आंगी बांय ।
मेरी मा का रे जाया, देतो तो लेती रै पगां री मोचड़ी ॥

(ज्यूं-ज्यूं जीण नैं आपरौ अपमान चेतै आवै, त्यूं-त्यूं उणरी रीस बधती जावै अर वा भाई सूं किरियावर करती थकी कैवै— हे भाई हर्ष! न तौ म्हें घर में अर न राज में ई पांती मांगी, फेर क्यूं छोटी बैन नैं घर सूं काढी? म्हें तौ थारी दियोड़ी चूनड़ी, कांचली अर ज्यादा सूं ज्यादा अेक जोड़ी पगरखी ई लेवती।)

हर्ष री जोड़ायत जद घरां पूगी, तद उणरे आपरी बैन नैं नीं देखनै हर्ष पूछ्यो कै जीण कठै रेयगी? तद नण-भोजाई रै झगड़े रौ हाल सुण-समझनै हर्ष आपरौ माथो पीट लियौ अर तव्यब कानी भाज्यौ। बठै जायनै जीण रै पगां री दिस दिखणाद कानी जोयौ। फेर उणी दिस दौड़े पड़यौ—

इसड़ा तो झुरणा ये जीण सगती झूरती गई,
गई कोस दोय रै च्यार।

देव्यां रा ये देवी कांकड़िये ढळता ये हरसो नावड़यो ॥
जीण मेरी बाई ए मुड़ मुड़ तूं घर नै पाढी चाल।
मेरी मां की ये जाई, हरसो तो ऊबो करै ये मनावणा ॥

(इण भांत भाई नैं ओळमा देती-झूरती जीण नैं गांव री कांकड़ सूं कोई च्यारेक कोस रै आंतरै हर्ष नावड़ली अर बोल्यौ, “हे देव्यां री देवी जीण, पाढी घरां चाल! हे जामण-जायी बैन, थारौ भाई हर्ष थनै खड़यौ-ऊभौ मना रेयौ हैं। पण जीण तौ काठी धार राखी ही। वा दर ई नीं मानी अर बोली—)

हरसा बीर मेरा रे मनै मनासी रै बामण-बाणियां।
और मनासी कुळ रा लोग,
मेरी मा का रे जाया, बेटी मनासी रे हाडे राव की ॥
हरसा बीर मेरा रे मनै मनासी राजा मान।
जामण का रे जाया, और मनासी रे दिली रो बादस्या ॥

(हे म्हारा भाई हर्ष, थूं म्हनैं काई मनासी, म्हनैं तौ मनासी आखो राज-समाज। बामण-बाणियां रै सागै आखै कुळ रा लोग म्हनैं मनावैला। हाडे राव री बेटी अर राजा मानसिंह ई म्हनैं मनावैला। अबै हर्ष करै तौ काई करै? वौ बैन री सुख-सुविधावां सारू कौल वचन करण लाग्यौ।)

जीण मेरी बाई ये, उजळा रंधादृयूं ये थांनै चावळ्या,
हरिये मूँगां री बाई नै दाळ,
जामण की ये जाई घीरत घलाऊं ये भूरी झोट को ॥

(हे बैन, थारै सारू ऊजळा चावळ अर हरिया मूँगां री दाळ रंधवा देवूल्ता। सागै भूरी भैंस रौं घी भी परोस देवूल्ता, पण जीण तौं सेंग सुख-सुविधावां सूं मूँढौं फेर लियौ हैं। वा बोली—)

हरसा बीर मेरा रे, भावज जीमैली उजळा चावळ्या,
भावज जीमैली थारी दाळ।
जामण का रे जाया, घीरत जीमैली रे भूरी झोट को ॥

(हे भाई, ऊजळा चावळ, हरिया मूँगां री दाळ अर भूरकी भैंस रौं घी भावज ई जीमसी। जीण रा अैड़ा बोल सुणनै हर्ष रै हियै में हेत हबोळा लेवण लागै। वौ कैवै—)

जीण मेरी बाई ये चोकी ढळवा दृयूं रतन जड़ाव की,
ऊपर लगवा दृयूं सुबरण थाळ।

जामण की ये जाई, झारी भरवाद्यूं ये पालर नीर की ॥

जीण मेरी बाई ये ऊंचो सो घालूं ये थांनै बैसणूं,

बैनड़ भाई जीमांला साथ ॥

जामण की ये जाई, बिच-बिच बदल्नांला ये बाल्हा गासिया ॥

(हे बैनड़ जीण, थारै खातर रतनां सूं जड़योड़ी चौकी ढलवायनै उण माथै सोनै रौ थाळ सजायनै पालर पाणी री झारी भरवास्यूं। ऊंचा आसण बिछायनै आपां दोनूं भेवा जीमांला अर बीच-बीच में अेक-बीजै नैं कवा ई देवांला। पण जीण हिमालै दाईं थिर ही। वा ठिमराई सूं बोली—)

हरसा बीर मेरा रे जे ओजूं जलमां रै अकै माय के,

जद रे जीमांला दोन्यूं साथ ।

मेरी मा रा रे जाया जद रे बदल्नांला बिचला गासिया ॥

हरसा बीर मेरा रे आकां कै लागै रै मतीर।

जामण का रे जाया, फोगां कै लागै रे चाये काकड़ी ॥

हरसा बीर मेरा रे, खेजड़ियां लागै चाये बोर।

जामण का रे जाया, झाड़ां कै रे लागै चाये सांगरी ॥

हरसा बीर मेरा रे, पीपळ कै लागै चाये आम।

जामण का रे जाया, आमां रै लागै चाये पीपळी ॥

हरसा बीर मेरा रे, फिरजावै कुदरत का साचल नेम।

जामण का रे जाया, मेरा वाचा पाछा ना फिरै ॥

हरसा बीर मेरा रे, सिखर आयोड़े रे सूरज मुड़चलै।

समै भी गयोड़े मुड़ जाय ॥

मेरी मा का रे जाया, जम पर गयोड़ा रै भंवरा मुड़ चलै।

हरसा बीर मेरा रे, बादल री बूनां रै पाछी मुड़ चलै ॥

समदर हूं नदियां पाछी जाय,

जामण का रे जाया, जीण आयोड़ी रै पाछी ना मुडै ॥

(हे मां-जाया भाई हर्ष, अबै तौ जे आगलै जलम में ओजूं अकै ई मां रै पेट सूं जलमांला, तद ई अकै सागै जीमण जीमांला अर आपस में गासिया ई बदल्नांला। जीण आपरौ अटल निरणै सुणावती बोली— हे भाई हर्ष, चायै आकड़ै रै मतीरा लागै, फोगां रै चायै काकड़ी लागै, खेजड़ी रै बोरिया अर झाड़ां रै सांगरी ई क्यूं नीं लागै, पीपळ रै चायै आम अर आम रै चायै पीपळ-फळ लागै। हे भाई हर्ष, चायै कुदरत रा नेम-कायदा टळ जावै, पण जीण आपरै कौल-बचनां सूं पाछी नीं टळै। चायै सिखर चढ़योड़ै सूरज पाछौ मुड़ जावै, गुजरेड़ै समै ई पाछौ बावड़ आवै अर चायै जमराज कनै गयोड़ा जीव ई पाछा आय जावै। हे भाई, चायै बादल्नां री बूदां पाछी मुड़ जावै अर समदर सूं नदियां पाछी बावड़ जावै, पण जीण पाछी किणी सूरत में नीं बावड़ै। वा आपरै बचनां माथै थिर है। जद हर्ष नैं पक्कौ पतियारौ होयग्यौ कै अबै जीण पाछी धरां नीं चालैली, तद वौं उणरै रुसणै रौं कारण जाणणौ चायौ—)

जीण मेरी बाई ये के थांनै काढी भावज गाळ।

जामण की ये जाई, के थांनै दीन्या ये ओळमा ॥

(हे बाईं जीण, काईं थनैं थारी भावज गाळ्यां काढी या थनैं किणी तरै रा मोसा मास्या? तद जीण बोली—)

हरसा बीर मेरा रे, सौगन मैं खाई सरवर पाल्पर,

आडो तो लीनूं सूरज देव।

जामण का रे जाया, भावज को चाढ्यो रे कळक उतारस्युं।।

हरसा बीर मेरा रे, एकण ओदर मैं रे दोन्यूं लोटिया,

एकै मायड़ को रे चूख्यो दूध।

जामण का रे जाया, अकै पालणियै रे दोन्यूं झूलिया।।

हरसा बीर मेरा रे, अकै आंगण मैं रे दोन्यूं खेलिया,

एकै बाटकियै पीयो दूध।

मेरी मा का रे जाया, एकै थाळकली रै सागै जीमिया।।

हरसा बीर मेरा रे, बैनड़ भाई रो गाढो नेह।

जामण का रे जाया, परघर की दूती रे आय तुड़ाइयो।।

(हे भाई हर्ष, मैं सरवर री पाल माथै सूरज री साखी मैं सौगन खाइ ही कै भावज रो लगायोड़ै कळक उतारुंली। हे भाई, आपां दोनूं अकै ई मां रै पेट मैं लोट्या, अकै ई पालणै मैं हींड्या, अकै ई कटोरी मैं दूध पीयौ अर अकै ई थाळी मैं जीमण जीम्यौ, पण हे भाई, परायै घर सूं आयोड़ी दूती जैड़ी भावज आपणै गाढै हेत नैं तोड़ नाळ्यौ। जीण रा अै उद्गार सुणनै हर्ष गळगळौ होयायौ। उणरी आंख्यां सूं चौसारा चालण लागाया। वौं संकल्प करूयौ—)

जीण मेरी बाई ये! इतणी निसासी ये बैनड़ क्यूं हुई?

हरसो तो चालै थारै साथ,

जामण की ये जायी, चाल बसांला ये बनखंड डूंगरां।।

(हे म्हारी बैन जीण! थूं इत्ती अणमनी क्यूं होवे हैं। मैं खुद थारै साथै हूं अर आपां बनखंड अर भाखरां मैं ई चालनै रैवास कर लेवाला।)

हरसा बीर म्हारा रे, कुण करैलो थारै राज?

जामण का रे जाया, कुण तो रुखाळैलो पिरजा बापड़ी।

हरसा बीर मेरा रै, मुड़ मुड़ पाछो घर नै जाय।

जामण का रे जाया भावज बिलखै रै थां बिन अकेली।।

(हे म्हारा भाई हर्ष, जे थूं म्हारै सागै चालैला तौ थारौ राज कुण संभाळैला? हे जामण जाया बीर, फेर इण भोळ्यी प्रजा नैं कुण रुखाळैला। इण वास्तै हे हर्ष वीरा, थूं पाछो मुड़जा अर घरां जा परौ, थारै बिना घरै भावज बैठी अकेली झुर रैयी है।)

गाथा मैं आगै बैन जीण आपै भाई हर्ष नैं घणौं ई समझावै, पण वौं नीं मानै अर सेवट बैन-भाई दोनूं भाखरां माथै अपूठा बैठ तपस्या मैं लीन व्है, आपरी आतमावा रौं उत्सरग करै अर भाई-बैन रै अटूट नेह रै प्रतीक रूप जग मैं पूजीजै।

अबखा सबदां रा अरथ

ਖਣ=ਪ੍ਰਣ । ਭੋਨਾਵਣ=ਸੰਭਨਾਵਣ । ਗਾਸਿਆ=ਕਵਾ, ਰੇਟੀ ਰੈ ਕੌਰ । ਕਾਂਠੈ=ਕਿਨਾਰੈ, ਸਰਕਰ ਰੀ ਪਾਲ । ਭਾਵਜ=ਭੋਜਾਈ, ਭਾਈ ਰੀ ਜੋਡਾਯਤ । ਬਿਡਾਰਣੌ=ਬਿਸਾਰਣੌ, ਭੂਲਣੌ । ਬੁਡਲਾ=ਘੋਡਾ । ਹਸਤੀ=ਹਾਥੀ । ਚੌਮਾਸੋ=ਚਾਤੁਰ੍ਮਾਸ, ਬਿਰਖਾ ਰੁਤ ਰਾਚਾਰ ਮਹੀਨਾ । ਮੋਚਡੀ=ਪਗਾਂ ਰੀ ਪਗਰਖੀ, ਚਮਡੇ ਰੀ ਜੂਤੀ । ਝੂਰਣੌ=ਵਿਲਾਪ ਕਰਣੌ, ਬਿਲਖਣੌ । ਘੀਰਤ=ਘੀ । ਝੋਟ=ਭੇਸ । ਰਤਨ ਜਡਾਵ=ਰਤਨਾਂ ਸ੍ਰੂ ਜੱਡਧੋਡੀ । ਸੁਕਰਣ=ਸੋਨੈ ਰੈ, ਸੋਨਲਿਯੈ । ਪਾਲਰ ਨੀਰ =ਬਿਰਖਾ ਰੈ ਪਾਣੀ । ਵਾਚਾ=ਕੌਲ, ਬਚਨ । ਜਮ=ਜਮਰਾਜ । ਕੁੰਨਾਂ=ਕੁੰਦਾਂ, ਬਿਰਖਾਂ ਰੀ ਛਾਂਟਾਂ । ਪਿਰਯਾ=ਪ੍ਰਯਾ, ਰੈਧਤ, ਜਨਤਾ ।

सवाल

विकल्पाऊ पडत्तर वाळा सवाल

साव छोटा पड़ुत्तर वाला सवाल

- ‘हर्ष-जीण री लोकगाथा’ में हर्ष रौ जीण सूं कांई रिस्तौ है?
 - पाणी भरण नैं सरवर री पाळ माथे कुण-कुण सागै जावै?
 - हर्ष अर जीण पहाड़ं माथे जायनै तपस्या सारू किण तरै बैठै?
 - हर्ष ई धरां पाछौ जावण सं क्यं नट जावै?

छोटा पड़त्तर वाला सवाल

1. हर्ष अर जीण रै बाळपणै री दो घटनावां लिखौ।
 2. 'हर्ष-जीण री लोकगाथा' सं आपां नैं काँई प्रेरणा मिलै?

3. जीण नैं उणरी भावज काँई मोसा बोल्या हा ?
4. घर सूं निकळ्यां पछै हर्ष नैं जीण किण ठौड़ मिळी ?

लेखरूप पढूतर वाळा सवाल

1. ‘हर्ष-जीण री लोकगाथा’ रौं सार आपै सबदां में लिखौं।
2. “हर्ष-जीण री लोकगाथा भाई-बैन रै अछेह नेह री बानगी है।” इण कथन नैं लोकगाथा सूं दाखला देयनै पुख्ता करौ।
3. जीण नैं घरां पाछी ले जावण सारू हर्ष काँई-काँई मान मनवार करै अर जीण आपै कौल-बचनां सूं नॊं टळण सारू काँई-काँई दाखला देवै ? दाखलां समेत विस्तार सूं लिखौं।

नीचै दिरीज्यां पद्यांसां री प्रसंगाऊ व्याख्या करौ।

1. हरसा बीर मेरा रे, मा बाबल खोस्या मेरा राम।
जामण का रे जाया, जलमी को जायो भावज खोसियो ॥
हरसा बीर मेरा रे, मेरा कुळ में कोई साथी नांय।
जामण का रे जाया, अंबर तो पटकी रे धरती सांभवी ॥
2. इसङ्ग तो झुरणा ये जीण सगती झूरती गई,
गई कोस दोय रै च्यार।
देव्यां रा ये देवी कांकड़िये ढळता ये हरसो नावङ्यो ॥
जीण मेरी बाई ए मुड़ मुड़ तूं घर नै पाछी चाल।
मेरी कां की ये जाई, हरसो तो ऊबो करै ये मनावणा ॥
3. हरसा बीर मेरा रे, पीपळ कै लागै चाये आम।
जामण का रे जाया, आमां रै लागै चाये पीपळी ॥
हरसा बीर मेरा रे, फिरजावै कुदरत का साचल नेम।
जामण का रे जाया, मेरा वाचा पाछा ना फिरै ॥

ઉપન્યાસ અંસ

કનક-સુંદર

શિવચંદ્ર ભરતિયા

ઉપન્યાસકાર પરિચૈ

શિવચંદ્ર ભરતિયા રો જલમ વિ. સં. 1910 મેં હોયો। ભરતિયા સંસ્કૃત, હિંદી, મરાઠી અર રાજસ્થાની રા વિદ્વાન હા। શિવચંદ્ર ભરતિયા ઘણી વિધાવાં રા રચનાકાર હા। આપ આધુનિક રાજસ્થાની ગદ્ય લિખણિયાં મેં પૈલડાં ઉપન્યાસકાર માનીજે। કેર્દી વિદ્વાન આપૈ ‘કનક-સુંદર’ ઉપન્યાસ નેં રાજસ્થાની રો પૈલૌ ઉપન્યાસ માનૈ। ઔં ઉપન્યાસ આપ સન् 1903 મેં લિખ્યો। આપ ‘કેસર વિલાસ’, ‘ફાટકા જંજાળ’, ‘બુઢાપા કી સગાઈ’ (લઘુ નાટક), સંગીત માનકુંવર આદ કેર્દી નાટક લિખ્યા। ‘મોત્યાં કી કંઠી’ આપરી પદ્ય-રચના હૈ। આપરો લેખન કથ્ય અર સિલ્પ દોનું દીઠ સૂં રાજસ્થાની ગદ્ય નેં સબળો બણાયો। આપરે લેખન રા ખાસ સુર હૈ— દેસ રી આજાદી રો ચાવ, જૂની સંસ્કૃતિ નેં આધુનિક સંસ્કૃતિ મેં વૈગ્યાનિક રૂપ સૂં ઢાળણો અર સમાજ-સુધાર।

પાઠ પરિચૈ

‘કનક-સુંદર’ ઉપન્યાસ રો મૂલ ધેય હૈ— સમાજ-સુધાર। ઔં ઉપન્યાસ આદર્શવાદી દીઠ સૂં રચીજ્યો હૈ। ઉપન્યાસ સૂં સાચ, મૈણત અર ઈમાનદારી જૈડા સફળતા રા સૂત્રાં રી આ સીખ મિલે। મુરલીધર મૈણત અર સર્વાઈ સૂં રાજ અર સમાજ મેં ઘણા માનીતા અર ધનવાન હોય જાવૈ। વારો બ્યાંવ ભાઈ-ભાભી કરાવૈ। વારો લડકો હોવૈ, ઉણરો નાંવ કનક કઢાઈજે। ઉણરે સાગો સુંદર પઢૈ। દોનું રો બ્યાંવ હોય જાવૈ। આગે રો હાલ દૂજૈ ભાગ મેં। દૂજૌ સાયદ લિખીજ્યો ઈ કોની। ઇણ મેં રાજસ્થાની જીવણ રો ફૂઠરો ચિત્રણ હોયો હૈ। ઉણ સમૈ રી કેર્દી સામાજિક બુરાયાં અર સમસ્યાવાં ભી પ્રકાસ મેં આવૈ। ઉપન્યાસ માથૈ નાટક સૈલી રો પ્રભાવ દીખૈ। ઉપન્યાસ ઘટણા અર વરણન પ્રધાન હૈ। સાફ અર સરલ અભિવ્યક્તિ આપરી ભાસા-સૈલી મેં સગળે પ્રગટૈ।

‘કનક-સુંદર’ રો અએક ભાગ ઈ સાહીં આયો, વૌ ભી મિલણો દુરલભ હૈ।

કનક-સુંદર

(૧)

દોપહર દિન કો બખત, ચ્યારાં કાની લૂ ચાલ રહી છૈ, હવા કા જોર સૂં બાદ્ય અઠી કી ઉઠીનૈ ઉડ-ઉડ કર બ૰્ંની કા નવા-નવા ટીબા હો રહ્યા છૈ। ઓર ભીંજણ ભી રહ્યા છૈ, મુંહ ઊંચો કર સામનૈ ચાલણો મુસ્કલ છૈ, લૂ કપડા માહે બડ કર સારા સરીર નેં સિકતાવ કર રહી છૈ। ધૂપ ઇસી જોર કી પડ રહી છૈ કે જમીં ઊપર પગ દેણો મુસ્કલ છૈ। રસ્તા માહે દૂર-દૂર કઠૈ હી ઝાડું કો નાંવ નહીં, બાદ્ય ઉડકર જગાં-જગાં નવા ટીબા હોણે સૂં રસ્તા કો ઠિકાણો નહીં, આદમી તૌ દૂર, રસ્તા માહે કોર્ઝ જીવ-જિનાવર કા ભી દરસણ નહીં, ઇસી બખત, અએક જવાન આદમી, જિણકી ઉમર સોલ્લા-સતરા બરસ કી થી, માથી કપડા સૂં બંધ્યો હુવૌ, પીઠ પર સામાન કી પોટલી લાદ્યાં હુવૌ, હાથ માહે લોટો-

डोर लटकायौ हुवौ, हुस-हुस करतौ अजमेर कानी चल्यो आरहौ छै, रैती गरम होणै सूं पगां के चरका लागकर फोड़ा आ रह्या छै। तौ भी जोर सूं चाल रह्यौ छै। मन माहे बार-बार बोल रह्यौ छै, कै “भाभी! साबास तनै! मनै थाळी पर सूं जीमता नै उठाकर घर छुड़ायौ! काई हरकत छै? रामजी म्हां का भी दिन कदै ही लासी जरां आप ही म्हांके पगां पड़ता फिरसौ! भाई तौ भाई छै! म्हैं तौ जाणतौ थो कै म्हारै लार कोई दौड़सी पण मा बिना कर्नै नैं पीड़ आवै? आज मां होती तो म्हैं घर बारै नीसरतौ काई? इन तरह रा विचार करतौ हुवौ अजमेर की टेसण ऊपर दाखल हुवौ।

खंडवा तरफ की गाडी जावा नै हाल पांच-छै घंटां की देर थी। पीठ पर को बोझौ उतारनै नीचै राख्यौ। पाणी बिना मुंह सूक रह्यौ थो सू बिरामण कनै सूं लोटौ भर जळ लेकर, खूब मूँडौ धोकर, थोड़ौ जळ पियौ, जरां कुछ होस आयौ। उता माहै अेक जणौ आकर इन मुसाफर को हाथ पकड़ कर बोल्यौ— जय गोपाल्जी की भाई साहब! कठीनै की तैयारी छै? क्यूं इन तरह काई? ” बिना मिल्यां ही परभारा टेसण पर आया? साबास! इन तरह चाहिजै।

—कुण भाई वंसीलाल जी? भला बखत ऊपर मिल्या! परभारा काई। म्हांको बखत ही अबार इन तरह को छै। घर माहै सूं काढ दीनौ जरा थे तौ खाली दोस्त छै, थांसूं मिलकर काई होणौ छै? इन तरह मुसाफर उदासी सूं बोल्यौ।

वंसी.— वाह साब वाह! दुनिया माहै दोस्त कै बराबर और कोई होतो होसी? मां-बाप सूं भी दोस्त ज्यादा काम आया करै छै। और साचा दोस्त की परीक्षा विपत पड़यांज हुवा करै छै, समझा मुरलीधरजी?

मुरली.— हां भाई! म्हैं तौ गरीब आदमी छूं। म्हैं काई इसौ दोस्त कै लायक छूं सूं मनै कोई काम आवै? दुनिया माहै पैसौ बड़ी चीज छै। पैसा वाला का हजार दोस्त-सगासोई ओर भाईबंध छै।

वंसी.— अब आ पोटली-वींटली लेकर कठीनै? परदेस जाणै को विचार दीखै छै? ठीक! पण आज कै दिन तौ म्हांके अठै चालौ, काल की गाडी माहै रवाना हो जायीजौ।

मुरली.— नहीं भाई! अब मनै दोस्ती का फांसा माहै मती नाखौ, अब मनै जाबा दौ। श्रीजी की कृपा सूं अणचींत्यौ मिलाप भी होयग्यौ। फेर आपकै अठै चालकर काई करणौ छै?

इन तरै मुरलीधर जी तिरस्कार-युक्त बोल्या खरा, पण मित्रता की मूर्ति सामनै खड़ी रहकर उणका हृदय कंपित करबा लागी। जाणै वंसीलालजी नै छोड़बा को दिल होवै नहीं और उणकै साथ उणकै अठै जाणै को भी दिल होवै नहीं। खूब धूप माहै घबराता-घबराता जोर सूं पांव उठाकर, जाणै गाडी की टैम मिलसी कै नहीं? तिकासूं दौड़ता-दौड़ता आया और जाणै की तैयारी पक्की हो गई। कठै ही दिल रुकबा नै जबा रही नहीं, इतना माहै वंसीलालजी को मिलाप हो गयौ और मन दुवध्या माहै पड़ग्यौ।

वंसीलालजी पूरौ आग्रह करनै आपका मित्र मुरलीधरजी नैं घरा ले गया। बिचारा मुरलीधरजी धूप की तीव्रता सूं, चित्त की व्याकुलता सूं और क्षुधा की आतुरता सूं घणा श्रमी हो गया था, जर्मी पर पग धरकर उठावणौ मुस्कल थो, तो भी प्रेम की रस्सी सूं खींचीजता हुवा वंसीलालजी कै अठै पूगा। घरां जातां पाण वंसीलालजी मुरलीधरजी को घणा प्रेम सूं आदर-सत्कार कीनौ। अर रसोई तैयार करायनै जिमाया। साम का दोन्यूं मिलकर हकीकत पूछी। सुणकर अचंबै रह्या। रात का रसोई जीम सुख-दुख की वातां करनै आराम कीनौ।

(2)

खंडवा की रचना ठीक छै। मोटौ स्हैर भी नहीं और छोटौ गांवड़ौ भी नहीं। टेसण को गांव होणै सूं रात-दिन लोगां को आणौ-जाणौ बण्यौ रहतौ। बैपार लंबौ-सो थो नहीं तौ भी मेहनत मजूरी वाला नैं निभाव की जगा थी। मुरलीधरजी उठै अेक छोटी-सी कोटड़ी भाड़ा सूं लेकर रहबा लाग्या। चारूं कानी फिरकर गांव देख्यौ। फेरी सूं कपड़ौ बेचबा को इरादौ कीनौ, किरकोल कपड़ौ, छींटा का टुकड़ा वगैरा दस-पंदरा रुपिया का घणी जांच करनै फायदा सूं लीना और फेरी देणी सरू कीनी। विचार कीनौ कै कपड़ा ऊपर थोड़ौ नफौ रखकर गिरायक नैं अेकज भाव

बोलणौ, माल बिकौ अथवा मत बिकौ, पहलै दिन सारा गांव माहैं फेरी दीनी, पण अेक भाव बोलणै सूं कुछ बिकरी हुयी नहीं। मुरलीधरजी दिल का पक्का और हीमत का पूरा। अेक निस्चय कर लीनौ कै झूठ तौ बोलणौ ज नहीं, क्यूं भी हो सचावट राखणी, देखां भला कांई परिणाम होवै ? दो-तीन दिन इण तरहै ही गया। फेर थोड़ौ-थोड़ौ कपड़ौ बिकवा लायौ। लोगां नैं मालप हो गयी कै बाण्यौ अेक बात बोलै छै, फेर उण माहैं कमी-ज्यादा करै नहीं। महिना-पंदरा दिनां पीछै बिकरी आछी होवा लाग गयी। ऊपर को ऊपर माल बेचकर जका को कपड़ौ लाता बीनै पैसा चुका देता। इण तरहै थोड़ा दिनां माहैं तीन-चार सौ की पूंजी हो गयी।

सांच नै आंच नहीं— सचावट दुनिया माहैं मोटी चीज छै। सच्चा आदमी पर सारां को विस्वास बैठ जावै। विस्वास बैठ्यां पीछै कोई बात की कमती नहीं, साच नैं कठै भी डर नहीं, धोकौ नहीं और खराबौ नहीं, सांच ऊपर सूर्य, चंद्र, तारा, प्रथ्वी चाल रह्या छै। सांच ऊपर राज्य को पायौ छै। सांच ऊपर वौपार की इमरात छै। सांच की लछमी बंधी हुई छै। जिण आदमी के पास सांच छै, उणकै सामनै अस्टसिद्धि-नवनिधि हाथ जोड़कर खड़ा छै। सांच के वसीभूत प्रत्यक्ष नारायण छै, सांच बिना सोभा नहीं, आबरू नहीं, धन नहीं, मान नहीं, कुछ भी नहीं, किसी भी विपत पड़ै, किसी परसंग आवौ, सांच नैं छोडणौ नहीं। राजा हरिसचंद्र सांच के वास्तै राज गमायौ, लुगाई-बेटा नैं गमाया, आप बिकर्यौ, नाना प्रकार का संकट भोग्या, पण सांच छोडी नहीं ! नळ राजा महा संकट भोग्यौ पण सांच छोडी नहीं। पांडवां राज गमायौ, वनवास भोग्यौ, पण सांच छोडी नहीं। इण तरहै ही म्हांका मुरलीधरजी सांच ऊपर कमर बांधकर सांच को पूरौ-पूरौ आश्रय लीनौ।

इण सचावट सूं खंडवा माहैं सारा ही मुरलीधरजी की सोभा करवा लाग गया। उण पर सारां को पूरौ-पूरौ विस्वास बैठ गयौ। अब कपड़ां कै ताईं बराणपुर, भुसावल, जळगांव तोड़ी जावा लाग गया। हजारां रुपियां को माल उधार मिलवा लाग गयौ। दुकान पर हर कपड़ा का थान ऊपर कीमत की चट्ठियां मार दीनी। अेक फरदी करनै बार सूं हर भाव का थान, नामूद कर दीना, इण तरहै की साख बंधी कै भाव बोलणै की कीनै जरूरत रही नहीं। कोई भी गिरायक साबत थान लेवै तौ थान पर रुपिया मंड़योड़ा देख कर बिना बोल्यां देय जावै। और किरकोल वाला फरदी माहैं भाव देखकर दाम देय जावै। डेढ दो बरस माहैं मुरलीधरजी आठ-दस हजार का मालक बण गया।

‘उत्तम खेती, मध्यम वौपार, कनिस्ट चाकरी और भीख निदान’ कहावत छै। खेती ऊपर तौ आपणौ सारौ ही देस छै। वौपार मध्यम कह्यौ छै, पण पारासर ऋसि को कहणौ छै कै वौपार माहैं लक्ष्मी पूरी, बीं सूं आधी खेती माहैं, बीं सूं आधी राजा री नौकरी माहैं और भीख माहैं तौ कुछ भी नहीं, इसी वास्तै वौपार सारा सूं घणौ ऊचौ अर श्रेस्थ छै, बीं को पार नहीं, अंग्रेज लोगां इत्ती बडी सत्ता और वैभव वौपार का कारण सूंज संपादन कीना छै। वौपार को मुख्य पायौ तथा आधार साच, उद्योग और नियमितपणा पर छै। टापटीप, व्यवस्थितपणौ, अेक बात, बखत की बखत भुगतावण, मीठी बात, नरमाई और गिरायक को आदर-सत्कार औ वौपार का अंग छै, अंग्रेज लोग मिट्टी को सोनौ कर रह्या छै। बै लोग कोई काम माहैं फस भी जावै तौ बींकौ पीछौ छोड कर निरास होकर बैठै नहीं, पूरौ पीसौ लेकर बीं काम नैं सेवट लेय जावै। आज सारौ दुनिया भर को वौपार उण लोगां कै हाथ माहैं छै।

(3)

अेक दिन इठै का बडा साहब कानी सूं कपड़ौ-लत्तौ और किरकोल माल की फैरिस्त आयी तिकी मुरलीधरजी आपका भाई नैं दीनी और कह्यौ कै फैरिस्त मुजब सारौ माल आपणा आदमी कै साथ देकर, माल की कीमत बराबर लगाकर, बीजक साथ देकर, भेज दियो। तिका परवाणै हजारीमलजी सारौ माल निकाल कर गुमास्ता कनै सूं बीजक लिखवाय नै भेज दीनौ। साम का मुरलीधरजी जमा-खरच देखबा लाग्या। साहेब का नांव सूं माल नौंध्योड़ौ देख्यौ। सारा माल की कीमत बराबर थी, परंतु काली बनात को थान, जका की कीमत खरच नफा सूधा नौ रुपिया वार की थी सूं हजारीमलजी जाण-बूझकर बारा रुपिया वार को भाव लगा दीनो थो। मुरलीधरजी देखकर चोंक उठ्या। और भाई नैं बोल्या कै औ कांई कीनौ ? नौ कै ठिकाणै बारा कियान लगाया ? आ बात आछी कीनी नहीं, बात नैं बट्टौ लगायौ।

हजारीमलजी सुणकर बोल्या कै काँई हुवौ ? चार-पांच सौ को माल गयौ जका माहै अेक बनात का दाम ज्यादा लगाया तौ काँई हरकत छै ? साहब लोगां को काम, बै किसा देखै छै ?

मुरली.— (दोरा होकर) बै किसा देखै छै ! नहीं-नहीं ! नारायण तौ देखै छै ना ? आदमी सूं तौ चोरी कर लेवां, पण श्रीजी कै आगे चोरी हो सकै काँई ? और इसी चोरी सूं फायदौ भी काँई ?

लाभ न होवै कपट सौं, जो कीजै व्योपार।

जैसे हांडी काठ की, चढै न दूजी बार॥

ओ काम आछौ नहीं हुवौ, आज ताँई म्हारौ नेम पूरै निभ्यौ, पण आज बीं को भंग हुवौ, मरजी नारायण की !

हजारी.— (नीचै झांककर) भाया ! इण माहै दोरौ होबा को काम काँई छै ? साहब नैं चिट्ठी लिखकर भूल सूं ज्यादा कीमत लगी सूं दाम करा ल्लौ। साहब तौ उल्टौ खुसी होसी, आगे इण माहै कोई आछी बात होगी छै। जरां औ इसौ काम हुवौ छै, भूलचूक को काँई ? भूलचूक तौ सदा लेणी-देणी छै।

मुरली.— (विचार माहै) ठीक छै, आज ताँई श्रीजी इण तरहै की म्हारा हाथ सूं भूल करायी नहीं, आज बडेरां का हाथ सूं हुयौ छै, सूं बोही नारायण सुधारसी।

इण तरहै बोलकर मुरलीधरजी झट अेक अंग्रेजी लिखबा वाळा नैं बुलाकर घणी नम्रता सूं अेक चिट्ठी साहब कै नाम लिखाकर भेजी कै म्हांका भाई की भूल सूं काळी बनात नौ रुपिया वार थी सूं बारा को भाव लगायौ गयौ छै, सूं बीजक दुरस्त करनै उत्ता रुपिया भेज दीजौ।

साहब कै पास माल पूग गयौ थो। दो-चार साहब और भी था। उणां की मेम साहब भी थी। माल सारां कै पसंद आयौ। कीमत भी ठीक नजर आयी। काळी बनात देख रह्या था। आपकै पास की बनात इण बनात सूं मिलायी, अेक बणाणै वाळौ, अेक कारखानौ, अेक नंबर, अेक रंग और अेक कपड़ौ, मेमसाहब नैं भाव पूछ्यौ तौ बोल्या कै तैरा का भाव की ममोई सूं आयौ छै, जरां साहब नैं बडो अचरज आयौ कै जो चीज ममोई माहै तैरा का भाव की बिकै सूं अठे बारा का भाव की कियां मिलसी ? इण तरहै सारौ ही माल किफायत वार छै। जाण-बूझकर बाण्यौ कठै कीमत तौ कमी लगायी नहीं छे ? आजू-बाजू का सारा ही लोग बोलबा लाग्या कै साहब ! नहीं बाण्यौ घणौज ईमानदार आदमी छै। आप मोटा साहब छौ तौ भी बौ ही भाव और कोई गरीब जासी तौ भी बौ ही भाव, कमती-ज्यादा को हिसाब बिंकै पास छै नहीं। कीं सूं पाई ई अेक को फरक नहीं। देसी लोगां माहै इसौ वौपारी दूजौ कोई देखण माहै छै नहीं। इण तरहै वातां हो रही छै।

इत्ता माहै मुरलीधरजी की चिट्ठी लेकर उणको आदमी आयौ। साहब नैं चिट्ठी दीनी, साहब चिट्ठी बांचकर अचंबै रह्या। और समझ्या कै मनैं खुसी करबा की बाण्या की आ चालाकी दीखै छै, इण माहै कोई सक नहीं, फेर आपका सईस नैं बुलाकर बोल्या कै तूं औ नौ रुपिया थारै पास रख, और मुरलीधर सेठ की दुकान ऊपर जाकर ऊंची सूं ऊंची काळी बनात अेक बार मांग, वार का नौ रुपिया मांगै तौ देकर लेय आ, ज्यादा दाम बोलै तौ पीछै आकर कमी रैवै सूं रुपिया लेय जाकर फेर लेय आ, तूं म्हारौ सईस छै जिकौ पतौ दीजै मती, पूछै तौ महू-को छावणी को छूं करनै बोलजै।

सईस झट मुरलीधरजी की दुकान पर जाकर ऊंची सूं ऊंची काळी बनात मांगी। वार भरका दाम वै ही नौ रुपिया मांग्या। बनात फाड़ दी और रुपिया नौ लेय लीना। बनात को टुकड़ौ लेकर सईस साहब कै पास आयौ। साहब पहली की बनात सूं मिला लीनी, उणकी खातरी हो गयी, घर माहै सूं सरकारी बार मंगा कर नापी। बराबर भरी, साहब झट आपकी डायरी माहै मुरलीधरजी को नांव नोंध लीनौ, और लिख रख्यौ कै 'रायबहादुर' की खिताब देणै माफक औ बाण्यौ छै। फेर कित्ती ही वार इण कै अठे सूं माल मंगायौ पण पाई को फरक पड़्यौ नहीं। सरकारी कामकाज माहै भी मुरलीधरजी नैं बुलाया, परंतु सारी बात सूं उणकी सचावट पायी गयी और सारां लोगां का मूं सूं

इण नर की बार-बार जठे-उठै सोभा ही सुणी, साहब की बाल-बाल खातरी हो गयी। और ‘रायबहादुर’ की खिताब देणै कै वास्तै सरकार माहै मुरलीधरजी की सिफारिस कर दीनी।

⌘⌘

अबखा सबदां रा अरथ

छै=है। भींजण=बिखरणौ। चरका=बालू पर पग बळणा। फोड़ा=फफोला, धाव। जरां=तद, तब। सगासोई=सगा-संबंधी। फांसा=फंदा। श्रमी=थाकग्या। फेरी=घूम-घूमनै कोई चोज बेचणी। परसंग=स्थिति, अवसर। तोड़ी=तक। फरदी=सूची, फेहरिस्त। नामूद=प्रगट। किरकोल=खुदरा। संपादन=आछी हासल, प्राप्ति। ठिकाणै=ठौड़ माथै, स्थान पर। बाण्यौ=बाणियौ, वौपारी। वाद भरका=गज रौ नाप। खातरी=आव-आदर, मान-मनवार।

सवाल

विकल्पाऊ पड़तर वाला सवाल

1. “भाभी! साबास तनै। मनै थाळी पर सूं जीमता नै उठाकर घर छुडायौ।”

इण वाक्य में किसौ भाव छिप्यौ है?

- | | |
|--------------|---------------|
| (अ) तारीफ रौ | (ब) निरासा रौ |
| (स) खीज रौ | (द) अभिमान रौ |

()

2. “जमीं पर पग धरकर उठावणौ मुस्कल थो।”

मुरलीधरजी रौ जमीं पर पग धरकर उठावणौ क्यूं मुस्कल हौ?

- | | |
|----------------------------------------------------|------------------------------|
| (अ) वंसीलालजी रै तिरस्कार रै कारण | (ब) भाभी रै वैवार रै कारण |
| (स) चित्त री व्याकुलता अर क्षुधा री आकुलता रै कारण | (द) अणचींत्यौ मिळाप होवण सूं |

()

3. “साहब चिट्ठी बांचकर अचंबै रह्या।”

साहब चिट्ठी बांचनै अचंभै क्यूं रह्या?

- | |
|-------------------------------------------------------------------|
| (अ) चिट्ठी में बनात रा भाव बारै रुपिया री जगां नौ रुपिया लगाया हा |
| (ब) चिट्ठी में बाण्या री चालाकी दीखै ही |
| (स) चिट्ठी में बीजक रा भाव बधायनै लिख्योड़ा हा |
| (द) चिट्ठी में बिल रा रुपिया जल्दी भेजण रौ लिख्यौ हौ |

()

4. “रायबहादुर की खिताब देणै माफक औ बाण्यौ छै।”

साहब मुरलीधरजी नैं खिताब देवणै री क्यूं सोची?

- | | |
|----------------------|------------------------|
| (अ) आछै व्यौहार खातर | (ब) ईमानदारी खातर |
| (स) प्रसिद्ध रै कारण | (द) लाभ पुगावण रै कारण |

()

साव छोटा पडूत्तर वाला सवाल

1. “हुस-हुस करतौ अजमेर कानी चल्यौ आ रह्यौ आदमी किण दसा में आय रह्यौ छै।” इणरौ वरणन करौ।
2. “साचा दोस्त की परीक्षा विपत पड़्यां ई हुया करै छै।” आ बात कुण, किणनैं अर कद कही।
3. खंडवा माहै मुरलीधरजी की साख आछी क्यूं बणगी ?
4. मुरलीधरजी साहब कै नाम चिट्ठी क्यूं लिखवाई ?
5. मुरलीधरजी बाबत लोगां माहै कांई बातां हो रही छै ?

छोटा पडूत्तर वाला सवाल

1. साहब नैं मुरलीधरजी रै सांच री खातरी कियां हुई ?
2. पाठ रै आधार माथै गरमी री दोपहर रौ वरणन करौ।
3. ‘कनक-सुंदर’ उपन्यास रै मुजब खंडवा री रचना बाबत चार ओळ्यां लिखौ।
4. ‘सांच नैं आंच नहीं’ सांच री महिमा नैं बतावतां पांच ओळ्यां लिखौ।
5. वौपार रा अंग कांई-कांई छै ?

लेखरूप पडूत्तर वाला सवाल

1. ‘कनक-सुंदर’ उपन्यास रै नायक रै चरित्त उकेरौ।
2. ‘ईमानदार व्यौहार सफळता रौ द्वार’, सिद्ध करौ।
3. नीचै लिखी ओळ्यां रै भावां रौ खुलासौ करौ—
 - (1) आज मां होती तौ म्हैं घर बारै नीसरतौ कांई ?
 - (2) अेक बनात का दाम ज्यादा लगाया तौ कांई हरकत छै ?
 - (3) आज तांई म्हारौ नेम पूरौ निख्यौ, पण आज बींको भंग हुवौ, मरजी नारायण की !
4. नीचै लिख्योड़ा मुहावरां रौ अरथ लिखौ अर इणां सूं अेक-अेक वाक्य बणावौ—
 - (1) मुंह ऊंचौ करनै चालणौ।
 - (2) पग देणौ मुस्कल होवणौ।
 - (3) पगां पड़तां फिरणौ।
 - (4) फांसा माहै नाखणौ।
 - (5) सोभा करणौ।
 - (6) अचंबै रहणौ।
 - (7) खातरी होवणौ।

□कहाणी

अलेखूं हिटलर

विजयदान देथा

कहाणीकार परिचै

साहित्य रै नोबल पुरस्कार सारू भारत री तरफ सूं नामित विजयदान देथा रौ जलम 1 सिंतंबर, 1926 नै जोधपुर जिलै रै बोरूंदा गांव में होयौ। वांरी माता रौ नांव सिरुकंवर अर पिता रौ सबल्दान देथा हौं। विजयदान देथा 1949 में जसवंत कॉलेज, जोधपुर सूं बी.ओ. पास करी। राजस्थानी इणां री काळजयी कृति ‘बातां री फुलवाड़ी’ (1 सूं 14 भाग) है। ‘अलेखूं हिटलर’ आपरै चरचित कहाणी-संग्रे है। विजयदान देथा रै लेखन री सरुआत हिंदी सूं होयी। सै सूं पैली वांरी हिंदी तीन पोथ्यां—‘ऊषा’ (कविता-संग्रे), ‘बापू के तीन हत्यारे’ (आलोचना) अर ‘साहित्य और समाज’ (निर्बंध-संग्रे) छपी। इणरै पछै वै पूरी तरै सूं राजस्थानी भासा नैं समरपित होयग्या। आपरै गांव बोरूंदा मांय उणां ‘रूपायन’ संस्थान री थापना करनै लोक-साहित्य नैं उजास में लावण रौ महताऊ काम कर्यौ। विजयदान देथा राजस्थानी लोककथावां रै अलावा राजस्थानी लोकगीतां रै संग्रे-संपादन रौ ई काम कर्यौ अर ‘गीतां री फुलवाड़ी’ रा छह भाग छपवाया। जनकवि गणेशीलाल व्यास ‘उस्ताद’ री कवितावां रौ संकलन आपरै संपादकत्व में ‘कलम रौ उस्ताद’ नांव सूं छप्यौ। विजयदान देथा ‘राजस्थानी-हिंदी कहावत कोश’ रौ वृहद् संकलन ई त्यार कर्यौ जकौ आठ भागां में छप्यौ हैं।

विजयदान देथा केई पत्र-पत्रिकावां रौ ई संपादन कर्यौ। वांरै संपादित कस्थोड़ी पत्रिकावां में ‘वाणी’ अर ‘लोकसंस्कृति’ रा अंक संग्रे-जोग है। श्री देथा री केई कहाणियां माथै हिंदी फिल्मां बणी। इणमें मणि कौल रै निरदेसित ‘दुविधा’ अर प्रकाश झा रै बणायोड़ी ‘परणति’ खास है। राजस्थानी साहित्य में उम्दा सेवा सारू वानै साहित्य अकादेमी, नई दिल्ली रौ सैं सूं पैलौ ‘राजस्थानी भासा पुरस्कार’, भारत सरकार सूं ‘पदमश्री’ अर राजस्थान सरकार कान्नी सूं ‘राजस्थान-रत्न’ रौ सम्मान मिळ्यौ। इणां रै टाळ मोकळा पुरस्कार अर सम्मान आपरै मिळ्या। 87 बरसां री उमर मांय 10 नवंबर, 2013 नैं वांरै सुरगवास होयग्या, पण वांरै वृहद् साहित्य-सिरजण हमेस राजस्थानी साहित्य री अमोलक धरोड़ बण्यौ रैवैला।

पाठ परिचै

विजयदान देथा री कहाणी ‘अलेखूं हिटलर’ मरम नैं परसण वाळी कहाणी है। आरथिक सबल्ता रै पेटै पक्ष्योड़ी मानवी विदूपता रौ खुलासौ आ कहाणी करै। अेक साइकिल सवार रै ओळै-दोळै पूरी कहाणी आगै बधै। अखिल भारतीय साइकल दौड़ में सामल होवणौ अर जीतणौ उण साइकल सवार रौ सपनौ हौ, पण नूंवा मोलायोड़ा ट्रैक्टर सूं तीन-चार सौ री साइकिल आगै कीकर निकल सकै। वौ साइकल दौड़ में जीतण री खिमता वास्तै ट्रैक्टर सूं आगै निकलनै खुद री परख करणी चावै। आगै निकळ्यां पछै घड़ी अेक राजी होवै, सपना देखै, पण इण दौड़ री होड में ट्रैक्टर सवार च्यारूं ई भाई जिनावरां सूं ई फोरा बणग्या अर आपरै सामंतपणै रै मद अर आतमतोस सारू साइकिल सवार नैं ट्रैक्टर सूं चिंगद देवै। नूंवै ट्रैक्टर रौ मोद आ मांयलौ मद ऊगतै धान री पनैर नैं जड़ सूं उखेल न्हाखी।

कहाणीकार इण कहाणी में छोटा-छोटा संवादों में गैरी बात करै। कैवतां अर ओखाणां सूं लड़लूम भासा घणी सजोरी लागै। गिरज अर ऊंदरां रै ओब्वावै अत्याचार, अन्याव अर दानवी सुभाव री बात करै। मिनखीचारा नैं जींवतौ राखण वास्तै कहाणीकार सरू में ई कैवै कै वांरा उणियारा मिनखां जैड़ा मिनख, बोली ई मिनखां जैड़ी बोलता अर इणीज बात नैं कहाणी रै अंत में पाछी कैयैनै याद दिशावै कै मिनख विणास क्यूं करै, विणास क्यूं चावै? आपरी लांठाई रौं जोर निबलां माथै क्यूं जतावै? इण विणास-लीला नैं हिरोसिमा अर नागासाकी अर महाजुद्धां सूं तोलतौ कहाणीकार हिरदै नैं चीरण वालौं चित्राम दियौं है। मानवी संवेदनावां अठै मर जावै। कागला अर गिरजड़ां सूं ई बेसी मिनखां रा उणियारा डरावणा लागै। वौं मिनख कागला अर गिरजड़ां सूं ई फोरौं निजर आवण लागै।

आज ई इण दुभांत नैं मेटण री दरकार है। ट्रैक्टर रेत में फिरै तौ खेत खड़ीजै अर धान ऊगै, पण जे वौं ई ट्रैक्टर अेक निरदोस नैं मारण रौं साधन बणै, तौ इणमें उण निरजीव मसीन रौं काईं दोस? उण माथै बैठा सवार उण मसीनरूपी साधन नैं किण भांत परेटै, वौं तौ वाँरै ई विवेक माथै है। कहाणीकार विजयदान देथा इण कहाणी रै मारफत मिनख नैं खुद रौं अहम मारनै मानवी भावना जगावण रौं संदेस देवै। वरणन री विसेसता, ठेठ राजस्थानी सबदां री परेट, ध्वन्यात्मक सबदां सूं कहाणी में उठती हलचल पाठक रै मन में ई अेक अजाण अर अदीठ भौं (डर) जगावै। हया-दयाबायरा मिनखां रै वास्तै घिणा रा भाव आवतां ई नाड़ियां रगत में उकलण लागै। उण अत्याचार नैं मिटावण खातर अेक सावचेत अर साचौं मिनख ऊभौं दीसै, आ इज कहाणी 'अलेखूं हिटलर' री सारथकता है।

अलेखूं हिटलर

वै पांचूं ई मिनख हा। कोई ऊमर में छोटौं तौ कोई मोटौं। तीस अर पचास बरसां रै बिचालै सगळां री ऊमर ही। सबसूं लांठोड़ां रै माथा में कठैं-कठैं धोब्बा झांकण लागया हा। बाकी सगळां रा ई माथा काला-भंवर। उणियारा मिनखां जैड़ा ई हा। आंखां री ठौड़ आंखां। नाक री ठौड़ नाक। दांतां री ठौड़ दांत। हाथ-पगां री ठौड़ हाथ-पग। तांबावरणौं रंग। सगळां रै माथै धोब्बा पोतिया। किणी रै नवा। किणी रै जूना। लटु रा धोब्बा झब्बा अर धोब्बी ई धोतियां। कानां में निगोट सोना री सांकळियां अर मुरकियां। तीन जणां रै गळै कालै डोरां पोयोड़ा सोना रा फूल। सगळा मिनखां री बोली बोलता अर मिनखां री ई हाली हालता।

सगळां रै ई खेती री हलीलौ। खेत कमावता अर साखां निपजावता। गवूं, जीरौं, मिरचां, राई, बिराळी के मेथी इत्याद भांत-भांत री साखां रै मिस सूखी धरती री कूख सरसावता। देस री आजादी रै उपरांत लूंठा करसां रै फाचरै आई पण आई। आंधा होय धूड़ में बीज बूरता अर जाणै जित्ती कमाई बीणता!

आं पांचूं मिनखां रै ढंग-ढाला सूं औड़ै लखावतौं कै किणी मां री कूख सूं जलम नैं व्हियां, आं सगळां रै धरती री कूख सूं ई जलम व्हियौं। कैर, आक, खेजड़ी अर फोगड़ा फळै ज्यूं ई औं तर-तर बधिया अर फळिया। जाणै कुदरत री बनापाती ई आंरौं भाईपौ व्है।

पांचूं ई आगा-नैड़ा कडूंबै भाई हा। सीर में ट्रैक्टर मोलावण सारू गांव सूं जोधाणै जावै हा। झब्बां रै हेटै बंडियां रै ऊंडै खीसां में नोटां री सावल जाक्तौं करस्योड़ै है। सगळां रै ई मूडै रिपियां री झीणी आब झबूका भरती ही। धन री जड़ व्है तौ काळजा में ठेट ऊंडी पण उणरै अदीठां फळां री आब उणियारा माथै झळकै।

मोटर सूं उतरतां ई वै खीसां माथै हाथ फेरता पाधरा ट्रैक्टरां री धास्योड़ी दुकान कानी खाथा-खाथ व्हीर क्हिया। सड़क माथै पग टिकतां ई पाछा अजेज उठ जाता। वाँरै बस री बात व्हैती तौ कालूड़ी सड़क माथै पग टेकता ई नीं।

नाल रौ अेक पगोथियौ चढतां ई काच रै मांय रै धणी रौ माथौ सुभट निगै आयौ। पळकती टाट माथै निजर पडतां ई सगळा अेकण सागै बोल्या, “सुगनां री बात! खुदोखुद ओमजी ई मांय बैठा है।”

फड़कौ उधाडतां ई हेम री जात ठाडी हवा रौ लैरकौ आयौ। पांचूं ई अेकण सागै ऊंडा-ऊंडा निस्कारा खाँचिया। अेक जणौ बोल्यौ, “सुरग री मोजां तौ अै लोग माणै। अपां तौ ढोर-डांगरां री जूण भुगतां।”

ओमजी मुळकता थका झीणा अर गळगच सुर में बोल्या, “थांरी खेती-पाती सूं म्हारी दूकान रै आटै-साटै करता व्हौ तौ ना कोनी।”

“देखौ पिछतावोला!”

“छौ पिछतावतौ।”

सबसूं लांठोडौ भाई बोल्यौ, “चिपतां ई आ पिछतावा री बात काई छेड़ी। अै तौ आप-आपरा करम अर आप-आपरा काम है। करै जिणनैं ई छाजै।

गुदगुदा रबड़ री कुरसियां माथै बैठतां ई औड़ौ लखायौ जाणै वै बैठा ई नीं व्है। पतियावण सारू रबड़ में तीन-चार वळा आंगळियां खसोली तद वांनै बैठण रै पतियारौ व्हियौ। पछै कुरसियां रै हत्थां माथै खूणियां टेक नचीता व्हैगा।

रामा-सामा करूचां उपरांत अेक जणौ कह्यौ, “सेवट खपतां-खपतां म्हारौ ई नंबर आयग्यौ। आज रौ आज ट्रैक्टर खेंचावौ जकी बात करै। सांतरै वार अर सांतरी तिथ रै मौरत कढाय घर सूं व्हीर व्हियां सदिये-सदिये पाळा गांव बड़ता व्हैणी चावां। म्हे जाणांला कै ट्रैक्टर सारू दो दिन ई सबर नीं व्है।”

छोटकियौ भाई बोल्यौ, “दो दिन री भलां कही, म्हानै तौ घड़ी री ई सबर नीं व्है। लुगायां तौ म्हरै वहीर व्हैतां ई मोड़ा माथै ट्रैक्टर बधावण सारू ऊभगी व्हैला। सौ रिपिया वत्ता लागै जिणरी आंट नीं, पण ट्रैक्टर तौ आपनै अबारू खेंचावणौ पड़सी।”

वांरी खतावळ देख ओमजी मुळकिया। कैवण लागा, “म्हैं थां गांववाळं री आदत पिछाणूं। ट्रैक्टर कालै ई रेडी-रेट कर दियौ! मरजी व्है जाणै ट्रैक्टर खांच लीजौ।”

पांचां रै ई खुसी अर हरख रै पार नीं रह्यौ। जाणै आखी दुनिया रै राज हाथै लागण्यौ व्है। विचेटियौ भाई ओमजी री पळका पाडती टाट साम्हीं देखतौ बोल्यौ, “बडभागियां रै हाथ भर रै लिलाड़—पछै काई ढील! जीवता रैवौ।”

ओमजी सगळै भायां नैं ओळखता हा। नंबर री तपास करण सारू सेंग दो-दो, तीन-तीन वळा अै आयोड़ा हा। धंधा-परवांण पूजती ओळखाण ही। दीखतो सळियो सुभाव। मीठी बोली। झीणी मुळक। ढील री बणगट सूं औड़ौ लखावतौ जाणै ट्रैक्टर रै पुरजां री गळाई किणी कारखानां में ई सरूप रै निरमाण व्हियौ। मसीनां रै उनमान ई वांरी काया घडीजी। टाट री ठौड़ टाट। हेटै तीन कानी कड़बटीला बाळं री झालरी। गळा री ठौड़ गळै। मुळक परवाण मुळक।

साम्हीं बैठा पांचूं मिनखां रा उणियारा निरखता बोल्या, “अबै तौ नेहचौ व्हियौ। पण आखै मारग बस रा गटका खावता आया हौ। कीं सुस्तावौ। पाहरौ खावौ। ठाडौ पाणी पीवौ।”

इण मान-मनवार रै उपरांत वै घंटी बजाई। उण समचै ई अेक आदमी मांय आयौ। लस्सी लावण रै आदेस व्हियौ। हाजरिया रै बारै नीसरतां ई ओमजी कह्यौ, “थांरे घर रा दूध-दही री तो होड ई नीं व्है, पण दूजी मनवार ई काई करां। पाणी सस्तै दूध। मिचळौ दही। अै तौ फगत ठाडी हवा, ठाडौ पाणी, रबड़ री गीदियां अर बिजळी री चकाचूंध है। मिळवट रा ठाठ-भेळ रा गाजा-बाजा है। रिपियां साटै ई नीं धान मिळै अर नीं मुसाला। खावण-पीवण री मनवार करतां ई लाज आवै।”

अेक जणौ हंसतौ थकौ बोल्यौ, “जे साचा मन सूं मनवार करणी चावौ तौ घणी ई ऊंची-ऊंची चीजां मिळै। सुरग रै देवतावां नैं ईसकौ व्है जैड़ी। मनवार करै तौ औं चीजां है, नींतर लस्सी सूं काळजौ ठाडौ करणौ तौ दीसै ई है।”

सांनी साव सुभट ही। ओमजी जोर सूं हंसता थकां कैवण लागा, “अठै दुकान में औं ऊंची चीजां नैं चालै! सिंझ्या तांई ढबौ तौ म्हरै ठरका जोग घरै सरबरा कर सकूं।”

“थाँरै कैतां पाणी म्हांरी सरबरा तौ व्हैगी। औं माईपणौ ई घणौ। अेकर ट्रैक्टर निजरां तौ बतावौ।”

“लस्सी आवै। पीयनै चालां।”

“लस्सी किसी पाछी व्हाड़ा में बडै! ट्रैक्टर देख्यां पछै काळजौ घणौ झैरैला। वत्तौ स्वाद आवैला।”

ओमजी खुद साथै व्हीर व्हिया! कारखाना में ट्रैक्टर तौ त्यार-टंच पड़यौ ई है। लाल-बंब फरगुसन टैक्टर। जाणै ममोलिया री ढिगली अेकठ व्ही! माथै निजर पड़तां ई पांचूं भायां रौ अंतस रंगीजग्यौ।

ट्रैक्टर माथै सावळ हाथ फेर आछी तरै निरख-निरखाय सगळा ई पाछा कमरा में आया। लस्सी री गिलासां टेबल रा काच माथै ढक्योड़ी पड़ी ही।

कुरसी माथै बैठतां ई ओमजी कह्हौ, “भाईड़ां, जमानौ बदळियौ पण बदळियौ। पैलां तौ गांव में अेक ठाकर हौ, पण अबै तौ सगळा ई थाँरै जैड़ा मोटा करसा ई ठाकर बणग्या। आजादी रा ठाट सगळा थाँरै ई पांती आयग्या! छाछ-राबड़ी रा ई जांदा पड़ता जकौ अबै ऊंची-ऊंची चीजां पाणी रै उनमान खळकाइजै। हळ अर हींयड़ी मोलावतां जोर पड़तौ जका हजारूं रिपियां रौ ट्रैक्टर बपरावतां सोचौ ई नौं। काटीड़ां, आजादी रौ लावौ लोणौ व्है सो ते लीजौ। मन में मत राखज्यौ।”

चौथोड़ौ भाई बिचाळै ई बोल्यौ, “कैण रा धूड़ रा लावा है। धान खाय नीठ पेट भरां। हजारूं पीढियां लग विखौ भुगतियौ, आज थाँनै काणी रौ काजळ ई को सुहायौ नौं! भलौ व्है गांधी-बाबा रौ जकौ म्हांनै ई मिनखाजूण रौ साव लिरायौ। नींतर गांवां में बिजळी री मोटरां, रेडिया अर ट्रैक्टरां रौ कांई वास्तौ।”

“पण म्हांनै तौ अबै कागदां रा नोट खाय पेट भरणा पड़ेला! गिणिया दिनां सूं म्हां लोगां नैं तौ धान मिळणौ ई दूभर व्है जावैला।”

थे म्हांनै ट्रैक्टर पूरियां जावौ, म्हे थाँनै धान पूरियां जावांला! चावौ तौ माहोमाह लिखत करलां।”

बडोड़ौ भाई बोल्यौ, “कांई किणी नैं कीं नीं पूरै। भेंस खड़ खावै तौ आपरा पेट सारू। सै आप-आपैर मतलब रा छातीकूटा है। कोई आपरी गरज ट्रैक्टर बेचै अर कोई आपरी गरज ट्रैक्टर मोलावै।”

आपैर कानां आं सबदां रौ भणकारौ पड़यौ तौ बडोड़ा भाई नैं लखायौ कै बात कीं अंवळी उळझगी! पाछौ तांतौ सांधंय री चेस्टा करतौ थकौ कैवण लागौ, “हां ओमसा, बात तौ थे साची ई फरमाई। बाबा रै परताप म्हांनै आजादी रै उपरांत सुख रौ साव तौ खासौ-भलौ आयौ! घर-घर धान रा ढिगला, धीणा री धेचाळ्या...!”

बिचाळै ई टाटियौ माथै धूंता ओमजी कह्हौ, “घर-घर री बातां झूठी! इणिया-गिणिया थां मोटोड़ा करसां री अवस मन जाणी व्ही।”

छोटकियौ भाई थोड़ौ-घणौ भणियोड़ौ हौ। बोल्यौ, “मन जाणी तौ कांई व्ही, दुख रौ टूंपौ कीं खोलौ व्हियौ, इण सूं सोरौ सांस आयौ। सुख रा साव तौ हाल चांद ज्यूं घणा अळ्या है।”

बिचेटियौ भाई फालतू री झिकाळ रौ निवेड़ौ करता थकां बोल्यौ, “चांद सारू झांपळियां मारण में कीं सार नौं। मतलब री बात करै। खीसां मांयला नोट काढ ओमजी नैं संभळवौ। अपां री चीजां देख-भाल करनै हानै करै! बगत तौ बातां करां तौ ई बीतै।”

जाणे अणछक भूल्योड़ी बात याद आयगी। अजेज खीसां में हाथ बड़िया। टेबल माथै नोटां री ढिगली व्ही। पचास घोड़ां री ताकत रै विलायती फरगुसन ट्रैक्टर रै सागै ट्राली, तवियां, झूलौ अर हेरै। साठ हजार रिपियां रै निवतौ हौ।

अठी ओमजी नोटां नैं गिण-गिणाय दराज तालैके कर्स्या अर उठी सगला भाईड़ा अेकण सागै उठिया अर आपरी चीजां हानै करण सारू कारखाना री सोय करी। बडोड़ा भाई रै कहां छोटिकियौ भाई सुरंगी मालावां, साख्या सारू रातौ रंग, गुळ अर छः: रम री बोतलां खरीदण वास्तै बजार कानी व्हीर व्हैगौ। बाकी चारूं भाई टिकिया जकौ हमालां साथै जुतनै झपाझप ट्राली भरली। वै आपरै काम सूं निवडिया जितै छोटिकियौ भाई आयग्यौ। अणूता कोडे सूं गुळ बेंच्यौ! मालावां सूं ट्रैक्टर सिणगार्यौ! साम्हो-सांम साख्यौ कोरस्यौ। छोटिकिया तीनूं भाई खामची डलेवर हा।

व्हीर व्हैतां ई खासौ दिन ढळ्यायौ। सूरज आथूण दिस रै ओलै लुकण री त्यारी में इज हौ! अजमेर-जैपर सड़क वाली चुंगी-चौकी सूं सूं धकै निकलतां ई खुली सड़क ही। फरफरावती मालावां सूं सिणगारियोड़ै ट्रैक्टर धरर-धरर चालतौ हौ। माथै पांचूं भायां नैं औड़ौ लखायौ जाणै सड़क री ठौड़ आभौ ई वांरै ट्रैक्टर रै तळै पाथरग्यौ व्है। अर साम्हली धरती वांनै नारेक्कां सूं ई साव छोटी लखाई। आथमतौ सूरज जाणै वांरा ई वारणा लेवतौ व्है। आख्या दुनिया रा हरख वांरै हिवड़े भरण लागौ। सोना रै फूलां रौ परस करनै जाणै ढळता सूरज री किरण सारथक व्ही। रुंख-बांठकां में चापल्यियोड़ा पंछी ट्रैक्टर री धरधराहट सुननै कानी-कानी उडता तद वांनै औड़ौ लखावतौ जाणै वांरै अंतस रौ आणंद ई आं पखेस्वां रौ रूप धरनै कानी-कानी उडै।

कै इत्ता में सूं-सूं करतौ तीखौ सरणाटी वांरै कानां खणकियौ। झिझकनै अठी-उठी जोयौ। पांख्यां थाम्योड़ै अेक बाज नीचौ उतस्यौ अर देखतां-देखतां सिणतरा रै पाखती चापल्यियोड़ा अेक धोला सुसिया नैं आपरै पंजा में झांप पाछौ उडग्यौ। पांचूं ई अेकण सागै हंसनै अेक दूजा रै साम्हीं जोयौ। बडोड़ा भाई बोल्यौ, “जोग किणी भाव नैं टळै। इणी सिणतरा रै पसवाड़े बाज रै पंजां इण सुसिया री मौत लिख्योड़ी ही।”

बाज अदीठ व्हियौ जितै वै उठी देखता रह्या। ट्रैक्टर री धरधराहट चालू ही। नाला री ढळांत रै बीचोंबीच पूगतां ई चौथोड़ौ भाई बोल्यौ, “नीं-नीं करतां ई खासौ अबेळै व्हैगौ। पण तौ ई सांतरै मौरत रौ टाणौ सजग्यौ। गांव सूं वहीर व्हैतां सुगन ई टाळका व्हिया हा।”

चढांत ढळतां ई वांनै दो-अेक खेतवा धकै साइकिल चढ्यां अेक मोर्कार निगै आयौ! अर उठी मोर्कार नें कीं धरधराहट सुणीजी तौ वौ लारै मुड़नै जोयौ— कोई ट्रैक्टर आवै दीसै। वौ तुरंत पाछौ मुड़नै खाथा-खाथ पैडल दाबिया। ट्रैक्टर वालां सूं उणरी वा खथावल छानी नीं री। छेती बधतां ई वै आ बात लखग्या। ट्रैक्टर चलावतौ भाई बोल्यौ, “कालौ कठा रौ ई! कित्ता ई आंचै पैडल मारै तौ कार्इ व्है। ट्रैक्टर सूं धकै जायनै कितोक जावैला!”

वौ थोड़ी-सी रेस वळै बधायी। ट्रैक्टर री धरधराहट ई वती व्ही। साइकिल वाला रै कानां ई इण बात रौ बेरै पड़ग्यौ। वौ वळै आयै-आयै पैडल दाब्या। कीं छेती वळै बधगी।

तर-तर बधती छेती ट्रैक्टर चलावता भाई रै हीये झरी कोनी! वौ वळै कीं रेस खांची। छोटिकियौ भाई बोल्यौ, “मां रौ मांटी, सेवट तौ थाकैला। थोड़ी ताळ राजी व्है तौ छौ व्हैतौ।”

विचेटियौ भाई बोल्यौ, “उघाड़माथ्या छोरां री औड़ी इज अंवली बुध व्है!”

धरधरातौ ट्रैक्टर सड़क नैं सवेटतां दौड़तौ हौ। सुरंगी मालावां हवा में वत्ती फरफरावण लागी। बडोड़ा भाई बोल्यौ, “मतै ई आहज्जेला। क्यूं बिरथा रेस खांचै! ट्रैक्टर आगै बापड़ी साइकिल री कार्इ जिनात।”

चीं-चीं करती अेक तीखी चींचाट अणछक वांरै कानां सुणीजी। बिल में बड़ता-बड़ता ऊंदरा नैं अेक चील हांकरतां झांप लियौ। वा चीं-चीं उण मरता ऊंदरा री ही। थोड़ी ताळ में चीं-चीं री आवाज इण दुनिया सूं बिलायगी।

सूरज री आधी कोर झूबगी ही। अबै वौ ई रात-भर तांई बिलाय जावैला। झूबता सूरज रै ओळूं-दोळूं गुलाल ई गुलाल पाथरग्यौ। जाणै ट्रैक्टर रै कसूंबल रंग रौ ई उण ठौड़ प्रतम पड़ै।

डलेवर रै टाळ च्यारूं भाई डूबता सूरज सूं मीट हटाय धकै जोयौ— और! साइकिल अर ट्रैक्टर री छेती तौ तर-तर बधती ई जावै! सगळां रै मन में ओकण सागै ओक बात ई रड़के— सौ-दो सौ रिपल्ली री साइकिल अर साठ हजार रिपियां रौ ट्रैक्टर। आ कोई होड में होड! ऊंदरौ हाथी सूं आथडै!

दूजोड़ौ भाई बोल्यौ, “फिंपरौ फाटनै मरग्यौ तौ घरवाळं सूं छेती पड़ जावैला।”

चौथोड़ौ भाई बोल्यौ, “राम जाणै घरवाळं सूं छेती कद पड़ै, पण अपां रै ट्रैक्टर सूं तौ छेती खासी बधती ई जावै है।”

छोटकियौ भाई थोड़ौ रेस वळै खांची। नवौ अटंग ट्रैक्टर हौ। पूरी रेस खंचणी सावळ कोनी।

साइकिल वाळौ लारै मुड़नै जोयौ। साचाणी वौ खासौ आगै निकल्यौ हौ। वौ जोस अर हूंस में वळै जोर सूं पैडल दाब्या। पग तौ जाणै भरणाटै चढ़ग्या व्है। ढूंगर सूं खलकता झरणा रै वेग साइकिल सड़क माथै रळकती ही। जाणै कोई बतूल्यौ साइकिल रौ रूप धारण कर लियौ व्है अर कै वौ मोट्यार वतूल्या माथै सवार व्हैगौ व्है।

ट्रैक्टर माथै बैठा सगळा भाई ध्यान सूं देख्यौ। साचाणी छेती खासी बधगी ही अर तर-तर बधती ई जावै। माळावां सूं सिणगास्योड़ौ विलायती ट्रैक्टर! पचास घोड़ां री ताकत रौ! साठ हजार रिपियां री लागत रौ! अर आ दोसौ रिपल्ली री साइकिल! अर औ कॉलेजियौ छोरौ! उघाड़े माथै! नेकर पैस्योड़ौ।

हवा रौ जोर सूं फटकारौ लाग्यौ तौ ओक माळा रौ डोरौ तूटग्यौ। वा चारूं कानी अठी-उठी फरफरावण लागी। कदैई दोबड़ी व्है जाती। कदैई पाधरी व्है जाती। ओक माळा रौ डोरौ वळै तूटग्यौ।

ट्रैक्टर चलावता छोटकिया भाई रै काळजै फरफरावती माळावां रै मिस जाणै झाटी रा सडिंदा लागा। वौ दांत पीसतौ—पीसतौ ई पूरी रेस खांची! तोप सूं छूट्या गोळा रै वेग ट्रैक्टर ठौड़ण लागौ। हवा में चारूंमेर धरधराहट ई धरधराहट गूंजण लागी! ट्रैक्टर तळै पाथस्योड़ौ आभौ पाछौ पैलां सूं ई ऊंचौ— घणौ ऊंचौ चढ़ग्यौ है।

कीं छेती कम पड़ी! वळै कम पड़ी! हां, अबै तौ खासी कम पड़गी।

टोपसी रै उनमान छोटी लागती दुनिया फगत दो ठौड़ सिवटनै बिखरगी ही। ट्रैक्टर अर साइकिल-सवार टाळ वांनै दुनिया री किणी तीजी बात रौ ध्यान नीं हौ। साठ हजार रिपियां रौ ट्रैक्टर अर दो सौ रिपल्ली रौ खीलौ!

जोग री बात कै लगती दो मिलटरी री गाडियां साम्हीं आई तौ ट्रैक्टर री रेस धीमी करणी पड़ी। बाईसिकल वाळौ मोट्यार औ ताखौ राख खासौ आगै निकल्यौ।

बिचेटियौ भाई बोल्यौ, “औ उघाड़माथ्या छोरा कित्ता ओटाळ व्है! गाडियां रौ उकरास लगाय सपाक आगै बधग्यौ।”

बडोड़ौ भाई बोल्यौ, “बापड़ौ थोड़ौ ताळ मोदीजै तौ छौ मोदीजतौ! कित्तोक आगै जावैला। सेवट तौ सांस तूटैला ई। बावळौ, आपरी जवानी गालै! नसां ढीली पड़गी तौ लुगाई रै काम रौ ई नीं रैवैला। आ जवानी कोई साइकिल माथै उतारण सारू नीं व्है।”

खुली सड़क मिळतां ई छोटकियौ भाई पाछी पूरी रेस खांचली। जाणै सोर नैं बत्ती बतायी! हवा नैं अपड़ण सारू झांपल्यां भरतौ ट्रैक्टर जाणै आंधी रौ इज रूप बणग्यौ! अर तर-तर छेती भांगती ई गी!

ट्रैक्टर री धरधराहट सलबै सुणी तौ वौ ओकर वळै लारै मुड़नै जोयौ। रीस में तणकारौ देय पाछौ मुड़यौ। फिड़कती रै उनमान उणरा दोनूं पग चकरी चढिया सो चढता ई गियौ। अबै उणनै थोड़ौ-थोड़ौ परसेवौ होवण लागौ हौ। वौ राजस्थान रौ सबसूं तेज साइकिल चलावणियौ हौ। हां, वौ ई ओक मिनख हौ। बूकियां री ठौड़ बूकिया। पगां री ठौड़ पग। अर सांस री ठौड़ सांस! सपनां री ठौड़ सपना।

वौ नित साठ-सित्तर मील साइकिल बगड़ावण करतौ। लारला दो महीनां सूं अभ्यास करै। धकलै महीनै अखिल भारतीय साइकिल दौड़ में अगवाणी रैयग्यौ तौ कदास पैरिस जावण री बारी आ सकै। आज इण ट्रैक्टर री होड में उणरी परख व्है जाणी है। दांत पीसनै आपैर करार सूं ई सवाया पैडल दाब्या।

साइकिल चलावण री लकब अर आंट देख उणरै साथै भणती अेक साथण पैलपोत चिपतां ई सीधौ ब्यांव रै प्रस्ताव धर्ख्यौ! वौ पाढौ सुभट हां-ना रौ कीं पडूतर नीं दे सक्यौ! थोड़ा दिन साथै रह्या, माहोंमाह वंतळ कर्ख्यां, अेक-दूजै रै अंतस नैं सावळ ओळखियां मतै ई सगळी बातां सुभट व्हैगी। अखिल भारतीय साइकिल दौड़ सूं निवङ्ग्यां उपरांत ब्यांव रौ कौल कर लियौ! वौ विखा में पळ्योड़ै हौ। वा आसूदा घर में रम्योड़ी ही। पण दोनूं ई अेक-दूजा माथै जीव देता। अेक दांत रेटी टूटती! ब्यांव री लाखीणी रात वारी सेजां चांद उतरैला!

अणछक वाहेली रौ उणियारौ उणरी आंख्यां साम्हीं भव्यकियौ! जाणै वा हवा रै मिस आज री आ होड निरखै। उणरौ करार दस गुणा बधग्यौ! पगां रै जाणै पांखां लागागी। भलां वाहेली री अदीठ निजर सूं वत्ती इन निरजीव ट्रैक्टर री कांई जिनात! छेती बधण लागी सो तर-तर बधती ई गी! देखतां-देखतां पैलां सूं ई डोढी छेती पड़गी। ट्रैक्टर री रेस पूरम-पूर खांच्योड़ी ही। इण सूं आगै किणी रौ कीं जोर नीं हौ। पांचूं ई भयां रौ मन मठोठी खावण लागौ। चारुंमेर री सूंसाड़ा भरती हवा धरधराहट रा पळेटा में अळूङ्गागी ही! आखी दुनिया रौ राज हाथां में आयोड़ै देखतां-देखतां खुस जावैला!

तोप रै गोळा रै वेग ट्रैक्टर मलपतौ हौ। साइकिल वाळा उघाड़माथ्या छोरा रै पगां में जाणै कोई वतूळियौ सरण लेली व्है! वाहेली रौ उणियारौ उणरी आंख्यां साम्हीं झबूका भरतौ हौ। छेती तर-तर बधण लागी। नीं तौ उणरौ फींफरै फाट्यौ अर नीं उणरौ सांस तूटौ। पण ट्रैक्टर रै टंग्योड़ी आधी माळवां तूट-तूटनै हेटै खिरगी। ट्रैक्टर माथै बैठा वै काटी दूजौ जोर ई कांई करता!

पण अदीठ रै जोर अर जोग रो किणी नैं की बेरो नीं हौ! वतूळियौ बण्योड़ा पग अणछक खाली घूमण लागा। साइकिल री चैन उतरगी ही। तौ ई वौ कीं हाबगाब नीं व्हियौ। ट्रैक्टर रै वेग रौ कूंतौ उणरा पग मतै ई कर लियौ हौ। वाहेली रौ उणियारौ च्यारुं कानी दीप-दीप करण लागौ। इण ताकत सूं ऊंची तौ दुनिया में दूजी कीं ताकत नीं। वौ तुरत साइकिल थाम फूंदी रै उनमान हेटै उतर्ख्यौ। स्टैंड माथै ऊभी करनै वौ निरांत सूं चैन चाढण लागौ।

तर-तर छेती कम पड़ती गी! ट्रैक्टर री धरधराहट अर पांचूं भायां री खुसी हवा में मावती नीं ही। भलां जोग रा जोर नैं कुण पूगै! साठ हजार रिपियां री लाज रै ढाका-दूमौ व्हैगौ। इण भांत रै झूठा संतोख सूं कोई आपरौ मन पोखै तौ उणरौ कुण कांई करै!

ट्रैक्टर री धरधराहट साव सलबै सुणीजण लागी। चैन चाढण री हळफळाई खथावळ में साम्हीं वत्तौ मोड़ै व्हैतौ गियौ! अर देखतां-देखतां ट्रैक्टर तौ साव पाखती आयग्यौ! पण उणनै तौ आपरै करार अर वाहेली रै अदीठ उणियारा रौ अंजस हौ।

धरधरातौ ट्रैक्टर अडोअड़ आयनै धकै निकळ्यौ। पांचूं भाई मिनखां री बोली में कीं जोर सूं अेकण सागै बड़बड़ाया। उण वेळा ई कागलां री जान क्रांव-क्रांव करती माथा कर निकळ्यी। ट्रैक्टर री धरधराहट अर कागलां री क्रांव-क्रांव रै बिचाळै मिनखां री बोली सावळ उघड़ी कोनी।

वौ चैन चाढ साइकिल माथै चढ्यौ जणां ट्रैक्टर दोयेक खेतवा धकै निकळ्यौ हौ। च्यारुं भाई लारै मुड़नै देखण लागा। सोचण लागा कै गैलौ चैन चाढण रौ मिस करै। कदास अबै होड करण री हूंस ठाडी पड़गी दीसै। पण वौ तौ साइकिल माथै चढतां ई पाढौ वतूळियौ बण्यग्यौ! अर छेती तर-तर कम होवण लागी सो व्हैती ई गी।

मगसा-मगसा अंधियारा में कुदरत बुरीजण लागी ही। च्यारुं भाई आंख्यां फाड़-फाड़ देखण लागा। आ साइकिल तौ वळै धकै निकळ जावैला!

रेस पूरमपूर खांच्योड़ी ही। ट्रैक्टर रै वेग सूं आगै वांसै कीं जोर नीं हौ। सगळा ई दांत पीसण लागा।

ट्रैक्टर रा कसूंबल रंग माथै मगसी झाँई घिरण लागी। छोटकियौ भाई पूछ्यौ, “उघाड़माथ्यौ कठैक आवै?”

च्यारुं भाई दांत पीसता थका बोल्या, “औं तौ वळै हांकरतां ट्रैक्टर सूं धकै निकळ जावैला।”

“अबै तौ इणरौ बाप ई नीं निकळ सके।” आ बात कैतां ई छोटकिया भाई रै कानां बाज वाळौ सरणाटौ अर ऊंदरा वाळी चीं-चीं बारी-बारी सूं गूंजण लागी। थोड़ी ताळ उपरांत अेक कान में चीं-चीं अर दूजा कान में सरणाटौ ढबियौ ई नीं! बिरमांड री हवा जाणै इण गूंज सूं चीरीज जावैला! ट्रैक्टर रौ धरधराटौ ई इण गूंज में डूबग्यौ हौं!

अर उठी साइकिल वाळा उघाड़माथ्या री आंख्यां साम्हीं अेक दूजौ ई बिरमांड पळकतौ हौं! ठौड़-ठौड़ वाहेली रा उणियारा झमका भरण लागा— छिड़या-बिछड़या तारां में, रुंख-बांठकां में, धोरा में अर साम्हीं जावता ट्रैक्टर में, ट्रॉली में! आज उणरी परख व्है जाणी है! जे ट्रैक्टर सूं धकै निकळग्यौ तौ वेगौ ई ब्यांव कर लेला। वा मान जावै तौ कालै! नींतर पिरसूं। परलै रोज। जद-कद ई उणरौ मन व्है!

अबै तौ धकै निकळण में वारै ई काई! आखी दुनिया उणरा हथलेवा री मूठी में समाय जावैला। आंख्यां साम्हीं सोवन सपनां रौ बेजौ बुणीजण लागौ।

अर उठी जाणै बाज रै सरणाटा अर चीं-चीं री गूंज सूं हवा रौ रेसौ-रेसौ टूंपीजण लागौ हौं!

च्यारूं भाई किड़किड़ियां चाबता अेकण सागै बोल्या, “अधबेरडौ उघाड़माथ्यौ छोरौ तौ आज अपां रै पोतिया री जबरी सान बिगाड़ी!” पछै वै छोटकिया भाई नैं अेक जुगत बताई, “पाखती आवतां ई ट्रैक्टर आडौ करदै! औ ओटाळ ई काई जाणैला कै...!”

बाज रा सरणाटा अर ऊंदरा री चीं-चीं नैं मिनखां री वाणी रौ अरथ मिळग्यौ!

अर उठी उणरी वाहेली रा उणियारा रौ उजास ई खासौ बधग्यौ हौं। अेक-अेक उणियारौ साव सुभट दीखण लागौ।

अबै तौ ट्रॉली रै साव अड़ोअड़ पूगग्यौ। बाज रै सरणाटा अर ऊंदरा री चीं-चीं छोटकिया भाई रै माथा में चापळनै मून धारली ही।

वतूळिया रै वेग सूं दौड़ती साइकिल अणाछक ट्रैक्टर सूं टकराई। अेकर आंख्यां साम्हीं बीजळी पळकी। पछै दीप-दीप करतौ अेक-अेक उणियारौ बडौ व्हैतौ गियौ। ट्रैक्टर रै लारलौ काळौ टायर माथा रौ गिरड़कौ काढ दियौ। सगळा उणियारा अेकदम बडा व्हैगा!

हवा में वळै मिनखां री बोली गुणमुणाई— मां रौ मांटी, ट्रैक्टर सूं धकै जावण री हूंस राखै।

छोटकियो भाई कीं भण्योड़ी हौं। तुरंत अेक जुगत विचारी। थोड़ी अळगी भायं जाय ट्रैक्टर ढाब्यौ। धैलां मायं सूं बोतल काढतौ बोल्यौ, “बापडा नैं थोड़ी रम तौ पावां।”

पछै मिनख रै पगां-पगां वौ धकै बधियौ! साइकिल वाळा रै पाखती जाय बोतल रौ ढक खोल्यौ! उणरै मूँडा में आधी बोतल दारू ऊंधायौ! पछै माथा रै पाखती बोतल फोड़ वौ दौड़तौ-दौड़तौ ट्रैक्टर माथै चढग्यौ! धरधरातौ ट्रैक्टर धकै बधग्यौ! मोड़ा माथै ऊभी लुगायां बाट निहारती व्हैला! घरै गियां वानैं कोड सूं वधावैला!

हवा में मिनखां री हंसी रौ ठहाकौ गूँज्यौ!

अर उठी काळी सड़क रै माथै अेक चित्राम किणी उम्दा पारखी नैं उडीकतौ हौं। लाल रगत रै बिचाळै मिनख रौ धोळौ भेजौ! फुटोड़ी बोतल रा टुकडा। किणी मोट्यार री ल्हास! धोळौ नेकर! ठौड़-ठौड़ रगत रा छाबका! सोसनी बंडी! सपनां रौ किचड़कौ! मोह-प्रीत रा रेल्या! चित्राम कीं बेजा नीं हौं!

पण दोनूं महाजुद्धां रा चित्राम, हिरोसिमा, नागासाकी रा चित्राम अर बंगलादेस रा बेजोड़ चित्राम—इण नाकुछ चित्राम सूं घणा-घणा ऊंचा हा। घणा-घणा रूपाळा हा। औ चित्राम वांगी होड तौ नीं कर सकै, पण गिंवारू हाथां कोर्स्योड़ी औ छोटौ चित्राम ई कीं बेजा नीं हौं!

हां, वै पांचूं ई मिनख हा! मिनखां री बोली बोलता अर मिनखां री ई हाली हालता!

अबखा सबदां रा अरथ

लांठोड़ा=बड़ौ, बल्वान। पोतिया=साफा, पाघङ्गां। हलीलौ=धंधौ, कामकाज। फाचैरे=ताबै, काबू में। फळिया=फळ्या-फूल्या, बड़ा होया। बनापाती=वनस्पति, वन रा फूल-फळ अर पानड़ा। सुभट=साफ, स्पष्ट। पळकती=चमकती। पतियारौ=भरोसौ, विस्वास। बडभागियां=भाग्यसाली। ममोलिया=वीर बहूटी, मेह री डोकरी, बिरखा में पैदा होवणियौ मखमली रातौ जीव। झिकाळ=बिरथा बहस। रातौ=लाल। खामची=पारंगत, हुंसियार। चापळियोड़ा=दुबक्योड़ा, दोलड़ा व्हियोड़ा। पाथरग्यौ=पसरग्यौ, फैलग्यौ। मीट=दीठ, निजर। सडिंदा=ताजणै री फटकार, कौड़ा रा सड़ीड़। ताखौ=मौकौ। सलबै=साव नैड़ी, अेकदम कनै। आसूदा=राता-माता। फोंफरौ=फेफड़ौ, आंतङ्गां। हाबगाब=हाकबाक, आकळ-बाकळ। बांठकां=झाड़-झांखाड़। अधबेरड़ौ=बिगड़ैल, अधकालौ। गिरड़कौ=चिगद देवणौ। छाबका=धब्बा, दाग।

सवाल

विकल्पाऊ पड़ूत्तर वाला सवाल

1. हिरोसिमा अर नागासाकी किण देस रा महानगर है ?

(अ) जापान	(ब) इटली
(स) भारत	(द) जर्मनी

()

2. पांचूं भाई जोधाणै किण सारू गया हा ?

(अ) सगपण सारू	(ब) ट्रैक्टर लेवण सारू
(स) ब्यांव में	(द) घूमण सारू

()

3. पांचूं भायां रै रीस रौ कांई कारण हौ ?

(अ) ट्रैक्टर नीं मिळणौ	(ब) पईसा गमणा
(स) साइकिल वाळै रौ आगै निकळणौ	(द) किणी सूं राड़ै कारण

()

4. 'अलेखूं हिटलर' कहाणी रा कहाणीकार कुण है ?

(अ) अन्नाराम सुदामा	(ब) डॉ. कल्याणसिंह
(स) मालचन्द तिवाड़ी	(द) विजयदान देथा।

()

साव छोटा पड़ूत्तर वाला सवाल

1. पांचूं भायां रौ काम धंधौ चालतौ ?
2. ट्रैक्टर रौ मोल कांई हौ ?
3. साइकिल वाळै नैं आखिर ट्रैक्टर हेटै कुण दियौ ?

छोटा पङ्क्तर वाळा सवाल

1. पांचूं भायां रौ रूप-रंग कहाणी में किण भांत बखाणीज्यौ है ? लिखौ।
2. “भाइड़ां, जमानौ बदल्यौ पण बदल्यौ...।” ओमजी री इण बात माथै चौथोड़े भाई काँई विचार राख्या ?
3. साइकिल चलावती बगत साइकिल वाळा रै मन में काँई कल्पना अर सपना चालै हा ?

लेखरूप पङ्क्तर वाळा सवाल

1. ‘अेलखूं हिटलर’ मांय कहाणीकार किण हिटलरां री बात करै ? आज रै समाज में आंरी ओळखाण करावौ।
2. कहाणी रै तत्वां रै आधार माथै अलेखूं हिटलर कहाणी री विरोळ करौ।
3. विजयदान देथा री भासा अर सैली री इण कहाणी रै आधार माथै टीप लिखौ।

नीचै दिरीज्योड़ा गद्यांसां री प्रसंगाऊ व्याख्या करौ।

1. अणछक वाहेली रौ उणियारौ उणरी आंख्यां साम्हीं भळकियौ ! जाणै वा हवा रै मिस आज री आ होड निरखै। उणरौ करार दस गुणा बधग्यौ ! पगां रै जाणै पांखां लागणी। भलां वाहेली री अदीठ निजर सूं वत्ती इण निरजीव ट्रैक्टर री काँई जिनात ! छेती बधण लागी सो तर-तर बधती ई गी !
2. वतूल्या रै वेग सूं दौड़ती साइकिल अणछक ट्रैक्टर सूं टकराई। अेकर आंख्यां साम्हीं बीजळी पळकी। पछै धोळै भेजौ ! फूटोड़ी बोतल रा टुकड़ा। किणी मोरुयार री ल्हास ! धोळै नेकर ! ठौड़-ठौड़ रगत रा छाबका ! दियौ ! सगळा उणियारा अेकदम बडा व्हैगा !
3. अर उठी काळी सङ्क रै माथै अेक चित्राम किणी उम्दा पारखी नैं उडीकतौ हौं। लाल रगत रै बिचाळै मिनख रै धोळै भेजौ ! सोसनी बंडी ! सपनां रौ किचड़कौ ! मोह-प्रीत रा रेळा ! चित्राम कीं बेजा नीं हौं !

□**कहाणी** **बंटवारै**

हनुमान दीक्षित

कहाणीकार परिचै

कहाणीकार हनुमान दीक्षित रौ जलम 4 मई, 1943 में होयौ। अमे.ओ., बी.ओड. तांई भण्योडा श्री दीक्षित अध्यापन-सेवा करता थकां प्रधानाध्यापक रै पद सूं सेवानिवृत्त होया। आप हिंदी अर राजस्थानी दोनूं में लगोलग सिरजण कर्ख्यौ। राजस्थानी में वांग ‘गांव-गळी री कहाणियां’ अर ‘माटी रौ मकान’ कहाणी-संग्रे छप्योड़ा। ‘डाकी दायजौ’ नांव सूं आकासवाणी सारू रेडियो-रूपक ई लिख्यौ। आपरी कहाणियां जमीन सूं जुड़योड़ा ग्राम्य परिवेस री रंगत लियोड़ी है, जिणमें राजस्थानी री माटी री मधरी-मधरी महक आवै। वै केई साहित्यिक संस्थावां सूं जुड़योहा हा। राजस्थानी री सेवा सारू वांरै काम सरावण जोग रैयौ। वै राजस्थानी भाषा, साहित्य एवं संस्कृति अकादमी रा उपाध्यक्ष रैया। इणरै अलावा वै राजस्थान साहित्य अकादमी, उदयपुर रा ई सदस्य रैया। कहाणियां रै अलावा वां राजस्थानी में कवितावां, व्यंग्य, बाल-साहित्य अर निबंध ई लिख्या। आपरै सुरगवास 17 दिसंबर, 2015 नै होयौ।

पाठ परिचै

बडेरां री भेल्प अर साझा रीत नैं दरकिनार करती आज री पीढी री मनोदसा अर फंटवाड़े नैं चौड़े करती सास्वत कहाणी ‘बंटवारै’ आम आदमी रै जीवण री कहाणी है। आज भेल्प अर भाईचारै मिटता जाय रैया है। परिवार री संपत संपति रै चक्कर में चकरीज री है। गांव री आतमा में जकौ परमातमा रौ वासौ हौ, बठै बगत रै बदलाव री चौसर सगळौ सत्यानास कर न्हाख्यौ। लोगां री जमीन अर मन दोनूं बंट रैया है। जमीन रै बंटण सूं घरां री दरारां आंगणै सूं लेयनै मिनख रै मन-मगज तांई बधगी है। साझा खेती आरथिक, सामाजिक अर वैग्यानिक आद सगळी दीठ सूं महताऊ है, पण आप-आपरा स्वारथ मांयलै धीरज नैं कपूर बणाय दियौ। सगळी भेल्प, भाईचारै, रिस्ता री मीठास, मिनखाचारौ सगळौ कीं होळै-होळै मिनख सूं अळगौ होवै है। इण सारू चेतणौ जरूरी है। दीक्षित जी आपरी इण कहाणी मांय बंटवारै री पीड़ नैं सांगोपांग ढंग सूं उकेरी है अर आखर कहाणी रै अंत में भेल्प री हूंस अर आस सागै कथानक सिमटै। कहाणी में बगत सागै मिनख अर गांव दोनूं में बदलाव नैं बतायौ है। कुल मिलायनै बंटवारै कहाणी सामाजिक समस्या प्रधान ग्रामीण परिवेस री प्रासंगिक अर युगीन कहाणी री पांत में सिरै आवै।

बंटवारै

रामसरौ मोटौ गांव। चौधरी रतनाराम इलाकै रौ मोटौ मिनख। मोटी गुवाड़ी रौ धणी। रियासत रै बगत सूं मिल्योड़ी लंबरदारी। आजादी आयी। लंबरदारी गई परी, पण लोग अर सरकारी कारूंदा वाँनै लंबरदार सा ’ब कैवै। चौधरी कनै मोकळी जमीन। औ ई कोई तीन सौ बीघा अर तीन भाई। बिचलै रौ नांव हेतराम जकौ खेती-पाती री देखभाल करै। छोटै भाई रौ नांव साहबराम, जकौ दसवीं जमात तांई पढ्योड़ा। राजनीति भी करै, सागै ई मंडी जायनै खेती री निपज बेचणी अर बठै सूं घर री जरूरत मुजब चीज-बस्त खरीदनै ल्यावण रौ काम ई करै।

ਖੇਤੀ ਰੋ ਘਣਕਰੈ ਕਾਮ-ਪਾਡ़, ਪਾਤੀ, ਬੀਜਣੌ, ਅਨਾਜ ਕਾਢਣੌ ਆਦ ਟ੍ਰੈਕਟਰ ਸੂਂ ਕੱਹੈ। ਧਣ ਚੌਧਰੀ ਨੈਂ ਪੁਰਾਣੀ ਰੀਤ ਸਾਰੂ ਮਦੁਵੌ ਊਂਠ ਰਾਖਣ ਰੋ ਘਣੌ ਕੋਡ। ਸਰਦੀ ਰੈ ਟੈਮ ਮਾਂਧ ਬਾਖਲ ਮੇਂ ਖੜਕੌ ਊਂਠ ਬਲਬਲਾਵੈ ਅਰ ਮਾਕਡੀ ਪੀਟੈ ਜਦ ਦੇਖਨੈ ਚੌਧਰੀ ਰੋ ਜੀ-ਸੋਰੈ ਹੋਹ ਜਾਵੈ। ਚੌਧਰੀ ਸਵਾਰੀ ਕਰਣ ਖਾਤਰ ਘੋੜੀ ਈ ਰਾਖੈ। ਗਾਂਵ-ਗਾਂਵਤਰੈ ਕਰਨੈ ਵੌ ਅਪੂਠੌ ਆਵਤੌ ਤਦ ਭੀਮਲੈ ਰੈ ਤਾਲ ਮੇਂ ਪਡ਼ੀ ਘੋੜੀ ਰੀ ਟਾਪਾਂ ਸੂਂ ਟਾ ਪਡ਼ ਜਾਵਤੌ ਕੈ ਚੌਧਰੀ ਆਵੈ ਹੈ। ਵੌ ਕਾਰੁ-ਕਾਰਿੰਦਾ ਰੈ ਭਰੋਸੈ ਊਂਠ-ਘੋੜੀ ਨੰਂ ਛੋਡਤੌ। ਖੁਦ ਨੀਰਤੌ ਅਰ ਆਥਣ ਪੌਰ ਰੋ ਪਾਣੀ ਪਾਵਣ ਸਾਰੂ ਜੋਹਡੈ ਲੇ ਜਾਵਤੌ। ਗਾਂਵ ਰੀ ਬਹੂ-ਬੇਟਿਆਂ ਚੌਧਰੀ ਰੋ ਘਣੌ ਕਾਣ-ਕਾਧਦੌ ਰਾਖਤੀ। ਜਦ ਪਾਣੀ ਲਾਵਤੀ ਬੀਨਣਿਆਂ ਸਾਮ੍ਰਿੰ ਮਿਲ ਜਾਵਤੀ ਤੌ ਵੈ ਆਦਰ ਦੇਵਣ ਖਾਤਰ ਪੀਠ ਮੋਡਨੈ ਊਭੀ ਫਲ ਜਾਵਤੀ।

ਚੌਧਰੀ ਰੈ ਘਰੈ ਦੂਧ-ਛਾਛ ਰੀ ਕਮੀ ਨੰ ਹੈ। ਤੀਨ ਭੈਂਸ ਅਰ ਪਾਂਚ-ਛਹ ਗਾਧਾਂ ਨੋਹਹੈ ਮੇਂ ਹਰਦਮ ਬੰਧੀ ਰੈਕਤੀ। ਦਿਨ ਊਗਣੈ ਸੂਂ ਪੈਲੀ ਈ ਬਿਲੋਵਣੈ ਰੀ ਆਵਾਜ ਤਾਗਡੇ ਮੇਂ ਦੂਰ-ਦੂਰ ਤਾਂਈ ਸੁਣੀਜਤੀ। ਭਾਖ ਫਾਟਤਾਂ ਰੈ ਸਾਗੈ ਗਾਂਵ ਰੀ ਲੁਗਾਧਾਂ ਅਰ ਟਾਬਰ ਲੋਟਾ, ਹਾਂਡੀ ਅਰ ਜਗ ਲੇਯਨੈ ਛਾਛ ਖਾਤਰ ਚੌਧਰੀ ਰੀ ਡਾਂਡੀ ਮਾਥੈ ਊਭਾ ਹੋਹ ਜਾਵਤਾ।

ਆਥਣ ਪੌਰ ਚੌਧਰੀ ਰੀ ਚੂਂਤਰੀ ਮਾਥੈ ਗਾਂਵ ਰੀ ਚੌਪਾਲ ਜੁਡਧਾ ਕਰਤੀ। ਚੌਧਰੀ ਹੋਕੌ ਭਰਨੈ ਮੁੜੈ ਮਾਥੈ ਬੈਠ ਜਾਵਤੌ। ਸੈ ਭਾਂਤ ਰਾ ਲੋਗ ਆ ਬੈਠਤਾ। ਹੋਕੈ ਰੀ ਕੁਰਡ-ਕੁਰਡ ਰੈ ਸਾਗੈ ਗਾਂਵ-ਦੇਸ ਰੀ, ਸੁਖ-ਦੁਖ ਰੀ ਬਾਤਾਂ ਹੋਹਾ ਕਰਤੀ। ਚੌਧਰੀ ਗਾਂਵ ਰਾ ਗਰੀਬ-ਗੁਰਬਾਂ ਰੋ ਘਣੌ ਖਧਾਲ ਰਾਖਧਾ ਕਰਤੌ। ਜਦ ਕਦੈ ਝਲਾਕੈ ਅਕਾਲ ਰੀ ਚਪੇਟ ਮੇਂ ਆ ਜਾਵਤੌ ਤਦ ਆਪਰੀ ਬਖਾਰੀ ਅਰ ਚਾਰੈ-ਤੂਡੀ ਰੈ ਕੁਪਾਂ ਰੋ ਮੂੰਡੀ ਖੋਲ ਦੇਵਤੌ। ਸਗਲਾਂ ਰੈ ਸੁਖ-ਦੁਖ ਰੋ ਸੀਰੀ ਹੈ। ਜ਼ਰੂਰਤਮਦ ਮਿਨਖ ਤਮੀਦ ਲੇਯਨੈ ਆਵਤੌ ਅਰ ਮੂੰਡੈ ਪਰ ਹਾਂਸੀ ਲਿਧਾਂ ਪਾਛੀ ਜਾਵਤੌ। ਲੋਗ ਚੌਧਰੀ ਰੈ ਭਰੋਸੈ ਆਪਰੀ ਬੇਟੀ ਰੀ ਬਾਂਵ ਮਾਂਡ ਦੇਤਾ। ਬਣ ਜੰਕਤੈ-ਜੀ ਨਾ-ਨੁਕਰ ਨੰਂ ਕਰੀ। ਆਧੀ ਰਾਤ ਪਛੈ ਤਾਂਈ ਚੌਪਾਲ ਲਾਗੀ ਰੈਕਤੀ। ਜਦ ਹੋਕੌ ਠਾਂਡੈ ਪਡ਼ ਜਾਵਤੌ ਤਦ ਕਾਰੁ-ਕਾਰਿੰਦਾ ਖੀਰਾ ਅਰ ਤੰਬਾਕੂ ਓੜ੍ਹ੍ਹੂ ਟੇਕ ਲਾਵਤਾ। ਗਰਮੀ ਰੀ ਟੈਮ ਮਾਂਧ ਧੂਣੀ ਕੋਨੀ ਧੁਕਤੀ, ਧਣ ਸਰਦੀ ਮੇਂ ਸਗਲਾਂ ਬਿਚਾਲੈ ਧੂਣੀ ਧੁਕਧਾ ਕਰਤੀ।

ਗਾਂਵ ਮੇਂ ਕਾਮ ਸਾਰੂ ਸਰਕਾਰੀ ਹਾਕਮ, ਪਟਵਾਰੀ, ਸਿਪਾਹੀ ਆਦ ਆਵਤਾ ਤਦ ਲੰਬਰਦਾਰ ਰੀ ਬੈਠਕ ਮੇਂ ਰੁਕਤਾ। ਜਾਣ-ਪਿਛਾਣ ਵਾਲਾ ਈ ਨੰਂ, ਰਾਹ-ਬਗਤਾ ਬਟਾਉ ਭੀ ਰਾਤਵਾਸੈ ਲੇਵਤਾ। ਸੌਂਗ ਜਣਾ ਨੈਂ ਡੋਲ-ਮਾਜਣੈ ਸਾਰੂ ਆਵਭਗਤ ਅਰ ਰੋਟੀ-ਖਾਟ ਮਿਲਤੀ।

ਸੂਰਜ ਭਗਵਾਨ ਰੋ ਰਥ ਜਿਧਾਂ ਬ੍ਰੂਮੈ ਬਿਧਾਂ ਟੈਮ ਰੋ ਪਹਿਯੌ ਭੀ ਸਰਕਤੌ ਰੈਹੈ। ਲੰਬਰਦਾਰ ਆਪਰੀ ਤਮਰ ਰਾ ਅਸਸੀ ਫਾਗਣ ਦੇਖ ਲਿਧਾ। ਆਂਖਾਂ ਅਰ ਗੋਡਾ ਜਬਾਬ ਦੇਧਗਧਾ। ਅਬ ਘਰ ਮੇਂ ਅਰ ਬਾਰੈ ਸਾਹਬਰਾਮ ਰੀ ਚਾਲਣ ਲਾਗਗੀ। ਬੰਦੀ ਰੋ ਰਾਜਨੀਤਿ ਕਰਣ ਰੋ ਚੱਕੈ ਬਧਤੌ ਗਹੈ। ਪੰਚਾਧਾਰ ਰਾ ਚੁਣਾਵ ਆਧਗਧਾ। ਚੌਧਰੀ ਰੈ ਬਰਜਤਾਂ-ਬਰਜਤਾਂ ਵੌ ਸਰਪੰਚ ਰੈ ਚੁਣਾਵ ਮੇਂ ਖੜਕੌ ਹੋਹਗਹੈ। ਤਣੈਰੈ ਸਾਮ੍ਰਿੰ ਟਾਕਰ ਜਸਵਾਂ ਸਿੰਹ ਖੜਕੌ ਹੈ। ਈ ਸੂਂ ਪੈਲੀ ਗਾਂਵ ਰੀ ਪੰਚਾਧਾਰ ਰੋ ਚੁਣਾਵ ਸਦੀਵ ਨਿਰਵਿਰੋਧ ਹੋਹਾ ਕਰਤੌ। ਸੌਂਗ ਜਣਾ ਭੇਲਾ ਹੋਹਨੈ ਪੰਚ-ਸਰਪੰਚ ਚੁਣ ਲੇਵਤਾ। ਸਰਕਾਰ ਕਾਨੀ ਸੂਂ ਪੁਰਸਕਾਰ ਮੇਂ ਮੋਟੀ ਰਕਮ ਲੇਯਨੈ ਗਾਂਵ ਰੈ ਵਿਕਾਸ ਮੇਂ ਲਗ ਦੇਵਤਾ।

ਜਕੀ ਚੂਂਤਰੀ ਮਾਥੈ ਆਖੈ ਗਾਂਵ ਰੀ ਚੌਪਾਲ ਜੁਡਧਾ ਕਰਤੀ, ਗਾਂਵ ਰੈ ਵਿਕਾਸ ਰੀ ਬਾਤਾਂ ਹੋਹਾ ਕਰਤੀ, ਅਬੈ ਬਾਟੈ ਪਟਕਾ-ਪਛਾਡੀ ਰੀ ਯੋਜਨਾ ਬਣਣ ਲਾਗਗੀ। ਚੌਧਰੀ ਰੈ ਪ੍ਰਭਾਵ ਸੂਂ ਆਧੈ ਸੂਂ ਬੱਤੌ ਗਾਂਵ ਸਾਹਬਰਾਮ ਕਾਨੀ ਹੈ। ਧਣ ਗਾਂਵ ਤੌ ਬੰਟਗਹੈ ਈ। ਚੌਧਰੀ ਕਨੈ ਸਗਲੀ ਬਾਤਾਂ ਪ੍ਰਗਤੀ ਜਦ ਸੌਂਗ ਜਣਾਂ ਨੈਂ ਆ ਇਜ ਸਮਜ਼ਾਵਤੌ ਕੈ ਮਨ ਮਾਠੌ ਨਾ ਕਰੈ। ਅੇਕ-ਦੂਸਰੈ ਰੀ ਬੁਰਾਈ ਨਾ ਕਾਢੈ। ਜਿਕੈ ਨੈਂ ਜਨਤਾ ਚਾਵੈਲਾ ਵੌ ਇਜ ਸਰਪੰਚ ਬਣਸੀ। ਧਣ ਸੁਣੈ ਕੁਣ ? ਸਗਲਾਂ ਆਪਚਾਵੀ ਕੈ। ਜਿਧਾਂ-ਜਿਧਾਂ ਚੁਣਾਵ ਰੀ ਤਾਰੀਖ ਨੇਡੈ ਆਵਤੀ ਗਈ ਬਿਧਾਂ-ਬਿਧਾਂ ਖਰਚੈ ਰਾ ਖਾਲ ਬਿਗਡਣ ਲਾਗਗਧਾ। ਰਿਪਿਧਾਂ ਰਾ ਪਨਾਲਾ ਬੈਧਗਧਾ। ਛੇਵਟ ਜੀਤ ਸਾਹਬਰਾਮ ਰੀ ਹੋਹੀ।

ਚੁਣਾਵ ਰੈ ਸਾਲੇਕ ਪਛੈ ਚੌਧਰੀ ਬੀਮਾਰ ਪਡ਼ਗਹੈ। ਘਣੀ ਦਵਾ-ਦਾਰੁ ਕਰੀਜੀ, ਧਣ ਸ਼ਹਾਰੀ ਨੰ ਆਹੈ। ਅੇਕ ਦਿਨ ਵੈ ਸਗਲਾਂ ਜਣਾ ਨੈਂ ਭੇਲਾ ਕਰਨੈ ਬੋਲਧੈ, “ਇਣ ਦੁਨਿਆਂ ਮੇਂ ਕੋਈ ਕੋਨੀ ਰੈਹੈ। ਰਾਮ-ਰਾਵਣ ਸਰੀਖਾ ਨੰਂ ਰੈਹੈ। ਸਕਨੈ ਅੇਕ ਨ ਅੇਕ ਦਿਨ ਜਾਵਣੀ ਈ ਪਡੈ। ਮੈਂ ਤੌ ਸੋਰੈ-ਸੁਖੀ ਜਾਊਲੈ। ਮਹੈਰੈ ਜੀ ਮੇਂ ਅੇਕ ਬਾਤ ਅਟਕੀ ਪਡੀ ਹੈ ਜਕੀ ਥਾਨੈ ਕੈਧਨੈ ਜਾਊਂ। ਬੰਦੀ ਪਰ ਚਾਲਦ੍ਧਾ ਤੌ ਸੁਖ ਪਾਵੋਲਾ। ਖਾਨਦਾਨ ਰੋ ਨਾਂਵ ਊਂਚੈ ਰੈਸੀ। ਧਰਤੀ ਕਿਸਾਨ ਰੀ ਮਾਂ ਹੋਵੈ। ਮਾਂ ਕਦੈਈ ਕੋਨੀ ਬੰਟ ਸਕੈ। ਵਾ

सगळा बेटां री मां होवै। जमीन नीं होवण सूं भूमिहीण बण जावै। म्हारौ औ कैवणौ है कै जमीन मत बांटज्यौ। समै सारू भेळा नीं रैय सकौ कोई बात कोनी, पण खेती मिळ्नै करूया। फसल भलाईं बाट लीजौ। जमीन बांटण री बेमारी चाल रैयी है। घणै टैम पैली म्हरै कनै खेती-बाडी अधिकारी आयै। आ बात म्हनै समझायी कै छोटा-छोटा जमीन रा टुकडा आरथिक दीठ सूं लाभप्रद नीं होवै। आज आपणै कनै तीन सौ बीघा जमीन है जद मोटी गुवाडी बाजै। आ इज जमीन म्हे भाई बांटल्यां तौ सौ-सौ बीघा पांती आवै। फेरूं आपणै टाबरां में बंटती जावै तौ छेवट दो-दो बीघा पांती आसी। किसान सूं आपणी औलाद मजूर बण जासी। आपां नैं टाबरां नैं पढावणा चाईजै, जकै सूं वै दूजा धंधा कर सकै। आपणा बडेरा कैया करता हा कै 'घण जाप्या ऊत जा कै घण बरस्या', साहबराम नैं खास तौर सूं ताकीद करूं हूं कै थूं सरपंच है, सगळे गांव रौ खयाल राखी। आपणै कनै आवणियै री डोळ-माजनै सारू मदद करजै। सगळां रौ भलौ करजै। बुरा कदैई मत बिचारजै।"

कई दिनां पछै चौधरी बिंयासी बरस री उमर लेय देवलोक होयग्यौ। सगळै गांव दुख मनायौ कै म्हारै रुखाळै चल्यौ गयौ।

चौधरी री सीमख घणा दिनां ताईं कोनी मानीजी। गढ जैडौ मकान तीन हिस्सा में बंटग्यौ। बाखळ में दो भींतां खींचनै तीन हिस्सा कर दिया। खेत ई बंटग्या। जमीन बंटी जद घणी ले-दे, चख-चख होयी। रिस्तेदार भेळा होया। आपस में खींचाताण होयी। जकौ घर सगळै इलाकै री पंचायती करूया करतौ, अबै दूजा लोग उण घर री पंचायती करण लागग्या। छेवट चौधरी रतनाराम रौ बेटौ दुनीराम ई आपरी मांरै कैवण सूं कम उपजाऊ अर टीबै वाळी जमीन लेवण सारू राजी होयग्या। जमीन काईं बंटी, मन भी बंटग्या। जकी चूंतरी माथै आखौ गांव भेळा होया करतौ, बठै अब घरवाळा ई भेळा नीं होवै। अबै वा सूनी पड़ी रैवै या उण माथै झाबरियो गंडक पड़्याँ रैवै।

कई सालां पछै दुनीराम री छोरी चंदा रौ व्यांव मंडग्यौ। दिनुगै-आथण गीत गाईजै। घर रा नीं आवै। आडोसी-पाडोसी जरूर आवै। इण मौकै परिवाररौ बामण तेजाराम आयौ। तेजाराम चौधरी रै देवलोक री बगत आयौ हौ। बाखळ में भींतां खींची देखनै उदास होयग्यौ। नीं बठै घोड़ी हिणहिणावै ही अर नीं मदुवौ बलबलावै हौ। भींत रै खूणै में बंधी डाग जरूर अरड़ावै ही। पंडतजी सगळा भाइयां रै घरां गयौ। सैंग जणा सूं रामा-स्यामा करी। हालात रै जायजौ लियौ।

आथण पौर में रोटी जीमनै बैठक में जा बैठ्यौ। केई ताळ ताईं अेकलौ ई बीड़ी फूंकतौ रैयौ। फेर मांची पर आडौ होयग्यौ। सांमली भींत माथै महात्मा गांधी री तस्वीर टंग रैयी ही। बीं तस्वीर रै तळै रतनाराम चौधरी री। तेजाराम सोच में पड़ग्यौ कै इण बापू गांधी देस नैं बांटण वाळी बात रै घणै विरोध करूयौ। लोगां नैं, नेतावां नैं कितरा समझाया। भारत म्हारी मां है। आपणी सगळा री मां है। भेळा रैवौ, पण जिन्ना सरीखा धरमांध माणस हित री बात नीं सुणी। देस बंटग्यौ—तीन हिस्सां में। लाखू माणस तबाह होयग्या। हजारूं सुहाग उजङ्ग्या। घणी उथळ-पाथळ माची। देस नैं बाट काईं सुखी होया। चौधरी भी घणा समझाया। जमीन मत बांटज्यौ। बीं रै जावतां ई जमीन बंटगी। घर बंटग्या अर सागै मन ई बंटग्या।

थोड़ी ताळ पछै तेजाराम कनै दुनीराम चिलम भरनै बैठग्यौ। केई ताळ ताईं घरबार, गांव-गुवाड़ री बातां होयी। दुनीराम सगळी कहाणी बंटवारै री सुणाय दी। सुणनै तेजाराम बोल्यौ, "चौधरी री बात पर थे सगळा जणा कोनी चाल्या। घर-जमीन बंटग्या। संपत कोनी रैयी। आ बात सैं सूं माड़ी होयी। ईट जुङ्यां भींत खड़ी होवै। भींत पड़ी अर डगळिया खिंड्या। म्हैं थानैं कैवूं कै ओज्यूं भी भेळा होय सकौ हौ।"

"म्हे फंट्योडा कीकर भेळा हो सकां हां पंडतजी? म्हांरा तौ मुसाण ई कोनी मिळै।" दुनीराम बोल्यौ।

तेजाराम पडूतर देवतौ थकौ बोल्यौ, "थांरा सगळां रा ओळ-नाळा जद अेक जग्यां गङ्गा है तौ मुसाण ई अेक जग्यां रैसी। थूं बडै मिनख चौधरी रतनाराम रौ बेटौ कुहावै। दूटी जेवडी नैं फेरूं जोड़। बिना गांठ लगायां बट लगायनै पाढी जोड़। चंदा रै व्यांव है। परिवार बिना व्यांव फूठरौ नीं लागै। चंदा, रतनाराम री पोती नीं है, हेतराम

अर साहबराम री ई पोती है। थूं म्हरै सागै चाल, म्हैं सारी बात कर लेस्यूं। व्यांव पर भेळा करणा म्हरै जिम्मै। म्हैं तौ सगळ्या रै ई साझौ बामण हूं।'

केई ताळ ताईं दोनूं जणा में बाथा-झोड़ होयौ। दूजे दिन आगै पंडित तेजाराम अर लारै दुन्नीराम आपरै दोनूं काकां रै घरां कानी जावतौ दीस्यौ।

⌘⌘

अबखा सबदां रा अरथ

कारुंदा=काम करण वाळा। अपूठौ=पाछौ। सदीव=हमेसा। चूंतरी=चौकी। मन माठौ करणौ=मन खराब करणौ। गुवाडी=मोटौ परिवार। आथण=सिंद्या। माणस=मिनख, आदमी। ताळ=बगत, टैम। संपत=भेळप। ओज्यूं=हाल ताईं। कोड=हरख, उमाव। भाख=भोर, दिनुगौ। सीरी=सैयोगी, साझेदार। मुसाण=समसाण। चख-चख=कळह, मुखजोरी। फूठरौं=सुंदर। साझौ=भेळप रौ, सिरोळौ। निपज=उपज, नेपा। मोकळी=घणी, ज्यादा।

सवाल

विकल्पाऊ पढूत्तर वाळा सवाल

1. चौधरी कनै कुल कित्ता बीघा जमीन ही ?

(अ) तीन सौ बीघा	(ब) दो सौ बीघा
(स) पांच सौ बीघा	(द) सौ बीघा

()

2. चौधरी रतनाराम टाळ उणरै कित्ता भाई हा ?

(अ) तीन	(ब) दो
(स) अेक	(द) चार

()

3. खेती रा सगळा काम ट्रैक्टर सूं होवता हा, पण चौधरी नैं पुराणी रीत सारू किणरै घणौ कोड हो ?

(अ) घोड़ी	(ब) बळद
(स) ऊंठ	(द) घोड़ौ

()

4. चौधरी री पोती रौ व्यांव हो, वा किणरी बेटी ही ?

(अ) रतनाराम री	(ब) साहब राम री
(स) हेतराम री	(द) दुन्नीराम री

()

साव छोटा पढूत्तर वाळा सवाल

1. चौधरी रौ किसौ भाई ज्यादा पढ्योड़ौ हो, जिकौ राजनीति में ई रुचि लेवतौ हो ?
2. चौधरी नैं सवारी सारू किणरै कोड हो ?

3. कहाणी में लंबरदार किणनै कैयौं गयौं हैं ?
4. चौधरी रै मांचौ पकड़यां पछे घर अर बारै किणरी ज्यादा चालण लागगी ही ?

छोटा पडूतर वाळा सवाल

1. चौधरी आपरा दिन नैड़ा आवता देखनै सगळा जणां नैं भेवा करनै काँई हिदायत दीवी ही ?
2. “घण जाम्या ऊत जा कै घण बरस्यां।” इण कैवत रौ खुलासौ करता थकां समझावौ।
3. “जर्मी काँई बंटी, मन भी बंटग्या।” इणनैं समझायनै लिखौं।
4. तेजराम बामण रौ चरित्र-चित्रण करौ।
5. ‘बंटवारौ’ कहाणी काँई संदेस देवै।

लेखरूप पडूतर वाळा सवाल

1. “घर री गुवाड़ी रौ आप-आपरै स्वस्थ अर गांव री खुसहाली रौ राजनीति रा पड़पंच बंटवारौ कर दियौ।” कहाणी रै कथ्य री दोठ सूँ इण बात रौ खुलासौ करौ।
2. चौधरी रतनाराम रौ चरित्र-चित्रण करता थकां आ बात सुभव करौ कै कीकर वै गांव अर आपरी गुवाड़ी रौ भलौ सोचण वाळा मिनख हा।
3. कहाणी रै मूळ तत्त्वां रै आधार माथै ‘बंटवारौ’ कहाणी री समालोचना करौ।

नीचै दिरीज्या गद्यांसां री प्रसंगाऊ व्याख्या करौ।

1. चौधरी रै घरै दूध-छाछ री कमी नीं ही। तीन भैंस अर पांच-छह गायां नोहरै में हरदम बंधी रैवती। दिन ऊगणे सूँ पैली ई बिलोवणै री आवाज उगाड़ में दूर-दूर ताँई सुणीजती। भाख फाटां रै सागै गांव री लुगायां अर टाबर लोटा, हांडी अर जग लेयनै छाछ खातर चौधरी री ड्योढी माथै ऊभा होय जावता।
2. चौधरी री सीख घणा दिनां ताँई कोनी मानीजी। गढ जैड़ौ मकान तीन हिस्सा में बंटग्यौ। बाखल में दो भींतां खींचनै तीन हिस्सा कर दिया। खेत ई बंटग्या। जमीन बंटी जद घणी ले-दे, चख-चख होयी। रिस्तेदार भेला होया। आपस में खींचाताण होयी। जकौ घर सगळै इलाकै री पंचायती करूया करतौ, अबै दूजा लोग उण घर री पंचायती करण लागग्या।
3. तेजराम पडूतर देवतौ थकौ बोल्यौ, “थांरा सगळां रा ओळ-नावा जद अेक जग्यां गड्या है तौ मुसाण ई अेक जग्यां रैसी। थूँ बडै मिनख चौधरी रतनाराम रौ बेटौ कुहावै। टूटी जेवड़ी नैं फेरूं जोड़। बिना गांठ लगायां बट लगायनै पाढी जोड़। चंदा रौ ब्यांव है। परिवार बिना ब्यांव फूठरौ नीं लागै। चंदा, रतनाराम री पोती नीं है, हेतराम अर साहबराम री ई पोती है। थूँ म्हरै सागै चाल, म्हैं सारी बात कर लेस्यूं। ब्यांव पर भेवा करणा म्हरै जिम्मै। म्हैं तौ सगळां रौ ई साझौ बामण हूँ।”

□कहाणी

गाय कठै बांधूं

रामस्वरूप किसान

कहाणीकार परिचै

14 अगस्त, 1952 नै हनुमानगढ़ जिलै रै परलीका गांव में जलम्या रामस्वरूप किसान प्रतिभासाली अर मेहनती साहित्यकार है। वाँरे अठै सिरजण अर मैणत अेकमेक है। बै पसीनै री पाणत सूं खेती रै साथै-साथै कविता-कहाणी री साख निपजावै। साहित्य मांय ई किसान खेती दांड पचै। किसान आपरी रचनावां सूं पुख्ता करै कै वै स्थमसील वर्ग नैं दूर सूं देखणवाळा नीं होयने खुद बीं रा अणटूट हिस्सा है। इण वास्तै वांरी रचनावां में भोग्योड़ै जथारथ प्रगट होयौ है। वै आपरी कहाणियां में ग्रामीण जीवण रौं जबरौं दोहन कर्ह्यौ है। ग्रामीण जनजीवण अर संस्कृति माथै वांरी जबरी पकड़ है। आपरै लेखन सूं सामाजिक अर आर्थिक बदलाव रा पखधर किसान आपरै चिंतन नैं कलात्मक रूप देवण मांय माहिर है। आंरी कहाणियां पठनीयता रै गुणां सूं लबालब है।

किसान रा अजै लग ‘हिवडै उपजी पीड़’, ‘आ बैठ बात करां’ अर ‘कूक्यो घणो कबीर’ कविता-संग्रै, ‘हाडाखोड़ी’, ‘तीखी धार’ अर ‘बारीक बात’ कहाणी संग्रै, ‘सपनै रो सपनो’ लघुकथा संग्रै अर ‘राती कणेर’ नांव सूं खवीन्द्रनाथ टैगोर रै बांग्ला नाटक ‘रक्त करबी’ रै राजस्थानी अनुवाद री पोथी छप चुकी है। ‘गांव की गली-गली’ वांरी हिंदी में लांबी कविता री पोथी है। किसान कथा प्रधान राजस्थानी तिमाही पत्रिका ‘कथेसर’ रा संपादक है।

किसान नैं कहाणी ‘दलाल’ माथै कथा संस्था दिल्ली रौं कथा-पुरस्कार, ‘हाडाखोड़ी’ कहाणी-संग्रै माथै ज्ञान भारती कोटा रो गौरीशंकर कमलेश पुरस्कार अर राजस्थानी भाषा, साहित्य एवं संस्कृति अकादमी, बीकानेर रौ मुरलीधर व्यास ‘राजस्थानी’ कथा पुरस्कार, ‘राती कणेर’ माथै साहित्य अकादमी, नई दिल्ली रौ अनुवाद पुरस्कार समेत मोकला मान-सम्मान मिल चुक्या है। किसान री रचनावां रौं कैर्इ बीजी भासावां में अनुवाद पण होय चुक्यौ है। किसान रौं कविता-संग्रै ‘आ बैठ बात करां’ जनार्दन राय नागर राजस्थान विद्यापीठ विश्वविद्यालय, उदयपुर अर ‘दलाल’ कहाणी रौं अंग्रेजी अनुवाद ‘द ब्रोकर’ नांव सूं क्राइस्ट यूनिवर्सिटी, बैंगलोर (कर्नाटक) अर महात्मा गांधी यूनिवर्सिटी, कोट्टायम (केरल) रै पाठ्यक्रम में सामल है।

पाठ परिचै

‘गाय कठै बांधूं’ कहाणी किसान री कहाणी-कला रौं नायाब नमूनौ है। आ कहाणी किसान रै ‘हाडाखोड़ी’ कहाणी-संग्रै सूं सामल करीजी है। संस्मरणात्मक सैली में रचीजी इण कहाणी में दो वरणां री मनगत रौं खुलासौ होयौ है। अेक कानी ग्रामीण किसान है, जिकौं गाय सारू ‘गावड़ी’ अर ‘ढांडी’ सरीखा सबद बरतै, पण वै सबद आत्मीयता सूं भर्या-पूरा है। मजबूरी में जद उणनैं गाय बेचणी पड़ै तौं गाय दुरांवती वेळा वौं गळगळौ होय जावै अर यूं लागै जाणै वौं घर सूं बेटी नै विदा कर रैयौ है। दूजी कानी बाजारू मानसिकता रा लोग है, जिकां सारू गाय सेवा री नीं, फगत पूजा री वस्तु है। गाय री पूजा होवती देख बाजारू लोगां सारू कहाणी नायक रै मन में सरथा जागै, पण असलियत उजागर होवतां ई उणरै पगां तळै सूं जमीं खिसक जावै। गाय सारू साचौ हेत राखणवाळै अेक किसान री पीड़ नैं प्रगटावती आ अेक मनोवैज्ञानिक कहाणी है। कहाणी में जबरी पठनीयता है, साथै ई मुहावरां अर कहावतां रौं सरस बरताव इणनैं बेजोड़ बणावै।

गाय कठै बांधूं

सै'र मांय दुधारू पसुवां रौ मेलौ लागै। हजारूं गाय-भैस्यां बिकण सारू आवै। गोरती गाय त्यारी व्यायोड़ी ही। हाथ तंग है। गाय ई दीखी। महें गाय-बाछरू लेयनै बेगौ ई मेलै आयगयौ। क्यूंकै म्हारौ गांव सै'र रै जाबक ई नजीक है।

इसी सूत बैठी, गाय जावतां पाण बिकगी। हीयै रौ आंधौ अर गांठड़ी रौ पूरौ मिलगयौ। महें तीन हजार मांग्या। उण पकड़ा दिया। इत्तौ ऊंतावलौ सौदौ तौ कदई नीं बण्यौ। म्हारौ मन मांय ई मांय नाचण लागग्यौ। सोच्यौ, स्यात कोई पूगतौ आदमी है। पीसै नैं बाल बरोबर ई नीं समझै। साथै गिरगराट ई होयौ। मोल में ऊकग्यौ बेलीड़ा! च्यार हजार मांग लेवतौ तौ कित्तौ ठीक रैवतौ। पण औं गिरगराट हुल्स पर छावै इण सूं पैलां ई महें सावचेत होयग्यौ। गिरगराट नैं बारै धक नै मन रा किंवाड़ मूंद लिया। भलै लाडू-सा फूटण लागग्या। दो हजार री गावड़ी अर तीन हजार बांट लिया। आछौ टूठ्यौ रामजी! आज तौ किणी भलै रा ई दरसण होया है। महें रिपिया आछी तरियां गिण्या अर गोजै में घाल लिया। जद महें पचास रिपिया धारणी साथै गाय-बाछरू उणनैं पकड़ावण लागग्यौ तौ वौ बोल्यौ, “थोड़ा फोड़ा और घालसुं।”

“कांई?” महें चौकन्नी होयौ।

“गाय म्हारै घर ताईं पूगती करणी पड़सी। महें थोड़ा डर लागै। क्यूंकै गाय औपरी है।”

“सूधी भौत है। सिर ई कोनी हलावै।” महें जी-टिकाई सारू कैयौ।

“फेरूं ई औपरापणा तौ कर ई सकै। थे डरौ नां। घर दूर कोनी। थरौं गुण कोनी भूलूं।”

उणरा छेकड़ा सबद सुणनै महें नट नीं सक्यौ। अेक हाथ में गाय री सांकळ अर दूजै में बाछरू री जेवड़ी पकड़नै उणरै लारै-लारै चाल पड़यौ। वौ छव फुटै ढील रौ धणी। गोडां चूमतौ कुड़तौ। झीणी धोती मांयकर पट्टदार कछौं दीसै। कालै बूंटां में धोळी जराब आंख-सी काढै। आंख्यां पर धूप रौ चसमौ। औं रंग-ढंग देखनै महें बूझ्यां बिनां नीं रैय सक्यौ, “कांई काम करौ हौ थे?”

“महें तौ सेठ रौ मुनीम हूं।”

“किसै सेठ रा?”

म्हारै इण सवाल रौ पडूत्तर गावड़ी खायगी। वा अेक ट्रकड़े सूं बिदकनै सांकळ छुटागी। महें संकट मांय पड़ग्यौ। तिल जित्ती हुयगी। गावड़ी दो ई डाकां में सड़क रै दूजै पसवाड़े जाय पूगी। महें बाछरू पकड़ायां उरलै पालियै धूजूं तौ गावड़ी परलै पालियै रांभै। म्हारै बिचाळै मसीनस्यां री अेक चालती भींत-सी तण्योड़ी। गाय, बाछरू कन्नै आवणौ चावै। पण सड़क कीकर लांघै? साधनां रौ खाल-सो चालै हौ सड़क पर। वा चली तौ गयी बीं पासै, पण इब इन्नै आवणौ मौत होयग्यौ। वा फुटपाथ पर मसीनां रै बरोबर भाजै अर पाछी ई सागण जगां आयनै रांभण लागै। म्हारी ज्यान नै मालौ मंडग्यौ। बाछरू ई ताळ-ताळ कूदै। म्हारै हाथां सूं निकळ 'रे हेरण बणनौ चावै। महें पसीनै सूं हल्लाडोब होयग्यौ। सोच्यौ, आज तौ आछा दोजख में फंस्या। जाण-बूझ अल्बाद खरीदली। गावड़ी पकड़ायनै गेलौ नापतौ तौ कित्तौ ठीक रैवतौ। ठंडे-ठंडे घरां पूग जांवतौ। आज तौ आछौ कुड़कै में पग दियौ। मेलै मांय कित्ता डांगर बिकै। कुण कीं रै घरां पुगायनै आवै। म्हनै खुद पर झुंझल-सी आवण लागी। महें सैयोग सारू मुनीमडै नैं हेलौ मार्ख्यौ, जकौ कड़तू रै हाथ लगायां अळगौं खड़ग्यौ है। पण वौ लोवै नीं आयौ। बोल्यौ, “महें तौ गावड़ी मारै।”

“बाछरू तौ पकड़ सकौ है।” महें कैयौ।

उण धूजतै-धूजतै बाछरू री जेवड़ी पकड़ली। महें सड़क रै दूजै पालियै गयौ अर गावड़ी नै ओखी-सोखी पकड़नै ल्यायौ ई है कै दूजी अणहोणी देखनै म्हारौ काळजौ जगां छोडग्यौ। अचाणचक बाछरू अेक जीपड़ी रै आगै

पवन बणगयौ। गावड़ी बाछरु री भौत हेजावू ही। वा आपरै बच्चै लारै रेल बणगी। सांकळ म्हारै हाथ में ही। म्हें और काठी पकड़ली। म्हारी भाज गावड़ी आपरी भाज रै बरोबर बणाली। म्हें उणरै लारै उड्यौ ई बगूं। सगती गाय री अर धीजौ म्हारौ। म्हारा पग कठै ई टिकै तौ कठै ई नीं। आखी सड़क रौ ध्यान म्हारै पर। सगळौ फुटपाथ भीतां चिपगयौ। म्हारै कानां भणकार पड़ी, “अरे गिंवार, मरावैलौ। अरे मूरख! इयां के करै है?”

अेक बाबू ताळी पीटनै हांस्यौ, “अरे औ कठै सूं आय बड़यौ अठै?”

आं बाणां सूं म्हारौ काळजौ चालणी होयगयौ। पण म्हनै बोलण नै कठै फोरौ। अेक किलोमीटर री बेओसाण दौड़ रै पछै म्हें बाछरु नै काबू कर सक्यौ। म्हारी कोडी चकीजगी। गावड़ी ई हांफगी। वा बाछरु नै चाटण लागगी। म्हारौ दम टिक्यौ। इतराक में मुनीम आयगयौ। म्हें सांस खींच 'र बूझ्यौ, “कित्ती'क दूर और चालणौ पड़सी?”

“चालणौ तौ थोड़ौ ई पड़नौ, पण इब तौ खासा ई चालणौ पड़सी। आपां नै आ गावड़ी दूजी सड़क माथै ठरड़ ल्यायी। जीपड़ीआळै निरभाग बाछरु रै मांय ई ल्याय मारी जीपड़ी। बस, बाळ-बाल ई बचग्या। नीं तो मास्या जावता। आज तौ भाग ई भलेरा हा।”

उण आपरौ पख पाळण सारू खुद री कमी जीपड़ीआळै रै माथै मंदंदी। म्हनै उणरी झूठ पर रीस-सी आयी।

म्हे उणी सड़क पर पूठा मुङ्गा। सागण जगां पूया। जठै सूं गाय चौफाळ्यां होयी ही। भळै वौ आगै-आगै अर म्हें लारै-लारै। गळी पर गळी। नुकङ्ड पर नुकङ्ड। चौरावां पर चौरावा लारै रेवता जावै हा। पण घर आवणै में नीं आवै। झाळ उठी, मुनीमडै रै थोबै पर मारूं। साळा, थूं कैवै हो नीं, घर लोवै ई है। क्यूं झांसौ दियौ म्हनै। पण सगळी गिटगयौ। गावड़ी नै ठरड़तौ रैयौ। उणमें चिमक बड़गी। बा लारै तणावै। म्हें सांकळ रै बळ आगै खींचूं। बाछरु ई पग रोपै। खींचूं जाणा नौ-नौ ताळ कूदै। छोब्यां चढै। कदै गावड़ी रै डावै तौ कदैई जींवणै आवै। इसी खींचाताण में तौ कदैई नीं फंस्यौ। आछौ घरड़सियौ होयौ। सांकळ अर जेवड़ी हाथां में गडण लागगी। भळै सोच्यौ, देख तेरी... घर होग्यौ कै अमरीका! कित्ता मोड़ लांघग्यौ, आवणै में नीं आवै। आज तौ आछा कान कतस्या इण मुनीमडै। आछी फाक्यां चढ्यौ इण री। ठा नीं कठै लेजायनै मारैलौ। अेकर तौ इसी रीस आई कै सांकळ रौ दूजौ सिरौ मुनीमडै रै गळै में घालनै गावड़ी रै गदगदी करद्यूं, पण आ रीस पीड़ भर्है सवाल रै बंट निकळ्यी, “इब तौ थोड़ौ ई चालणौ होसी?”

“बस, इब तौ ठिकाणौ आ ई लियौ मानौ।” मुनीम धोळै बाळां में आंगळ्यां फेरतौ बोल्यौ।

“थे थोड़ी गावड़ी नैं टोरै दिखाण।”

वौ डरतौ-डरतौ गावड़ी नै टोरण लागग्यौ। म्हें सोच्यौ, औ काम तौ गळत भुळ्यौ मुनीमडै नैं। जे गावड़ी लात फटकार दी तौ? औ सैर है बावळा! लेणे रा देणा पड़ जासी। लोग पीसा पाछा खोसनै ढांढी कर देसी पूठी। म्हें बोल्यौ, “आगै ई आ ज्यावौ मुनीमजी! म्हें गळी कोनी जाणूं।”

“इब तौ आ ई ग्यौ घर। बा दीखै सामनै नुकङ्डआळी हेली।”

म्हारी ओरी-सी ढळ्यौ। अेक लांबो सिसकारौ आपै-आप भरीजग्यौ।

म्हें गाय-बाछरु पकड़यां अेक बंगलै रै बारणै आगै चेताचूक-सो खड़यौ हौ। मुनीम बंगलै रै भीतर बड़यौ। म्हें उणरी बाट जोवूं। म्हनै अचाणचक लाग्यौ जाणै म्हें गाय रौ बिकवाल कोनी। गंगा-घाट रौ कोई मंगतौ हूं। गाय रै मिस लोगां रै बारणै-बारणै भीख मांगतौ फिरूं। म्हनै खुद सूं घिन होवण लागी। पण म्हें करड़ै भौत हौं। सगळी हीणतावां पाणी ज्यूं पीयग्यौ। माथै रौ पसीनौ पूँछ्यौ अर चैरै पर भळै गुमेज उपजायौ। इतराक में मुनीम आयग्यौ। केई ताळ सूं अेक सवाल हिवड़ै नै सालै हौ। म्हें ताचकनै बूझ्यौ, “औं बंगलौ थारौ ई है?”

म्हारौ सवाल बायरै रळ्यौ। पड़ूतर री जगां मुनीम आदेस दियौ, “आ भई। भीतर लेय आ गाय-बाछरु।”

म्हैं आदेस नैं आदेस मान्यौ। गाय-बाछरु बंगलै रै 'लॉन' में लेय आयौ। इन्वै-बिन्वै ख्यांत्यौ। डांगर-ढोरां सारु अठे कठैर्इ जगां कोनी दीखी। बंगलौ! पांच तारा होटल जिसौ बंगलौ अर इण मांय अेक मुरदी-सी गाय बंधै। म्हरै मन कोनी मानी। धूजणी-सी छूटणी। अेक अणजाण्यौ डर मलोमल काळजै छावण लाग्यौ। अनेकूं सवाल म्हरै साम्हीं दांत काढण लाग्या। म्हैं मुनीम सूं पूछ्यौ, "गाय कठे बांधू?"

"थोड़ी ताळ पकड़यां राखौ। म्हैं सेठजी नै बुलायनै लावूं।"

'सेठजी' सबद सुणतां ई म्हारै अेक सवाल तौ सुलझाव रै 'साइड इफैक्ट' सूं कई और सवाल खड़ा होयग्या। पैलौ तौ औ कै इत्तौ मोटौ सेठ गावड़ी रौ हड़दौ करै ई क्यूं? जे चावै तौ रोजीना कूंटल दूध मोल लेय सकै। अर जे गाय रौ चाव ई होवै तौ कम सूं कम बीस-पच्चीस हजार री आछी नसल री खरीदै। कै फेर कामल गायां री डेरी लगावै। म्हरै भीतर आ दोगाचीती चालै ही, इतराक में सेठ रौ आखौ परिवार आयनै गाय रा इत्ता कोड करण लाग्यौ कै मत बूझौ बात। सेठ-सेठाणी गाय रै पगां री धोख खावण लाग्या। म्हनै अंचभौ-सो आयौ। बीनण्यां भाजनै आरती रौ थाळ ल्यायी। थाळ में सोनै रौ अेक हार हौ। म्हैं सोच्यौ, पुगता आदमी नुंवै-नुवै पसु नै सोनौ सुंधायनै खूटै बांधता होसी। क्यूंके म्हरै अठे चांदी सुंधावण रौ रिवाज है। पण सेठाणी तो गाय रै माथै रोव्ही रौ टीकौ काढनै इण हार नै उणरै गळै में घाल दियौ। सेठ रा बेटा-बेटी अर पोता-पोती गाय रै लिपट-लिपट कोड करण लाग्या।

गाय सारु आं रौ अणूतौ प्यार देखनै म्हारी रीस ई माठी पड़गी। गाय पुगावण रा फोड़ा भूलीजण लाग्या। म्हनै आनंद-सो आवण लाग्यौ। जद गाय छिंगास करण लागी, सेठाणी भाजनै कांसी रौ कचोल्हौ मांड दियौ। आखै कड़बै गौ-मूत रौ टीकौ काढ्यौ। अेक जणी अचाणचक गावड़ी आगै लाडुवां रौ टोकरियौ छोड्यौ तौ म्हारा तिराण फाटग्या। गावड़ी लाडुवां पर टूट पडी। म्हनैं गुड़ याद आयग्यौ। क्यूंके म्हे लोग नुंवै-नुवै पसु नै गुड़ धामां। गुड़ री जगां लाडू! इयां कै पाणी मांग्यां धी मिलै। आछी ताबै आई गावड़ी रै। आछा भाग जाण्या ढांढी रा। देख, राजा-घर बंधी है। स्यात लारलै भो रा आडा आवै। सेठ गाय रै डील पर खाज करण लाग्या। भळै म्हरै कानी मुळकनै बोल्यौ, "मारै कोनी के?"

"नां-नां, भौत सूधी है। देवता बरगी। बारह-मासी धीणौ है ई रौ। टाबर आसीस देवैला। थारै सागै दगौ थोड़ै ई करूं।" म्हारी इण गारंटी पर सेठ भळै मुळक्यौ। म्हनैं लाग्यौ, सेठ म्हरै पर मुळक्यौ है। म्हैं इणरौ अरथ सोधूं इतराक में सेठाणी आयी अर गाय नै अेक घणमोली पल्पव्यांवती चूंदडी ओढा दी। गळै में हार अर डील पर चूंदडी। औं नजारौ देखनै म्हारा रुं फाटग्या। म्हैं गळगळौ-सो होयग्यौ। म्हनै वा विदा होंवती बेटी ज्यूं लखाई।

इब सेठां सारु म्हारी चींत बदली। आज सूं पैलां म्हारी दीठ में औं वरग गरीबां रौ खून चूसणियौ जोंक सरीखौ हौ। हर बात नै मुनाफै री ताकड़ी तोलणियौ, पण आज म्हारी आंख्यां खुलगी। सोच्यौ, म्हारै खास पेसौ पसु पाल्यौ। दिन-रात पसुवां में रैवणौ। पण वां सारु इत्तौ हेत तौ म्हरै ई हिवड़े कोनी। हेत तौ दूर, मामूली चूक पर ई डांग ठोकां। पण औं लोग। धन-धन है आं री जामण नै। लखदाद है आं सेठां नै। पसुवां सारु कित्तौ हेत है आं रै हिवड़े। जद पसु ई आं नै इत्ता आछा लागै तो मिनख? आं रै काळजै री कोर है मिनख। औं लोग म्हां सूं भौत आछा है। इत्ता दिन म्हैं अंधारै में हो। बरत्यां बेरो लागै आदमी रौ।

सोचतां-सोचतां म्हारी आंख्यां आली होयगी। म्हैं खुद नै धिक्कारण लाग्यौ, लाणत है म्हारी सोच नै। आं दयालू अर हेताळू लोगां नै म्हैं सोसक मानतौ आयौ हूं। म्हनैं हर सेठ रै खूटै गाय बंधी दीखी। अर हर गाय रै आगै दीख्यौ लाडुवां रौ टोकरियौ। म्हैं ऊंडी सोच मांय डृव्योड़ी हौ। अचाणचक म्हरै हाथ सूं अेक दूजै हाथ गाय री सांकळ खोसली। साम्हीं देख्यौ तौ पगां तळै सूं जमीन निकळ्गी।

गळै में जनेऊ अर माथै पर टीकैआळौ अेक आदमी गाय री सांकळ झाल्यां खड़्यौ हौ। दूजी कानी सेठ मुनीम नै आदेस दियौ, "जा, पुरोहितजी रै खूटै गाय बंधाइया।"

अबखा सबदां रा अरथ

गाय-बाछरू=गाय-बाछड़ौ। सूत बैठी=संजोग होयौ। धारणी=बिक्योड़े पसु रौ मोल चुकायां पछै मामूली-सी रकम पाढ़ी मोड़ण रो ऐक रिवाज। फोड़ा=परेसानी। औपरी=अणजाण। पाल्हियै=किनारै। चालणी=छलनी। रांभणौ=गाय रै बोलणै री क्रिया। ताळ-ताळ=उभो मिनख हथ ऊंचा करै जितरी ऊंचाई। हळाडोब=तरबतर। अळबाद=मुसीबत। लोवै=नजदीक। ठरड़ ल्यायी=घींसनै लेय आयी। चौफल्हियां=च्यारू पगां नै ऐक साथै ऊंचाय-ऊंचायनै भाजणै री क्रिया। बिकवाळ=बेचण वालौ। ख्यांत्यौ=देख्यौ। हड़दौ=काम रौ अतिरिक्त बोझ। कामल=योग्य। दोगार्चींती=दुविधा। छिंगास=गोमूत्र। कचोल्हौ=बाटकौ। ढांढी=गाय। बेरौ=पतौ। खोसली=छीन ली। बंधाइया=बंधवायनै आव।

सवाल

विकल्पाऊ पट्टर वाला सवाल

1. रामस्वरूप किसान जिण पत्रिका रा संपादक है, उणरौ नांव काँई है ?

(अ) कथेसर	(ब) अपरंच
(स) माणक	(द) राजस्थली

()

2. हियै रौ आंधौ अर गांठड़ी रौ पूरौ मिलग्यौ, कुण ?

(अ) सेठ	(ब) सेठ रौ छोरौ
(स) मुनीम	(द) पसुपालक

()

3. गाय रा कित्ता रिपिया बंट्या ?

(अ) ऐक हजार	(ब) दो हजार
(स) तीन हजार	(द) चार हजार

()

4. मुनीम गाय लेयनै कठै गयौ ?

(अ) सेठ रै खेत में	(ब) सेठ रै बाड़े में
(स) सेठ री दुकान आगै	(द) सेठ रै बंगलै माथै

()

साव छोटा पट्टर वाला सवाल

1. रामस्वरूप किसान रा कहाणी संग्रै कुण-कुणसा है ?
2. कहाणी 'गाय कठै बांधूं' कुणसै कहाणी-संग्रै में सामल है ?
3. 'गाय कठै बांधूं' कहाणी किण सैली में लिख्योड़ी है ?
4. कहाणी-नायक गाय क्यूं बेची ?
5. गाय किणसूं बिदकनै सांकल छुटायगी ?

छोटा पडूत्तर वाला सवाल

1. रामस्वरूप किसान री खास-खास कृतियां रा नांव लिखौ।
2. मुनीम रै डील-डोल अर पहनावै रौ वरणाव लेखक किण भांत कस्यौ है ?
3. कहाणी-नायक रै मन में लाडू-सा कीकर फूटण लाग्या ? खुलासौ करौ।
4. 'धारणी' रौ काईं मतलब है ? लेखक धारणी रा कित्ता रिपिया छोड्या ?
5. “आं बाणां सूं म्हारौ काळजौ चालणी होयग्यौ ।” बै बाण कुणसा हा ?

लेखरूप पडूत्तर वाला सवाल

1. ‘गाय कठै बांधूं’ कहाणी री मूळ संवेदना आपरै सबदां मांय लिखौ।
2. “रामस्वरूप किसान री कहाणी ‘गाय कठै बांधूं’ कहाणी-कला रौ नायाब नमूनौ है ।” खुलासौ करौ।
3. कथा तत्वां रै आधार माथै ‘गाय कठै बांधूं’ कहाणी री कूंत करौ।
4. सेठ रै बंगलै माथै गाय रा कोड किण भांत हुया ? विस्तार सूं लिखौ।
5. इण कहाणी रै आधार माथै खुलासौ करौ कै गाय सारू साचौ हेत किणरै मन में हौ अर कियां ?

नीचै दिरीज्या गद्यांसां री प्रसंगाऊ व्याख्या करौ।

1. इसी सूत बैठी, गाय जावतां पाण बिकगी। हीयै रौ आंधौ अर गांठड़ी रौ पूरौ मिलग्यौ। म्हैं तीन हजार मांग्या। उण पकड़ा दिया। इत्तौ ऊंतावळौ सौदौ तौ कदैई नीं बण्यौ। म्हारौ मन मांय ई मांय नाचण लाग्यौ। सोच्यौ, स्यात कोई पूगतौ आदमी है।
2. उण धूजतै-धूजतै बाछरू री जेवडी पकड़ली। म्हैं सड़क रै दूजै पाळियै गयौ अर गावडी नै ओखी-सोखी पकड़नै ल्यायौ ई हौ कै दूजी अणहोणी देखनै म्हारौ काळजौ जगां छोड्यौ। अचाणचक बाछरू ओक जीपडी रै आगै पवन बण्यौ। गावडी बाछरू री भौत हेजावू ही। वा आपरै बच्चै लारै रेल बणगी।
3. म्हैं गाय-बाछरू पकड़यां ओक बंगलै रै बारणै आगै चेताचूक-सो खड़यौ हौ। मुनीम बंगलै रै भीतर बड़ग्यौ। म्हैं उणरी बाट जोवूं। म्हनैं अचाणचक लाग्यौ जाणै म्हैं गाय रौ बिकवाळ कोनी। गंगा-घाट रौ कोई मंगतौ हूं। गाय रै मिस लोगां रै बारणै-बारणै भीख मांगतौ फिरूं। म्हनै खुद सूं घिन होवण लागी।

मुहावरा अर वारंग अरथ

- | | | |
|------------------------------------|---|------------------------------------|
| 1. हीयै रौ आंधौ अर गांठड़ी रौ पूरौ | — | बिना सोच्यै-बिच्चारै खरच करण वालौ। |
| 2. लाडू-सा फूटणा | — | घणौ हरख होवणौ। |
| 3. तिल जित्ती होवणौ | — | संकट में पड़णौ। |
| 4. कुड़कै में पग देवणौ | — | जाण-बूझनै आफत मोलावणी। |
| 5. कोडी चकीजणौ | — | दम भरीजणौ। |
| 6. ओरी-सी ढळणौ | — | आराम आवणौ। |
| 7. तिराण फाटणा | — | आंख्यां फाटणौ, घणौ अचरज होवणौ। |
| 8. हेरण बणनौ | — | भाज जावणौ। |
| 9. पाणी मांग्यां घी मिलणौ | — | छोटी-सी मांग माथै घणौ मिलणौ। |

लघुकथा

आज रौ सरवण

डॉ. लीला मोदी

लेखिका परिचै

डॉ. लीला मोदी रौ जलम कोटा में 10 मार्च, 1960 में होयौ। अम.अे., पीअेच.डी., डी. लिट, बी.ओड., आयुर्वेद रत्न, अम.लिट. तांड भण्या-गुण्या लीला जी अबार जानकी देवी बजाज कन्या महाविद्यालय, कोटा में अध्यक्ष अर कोटा विश्वविद्यालय में हिंदी विभाग रा संयोजक है। बाल-साहित्यकार, शोधवेता अर कवयित्री अर कथाकार रै रूप में ख्यातनाम डॉ. लीला मोदी री छ्योड़ी पोथ्यां मांय 'हाड़ौती लोकगीत', 'हाड़ौती लोकगीतां में संस्कृति', 'लाख टकां की बात', 'हाड़ौती की कृषि संबंधी सबदावली', 'फुलवाड़ी', 'जातरा', 'सुपना', 'राघव' अर 'लहर लहर चंबल' उल्लेखजोग है। हिंदी मांय भी आपरी कई पोथ्यां छ्योड़ी है। आपनै 'तुलसी पुरस्कार', 'आशु कविता प्रतियोगिता पुरस्कार' अर भारतेंदु साहित्य समिति, कोटा सूं 'अखिल भारतीय कहाणी प्रतियोगिता पुरस्कार', 'सहकार गौरव' अर 'साहित्य रत्न पुरस्कार' समेत कई इनाम-इकराम मिल्योड़।

पाठ परिचै

इण पाठ में सामल लघुकथा 'आज रौ सरवण' आज री पीढी माथै अेक करारौ व्यंग्य है, जकी कै आपरै माईतां नैं बोझ समझनै वारो आव-आदर नैं करै अर वांरा हाण ढळ्यां पछै वानै वृद्धाश्रम में छोड आवण सूं ई परहेज नैं करै। अठै कथा रौ नायक रामरतन वृद्धाश्रम री ठौड़ आपरी मां नै टोकरै में ऊंचायनै आपरै गांव में रैवणियै छोटै भाई कनै छोडण नै जाय रैयौ है, पण देखण वाला लोग-लुगायां समझै कै रामरतन आपरी मां नैं कठैई तीरथ करावण नै लेजाय रैयौ है, का पछै मिंदर में दरसण करावण नै कै परिक्रमा दिरावण नै लेजाय रैयौ है। कथा रै अंत में जद अेक आदमी रामरतन नै चाय पीवण री मनवार करै तद वौ न्हासतौ-दौड़तौ कैवै कै अबार उण कनै टैम नैं है क्यूंकै वौ आपरी मां नैं कनै ई आपरै गांव में छोटकियै भाई कनै छोडण नै जाय रैयौ है तद कथा रौ असली मरम प्रगट होवै। कलजुग रा सरवण बेटा कैडा होवै, औ भेद प्रगट करणौ इज इण छोटी-सी लघुकथा रौ मोटौ मकसद है। डॉ. लीला मोदी कनै लघुकथा रचण रौ अेक आंटौ है, जकौ पाठकां नैं बांध्यां राखै अर अंत में उण लघुकथा री घुळगांठ ऐड़ी सौरी खुलौ कै पढेसरी अचंभै में पड़ जावै।

आज रौ सरवण

रामरतन की उमर पचास के आस-पास होवैगी। उंका माथां पै अेक बडौ सारौ टोकरौ छौ। उंमें बीचूं-बीच अेक गांठड़ी-सी पड़ी छी। उभाणा पावां उ भाग्यो जा रियौ छौ। उफणतौ तावड़ी छौ, माथा सूं पसीनौ चू रियौ छौ। उइं फुरती सूं भागतौ देखनै अेक साग बेचबा हालौ पूछ्यौ, “अरे रामरतन! कठी भाग्यो जा रियौ छै। अरे बता तो सही, ई टोकरा में खीं ले जा रियौ छै?

‘रामरतन हाथ हिलायनै बोल्यौ, “टैम कोईनै।”

साग लेबा वाली लुगाई थी। बोली, “भला मनख, थे तौ साग तोलौ। उ तौ उंकौ काम कर रियौ छै।” अेक लुगाई और साग लेबा आगी। वा बोली, “टोकरा में तो वांकी जामण दीखै। बीमार होगी। चाल फिरबा माफक नीं होवैगी। अस्प्ताल लेजा रियौ होवेगौ। थे भी काई बावला होग्या।”

साग वाली बोल्यौ, “लोग-बाग तौ झूठयाई खेवै छै कै घोर कळजुग आग्यौ। देखल्यो! असा कळजुग में भी सपूत छै न! धरती यांका धरम सूं ही चाल री छै।”

चौराहा पै अेक हैंडपंप छै। वां लुगायां पाणी भर री छी। आपणा दुख-सुख अेक दूजी नैं बाट री छी। रामरतन वां थमग्यौ। उन्हें अेक हाथ सूं टोकरो थामल्यौ। दूसरा हाथ सूं पाणी पिलाबा को इशारै कर्ख्यौ। अेक पिछाण की बायर नैं पाणी प्वायौ। पाणी पी'र फेर भाग्यौ-भाग्यौ आगै बङ्गै।

बायरां आपस में बातां करबा लागी—

पैली, “टोकरा में मायड़ दिखै। पाणी भी तौ साता सूं कोनै पीयो।”

दूसरी, “मंदर के आड़ी जा रियौ छै। दरसण कराबा ले जा रियौ होवैगौ।”

तीसरी, “डोकरी धीमां चालती होवैगी। महाप्रभुजी रौ मंदर तो झट ही बंद हो जावै छै। ई लेखै बचारै माई नैं टोकरा में माथै पे धरनै ही ले आयौ।

चौथी, “हे रे, म्हारा भगवान! कळजुग में सभ्याई असा ई बेटा दीज्यौ। अरे म्हारा राम! अेक मूँ छूँ। बुढापा में भी पाणी भरबा आणी पड़ै छै।”

पाचवीं, “घरां रैवां तौ गाळ्यां खावां। आज भी धरती पै धरम छै। कोख उजळी कर दी। थू धन्न छै रे रामरतन।”

रामरतन रेलवे क्रासिंग के पास पूग गियौ। वां सूं रेल गुजर री छी। धड़-धड़ करनै रेल भागी जा री छी। रामरतन रौ काळजौ रेल री रफ्तार सूं भी तेज धड़क रियौ छै। उन्हें रफ्तार थोड़ी दमनी कर दी। पसीना पूछ्यौ। थोड़ौ थमणौ पड़्यौ।

अेक बायर बोली, “टोकरा में डोकरी ही दीखै छै।”

दूसरी बोली, “मंदर कै आड़ी जा रियौ छे, अधक मास छै। पचकोसी परकम्मा लगाबा ले जा रियौ दीखै।

तीसरी सोचनै बोली, “डोकरी सूं परकम्मा भी काई दी जाती होवैगी। ल्याई माथां पै ढोकै ई परकम्मा देणी होवैगी।

चौथी बोली, “बेच्यारो! म्हनै घणी बार तौ ई कांधा पे बिठाण के लातो देख्यौ छै। अबकी बार ही टोकरा में माथा पै धरनै ले जा रियौ छै।”

अेक आदमी पूछ्यौ, “रामरतन, डोकरी मरगी के! मसाणा आड़ी जा रियो छे कै?

रामरतन बोल्यौ, “मरी तो कोनै। छोकी भली छै।”

आदमी, “तौ बीमार छै कै? भाग्यौ-भाग्यौ कठी ले जा रियौ छै? आजा चाय पी ल्यां।”

रामरतन बोल्यौ, “अबार टैम कोनी। पाछौ आऊंगौ तौ चाय काई नास्तौ भी कर लेगां। म्हारी टैम तौ अब पूरी होगी, सो माथै री आफत नैं उतारबा छोटा भाई के घरां पास रा गांव में जा रियौ छूँ।”

माटी री मनस्या / बांझ

भंवरलाल 'भ्रमर'

लेखक परिचै

कथाकार भंवरलाल 'भ्रमर' री जलम बीकानेर में 22 अक्टूबर, 1946 में होयौ। आप एम.ए., एम.एड. री डिग्री अर साहित्य-रत्न, साहित्य शिरोमणि री उपाधियां हासल करी। आप राजस्थान रै शिक्षा महकमै में अध्यापन सेवा करी। राजस्थानी में 'तगदो', 'अमूजो कद ताइ', 'सातुं सुख' कहाणी-संग्रे छप्योड़ा। 'भोर रा पगलिया' आपरै बाल उपन्यास है। 'भ्रमर' शिवचन्द्र भरतिया रै उपन्यास 'कनक सुंदर' अर राजस्थानी री प्रतिनिधि कहाणियां रै संग्रे रै 'पगडांडी' नांव सूं संपादन-प्रकाशन ई कस्यौ। आप 'मनवार' अर 'मरवण' नांव सूं राजस्थानी री दो कथा-पत्रिकावां रै संपादन कस्यौ अर कीं बरस राजस्थानी भाषा, साहित्य एवं संस्कृति अकादमी री पत्रिका 'जागती जोत' रै संपादन ई कस्यौ। अबार आप राजस्थानी लघुकथा री अनियतकालीन पत्रिका 'अपणायत' रै संपादन करै। आपनै कहाणी-संग्रे 'सातुं सुख' सारू राजस्थानी भाषा, साहित्य एवं संस्कृति अकादमी, बीकानेर कानी सूं 'शिवचन्द्र भरतिया राजस्थानी गद्य पुरस्कार' अर मारवाड़ी सम्मेलन मुंबई रै 'राजस्थानी पुरस्कार' मिळ्यौ। इणां रै टाळ ई केई इनाम-इकराम आपनै मिल चुक्या है।

पाठ परिचै

इण पाठ में भंवरलाल 'भ्रमर' री दो लघुकथावां 'माटी री मनस्या' अर 'बांझ' सामल करीजी है। पैली लघुकथा में माटी री अभिलासा अर परोपकार री भावना दरसाईजी है। इणमें अेक कुंभार माटी नैं लाल्च देवै कै थूं कैवै तौ थनैं गणेसजी, लिछमी कै सरस्वती री मूरत बणाय देवूं जिकौ लोग थनैं घणैमान पूजैला। पण माटी कैवै कै म्हनैं तौ थूं अेक दिवलै रै रूप में घड़ दै, जिणसूं म्हें जगत में उजावौ करण रौ निमित बण सकूं। इणी भांत दूजोड़ी लघुकथा 'बांझ' में अेक औड़ी नारी-पात्र नैं साम्हों लाईज्ञौ है, जिण माथै बांझ होवण रौ आरोप लगाईजै अर पछै सासरिया उणनैं घर सूं काढ देवै। पण वा ई नारी जद दूजौ घर मांड लेवै तौ उणरै आंगणै बेटौ खेलै, पण पैलडौ धणी जकौ उणनैं घर सूं काढै, वौ दूजवर बण्या उपरांत ई अेक टाबर सारू तरसै। कैवण रौ मतलब औ कै खोट भलाई आदमी में होवौ, पण उणरी तूमत लुगाई माथै लगाईजै। भारतीय लोकमानस रै इण सोच नैं मिटावण में आ लघुकथा घणी सहायक सिद्ध होवै।

माटी री मनस्या

कुंभार माटी नै गीली करनै सागीड़ी गूंधी। गुंधीज्यां पछै माटी सूं पूछ्यौ, "काई बणावां, थनै?"

माटी अबोली रैयी।

कुंभार पाछौ पूछ्यौ, "देवली बणावां? कैवै तौ गणेस जी री मूरती बणाय देवूं? सगळां सूं पैली पूजीजसी, का पछै लिछमी बणाय देवूं? जिकी नै हरेक गृहस्थ नित पूजै-ध्यावै। लिछमी सगळां नैं नाच नचावै। थूं कैवै तौ सुरसत बणाय देवूं! जिकी कला, साहित्य, संगीत अर ग्यान री अधिष्ठात्री देवी है। सगळां री आदरजोग। अबार थकां बताय दै, बाकी थारी मरजी।

माटी खासी ताळ ताई अबोली रैयी, अमूङ्गबौ करी। पछै टसकती होळै-सी'क बोली, "म्हारी मानै जणै तौ

पाणी रा घड़ा-मटकियां बणायलै, जिकै सूं सगळां री तिस बुझाय सकूं अर गांव-नगर सगळी ठौड़े चावी बण सकूं।
जनसेवा करनै आगोतर सुधार सकूं।

नीं तो फेर दिवलौ बणाय दै, जिकै सूं म्हैं अंधारौ भगायनै घर-घर उजालौ कर सकूं।

बांझ

उण री कूख सूनी ही।

सात बरस होयग्या व्यांव हुयां नै। तौ ई टाबर कोनी होयौ।

“बांझडी है, आ तौ” कैयनै उणरै धणी उणनै घर सूं काढ दी।

बापडी रै आगै-लारै कोई कोनी हौ। पीहर न सासरौ। जावै तौ कठै जावै? किणी सेँध-पिछाणवालै री सरण लीनी। चौका-बासण करनै टैम पूरौ करै ही।

उणी दिनां अेक जणै री जोड़ायत जापै में मरगी। टाबर नै छोडगी लारै। धणी नैं लुगाई सूं बत्ती आपै टाबरियै वास्तै अेक मां री धणी जरूत ही। उणरी निजर उण माथै पडगी। नौरा काढ्या अर समझायी उणनै। वा राजी-राजी उणरै घर आयनै नातै बैठगी। दोनां रौ घर बसतौ होयग्यौ।

छव महीनां में ई कूख हरी होयगी उणरी। रामजी री दया सूं वा तीन टाबरां री मां है, आज। अेक पैलडी रै है अर दो आपरा जायोड़।

उणरौ पैलडौ धणी ई दूजी परणीजग्यौ। दायजौ धणौ ई लायौ। रामजी री दया सूं वौ ई आपरी जोड़ायत सागै सौरौ-सुखी है। पण वौ अेक टाबरियै सारू तरसै हाल ताई!

॥४॥

अबखा सबदां रा अरथ

उंका=उणरै। उफणतौ तावडौ=तीखी धूप। उइं=उणनै। कठी=कठीनै, किन्नै। खीं=कांई। खेवै=कैवै। परकम्मा=फेरी, परिक्रमा। दमनी=धीमी। छोकी=चोखी, आछी। थे=आप। वांकी=उणरी। जामण=मां, मायड, माई। वां=बठै। साता सूं=सौराई सूं, सुख सूं। मंदर के आड़ी=मिंदर कानी। सभ्याई=सगळां नैं। बायरां=लुगायां।

देवल्ली=मूरती। सुरसत=सरस्वती। सगळा=सेँग, सारा। ताळ=देर। अबोली=मून धार्योड़ी, चुप। होळै-सी 'क=धीरै-सी। आगोतर=आगलौ जलम। उजालौ=च्यानणौ। बांझडी=निपूती। जोड़ायत=लुगाई, पत्ती। जापै में=प्रसव री वेळ। नौरा=मनवार, गरजां। कूख हरी होयगी=गरभ ठैरग्यौ। दायजौ=दहेज।

सवाल

विकल्पाऊ पडूत्तर वाळा सवाल

1. 'लहर लहर चंबल' किण लेखिका री पोथी है?

(अ) डॉ. लीला मोदी	(ब) किरण राजपुरेहित 'नितिला'
(स) नीता कोठारी	(द) मोनिका गौड़

()

साव छोटा पडूत्तर वाळा सवाल

- ‘आज रौ सरवण’ लघुकथा किण लेखिका री है ?
 - रामरतन रौ काळजौ किण सूं भी तेज धड़क रैयौ हो ?
 - ‘माटी री मनस्या’ लघुकथा रा लेखक कुण है ?
 - माटी नैं दिवलौ बणण रौ चाव क्यूं है ?
 - ‘बांझ’ लघुकथा मांय धणी आपरी लगाई नैं घर सुं क्यूं काढै ?

छोटा पड़ुत्तर वाला सवाल

1. डॉ. लीला मोदी री च्यार पोथ्यां रा नांव लिखौ।
 2. सागवाळै रामरतन नैं देखनै कार्ड कैयौ?
 3. कुंभार माटी सूँ कार्ड पूछै?
 4. 'बांध' लघकथा री मळ संवेदना कार्ड है?

लेखरूप पड़त्तर वाला सवाल

- ‘आज रो सरवण’ लघुकथा री मूळ संवेदना दाखला देयनै लिखौ।
 - टोकरा नै देखनै मिनख-लुगायां रामरतन रै बारे में काँई बातां करी ?
 - माटी अर कुंभार रै बिचालै काँई संवाद होवै ? विस्तार सूँ लिखौ।
 - ‘बांझ’ लघुकथा लोकमानस रै किण सोच नै मिटावण में सहायक सिद्ध होवै ?

निबंध

सुख-दुख

प्रो. कल्याणसिंह शेखावत

निबंधकार परिचै

प्रो. कल्याणसिंह शेखावत रो जलम 7 जुलाई, 1942 नै होयौ। आपै पिता रो नांव शिवदयालसिंह हो। आपरी मायड़ भासा राजस्थानी रा रुखाला, उण रा हिमायती अर उणनैं पोखण री तजबीज करणवाला प्रो. शेखावत पंदरे पोथ्यां रै लेखन अर संपादन कर्स्यौ। जोधपुर विश्वविद्यालय में राजस्थानी विभाग री थरपणा अर रुखाल रै जस प्रो. शेखावत नै जावै।

आप राजस्थानी भासा, साहित्य अर संस्कृति नैं सरल सबदां रै बागौ पैरायनै पाठक-समाज नैं सूर्योपियौ। साहित्य रै इतिहास री गैरी कूंत अर संस्कृति रै ओछाड़ ओढायौ। आपरी सिरजण ऊसा अर विद्रुता रै पाण केर्इ सम्मान आपनैं मिल्या। केर्इ विश्वविद्यालयां मांय आप पाठ्यक्रम मंडळ रा संयोजक अर सदस्य रैया। आप केर्इ राष्ट्रीय अर अंतरराष्ट्रीय संगोष्ठियां में भाग लियौ अर संगोष्ठियां रै आयोजन ई कर्स्यौ। मीरां बाई रै व्यक्तित्व अर कृतित्व नै लेयनै आप साहित्यिक कूंत करी। निबंध रचना री पोथी ‘मणिमाळ’ मानवी भावां री पारख अर अंवेर करै।

पाठ परिचै

निबंध गद्य री कसौटी मानीजै। राजस्थानी रै मांय निबन्ध-लेखन री परंपरा आधुनिक गद्य विधा सूं आई। दूजी भासावां री गद्य विधावां जियां राजस्थानी में आजादी रै पैलै सूं ई केर्इ वरणनात्मक, भावनात्मक, घटनात्मक अर आत्मकथात्मक निबन्ध लिखीजता रैया है। सामाजिक, सांस्कृतिक अर राजनीतिक तौ केर्इ व्यंग्यात्मक निबंध लेखन री परंपरा अठै रैयी है। कोई अेक विसय, घटना कै भावां रै सागर में ढूब रे लेखक आपै विचारां नैं सबदां रै ओळै-दोळै गूंथै अर समाज नैं नूंवी दीठ अर नूंवी सोच देवण रा जतन करै। भासा अर भाव रा संजोग नैं लेयनै पोथी ‘मणिमाळ’ रा निबंध ई राजस्थानी गद्य-साहित्य री विसेसतावां साथै खरा उतरै। ‘सुख-दुख’ निबंध भावनात्मक निबंधां री पोथी ‘मणिमाळ’ सूं लिरीज्यौ है। औ निबंध प्रो. कल्याणसिंह शेखावत रै निबन्ध-संग्रे ‘मणिमाळ’ सूं लिरीज्यौ है। इण पोथी में मनगत भावां अर अंतस रै गैरी आध्यात्मिक चिंतन निजर आवै। आप जीव-जगत, मोह, माया, सपनौ, रीस, ईसकौ, हरख, हेत, डर, भूख, आत्मा, धरम, मौत अर सुख-दुख जैडा विसयां नै लेयनै निबन्धां री रचना करी है। सुख-दुख मानवी भाव ई है, जिकौ मिनख री दसावां साथै ऊपजै। भौतिक सुख, आत्मिक सुख या आध्यात्मिक सुख दो न्यारा रूप है। मरजी रौं काम बणतौं जावै, सगळी थितियां अर बगत मिनख रौं साथ देवता जावै तौं उणसूं सुख रौं अनुभव होवै। थितियां अर बगत साथ नैं देवै, जिकौ चावै वौं काम पूरै नौं होवै, इच्छावां पूरी नौं होवै तौं उणसूं दुख ऊपजै। इच्छावां रौं पूरी होवणौ सुख है। आ बात ई खरी है कै हरेक मिनख रै वास्तै सुख अर दुख रा नांव, रूप अर म्यांना न्यारा-न्यारा होवै। परम सुख में आनंद है अर आनंद आध्यात्मिक सुख सूं आवै। सुख-दुख तौं भौतिक अर नासवान देही री भावनात्मक अवस्थावां है। ढळती-उतरती छियां रै ज्यूं जीवण में सुख-दुख आवता-जावता रैवै। कोई मिनख हरमेस सुखी नौं रैय सकै अर नौं दुखी रैय सकै। जीवण रै साथै ज्यूं मौत ई आवैला। सांत चित्त में कणैई रीस ई अवस आवैला, सूरज ऊगै तौं वौं आथमै ई है। रात रै पछै दिन अर दिन रै पछै

रात आवै । बगत बदल्तौ रैवै । जीवण में बदल्वा आवै अवस । किणी रौ ई जीवण ओक जैड़ौ नीं रैय सकै । उणीज भांत जीवण में सुख-दुख ई आवै । इच्छावां रौ तिरपत रूप सुख है अर सुखां री इच्छा राखणी ही दुखां रौ मूळ है । लेखक मानवी दसावां माथै सगळी बातां रौ खुलासौ करण री खेचल करी है । देह रा हाव-भाव सूं हियै रा भाव प्रगटीजै ।

राजस्थानी रौ औ दूहौ जिणमें कवि भौतिक सुखां रौ वरणाव इण भांत करै—

गो-धन, गज-धन, बाजि-धन, और रतन धन खान ।

जब आवे संतोष धन, (तो) सब धन धूरि समान ॥

तौ दूजै कानी कवि बांकीदासजी पूरण सुख इण भांत बतावै—

ज्यांरै खाक बिछावणौ, ओढण नै आकास ।

ब्रह्म पोख संतोस वित्त, पूरण सुख त्यां पास ॥

हाथी, घोड़ा, रथ अर रतन भण्डार दिन-दिन बधता जावै तौ ई बिना संतोस करियां सुख नीं मिलै अर जिणरै कनै कीं कोनी, वौ ई जे संतोस नैं धारण करतै तौ पूरण सुख मिल जावै । बात कैवण में साव छोटी लागै के ‘संतोसी सदा सुखी’ पण काँई आपां संतोस राखां ? काँई सुखी रैवण रा असल साधनां नै अपणायनै दुखां नैं मिटावण रा जतन करां ? काँई सुख-दुख नैं आपां खुद ई न्यूंत बुलावां कोनी ? औङ्ग घणाई सवालां रा पडूत्तर इण निबंध नैं पढनै समझण सूं मिल्लै । आपणा धरम-ग्रंथां—वेद-सास्त्रां, गीता, रामचरितमानस, बडा-बडा विद्वान, सन्त, साहित्यकारां सुख-दुख नैं लेयनै जिका भाव राख्या, उणां रा रूपाला दाखला देतां थकां लेखक आपरी बात राखी है । इण निबंध में च्यारुंमेर देख्योड़ौ, भोग्योड़ौ साच इधकी परिभासावां साथै उजागर करीज्यौ है । निबंध री भासा सरलता अर सहजता लियोड़ी है । उक्तियां साथै छोटा-छोटा वाक्यां में आपरी बात कैवणी, ओक वाक्य रै साथै दूजै वाक्य रौ जुड़ाव, केरई ठौड़ां काव्यमय अभिव्यक्ति, जनमानस में परोटीजै जैड़ा सबदां रौ प्रयोग सरलता सूं गैरी बात नैं समझावण री खिमता इण निबंध री विसेसतावां है । हरेक बार नूवै ढालै आपरी बात कैवण री कला राखणी, आ निबंधकार री इधकाई है । सब सूं मोटी बात कै सुख अर दुख रौ कोई ओक सरूप कोनी । औं निबंध आखरां रूपी मणियां नैं पोयनै ‘दुलड़ी’ (सुख-दुख) री अमोलक माला ज्यूं पाठकां रै हिवड़ै हिलोला लेवै अर नूवै मारग री सोझी देवै ।

सुख-दुख

संचय रौ भाव ही दुख रौ मूळ है अर त्याग सूं सुख-सांति मिलै । श्रीमद्भागवत गीता में भगवान वासुदेव कैयौ है—‘त्यागच्छानिरुत्तरम् (12/12) त्याग सूं इज तुरंत परम सांति मिलै ।

सुख री आसक्ति छूटण सूं ही सै दुखां रौ कळेस मिट जावै अर आणंद मिलै । जिका संसारी सुख प्राणी नै दीसै, वै सै दुख री ही जड़ है । सुख री कामना ही दुख है । जे सुख री इच्छा ही नीं हुवै तौ दुख उपजै कठै सूं ? सुख अर दुख रौ जोड़ौ है, पण दोनूं सदा रैवण वाला कोनी । ज्यूं धूप अर छाया आता-जाता रैवै— कदैई चढै तौ कदैई ढल जावै । इणी भांत सुख अर दुख भी आवै अर चल्या जावै । इण खातर न सुख में घणौ राजी होवणौ अर न दुख में निरास । संतवाणी रा बोल इणी भाव नै दरसावता कैवै—

देह धौरै रा दंड है, सब कोऊ को होय ।

ज्ञानी भुगतै ज्ञान से, मूरख भुगतै रोय ॥

चाणक्य नीति मुजब—

क्रोधौ वैवस्वतौ राजा, तृष्णा वैतरणी नदी ।
विद्या कामदुधा धेनुः सन्तोषी नंदन वनम् ॥

रीस जमराज ही है। इच्छावां वैतरणी जैडी विसाल नदी है, विद्या कामधेनु समान है अर संतोस नंदनवन ज्यूं सुखदाई है। सुख अर दुख प्राणी रै मन रा भाव है। यूं तौ सै प्राणी सुख-दुख री अनुभूति करै, पण मानखे में औं भाव कीं इधका है अर आं भावां नै समझावण री वाणी भी उणरै कन्नै है जिकी दूजा प्राणियां कन्नै कोनी! जिकी बातां अर कारज मनुज रै मन नैं भणण वाळा या लुभावण वाळा है, वांसूं उणरै मन में सुख उपजै। किण बात अर काम सूं कितौ सुख उपजै औं बतावणौ घणौ दोरै है, पण मिनख रा हाव-भाव, हास-विलास नैं देखनै इणरौ कीं अंदाजौ अवस लगायौ जा सकै है। हरेक मानवी सुखी रैवणौ चावै, पण सुख सदा रैवै कोनी— इणरौ काँई कारण है? गुणीजन सुख-दुख रौं संबंध उणरै पूरबला अर अबार रा करमां सूं जोड़े। आछा करम सुख देवै अर बुरा करमां सूं दुखां रै कल्पेस भुगतणौ पड़े।

सुख री अनुभूति भी न्यारी-न्यारी होवै। काया रौं सुख न्यारौ है अर मन, बुद्धि अर आत्मा रौं सुख दूजौ है। आछौ खावण-पीवण, आछा कपड़ा अर रैण-सैण सूं काया नैं सुख मिलै पण मन, बुद्धि अर आत्मा उणैं सुख नैं समझै। भगत नैं ईस नैं भजियां सूं ही सुख मिलै। चिंतक अर साधक रौं सुख बुद्धि सूं संबंध राखै अर मन विसय-वासना सूं सुखी होवै। साधु-सन्त सदआचरण सूं सुख री अनुभूति करै। उणां नैं मदिरापान सूं सुख री जागां दुख री अनुभूति होवै। संसार बोल-बतावण सूं सुखी होवै पण साधक मौन धारण सूं। इण जग में सुख रा कारण भी भांत-भांत रा है। गरीब अपार धन मिलण सूं निपूतौ पूत मिलण सूं कुंवारौ ब्यांव होवण सूं रोगी निरोगा होयां सूं वकील मुकदमौ जीतण सूं सुखी होवै, पण भगत भगवान मिलण सूं विग्यानी नयौ आविस्कार करण सूं धरमी परोपकार, चांडाल पापाचार कर राजी होवै। वौ ही उणां रै सुख रौं आधार बणै। कीड़ी कण सूं राजी होवै अर हाथी मण सूं। संत कबीर रा सबदां में—

सुखिया सब संसार है, खावै अरु सोवै।
दुखिया दास कबीर है, जागै अरु रोवै ॥

ओ सुख अग्यानता रौ है जिण सूं संसारी सुखी रैवै, पण ग्यानी ग्यान री जोत नैं देख्यां पछै दुखी रैवै। जिकौ मनुज जय-पराजय, लाभ-हाण अर सुख-दुख नैं अेक समझ रै करम करै बो सच्चौ साधक बाजै, पण औं काम हरेक संसारी रै बस रौं कोनी

श्रुति री मानता है कै 'यो वै भूमा तत् सुखं नाल्पे सुखमस्ति'। इणरौ मतल्ब औं कै थोड़ा में सुख कोनी, जिकौ भूमा है पूरौ है— वौ ही सुख है। औं सुख भगवत मिलण रौ है। ग्यानी कैवै— अग्यानी मनुज संसारी संबंधां, धन-संपदा, माया-मोह नैं ही सुख मान लेवै जिकौ असल में दुख रौ मूल है— भ्रम है। औं जगत तौ अपूर्ण अर सदा नैं रैवण वालौ है, पण प्रभु तौ पूरण अर सदा रैवण वाळा है। ग्यान अर सतसंग रै बिना औं अंधारौ मिटै कोनी, जिण सूं मानवी, झूठा संसारी सुख नैं ही साचौ मान भगवान री भगती रा सुख कानी लागै कोनी। ब्रह्म नैं पावण सूं मिलण वालौ सुख ही साचौ, हमेस रैवण वालौ अर आणंद देवण वालौ है।

धरम री धारणा है कै भगत अर ग्यानी सदा सुखी रैवै।

त्याग सूं प्रेम, प्रेम सूं सुख अर सुख सूं सांति रौ जलम होवै। हेत रौ आधार है त्याग अर उणैं समूल खतम करण वालौ है स्वारथ। अनुभूत साच औं ही है कै जठै प्रेम है बठै ही सुख है अर जिण जगां सुख है सांति भी उण ठौड़ है। सुख मीठा बोलां सूं भी मिलै, इण खातर ही तुलसीदासजी कैयौं है—

‘तुलसी’ मीठे बचन तें, सुख उपजत चहुं ओर।
वसीकरन यह मंत्र है, परिहरू बचन कठोर ॥

मीठा बोल बोलनै जद किणी नैं बस में कर्खौं जाय सकै है तौ कठोर बचन क्यूं बोलणा?

स्वीडिस कहावत है कै— बांट लेवण सूं सुख दुगणौ व्है अर दुख आधौ। इण खातर सुख अर दुखां नै बांट लेवणा चाइजै। आपां दूजां नैं सुख देयनै ही सुखी रैय सकां हां। ओरां नैं दुख देयनै आपां सुखी नीं रैय सकां। सुख रै भरपूर आणंद लेवण खातर उणनैं बांटणौ जरुरी है।

सुख रै पछै दुख अर दुख रै पछै सुख आवै। औं विधि रौ विधान है—

सुख बीते दुख होत है, दुख बीते सुख होत।

दिवस गये निसि उदित, निसिगत दिवस उदोत।

बुराई सूं सुख घटै अर दुख बधै—

करै बुराई सुख चहै, कैसे पावे कोय।

बोवै पेड़ बबूल का, आम कहाँ ते होय।

सुख री पिछाण है खुली हंसी अर छिपी मुस्कान। सुखी वौ कोनी जिणरै कन्नै सो-कीं है—पण जिणरै कन्नै जिकौ है उण सूं तुस्ट रैवण वाळौ ही सुखी है। इण तरै संतोस रौ दूजौ नांव ही सुख है। म्हारै कन्नै कांई है—इणसूं सुख नीं मिळै, पण जिकौ है उण सूं राजी अर तुस्ट रैवणौ ही सुख है। ईमानदारी भी सुख देवण वाळी है।

धन सूं सुख खरीदचौ नीं जा सकै, फगत आपां मन रौ रंजण खरीद सकां हां। सुख रौ भोग भोगणौ जठां तांई दोरौ है जद ताईं कै आपां उणनैं पैदा नीं करां।

दुख भी प्राणी रै हीयै री पीड़ सूं उपजै। है तौ औं मन अर हीयै रौ भाव, पण इणरौ सबसूं बेसी असर काया पर पड़ै।

दुख दो तरै रा होवै— अेक काया रौ अर दूजौ हीयै रौ। किणी तरै री विपदा जिणमें काळ पडणौ, बाढ अर तूफान आवणौ, आग लागणी, अकाळ मौतां होवणी, भूचाळ आवणौ, बीजाळ पडै, लावौ निकलै जैड़ा संकट आवै तद मिनख ही नीं आखौ प्राणी जगत दुखी होवै, तद प्राणी री काया अर मन हीयै नै पीड़ झेलणी पड़ै।

चिंता दुख रौ भारौ है। डर सूं भी दुख उपजै। दुख रा दिन लांबा अर सुख रा दिन छोटा हुया करै। दुख रौ अेक पल भी अेक जुग रै बरोबर लागै, पण सुख री छियां ढल्तां कीं जेज नीं लागै। बीत्योड़ा दुखां नीं कर्दैई याद नीं करणा चाईजै।

दुखां री सरुआत आखरां सूं व्है। बल्ता खीरा सो अेक-अेक आखर मन अर तन दोनुवां नैं झुळ्सा देवै। सुख री लालसा दुख रौ ही अेक रूप है। जिण कर्दैई दुख नीं देखौ, वौ सब सूं बडौ दुखी है। दुख रौ अेक कारण करजौ भी मानीज्यौ है। इण खातर मिनख नीं जे सुखी रैवणौ होवै तौ करज लेवण सूं बचणौ चाईजै।

देह रा इण दुख सूं हीयै रौ दुख घणौ दुखदाई होवै। गाळी-गालौज करण, तानौ मारण, स्नाप-दुरासीस देवण, चिड़ावण, मान घटावण, नीचौ दिखावण, निंदा, बदनामी अर चुगली करण, बात नैं बार-बार काटण, ठगी अर चोरी करण, बिना कारण सतावण, घात करण, जमीन, जोरू, धन-संपदा अर घर दबावण, दियोड़ी वसत नैं खावण री नियत करण, बणता काम अर बधोतरी में रोड़ै अटकावण, मां, भाण, बेटी अर लुगाई नैं बुरी निजर सूं देखण, धरम, देवी-देवता, आस्था विस्वास, मानीता सत्पुरुसां, लोकनायकां, वीरां, धीरां खातर ओछा बोल बोलण वाळा या बुराई करण वाळां सारू मानवी मन में दुख री झाल उठ्यां बिना नीं रैवै। मन, वाणी, सरीर अर करम सूं दुख अर सुख उपजै।

भगवान मनु कैवै— जिकौ बारली जिनसां रै अधीन है, वौ सगळौ दुख है अर जिकौ आपणै अधिकार में है, वौ सुख है।

भोग सूं बैर-भाव पनपै अर बैर सूं दुख रौ जलम हुवै जिणसूं असांति फैलै। भोगी मिनख भोग कानी ही

आसक्ति राखै अर जिकौ उणरै भोग में बाधक बणै उणसूं बैर राखै— बैर-भाव सूं दुख अर दुख सूं आसक्ति, औ चक्कर चालतौ ही रैवै।

इन संसारी दुख सूं दुखी मनुज करतार री सरण लेवै, पण भगतां अर संतां रौ कैवणौ है—

दुख में सुमिरन सब करै, सुख में करै न कोय।
जे सुख में सुमिरन करै, दुख काहै को होय॥

जठै त्रस्या, राग, द्वेष अर ईरखा है, बठै सुख कठै? दुख अर सुख में समभाव राखण वालै मनुज जोगी पुरसोत्तम मानीज्यौ है।

धरम दुख नैं समूल खतम करण खातर परम सुखदायक परमात्मा री सरण में जावण री बात कैवै। भगत रौ दुख भगवान मिल्यां सूं ही मिटै अर दुख में ही प्रभु याद आवै। सुख में मिनख भगवान नैं याद ही नॊं करै। दुख क्यूं जलमै? उण रा कारण अर हेतु काई है? इण बात पर विचार करां तौ लखावै कै यूं तौ दुख रा घणकरा कारण है, पण मूल कारण है आपणी मनचींती नॊं होवण सूं दुख उपजै। मिनख सोचै कीं है अर होय जावै कीं, तद दुख होवै।

समाज में मान घटणौ भी दारुण दुख रौ कारण है। विसय भोग कानी राग दुख रौ मूल बणै। गरीबी अर करजदार होवणौ दुख उपजावण वालै दो सीगा है।

दुख पूरबला करमां रौ फळ भी मानीजै। भगवान भी जद मानवी देह धारण करै तद वानै भी काया रा औ दुख भोगणा ही पड़ै।

दुख रौ कारण मोह अर आसक्ति भी है। औ म्हारौ है। म्हारौ इणरै साथै संबंध है— मां, बाप, भाई, भाण, बेटी-बेटौ, दादा-दादी, नाना-नानी, मामा-मामी, साली-सालौ-बैनोई, नणदोई न जाणै कित्ता संसारी रिस्ता-नाता है जिकां रै मोह बंधण सूं औ मानवी बंध्योड़ै है।

दुख रौ कारण अग्यान है, क्यूं कै सुख-दुख तौ घिरती-फिरती छियां हैं। जठै सुख है बठै दुख आवणौ ही है। इण जग में सुख कमती अर दुख बेसी रैवै। दुखां रौ सोच न करणौ ही दुखां सूं मुगती रौ मारग है। दुख नैं हंस नैं काटै वौ ही सुखी रैय सकै। महाभारत में छह तरै रा दुखियां रौ खुलासौ करतां कहीज्यौ है कै दूजां सूं ईरखा राखण वालै, घिरणा करण वालै, असंतोसी, रीसालू, संका करणहार, परधन सूं जीवण वालै— औ छह संसारी दुखी हैं।

⌘⌘

अबखा सबदां रा अरथ

आसक्ति=लगाव, प्रेम। कल्लेस=भावां रौ ढुंद्ह, पीड़ या दुख रौ दरद। दण्ड=यातना, दुख। नंदनवन=सदा सुख देवण वालै सरस सजीवनता। रीस=किरोध, गुस्सौ, झाल। मुस्कान=मुल्क, मधरी हंसी। मनचींती=मन री इच्छा, मन में सोच्योड़ै। ईरसा=ईरस्या, ईढ। देह धैरका— देहधारियां रा।

सवाल

विकल्पाऊ पद्धत्तर वाला सवाल

1. 'मणिमाल' किण विधा री पोथी है?

(अ) निबंध री	(ब) कहाणी री
(स) नाटक री	(द) संस्मरण री

()

2. 'सुख-दुख' निबंध रौ रचयिता रौ नांव—
 (अ) डॉ. गजादान चारण (ब) डॉ. मनोज स्वामी
 (स) रवि पुरोहित (द) प्रो. कल्याणसिंह शेखावत
 ()
3. 'सुख-दुख' निबंध रौ रूप है—
 (अ) वरणनात्मक (ब) राजनीतिक
 (स) भावनात्मक (द) आं मांय सूं अेक ई कोनी
 ()
4. 'सुखिया सब संसार है' तौ दुखी कुण है?
 (अ) तुलसीदास (ब) कबीर
 (स) सूरदास (द) रसखान
 ()
5. दुख रौ मूळ कारण है—
 (अ) संचय रौ भाव (ब) बैर रौ भाव
 (स) त्याग रौ भाव (द) संतोस रौ भाव
 ()

साव छोटा पढ़तर वाला सवाल

1. 'देह धरै रा दण्ड है सब कोऊ को होय' ओळी रौ भाव लिखौ।
2. इच्छावां किण नदी जितरी विसाल है ?
3. स्वीडिस कहावत रौ म्यानौ देवौ।
4. सुख किण सूं मिल्ल सकै ?

छोटा पढ़तर वाला सवाल

1. आदमी नैं सुख अर दुख क्यूं भोगणा पड़ै ?
2. 'संतोसी सदा सुखी' लेखक क्यूं कैवै ?
3. मनु काँई कैवै ? इण निबंध मांय सूं लिखौ।
4. काँई धन सूं सुख मोलायौ जाय सकै ? इण विसय में दो ओळ्यां मांडौ।
5. 'भोग सूं बैर-भाव पनपै !' इणरौ काँई कारण है अर बैर-भाव सूं काँई मिलै ?

बडा पढ़तर वाला सवाल

1. सुख-दुख जैड़ा भावां नैं लेयनै निबंध लिखण रै लारै लेखक रौ मूळ ध्येय काँई रैयौ होवैला ? आपरा विचारां में खुलासौ करौ।
2. सुख-दुख निबंध रौ सार आपरा सबदां में लिखौ।
3. लोक मानता रै मुजब सुख पुण्य सूं अर दुख पाप सूं मिलै। इण कथन रौ खुलासौ करौ।
4. धरम ग्रंथां अर संत-भक्त कवियां सुख-दुख रै वास्तै आपरा काँई-काँई विचार राख्या है। इणरौ वरणाव दूहां रा दाखलां सागै करौ।

नीचै दिरीज्या गद्यांसां री प्रसंगाऊ व्याख्या करौ।

1. सुख री पिछाण है खुली हंसी अर छिपी मुस्कान। सुखी वौ कोनी जिणरै कत्रै सो-कीं है—पण जिणरै कत्रै जिकौ है उण सूं तुस्ट रैवण वाळौ ही सुखी है। इण तरै संतोस रौ दूजौ नांव ही सुख है। म्हारै कत्रै कांई है—इणसूं सुख नीं मिळै, पण जिकौ है उण सूं राजी अर तुस्ट रैवणौ ही सुख है। ईमानदारी भी सुख देवण वाळी है।
2. दुखां री सरुआत आखरां सूं व्है। बळता खोरा सो अेक-अेक आखर मन अर तन दोनुवां नैं झुळसा देवै। सुख री लालसा दुख रौ ही अेक रूप है। जिण कदई दुख नीं देख्यौ, वौ सब सूं बडौ दुखी है। दुख रौ अेक कारण करजौ भी मानीज्यौ है। इण खातर मिनख नैं जे सुखी रैवणौ होवै तौ करज लेवण सूं बचणौ चाईजै।
3. धरम दुख नैं समूळ खतम करण खातर परम सुखदायक परमात्मा री सरण में जावण री बात कैवै। भगत रौ दुख भगवान मिल्यां सूं ही मिटै अर दुख में ही प्रभु याद आवै। सुख में मिनख भगवान नैं याद ही नीं करै। दुख क्यूं जलमै? उण रा कारण अर हेतु कांई है? इण बात पर विचार करां तौ लखावै कै यूं तौ दुख रा घणकरा कारण है, पण मूळ कारण है आपणी मनचींती नीं होवण सूं दुख उपजै। मिनख सोचै कीं है अर होय जावै कीं, तद दुख होवै।
4. दुख रौ कारण अग्यान है, क्यूं कै सुख-दुख तौ घिरती-फिरती छियां है। जठै सुख है बठै दुख आवणौ ही है। इण जग में सुख कमती अर दुख बेसी रैवै। दुखां रौ सोच न करणौ ही दुखां सूं मुगती रौ मारग है। दुख नैं हंस नै काटै वौ ही सुखी रैय सकै। महाभारत में छह तरै रा दुखियां रौ खुलासौ करतां कहीज्यौ है कै दूजां सूं ईरखा राखण वाळौ, घिरणा करण वाळौ, असंतोसी, रीसाळू, संका करणहार, परधन सूं जीवण वाळौ— औ छह संसारी दुखी है।

॥रेखाचितराम

चामळ का घाट पे

अतुल कनक

लेखक परिचै

अतुल कनक रो जलम 16 फरवरी, 1967 नै कोटा जिलै री रामगंज मंडी में होयौ। राजस्थानी रा चावा कवि, कथाकार, आलोचक अर उल्थाकार अतुल कनक री राजस्थानी में ‘आओ बातां करां’ (कविता-संग्रे), ‘जूण जातरा’ अर ‘छेकड़लो रास’ (उपन्यास) अर राजस्थानी भासा को मध्यकाल (आलोचना), हिन्दी में ‘पूर्वा’ (गीत-संग्रे), ‘चलो चूना लगाएं’ (व्यंग्य संग्रे) अर ‘प्रेम में कभी-कभी’ (प्रेम कवितावां) छप्योड़ी पोथ्यां। राजस्थानी अर हिंदी रै अलावा अंग्रेजी में ई लेखन। देस री नामी पत्र-पत्रिकावां में दस हजार सूं बेसी रचनावां छप्योड़ी। उपन्यास ‘जूण जातरा’ सारू साहित्य अकादेमी, दिल्ली रै राजस्थानी पुरस्कार समेत मोकठा इनाम-इकराम। माध्यमिक शिक्षा बोर्ड, अजमेर अर वर्द्धमान महावीर खुला विश्वविद्यालय कोटा रै पाठ्यक्रम मांय रचनावां सामल। मंच रा ई चावा कवि। दूरदरसण सारू केई वृत्तचित्रां अर दो धारावाहिकां रो लेखन। भासा, साहित्य, संस्कृति, कला, इतिहास, पुरातत्त्व अर लोकजीवण आपरी लेखकीय रुचि रा खास विसै। अबार कोटा में रैवै अर साहित्य लेखन रै साथै-साथै पत्रकारिता करै।

पाठ परिचै

‘चामळ का घाट पे’ अतुल कनक रौ लिख्योड़ी भावपूर्ण रेखाचितराम है। बदलतै बखत में आपरै प्राकृतिक संसाधनां सारू लोगां री धारणावां अर आस्थावां ई बदलती जा रैयी है। औड़े बखत में लेखक चंबल नदी सारू आपरी आस्था प्रगट करी है। लेखक नदी रौ मानवीकरण करता थकां उणरी तुलना मां सूं करै अर बतावै कै आज री भाजानासी री जिंदगाणी में इण मां री बेकदरी होय रैयी है। लेखक साची कैवै—‘जीं कोई सूं कोय कारज न्हं सधतो दीखे, ऊं के कनै जाबा की फुरसत छै कुण के गौड़े?’ इण रेखाचित्राम में लेखक रा दारसणिक भाव प्रगट होया है। हाड़ोती बोली रौ मीठास लियां और रेखाचित्राम आपणी कुदरती चीजां सारू मिनखां रै मोहभंग माथै चिंता प्रगट करै।

चामळ का घाट पे

नरा दनां पाछै चामळ (चंबल नदी) का यां घाटां का दरसन कर्या। पिताजी याद आयग्या। बालपणां में वांकी आंगली पकड़नै नरी बेर यां घाटां पे आयो छूं। धणां उछाह सूं वां मनै छ्वैती धारा बीचै तिरबौ सिखायौ छौ। ऊं बगत ताँई म्हारै गौड़े न्हं तो वांका उछाह अर उमाव के ताँई प्हैचाणबा की सामरथ छी अर न्हं ही हूंस। पण अब जद खुद बाप बण्यौ छूं तौ समझ सकूं छूं के कोय बाप के ताँई आपणी औलाद के ताँई तिरबौ सिखाबा में काँई सुख मिलै छै। बाप सूं बधकर जगत का समदर में तिरबा की चोखी सीख दे भी कुण सकै छै? पिताजी घाट पे मनख्यान् सूं बतियाता होता, तौ भी म्हूं छपाक सूं नदी में कूद जातो। पिता को होबो ही म्हां के ताँई सगळी चिंतावां अर सगळा डरप सूं कश्यां बचा ल्ये छै, यौ साच म्हूं पिताजी का रामसरण होयां पाछै जाण्यो। घाट पे ऊबौ छौ तौ जाणै घाट ओळमौ दियो, “आज अेकलो कश्यां आग्यो भाया? पिताजी चिंता करेगा न!”

मूँ समझूँ छूँ घाट का म्हैड़ला की बात। यां की आंख्यां में तौ अबार भी वै ही चतराम छै— कै मूँ छणीक-सी जेज आंख्यां सूँ दूरै सरकतौ तौ पिताजी की आवाज नदी को काळज्यौ चीर देती, “पम्मी, ओ पम्मी...” अब न्हं वश्यां हेलौ पाड़बा हाल्वा पिताजी जगत में रुया अर न्हं घाट पे वशी रैनक। लारला बरसां में चामळ का बंधा सूँ होयनै कतनौ पाणी खड़ग्यौ, तोळ ही न्हं पड़ी।

देखतां ही देखतां जिनगाणी कतनी बदल्गी? कोई बगत छै जद मनख या घाटां पे ही परभाती गाकर आपणा दन की सरुवात करै छै। आज तो शहर तगात में नरा मोठ्यार अश्या छै, ज्यानै अबार तांई यां घाटां को मूँडौ ही न्हं ओळछ्यां होवैगौ। मनख्यां की जरुरतां बदल्गी। जमारौ मुट्ठी में सिमटकर कांई आयै, काळज्या भी जाणै सिकुड़ग्या। जीं कोई सूँ कोय कारज न्हं सधतौ दीखे, ऊं के कनै जाबा की फुरसत छै कुण के गौडे? नदी तो नळ का पाइप में हो-होकर घर-घर तांई पूग्यां, अब नदी तांई पूग्यां की गरज कुण के छै? फेर, जद नदी आप आपणां अस्तित्त बेर्इ मोटी लड़ाई लड़ती होवै तौ यां घाटां को महत्त तो नदी सूँ ही छै। गंगा होवै कै चामळ, म्हंई लागै छै कै वां कै सिराणै उल्ला घाट म्हां मनख्यां का माजणां ई देखकर अतनी जोर सूँ कचकची खाता होवैगा कै वांका डील में ही ठंव-ठंव पे जखम पड़ग्या।

नद्यां कोय का सुख में पांती न्हं पाडै, लगौलग पुन्र की पांती बांचै छै। पण ई दौर में वांका नीर ई भी लीर-लीर करबा हाल्वी राजनीति तौ पुन्र की पूण्युं पे राहू बणकर ग्रहण लगा रही छै। लोग नद्यां पे भी हक जता रुया छै। नद्यां के तांई आपणी मूठी में बांध लेबा को सुपनो सजाबा हाल्वा यां मनख्यां सूँ कोय पूछै कै नद्यां तौ सबकी महतारी छै अर महतारी की ममता पे कोय अेक ही बेटा को अधिकार न्हं होवै। पॅण या बात वे लोग न्हं समझ सकै छै, ज्यानै घाटां सूँ लिपटकर ब्हैती नदी को बहाव न्हं देख्यो होवै।

बालपणां में ज्यां घाटां पे मनख्यां को मजमौ देखै छै, अब वां ही घाटां पे सरणाटो पसर्यौ छै। घाट पे अेक आड़ी थरप्या शिवलिंग (शिवजी की पिंडी) ई देखकर लाग्यौ, मानौ कोई बूढाकर हरिनाम जपकर मनखजूण का तमाशा ओळख रुयौ छै। जश्यां कोय भर्या-पूरा घर में अेकलौ बूढाकर हाउजी, किटी पार्टी, कंप्यूटर जश्यां कौतुकां सूँ परे जाकर आपणी कोठरी में ई आस सूँ सुमरनी का मनक्या फैरतो रहै छै कै कोय तौ मनक्यौ मौत की मंसा पूरेगौ। पण कांई नदी अर ऊं का घाट भी अतना परबस अर बूढा हो सकै छै? जीं दन नद्यां मौत मांगणी सरू कर दी, ऊं दन मनख जमारौ कांई करेगौ?

... और की कांई कहूँ, म्हारा बालपण की तो नरी यादां यां घाटां सूँ गूंथी होई छै, पण मूँ आप भी तो बरसां पाछै चामळ का ई तीर पे आयौ छूँ। आयौ कांई छूँ आणौ पड़ग्यौ। म्हां लोग यां दनां नदी तीरै जावां ही कद छां? जद कोय रामसरण हौ ज्यावै छै तौ मसाणां सूँ बावड़ती बगतां शुद्धि को लालच म्हां के तांई घाट की आड़ी धकेल द्यै छै। मसाणी माटी का अपसगुन सूँ मुगती को लालच न्हं होतो तौ आज भी कुण जातौ घाट पे? अब तौ नरा मनख ई रीत की भी काट खाड़ ल्यै छै। नळ के पींदै बैठ जाबा सूँ ही जे कारज सध जाता होवै तौ फेर नदी का घाट की पैळ्यां कुण उतरै?

जे चीज काम में न्हं आवै, वा हवळै-हवळै आपणौ महत खो द्यै छै। घाट तौ अब आपणौ रूप भी खोबा लाग्या। उठी पड़या कूड़ के तांई ओळखकर घिन आबा लागी। कदी ये ही घाट मुळकै छा अर मुळकावै छा। आप आपणां हाल पे अर जमारा का बरताव पे खून का आंसू ओसरता दीखै छै। म्हंई बालपणां में हेत लडाबा हाल्वी घाट गंदगी सूँ आंथड़ रुयौ छै। नदी कशी साता में छी? ऊं में भी मनख कूड़ पटकर रुया छा। मानता वहैवै छै कै पाणी में कूड़ पटक्यां सूँ पाप बदै छै। म्हनै सोची कै बालपणा की ओळूँ दोन्यूं हाथां सूँ अंगेज ल्यूँ। ई के बेर्इ घाट सूँ कूड़ हटाबौ भी जरूरी छै। पण जद सगळौ शहर नदी में कूड़ पटककर पाप कमा रुयौ होवै तौ म्हूँ ढोबौ भर पुन्र करके भी कश्या कारज साध लूँगौ?

म्हूं सोच में डूब्यौ थकौ छौ, म्हारै लारै आया मनख चाल पड़या। म्हंई सोच में डूब्यौ देख अेक बेली नैं सुझाव दियौ, “आप मूंडा अर माथा पे आलौ हाथ फेरल्यौ भाई साहब! फेर घरां जाकर नहा लीजौ।” ऊ समझ्यौ कै म्हूं गंदवा पाणी में उतरबा सूं डरप र्ह्यौ छूं। म्हूं ऊं के ताईं काईं समझातौ? म्हूं या बात भी जाणै छौ कै उठी रुकबा की थरता कोय में कोय नहं। म्हूं भी भीड़ के सागै आगै बदरयौ।

घाट सूं ऊपरै चढता सतां म्हंई लाग्यौ जाणै कोय आवाज छै, जे कहै रही छै, “फेर आइजै बेटा! थारी ओळूं सतावै छै अर थासूं दो बोल बोलबा को मन करै छै।” म्हारै ताईं उपेक्षा अर अेकलोपण झेलती वा जामण याद आगी, जीं नैं घणां उमाव सूं अेक मकान बणायौ छौ, पण मोर्च्यार होतां ही पेट का जाया बेटां नैं अेक अेक करके सगळा कमरा पे कब्जो कर ल्यौ अर अब डोकरी की खाट पैढऱ्यां के सौढै बणी अेक छोटी-सी कोठरी में बिछी छै। खाट घर सूं बारै भी जा सकै छौ, पण अब मां की पेंसन सूं नरा कारज सध जाबा को लालच मां को महत्त अतनौ भी नहं नकारबा द्यै।

⌘⌘

अबखा सबदां रा अरथ

नरा=खासा। दनां=दिनां। चामळ=चम्बल। नरी बेर=खासा देर। उछाह=उत्साह। उमाव=चाव। गौड़े=कनै। हूंस=इच्छा। मनख्या=मिनखां। रामसरण=निधन। म्हैड़ला=मन। खड़ग्यौ=निकळ्यौ। तोल=अंदाजौ। ओळख्यौ=पिछाण्यौ। सधतौ=सिध होवतौ। माजणां=औकात। महतारी=माता। ईं-नैं। आड़ी=कानी। तीर=किनारौ, कांठौ। मसाणां=समसाणां। हवळै-हवळै=धीरै-धीरै। कूड़=कूटळौ। ओसरता=बैवणा सरू होवता। म्हंई=म्हनैं। आंथड़ र्ह्यौ=भरुओड़ौ। साता=चैन। ढोबौ=धोबौ। थरता=धीरज। सतां=थकां। ओळूं=याद। जामण=माता। पैढऱ्यां=देहरी, थळी। सौढै=नजदीक।

सवाल

विकल्पाऊ पड़तर वाळा सवाल

1. बाल्पणै में लेखक नैं चामळ रा घाट माथै कुण ले जावता हा?

- | | |
|------------|------------|
| (अ) पिताजी | (ब) दादोसा |
| (स) नानोसा | (द) काकोसा |

()

2. रेखाचितरामकार ‘नदी’ नैं किणसूं बेसी मानी है?

- | | |
|-------------|-------------------|
| (अ) बैन सूं | (ब) नवी बीनणी सूं |
| (स) मां सूं | (द) भुवा सूं |

()

3. चामळ रा घाट माथै काईं बदल्याव देखनै लेखक दुखी है?

- | | |
|--------------------------|-----------------------------|
| (अ) पाणी कम होवण सूं | (ब) सरणाटौ पसरण सूं |
| (स) घाट टूट-फूट जावण सूं | (द) मिनखां रौ मेळौ मंडण सूं |

()

4. घाट सूं पाछौ ऊंची चढती बगत लेखक नैं कांई आवाज सुणण रौं लखाव होवै ?

(अ) लोगां नैं अठै मत आण दीजै ! (ब) अब कदैई मत आइजै !

(स) जोड़यत नैं सांगै लाइजै ! (द) फेर आइजै, बेटा !

()

साव छोटै पद्मनर वाळा सवाल

1. अतुल कनक नैं साहित्य अकादेमी पुरस्कार कुणसी पोथी माथै मिल्यौ ?

2. इण रेखाचितराम मांय राजस्थानी भासा री कुणसी बोली रौं मीठास है ?

3. लेखक नैं तिरणौ कुण सिखायौ ?

4. लेखक रौं बाळपणै में नांव कांई हो ?

5. 'माता' सबद रा दोय पर्याय बतावौ, जिका इण पाठ में आया है।

छोटै पद्मनर वाळा सवाल

1. अतुल कनक री राजस्थानी पोथ्यां रा नांव लिखौ।

2. अतुल कनक री लेखकीय रुचि रा खेत्र कुण-कुणसा है।

3. पिताजी घाट माथै मिनखां सूं बतावता तद लेखक कांई कर जावतौ ?

4. रेखाचितराम 'चामळ का घाट पे' मुजब पैली लोग दिन री सरुआत किण भांत करता ?

5. "बाप सूं बधकर जगत का समदर में तिरबा की चोखी सीख दे भी कुण सकै छै?" ओळी रौं म्यानौ द्यौ।

लेखरूप पद्मनर वाळा सवाल

1. 'चामळ का घाट पे' रेखाचितराम री मूळ संवेदना विगतवार बतावौ।

2. इण रेखाचितराम में लेखक नदी रौं मानवीकरण किण भांत कर्हौ है? खुलासौ करौ।

3. इण रेखाचितराम रै आधार माथै खुलासौ करौ कै आज कुदरती चीजां सारू मिनखां रौं मोहभंग होवतौ जाय रैयौ है ?

4. इण रेखाचितराम रै आधार माथै अतुल कनक री भासा-सैली अर लेखन-कला विस्तार सूं समझावौ।

5. "रेखाचितराम 'चामळ का घाट पे' में लेखक अतुल कनक रा दारसणिक भाव प्रगट होया है।" खुलासौ करौ।

नीचै दिरीज्या गद्यांसां री प्रसंगाऊ व्याख्या करौ।

1. नरा दनां पाछै चामळ (चंबल नदी) का यां घाटां का दरसन कर्ह्या। पिताजी याद आयग्या। बालपणां में वांकी आंगळी पकड़नै नरी बेर यां घाटां पे आयो छूं। घणां उछाह सूं वां मनै छ्वैती धागा बीचै तिरबौ सिखायौ छौ। ऊं बगत तांई म्हारै गौड़े न्हं तो वांका उछाह अर उमाव के तांई घैचाणबा की सामरथ छी अर न्हं ही हूंस।

2. बालपणां में ज्यां घाटां पे मनख्यां को मजमौ देखै छौ, अब वां ही घाटां पे सरणाटो पसर्ह्यौ छौ। घाट पे अेक आङ्डी थरप्या शिवलिंग (शिवजी की पिंडी) ईं देखकर लाग्यौ, मानौ कोई बूढाकर हरिनाम जपकर मनखजून का तमाशा ओळख रस्तौ छै।

3. जे चीज काम में न्हं आवै, वा हवळै-हवळै आपणौ महत्त खो द्यै छै। घाट तौ अब आपणौ रूप भी खोबा लाग्या। उठी पड़ा कूड़ के तांई ओळखकर घिन आबा लागी। कदी ये ही घाट मुळकै छा अर मुळकावै छा। आप आपणां हाल पे अर जमारा का बरताव पे खून का आंसू ओसरता दीखै छै।

□ व्यंग्य

सवाल शुद्धता रौ

डॉ. भगवतीलाल व्यास

लेखक परिचै

डॉ. भगवतीलाल व्यास रौ जलम 1941 में होयौ। आप अैम.ए., अैम.एड. तक भण्योड़ा है। आप लारलै पांच दसकां सूं राजस्थानी साहित्य री सेवा कर रैया है। आप राजस्थानी में पद्य अर गद्य दोन्यूं विधा में लिखै। ‘अणहद नाद’, ‘अगानी मंतर’ अर ‘सबद राग’ आपरा चावा कविता-संग्रै है। कविता टाळ आप कहाणी अर व्यंग्य भी लिखै। आप राजस्थानी भाषा, साहित्य एवं संस्कृति अकादमी, बीकानेर री मासिक पत्रिका ‘जागती जोत’ रौ केर्ड बरस संपादन ई करैयौ। आपनै के. के. बिड़ला फाउंडेशन कानी सूं ‘बिहारी पुरस्कार’, साहित्य अकादमी, दिल्ली कानी सूं ‘राजस्थानी पुरस्कार’, महाराणा मेवाड़ फाउंडेशन, उदयपुर कानी सूं ‘महाराणा कुंभा अवार्ड’ अर राजस्थान रत्नाकर कानी सूं राजस्थानी पुरस्कार मिळ चुक्या हैं। इणां रै टाळ ई केर्ड इनाम-इकराम। बरस 2014 में राजस्थानी भाषा, साहित्य एवं संस्कृति अकादमी, बीकानेर कानी सूं आपरै व्यक्तित्व अर कृतित्व माथै मोनोग्राम छप्पै।

पाठ परिचै

‘सवाल शुद्धता रौ’ व्यंग्य रचना आज रै आपा-धापी रै जुग में मिलावट माथै चोट करै। इणमें धणी-लुगाई रै पात्रां रै माध्यम सूं दूध री शुद्धता नैं लेयनै सामाजिक विसंगति रौ सांगोपांग व्यंग्यात्मक चित्राम उकेरण री कोसीस करीजी है। मिलावट री इण दुनिया में सामाजिक संबंध ई प्रभावित होवै है, इण कानी भी आ व्यंग्य-रचना इसारै करै। लेखक व्यंग्य रै सायरै सामाजिक तनै-बानै रै साँगे मिनख मायं पसरती खोट अर उणरौ सामाजिक अर मनोवैद्यानिक असर घणै सांगोपांग ढंग सूं बतायौ है। पुराणा अखाणां नैं उघाड़ता साच सूं परिचै करावै। पाठक रै मन में जथारथ रौ चानणौ करै। आज रै जुग री सब सूं मोटी समस्या मिलावट अर गिरावट है। इण रा दरसण हर ठौड़ निगै आवै। आलंकारिक भासा अर मुहावरैदार सैली घणी असरदार है। ‘सवाल शुद्धता रा’ रौ साचाणी आज रै जुग री मोटी अबखायी अर अबखौ सवाल ई है। हवा में भांग घुळण रौ कैयनै लेखक मिलावट रौ फैलाव अर प्रभाव बतावण री कोसिस करी है। व्यंग्य, हास्य, रोचकता आद विसेसतावां नैं अंगेजतौ औ व्यंग्य मिनख री सोच रौ साचौ चित्राम है।

सवाल शुद्धता रौ

आपां रै देस में दूध, दही रौ तोड़ौ नीं तौ पैलां कदई रैयौ अर नीं आज है। जिका लोग दूध-दही रौ रोवणौ रोवै वै या तौ देस में हुयी श्वेत-क्रांति सूं अणजाण है या निहित स्वारथां सूं घिस्योड़ा है।

रैयी बात शुद्ध दूध री। शुद्ध दही तौ आपै ई मिळ जासी जे दूध शुद्ध होसी। जावण में कोई कित्तीक मिळावट करसी। सेंग रोलौ इण दूध री शुद्धता रौ इज तौ है। शुद्धता अेक भरम है। आ बदल्ती रैवै है। अबै पैलां जिस्यौ शुद्ध सोनी ई नीं रैयौ तौ दूध-दही री कांई बात ? आ तौ अपणी-अपणी समझ री बात है कै कोई शुद्धता रै मामलै में नब्बै प्रतिशत सूं नीचै समझौतौ ई नीं करणौ चावै तौ कोई पचास-पिचपन सूं ही काम सरा लेवै। आ बात तौ खराखरी है कै सौं प्रतिशत शुद्धता खाली विग्यापनां में इज देखी-सुणी जा सकै है।

विस्वास करावौ। म्हनैं तथ्यां नैं तोड़-मरोड़नै परस्वा री शौक कदई नीं रैयौ। आप चावौ तौ इतिहास-पुराणां सूं प्रमाण दिया जा सकै। अबै इणी बात नैं इज लोग कैवै है कै पुराणै जमानै में धी-दूध री नदियां बैवती ही। आप ई सोचौ कै जे नदियां में धी-दूध बैवतौ हौं तौ उणमें पाणी नीं मिल्तौ हौं कांई ? आ तौ हौं नीं सकै कै पैलां शक्तिशाली पम्प-सेटां री मदद सूं सगळा नदी-नाळा खाली करीजग्या व्हैला अर पछै उणां में धी-दूधां रा टैंकर खाली कीधा व्हैला। छनीक देर रै वास्तै आ बात मान भी लेवां तौ महताऊ सवाल औं उठै है कै नदी-नाळां सूं खाली कीधोड़ौ पाणी अेक दिन में तौ भाप बणनै आभै चढवा सूं रैयौ। अबै कठै रैयी शुद्धता री बात ? वौ पाणी भूमिगत जळ रै रूप में पाछौ नदियां-नाळां में बैवतै दूध-दही-धी में बावडियौ इज होसी ! म्हैं इण सारू इज बजुर्गा नैं वीणती करूं हूं कै पल-पल में पुराणै जमानै री धी-दूध री नदियां रै नांव लेयनै नुंवी पीढी में हीण-भावना मत भरौ। उणरौ मनोबल मत गिरावौ। इण सूं म्हारी आतमा नैं घोर संताप पूर्ण है अर म्हैं सोचूं कै म्हैं इण जमानै में पैदा क्यूं व्हियौ ?

धी-दूध री नदियां बहावण री बातां करणियां आ ई भूल जावै कै जे सगळी नदियां में धी-दूध ई बैवतौ हौं तौ बापडौ जळ कठै बैवतौ ? कांई खेती-बाड़ी में सिंचाई भी धी-दूध सूं इज होया करती ही। लोग सिनान ई धी-दूध सूं ई करता होवैला वां दिनां में ? प्राचीन काळ रा रिसी-मुनियां री दिनचर्या तौ सिनान सूं इज सरू व्हैती ही। जे जळ नीं हौं तौ वै कियां काम चलावता होसी ? अै जबरा सवाल है, जिणरा उथळा दीधां बिना धी-दूध री नदियां बैयै नीं सकै।

पुराणै जमानै में राजा जिकी गायां दान में दिया करतौ हौं, वांग सिंगड़ा सोना सूं मंदावतौ। सवाल औं है कै शुद्ध दूध अर स्वर्ण में कांई संबंध है ? जे गाय रौ दूध महताऊ हौं तौ सोना सूं सिंगड़ा मंदावण री कांई जरूत ही ?

म्हैं कैवणौ औं चावूं हूं कै मिळावट दूध में नीं, दूध रा विचार में आदकाळ सूं आज ताँई होवती रैयै है अर आगे भी होसी। औं अेक मनोवैग्यानिक साच है कै ज्यूं-ज्यूं मिळावट बधसी, त्यूं-त्यूं ई शुद्धता रौ आग्रह ई बधतौ रैसी।

शुद्धता रौ आग्रह अेक निजू मामलौ है। इणमें नेम-कानून आडा नीं आ सकै। म्हैं आपनै घरबीती इज अरज करूं तौ सायद बात खुलासा व्है जासी। म्हारी होवा वाळी लुगाई फेरां रै समै इज आ सरत राख दी ही कै म्हैं उणरै सारू दूजी भलाई कोई सुख-सुविधा जुटा सकूं कै नीं जुटा सकूं, कोई चिंता नीं, पण शुद्ध दूध री जुगाड़ म्हनैं आजीवण करणी पड़सी। म्हारी मत मारी गी ही कै उण घड़ी म्हनैं आ सरत भोत मामूली-सी लागी अर म्हैं नाड़ हिलायनै मंजूर कर लीधी। म्हनैं कांई ठा ही कै इण घड़ी नाड़ हिलावणौ कितरौ मूंघौ पड़सी। साथै ई म्हनैं इण बात रौ गुमेज ई होयौ कै म्हारी लुगाई कितरी शुद्धतावादी महिला है।

म्हैं म्हारा यार-दोस्तां नैं घणै गरब सूं कैवतौ, “यार, थांरी भाभी बिचारी कितरी सीधी-सादी है। बंगलौ, कार, फ्रीज, रंगीन टीवी जिसी किणी सुविधा री फरमाइस नीं करनै फकत दो किलौ शुद्ध दूध हमेस लावा री

फरमाइस कीधी है।” अनुभवी भायला म्हारी बात सुणने ‘नो कमेंट्स’ री मुद्रा धार्यां मंद-मंद मुळकता रैवता। म्हनैं वां दिनां उण मित्रां माथै रीस ई आवती। म्हैं मन ई मन सोचतौ कै औ लोग भावात्मक दीठ सूं कितरा कृपण है कै म्हारी लुगाई रै त्याग अर सादगी री सरावणा में दो सबद ई नीं कैय रैया है। पण बाद में जद असलियत साम्हीं आयी तौ म्हैं खुद री अनुभवहीणता माथै मन मसोसनै रैयग्यौ।

होयौ इयां कै ज्यूं ई वा आणै आई, म्हरै दुरभाग रा दिन सरू व्हैग्या। दूजै ई दिन दूधवाळा री छुट्टी कर दीधी। घरवाळी री पारखी आंख्यां उण दूध में मिळ्योडै पचास प्रतिशत पाणी नैं अेक दिन में इज देख लियौ अर म्हैं इणीज दूध नैं खालस समझनै लारलै पांच बरस सूं सेवन कर रैयौ हौं। म्हैं समझावण री कोसीस कीधी, “भागवान! औ स्हैर है। भागजोग सूं आपणौ दूधवाळौ सतगुणी है, जकौ आधौ पाणी ई मिळा रैयौ है। औ तीन चौथाई भी मिळाय देवै तौ ई लोग उण तरल पदारथ नैं दूध इज कैवैला अर दूध लावणिया नैं दूधवाळौ कैयनै इज हेलौ पाडैला।”

म्हारौ तरक तौ बोदौ नीं हौं, पण ठा नीं क्यूं घरवाळी भूंडै ढाळै बिफरगी अर अगन री साखी में खायी सौगन री याद दियायदी। वा बोली, “देखौ, फेरां री वेळा थे आ प्रतिग्या करी ही कै शुद्ध दूध रौ बंदोबस्त करोला। जे नीं कर सकौ तौ कोई हरज कोनी। म्हनैं म्हरै पीवर भिजाय देवौ। बठै घणौ ई धीणौ है। म्हनैं म्हारा मायत इस्यौ दूध पीवा सारू थोडै ई उछेरी है। म्हनैं आज सिंझ्या रा ई भेज दौ।”

आप समझ सकौ हौं कै अेक नूंवी परण्योडी पैल आणै आयोडी कामण रौ इस्यौ ‘अल्टीमेटम’ मरद री मरजाद नैं जड़ामूळ सूं हिलायनै रख दिया करै है। उण दिन सूं म्हरै चैन-आराम रौ पत्तौ कटग्यौ। दो दिन रै सोध-सर्वेक्षण रै बाद घरवाळी जकौ फरमान जारी कस्यौ कै काल सूं इज दूध ‘आदर्श डेयरी’ सूं आसी। फरमान रै सागै ई डेयरी री कूपन-बुक थमायनै बोली, “सुबै छह बज्यां पूग जाज्यौ दूध लेवण नैं। कैतली साफ करनै परेंडे धरदी है।”

म्हैं आठ बजी तांई सोवण वाळै। छह बज्यां डेयरी पूगण रौ फरमान सुणनै कांपग्यौ। पण होणी नैं कुण टाळ सकै?

फरमान जारी कीधां पछै ई श्रीमती जी नर्चींत नीं व्है सकी। घडी में पांच बज्यां रौ अलारम भर दियौ अर बोली, “अलारम बाजतां ई उठर त्यार व्हैज्यौ। कोई आधीक घंटौ तौ त्यार होवा में ई लागसी। आधीक घंटौ पूगण में अर लाइन में लागवा में। जद करैई शुद्ध दूध रा दरसण होसी।”

अलारम टैम माथै बाजणौ इज हौं। वौ बाज्यौ। पण उठणौ तौ म्हरै हाथ हौं। म्हैं नीं उठ्यौ। वा उठां। थोड़ी देर म्हनैं देखती रैयी कै म्हारौ कर्तव्यबोध जागै। पण म्हैं नीं उठ्यौ तौ वा समझगी कै म्हारौ कर्तव्य म्हरै सूं ई ज्यादा निद्राप्रेमी है। बस, फेर कांई है? अेक झटके सूं रजाई खेंचनै सिंघणी री तरै दहाडी, “ओऽजी, सुणौ कै नीं? दूध नीं लावणौ कांई?”

औ अेक सबद ‘ओऽजी’ इतरै पावरफुल व्हैला, म्हैं कदैई कल्पना भी नीं कीधी ही। जाणै कठां सूं म्हरै नींदालू डील में गजब री फुरती बावड़गी। म्हैं उठ्यौ अर चपलां पैरतौ बोल्यौ, “कैतली कठै?”

कैतली आई। डेयरी सूं दूध भी आयौ। सागै ई आयग्यौ जुकाम। चार दिन री सी.एल। डेढ-दो सौ रुपिया दवा-दारू में। म्हैं सोची, अब तौ सायद छुट्टी मिळ जासी डेयरी-जातरा सूं। पण छुट्टी म्हरै भाग में कठै? हां, थोड़ी रियायत मिळगी। संशोधित फरमान जारी होयौ—“छह बज्यां री जगां सात बज्यां डेयरी पूगौ अर दूजी खेप सूं दूध लावौ।”

म्हैं संशोधित आदेश रौ पालन सरू कर दियौ। पण नंबर दो री खेप रौ दूध घरवाळी री पारखी आंख्यां में नंबर दो री कमाई ज्यूं अखरवा लागौ अर अेक दिन घोसणा होई—“शुद्ध दूध रै खातर गाय राखांला। न डेयरी जावण

रौ झंझट अर न शुद्धता रौ संकट ! घर री गाय व्है तौ दूध ई मन माफिक वापरौ। पीयौ अर पावौ। बच जावै तौ जावण न्हाख दौ। छाछ फेरौ। धी काढौ। जांका घर दोङ्गा वांका घर सोङ्गा।'' घरवाळीजी घर री गाय रा गुणानुवाद अेक सांस में इण तरै करगी जिण तरै विग्यान रौ कोई छात्र फार्मूलौ बोल जावै अर अणमणियौ उणरै मूळां कानी टक-टक न्हाळतौ रह जावै।

घरवाळी जी आपरै पिताश्री नैं संदेसौ भेज दियौ। पांचवैं दिन गाय हाजर। सागै ई ग्वाळ भी हाजर। बारह-तेरह बरस रौ अेक छोरौ। घरवाळी रै दूर रै रिस्तै में भतीजौ।

इण नूंवी व्यूह रचना नैं देखनै म्हनै भावी विपत्ति रौ अनुमान व्हैतां देर नॊं लागी। पण कस्यौ कार्ई जा सकै। जे म्हैं लगन मंडप में इज औं सगळी बातां सोच लेवतौ तौ कितरौ चोखौ होवतौ ? घरवाळी सायद म्हरी मनस्थिति भांगी। बोली, “गाय किसीक लागी ? ठीक है नॊं ? न घणी मोटी, न छोटी। पूळै भूखी अर पूळै धापी। घर में गाय राखणौ सास्त्रां में ई पुन्ह रौ काम बखाणीज्यौ है। दिनुगै-दिनुगै ई गोमाता रा दरसण। धन्न भाग ! म्हैं थानै कैवूं हूं कै थे रोज गोमाता रा सगुन लेयनै दफ्तर पधारज्यौ। थांरी रुक्योडी तरक्की छह महीनै में नॊं मिळ जावै तौ म्हनै कैइज्यौ।” कुसल्ज ज्योतसी री तरै घरवाळी म्हनै सब्जबाग दिखा दिया। थोड़ीक ठैरनै बोली, “औं गोपाळ है नॊं, इणनैं तौ म्हैं खुद ई पांच-सात दिन में पाढ़ौ गांव खिणा दृश्यूला। बस, यूं समझौं कै गाय जमी, अर गोपाळ गयौ।”

जिण छत रै तछै दो प्राणी हा अचाणचक चार व्हैग्या। घरवाळी जी रौ बेसी टैम गो-गोपाळ सेवा में बीतबा लागौ। म्हारौ लिखणौ-पढणौ छूटग्यौ। आज गाय रै बांटौ लाणौ, आज कुट्टी लाणी, आज रजकै री बंधी बांधणी, आज गाय मांदी पड़गी। जिनावरां रै सफाखानै ले जावणी। चौमासौ छाती चढ़यौ तौ गाय रै टाप घालणी।

घर में पग मेलतां ई नित नूंवौ आदेस। आज गाय रै खातर औं करणौ, आज वौ करणौ। दो किलो शुद्ध दूध माथै जिनगाणी री सगळी खुसियां निछवर व्हैगी। नर्चींताई कपूर ज्यूं उडगी। म्हैं बेबस हौ।

थोड़ा दिनां पछै घरवाळी कैयौ, “देखौ, थे तौ दफ्तर चल्या जावौ। मीटिंगां-फीटिंगां में बरै भी जावता ई रैवौ। सिंझ्या रा घरां भी मोड़ा ई आवौ। म्हैं इतरै बडै बंगलै में घबराऊं अेकली। नॊं व्है तौ इयां करां कै इण गोपाळ नैं अठै ही राखलां। म्हारै भी बसती रैसी अर छोटा-मोटा काम भी सलटा देसी औ। स्कूल में भरती करा देवांला। विद्यादान रौ पुन्ह भी मिलसी थानै अर टाबर री जिंदगी बण जासी स्हैर में रैवा सूं।”

दान-पुन्ह रा मामला में म्हैं म्हरै ससुराजी रै लारै कीकर रैवतौ ? पैलां वां कन्यादान अर पछै ‘गोदान’ रौ पुन्ह कीधौ तौ म्हनैं ‘विद्यादान’ रौ करणौ ई है।

पांच-छह महीनां पछै गाय डाकगी। म्हैं सोची कै कठैई घरवाळी पीहर सूं दूजी गाय मंगायनै डेयरी नॊं खोलदै। पण म्हारी संका निरमूळ ही। घरवाळी बोली, “गाय डाकगी है।”

म्हैं कैयौ, “कोई बात कोनी। डेयरी सूं बंधी कर लेस्यां। अबै तौ गोपाळ है इज। लेय आया करसी।”

पण घरवाळी आपरै पीहर रै किणी प्राणी नैं कष्ट देवण रै पख में नॊं ही। वा बोली, “नॊं रैवा दौ। डेयरी वाळा ई किस्यौ धी घालै है ? मिनख री नीत में इज मिलावट बापरगी है। थे तो इयां करौ कै उणीज पुराणै दूधवालै सूं बंधी बांध दौ। थोड़ा दिनां री ई तौ बात है। फेर तौ गाय ब्याय ई जासी।”

अेक बरस रै विवाहित जीवण में सायद पैली बार श्रीमतीजी रा मुखारविंद सूं इमरत जिसी वाणी सुणनै म्हैं अेडी सूं चोटी तांई पुलकित होयां बिना नॊं रैय सक्यौ। म्हैं तुरता-फुरती साइकिल उठायनै पुराणा दूधवालै सूं दूध री बंधी बांधवा निकल पड़ग्यौ। म्हनैं संकौ हौ कै कठैई घरवाळी फेर कोई संशोधित आदेश जारी नॊं कर देवै।

अबखा सबदां रा अरथ

तोड़ौ=कमी, अभाव। छनीक=छिन भर, पल भर। गुमेज=अंजस, गौरव। दीठ=दृष्टि। आणै आई=पैली वळा सासरै आयी। बोदौ=पुराणा, जूनौ। उछेरी=टोरी, भेजी। परेंडौ=पाणी रौ पढँडौ, मटकी राखण री ठौड़। डील=सरीर। दोझा=जिण घर में धीणौ होवै। न्हाल्तौ=देखतौ, ढूंढतौ। खिणा क्यूंला=भेज देवूंला। डाकगी=टल्गी, दूध देवणौ बंद कर दियौ। इमरत=अमृत।

सवाल

विकल्पाऊ पडतर वाळा सवाल

साव छोटा पड़ुत्तर वाला सवाल

1. લેખક રી લુગાઈ શુદ્ધ દૂધ સારુ છેવટ કાઈ વૈવસ્થા કરી ?
 2. ઘી દૂધ રી નદિયાં કિણ દેસ મેં બૈંવતી હી ?
 3. લેખક ને કિણ બાત રૌ ગરબ હોયો ?
 4. લેખક જદ છહ બજ્યાં ઉઠનૈ ડેયરી સું દૂધ નોં લા સક્યો તૌ દૂજૌ કાઈ ઉપાય કરીજ્યો ?
 5. ગાય રૈ ટક્ક્યાં પછૈ દૂધ રી પાછી કાઈ વૈવસ્થા કરીજી ?

छोटा पड़ूत्तर वाला सवाल

- “ज्यूं-ज्यूं मिलावट बधसी, त्यूं-त्यूं ई शुद्धता रौ आग्रह भी बधतौ रैसी।” इन बात नैं समझायनै लिखौ।
 - “जांका घरै दोझा वांका घर सोझा।” इनरौ अरथ समझावता थकां इनमें छ्पोडै व्यंग्य रौ खुलासौ करौ।

3. घर में गाय आवण सूं लेखक रौ काम कीकर बधग्यौ ?

4. लेखक री लुगाई आपरै भतीजै गोपाळ नैं स्थायी रूप सूं आपरै अठै राखण सारू काँई बहानौ बणायौ ?

लेखरूप पद्धत्र वाळा सवाल

1. 'सवाल शुद्धता रौ' व्यंग्य रचना री भासा-सैली री विसेसतावां उजागर करौ।

2. "आज तौ हवा मांय भांग घुळगी है।" इण दीठ सूं मिळावट री समस्या री चरचा करता थकां इणनैं मेटण सारू आपरा सुझाव दिरावौ।

3. आज रै सामाजिक विसंगति रै परिपेख में इण व्यंग्य री महत्ता उजागर करौ।

4. "मिनख री नीति में इज मिळावट वापरगी है।" इण कथन रौ खुलासौ करता थकां समाज में फैल्योड़ी इण बुराई नैं रेखांकित करौ।

नीचै दिरीज्या गद्यांसां री प्रसंगाऊ व्याख्या करौ।

1. अबै इणी बात नैं इज लोग कैवै है कै पुराणे जमानै में घी-दूध री नदियां बैवती ही। आप ई सोचौ कै जे नदियां में घी-दूध बैवतौ हौ तौ उणमें पाणी नौं मिळतौ हौ काँई? आ तौ हौ नौं सकै कै पैलां शक्तिशाली पम्प-सेटां री मदद सूं सगळा नदी-नाळा खाली करीजग्या व्हैला अर पछै उणां में घी-दूधां रा टैकर खाली कीधा व्हैला।

2. घी-दूध री नदियां बहावण री बातां करणियां आ ई भूल जावै कै जे सगळी नदियां में घी-दूध ई बैवतौ हौ तौ बापड़ौ जळ कठै बैवतौ? काँई खेती-बाड़ी में सिंचाई भी घी-दूध सूं इज होया करती ही। लोग सिनान ई घी-दूध सूं ई करता होवैला वां दिनां में?

3. केतली आई। डेयरी सूं दूध भी आयौ। सागै ई आयग्यौ जुकाम। चार दिन री सी.अैल। डेढ-दो सौ रुपिया दवा-दारू में। म्हैं सोची, अब तौ सायद छुट्टी मिल जासी डेयरी-जातरा सूं। पण छुट्टी म्हारै भाग में कठै? हां, थोड़ी रियायत मिळगी। संशोधित फरमान जारी होयो— "छह बज्यां री जगां सात बज्यां डेयरी पूगौ अर दूजी खेप सूं दूध लावौ।"

4. पण घरवाळी आपरै पीहर रै किणी प्राणी नैं कष्ट देवण रै पख में नौं ही। वा बोली, "नौं रैवा दौ। डेयरी वाळा ई किस्यौ घी घालै है? मिनख री नीत में इज मिलावट बापरगी है। थे तो इयां करौ कै उणीज पुराणे दूधवालै सूं बंधी बांध दौ। थोड़ा दिनां री ई तौ बात है। फेर तौ गाय व्याय ई जासी।"

□ व्यंग्य

मित्युरासौ

शंकरसिंह राजपुरोहित

व्यंग्यकार परिचै

शंकरसिंह राजपुरोहित रौ जलम 12 सितंबर 1969 में राजस्थान रै पाली जिलै रै आऊवा गांव में होयौ। आऊवा गांव सन् सत्तावन रा गदर रै गांव रै रूप में चौताठै चावौ। आपरा दादोसा हमीरसिंहजी, बिज्जी (विजयदान देशा) री 'बातां री फुलवाड़ी' री कथावां गांव री हथाई माथै सुणावता, जिणसूं विद्यार्थी जीवण में इज आपनै राजस्थानी सूं लगाव होयायौ। आप व्यंग्यकार, कवि अर राजस्थानी उल्थाकार रै रूप में ख्यातनांव है। संपादन-कौशल में ई सिद्धहस्त। इग्यारवीं कक्षा में भण्टी बगत राजस्थानी भाषा, साहित्य एवं संस्कृति अकादमी री पत्रिका 'जागती जोत' में कवितावां अर आवरण छ्या। इणी अकादमी रै 'पैलौ भत्तमाल जोशी महाविद्यालय पुरस्कार' (1989) आपरै आलेख 'राजस्थानी राखियां, रैसी राजस्थान' नै मिळ्यौ। आप केर्द बरस पत्रकारिता करी अर पछै आचार्य तुलसी राजस्थानी शोध-संस्थान, गंगाशहर में शोध अधिकारी रैय। राजस्थानी में 'सुण अरजुण' व्यंग्य-संग्रे अर 'आभै रै उण पार' कविता-संग्रे छ्योड़ा। राजस्थानी रै पखवाड़ियै छापै 'मरुधर ज्योति' अर त्रैमासिक पत्रिका 'गणपत' रै कीं बरस संपादन कर्यौ। राजस्थानी कवि-सम्मेलन रै मंच रा सबल हस्ताक्षर।

आप राजस्थानी उल्थाकार रै रूप में ई आपरी ऊरमा दिखाई है। राजपुरोहित केर्द पोथ्यां रा राजस्थानी उल्था कर चुक्या। इणां में साकेतानंद रै मैथिली कहाणी-संग्रे 'गणनायक' अर ख्यातनाम उपन्यासकार कमलेश्वर रै हिंदी उपन्यास 'कितने पाकिस्तान' रै राजस्थानी उल्थौ साहित्य अकादमी, नई दिल्ली सूं छ्या। इणी भांत पॉस्कल एलन नाजरेथ री 'गांधी'ज आउटस्टैंडिंग लीडरशिप' रै राजस्थानी उल्थौ 'महात्मा गांधी री बेजोड़ आगीवांणी' सिरैनामै सूं राजस्थानी ग्रंथागार, जोधपुर छ्या। मैथिली कथा-संग्रे 'गणनायक' रै उल्थै सारू आपनै साहित्य अकादमी, नई दिल्ली रै 'राजस्थानी अनुवाद पुरस्कार' (2010) मिळ्यौ। व्यंग्य-संग्रे 'सुण अरजुण' राजस्थानी भाषा, साहित्य एवं संस्कृति अकादमी रै 'पैली पोथी पुरस्कार' (1996) सूं पुरस्कृत होयौ। राव बीकाजी संस्थान रै 'राजस्थानी प्रोत्साहन पुरस्कार' (2003) अर नगर विकास न्यास, बीकानेर रै 'राजस्थानी पीथळ पद्म पुरस्कार' (2006) समेत केर्द इनाम-इकराम आपनै मिळ्या।

पाठ-परिचै

पाठ्यक्रम में सामल व्यंग्य 'मित्युरासौ' लेखक री चरचित व्यंग्य-रचना है। इणमें लेखक मित्यु रै उपरांत आपरी खुद री, आपरै घरवाल्वां री अर दुनियां री मनगत रौ सांतरौ खुलासौ कर्यौ है। व्यंग्य, लेखक रै मरण सूं सरू होवै पण छेकड़ जावतां पाठक नै ठाह पड़ै के उणनैं तौ रात रा सूत्यै नैं मरण रौ आळ-जंजाळ आयौ हौ, हकीगत में तौ वौ पाठकां रै भाग रौ जींवतौ-जागतौ बैठ्यौ है। इण आळ-जंजाळ वालै सुपैनै रै टूटतां ई लेखक नैं आपरौ नांव अर मरण री खबर अखबारां में नीं छपण रौ रंज ई है। लेखक आपरै इण व्यंग्य रै मार्फत मरण वालै प्राणी रै पेटै दुनिया री मनगत दरसायी है। आज री भागदौड़ भरी जिंदगाणी में लोगां री व्यस्तता, किणी री मौत री खबर ई अखबारां सूं ठा पड़ण री मजबूरी, छपास रा रोगियां री आफव्यां, स्वारथ रा भायलाचार रै सागै अंतिम-संस्कार में सामिल होवणिया लोगां में अेकरकै उठतै मुसाणियै बैराग अर बरै आयां पछै 'वै ई घोड़ा अर वै ई मैदान' वाली बातां माथै कररौ व्यंग्य करीज्यौ है। लेखक आ रचना इण ध्येय सूं लिखी लखावै कै आपसी समाजू-रिस्ता, आपां रा सीर-संस्कार अर मित्यु जैड़ मौकै माथै आपां री मानवी संवेदनावां बणी रैवै।

प्रित्युरासौ

म्हँ मरग्यौ हौ। सुरगवास होयौ कै नरकवास, इण गांगरथ में कार्इ सार! म्हँ तौ इत्तौ ई सुण राख्यौ हौ कै संसार असार है अर मरण में इज सार है। इण कारण म्हँ सार नैं धार चुक्यौ हौ। अबै आप कैवोला कै थूं मरियां पछै ई म्हारौ लारौ क्यूं नीं छौडै! जे थूं मरग्यौ हौ, तौ पछै औ 'प्रित्युरासौ' कार्इ थारौ कोई चोटीकटियौ चेलौ सिरधांजली सरूप लिख्यौ है?

अरे हुकम, म्हँ आपनैं फकत म्हारै मरण रा समाचार भुगताया है अर आप मस्यौडै मुड़दै में ई मीन-मेख काढण लागया? कार्इ आपनैं म्हारी आतमा री मुगती सूं कीं तल्लौ-मल्लौ कोनी। कार्इ आप म्हारी मुगती सारू दो मिंट रौ मौन ई नीं राख सकौ? इण सारू आपनैं किणी सिरधांजली सभा रौ सांग रचण री जरूत कोनी, क्यूंकै बठै तौ आप ओक-डौढ मिंट ई आंख मींच्योड़ी अर मून धास्योड़ी नीं राख सकौ। अठी-वठी बाका फाड़ता 'ॐ सांति-सांति' करण सारू ताखड़ा तोड़ै, जाण पगां रै कीड़ियां चैठती होवै। मरणियौ आदमी जींवतौ हौ जित्तै तौ आप उणरौ माथौ चाटता नीं थाकता, आंती आयनै आगलै नैं ई सिरकणौ पड़तौ अर उणरै मरियां पछै आप आपै इष्ट सूं उणरी आतमा री मुगती सारू थोड़ीक सिफारस ई नीं कर सकौ? इण भटकती आतमा री बात माननै आप तौं बैठा हौ जठै इज पसर जावौ अर इणरी मुगती सारू ईस्वर सूं नीं तौ आपरी आतमा सूं इज प्रार्थना कर लिरावौ। आतमा सो परमात्मा अर परमात्मा तौं म्हारी आतमा री मुगती सारू त्यार ऊभौ है, पण आपरी आतमा री हरी झांडी मिल्यां बिना म्हारौ औ आतम-वियांग आगै नीं सिरक सकैला।

म्हनैं ठा है, म्हारै मरण सूं किणी रौ सांस कोनी अटकै, पण म्हारी आतमा तौ अजै ई भटकै है। म्हँ वौ दरसाव कियां भूल सकूं हूं, जद म्हारै मरियां सूं पैलां ई म्हारै मरण री त्यास्यां बरतीजण लागगी ही। छैली सांसां सूं पैली ई म्हनैं मांचै सूं हेठै पधाराय दियौ है। पिलंग सूं सिरख-पथरणा सांवटीजग्या हा अर ओक लीरझीर दरी आंगणे बिछाईजगी ही। बडेरां रौ कैवणौ हौ कै मांचै माथै सांस निकळ्यां नरक में ई ठौड़ नीं मिलै। जे म्हनैं इण बात रौ पैली ठा होवतौ तौ घर में कदैई मांचौ ई नीं बपरावतौ। सगळां नैं नीचै ई सुवण अर सुरग में लेय जावण रै पुख्ता बंदोबस्त करतौ। पण अबै पछतायां कार्इ होवै।

मरती बगत म्हारा दोनूं बेटा डील सूं म्हारै कनै ऊभा हा, पण आतमा वांरी ई और कठैई भटकै ही। म्हारै औँठै-दौँठै औरुं ई केई लोग ऊभा हा, पण आजकाल लोग मुड़दै नैं बाळण री त्यारी पछै करै, अखबार में 'सोग-संदेस' अर 'तीयै रौ बैठक' रौ विग्यापन फोटू समेत पैली देयनै आवै। म्हारौ छोटियौ छोरौ इणीज सुभ काम में लाग्योड़ा हौ। वौ म्हारै अलेबम री हजारूं फोटुवां मायं सूं अक लाखीणी फोटू पैली ई छांट राखी ही— फेंटौ बांध्योड़ी। बाल उड्योड़ा होवण सूं म्हँ आणे-टाणे माथै फेंटौ बांध लिया करतौ। म्हँ ई कार्इ आपरौ किणी गंजै सूं भेंटौ कै फेंटौ पड़ै तौ आप ई देख लीजौ, कोई दुरंगौ, कोई पिचरंगौ, कोई छुरंगौ फेंटौ बांध्योड़ा लाधसी। भांत-भांत री टोपियां तौ वारी टोपाळी नैं सांतरी ढाकी ई राखै, पण फेंटौ री आब अर फाब न्यारी है। फेंटौ तौ बियां म्हँ ब्यांव री बगत ई बांध्यौ हौ, पण उण बगत तौ म्हारै बाल सांघणा हा। खाल तौ ब्यांव रै पछै ई खंचै अर पछै ईज बालां री गरुड़-पुराण बंचै। खैर, ब्यांव री बगत ई म्हारा मोकळा फोटू खांचीज्या हा, पण वौं 'हरखै बनडै' रौ फोटू तौ इण दुख री घड़ी में दिरीज नीं सकतौ हौ। म्हारा बिस्तरा गोळ होवै हा, इण वास्तै छुरंगै री ठौड़ म्हारौ बेटौ गोळ साफा वालौ ईज फोटू छांट्यौ। म्हँ उणनै उमर-भर डफोळ समझतौ रैयौ, पण मरती बगत म्हनैं वौ खासौ अकलवान लखायौ। म्हारी जूती उणरै पग में ज्यूं ई पूरी आवती लागी, म्हारी सांसां लेखै लागगी।

म्हारै मरियां पछै घर में कूका-रौळौ मचग्यौ। म्हँ जींवतौ हौ जित्तै घरवाला मायं रा मायं धमीड़ लेय लेवता, पण अबै तौ वै चौड़े-धाड़े लेवण लागया हा। आड़ोसी-पाड़ोसी भेला होय थावस बंधावण नै आयग्या। बियां तौ

वानै मरण री ई फुरसत कोनी, पण अबार केर्द दिनां सूं वै म्हरै मरण री झाक में हा। सुख-दुख में पाड़ोसी ई आडा आवै, सो वै ऊभा ई आयग्या।

लोक में कैवत है कै जलम तौ रात रौ अर मरण परभात रौ। पण म्हें मर्चौ जणै ना तौ रात ही अर ना परभात। सिंझ्या री चारेक बजी ही। औ बगत म्हरै चाय पीवण रौ होया करतौ, पण अबै कुण म्हारौ बाप चाय चढावै हौ अर वा ई मुड़दै नैं पावण सारू? म्हारी लोथ नैं बाळ्यां बिना तौ पाड़ोस्यां रा चूल्हा ई कोनी जग सकै। स्याणा-समझाणां तोड़ काढ्यौ कै दाग तौ दिन बधियां पैली देवां जणै होवै, नींतर रात-भर लास नैं रुखाळ्णी भारी व्है जावैला। वांरी आ बात म्हरै पाड़ोस्यां अर भाईबंधां नैं ई अणूती दाय आयी अर वै म्हरै बडोडै बेटै नैं सिणिया-बांस अर अरथी री दूजी सामग्री रौ तुरत बंदोबस्त करण री बात भुगतायी। हालांकै वौ मोबाईल माथै बीजी हौं, पण काम म्हारौ ईज सारै हौं। वौ म्हरै किरिया-करम री जुगत जचावै हौं अर आपरा भायलां सागै म्हारी लेखक बिरादरी नैं ई म्हरै मरण रा समाचार भुगतावै हौं।

म्हारौ छोटियौ छोरौ जैकै काम में लाग्योड़ौ हौं, उणरौ रिजल्ट तौ अखबार में दूजै दिन दिनुगै आवणवावै हौं। आजकल घणकरै लोगां नैं किणी रै मरण-ठरण रौ ठा अखबार सूं ईज पडै। दूजै दिन तौ विग्यापन रै सागै म्हारी छोटी-मोटी खबर ई छपणी चाईजै! बियां तौ आजकल खबर छपावण सारू सागै विग्यापन देवण रौ ई रिवाज है, पण म्हारी बात न्यारी है। छोरै म्हारौ सोग-संदेस नैं देवतौ तौ ई म्हारी खबर जस्तर छपती, क्यूंके म्हें तौ खबरां में इज छोटी-मोटी होयोड़ौ हूं। खबरां छपावणिया अर छापणियां रै म्हें घणौ आडौ आयोड़ौ हूं। वांरी विज्ञप्तियां घस-घसनै म्हारी आंगळ्यां रै आंयठण पड़ग्या। कांई वै म्हरै सारू च्यार ओळ्यां ई मांडण जोगा कोनी। म्हरै मना-ग्यानां तौ म्हारी खबर फेटैआळी फोटू समेत अखबार रै फ्रंट पेज माथै आवणी चाईजै अर हैंडिंग ई म्हरै मन मुजब लागणी चाईजै—“अबै कुण घड़ेला घड़िया... ?”। म्हरै स्हैर में खबर होवै कोनी, घड़ीजै। इण वास्तै उणनैं ‘घड़ियौ’ कैवै। कैयां नैं तौ अखबार में आपरौ नांव पढ़यां बिना हाजत ई कोनी होवै। वानै खबर सूं कीं मतलब कोनी। उसेन बोल्ट ओलंपिक में भलां ई सौ मीटर री दौड़ जीतौ अर भलां ई दौय सौ मीटर री, पण आंरी दौड़ तौ अखबार रै दफ्तर ताईज होवै। कोई खबर नैं बणै तौ उसेन बोल्ट नैं बधाई देवण रौ घड़ियौ ई घड़ काढै।

खैर, ‘राम-नाम सत है’ रै साथै जद म्हरै प्रित सरीर री अरथी उठण लागी तौ म्हारी भटकती आतमा आनंद-निकेतन में आयोजित अेक ग्यान-गोठ में गोता खायनै पाछी म्हारी अरथी माथै आयनै बैठगी। वा बैठी-बैठी सिंधावलोकन करण लागी। कूड़ बोलनै म्हनैं कोई चुनावी अंदाजौ तौ लगावणौ कोनी, पण पचास-पिचपन लोग तौ पक्का हा। लोग तौ पाणी बतावै जठै कादौ ई कोनी लाधै, म्हें तौ म्हारी उमर सूं ई कम आदमी बताय रैयौ हूं। इण हिसाब सूं तौ साठ बरसां री उमर पाक्यां पछै ई म्हें साल दीठ अेक आदमी ई कोनी पकाय सक्याँ। पण म्हारी जाण-पिछाण वाला सगळा म्हरै ज्यूं कोई बैला थोड़ी ई बैठा हा। जका टाइम काढनै आया हा, वै ई म्हरै लांपै लगावण री उंतावळ में हा। सिंधावलोकन करती म्हारी आतमा में गादडै रै गळैई हुकहूकी ऊठगी। म्हारी आतमा सिंधावलोकन करणौ छोडनै छिद्रान्वेषण करण लागगी।

म्हारी अंतिम-जातरा में सामल लोगां में वै लौग ई भेला हा, जका मौकौ लाग्यां म्हारी टांग खींचण सूं नैं चूकता, पण आज अरथी रै खांधौ देवण सारू ताता दीसै हा। म्हारी आतमा नैं तौ इणमें ई वांरी कोई स्वारथ निगै आयौ। ‘राम नाम सत है’ रै नारै सागै वां लोगां में ई सत वापरग्यौ, जका कदैई हाथ सूं फळी ई कोनी फोड़ी अर ना ई किणी री बाढी आंगळी माथै मूत्यौ, पण आज मसाणियै बैराग रै मिस पुन कमावण में पाछ नीं राखै हा। तीन तिलंगा औड़ा ई हा, जका जींवता-जी तौ म्हरै चींचड़ ज्यूं चिप्योड़ा रैवता, पण अबार म्हारी अरथी सूं अळघा-अळघा आपरी ई गांगरथ गावता चालै हा। म्हारी इण चौकड़ी नैं जाणणियौ अेक जणै वां मांय सूं अेक नैं कैयौं, “थे ई अबै पाका पान हौं, अरथी रै खंवौ देयनै पुन कमायलौ!”

आ बात सुणनै वौ उण माथै रातौ—पीळौ होवतौ बोल्यौ, “म्हारी तौ थूं चिंता ई मत कर, थारा फूल चुग्यां बिना म्हैं कठैई कोनी जाऊं। म्हारी मानै तौ थूं लकड़ां रौ गाडौ आगूंच नखायलै भलाईं। औ ई तर-तर मूंधा होवै है।”

मारग में चौरायौ आयौ। अरथी नीचै राखीजी। पिंड उछाळीज्या। चौराया माथै ओक पनवाड़ी री दुकान ही। अठै सूं इज म्हैं आथण-दिनुगै मीठै पत्तै सागै लंबी सुपारी रौ पान खाया करतौ। भायलां नैं ई खवावतौ। बुधवार नैं इक्कीसिया गणेसजी सारू मीठै मसालै रौ पान ई अठै सूं इज बंधावतौ। म्हैं जिण हिसाब सूं इण पनवाड़ी रौ पुराणौ अर पक्कौ ग्राहक हौ, उण हिसाब सूं तौ इणनैं अबार दुकान बंद राखणी चाईजती। पण पनवाड़ी नैं कांई मरेठी, इलायची कै पीपरमेंट ज्यूं म्हरै मरण री सौरम थोड़ी आवै ही। म्हनैं मरियां नैं तौ हाल दो-दाई घंटा इज होया हा। कालै अखबार में सोग-संदेस छपियां पछै सायद दौपारै ताईं बंद राखै तौ, पण अबार तौ वौ म्हारी अंतिम-जातरा में सामल कैं पान रा रसियां नैं फटाफट पान पकड़ावण में लागोड़ै है। केई लोग पैली सूं अठै इज ऊभा म्हारी बाट जोवता हा। अठै सूं इज क्यूं मुसाण पूगतां-पूगतां सितर-पिचहतर जणा होयग्या हा। सगळा आप-आपरौ जरुरी काम सलटायनै आया हा। जे नौं आवता तौ ई म्हैं किसौ वानै पूछ्ण नैं जावै है कै आपै औड़ी कांई फाडी फंसगी ही? छोरौ सौ-सवासौ नैं फोन कर्खा होवैला अर म्हारी उमर सूं बेसी लोग मुसाण पूगाया हा। डूबतै नैं तौ तिणकलौ ई घणौ, मस्तौडै नैं और कांई चाईजै? लांपै तौ घरवाला लगासी। कपाळ-क्रिया ई वै इज करैला। लारै आया लोग तौ म्हनैं थेपड़ी देवण रा सीरी हा। इण वास्तै तौ वानै घंटौ भर अडीकणौ पड़ैला। वै टाइम पास रै हिसाब सूं निरगुट सम्मेलन ज्यूं च्यार-च्यार, पांच-पांच रौ गुट बणायनै घरविध सूं लेयनै देस-विदेस री घाण-मथाण में उल्झ्योड़ा हा। केई सूना-मूना ई बैठ्या हा। वां में स्यात मुसाणियौ बैराग जाग्यौ है। औ बैराग ई जबरौ होवै। फगत किणी मुड़दै नैं बाल्ण वाळी टैम ई उठै। बारै आयां पछै सोनै पाणी रौ छांटौ लागतां ई मसाणियौ बैराग छू-मंतर। आदमी पाढ़ौ आपै गोरखधंधा में अबूझ जावै। तीन-च्यार जणा लकड़ जचावण में घरवालौ री मदद ई कर रैया हा। इण काम रै सागै मुड़दै रै हरेक क्रिया-करम में वां लोगां री मास्टरी ही। म्हारी चिता सूं पैलां ई म्हैं वानै केई वेळा लकड़ा जचावतां देख चुक्या है। अबार लग वै केई जणां रौ कल्याण कर चुक्या हा। मणियै रा घरवाला वानै गरजां करनै ले जावै। वै मुड़दै री कद-काठी देखनै बल्लीतै रौ अंदाज लगाय लेवता। म्हरै जिसै मुड़दै आदमी सारू तौ चिता चिणणी वांरै डावै हाथ रौ खेल है। म्हैं डील सूं मुड़दै जरुर है, पण म्हारा हाड चीढा हा। चीढा हाडां सारू चीढी लकड़ी सूं काम कोनी चलै, ओकदम सूकी अर नीमण चाईजै। पण दाई सूं पेट छानौ रैवै तौ वां सूं औ छानौ रैवतौ। वै ओकदम नीमण अर सूकी लकड़ां ई चिणी ही।

पण ज्यूं ई परिक्रमा देयनै म्हारौ बडोड़ै बेटौ म्हरै लांपै लगावण लाग्यौ कै म्हैं पिलंग माथै सूं ओझक नै ऊभौ होयग्यौ। म्हारी आंख खुलगी। म्हनैं मरण रौ इत्तौ डर नौं लाग्यौ, जित्तौ सुपनै में लांपै रौ लाग्यौ। सुपनौ टूटतां ई म्हारी आतमा पाढ़ी ठायैसर आयगी, जकी मांझल रात में कांई ठा कठै-कठै भटकनै आयी ही। दिनुगै अखबार में फोटू छोडनै म्हारौ कठैई नांव ई कोनी छप्यौ। थे ई बतावौ, पछै म्हारी आतमा मैं सांयती कियां मिळती!

॥॥

अबखा सबदां रा अरथ

गांगरथ=फालतू शिकाल, बाधू बंतल। ताखड़ा तोड़णा=उंतावल मचावणी। आंती=काठौ कायौ होवणौ, परेसान। वियांण=विमान। फेंटौ=साफौ, पाघ। टोपाळी=भोड, माथौ। सांघणा=घणा, सघन। लोथ=लाश, शव। आंयठण=आइटन, करड़ा छाला। घड़ियौ=कपोल कल्पित खबर घड़णी। बैला=खाली, ठाला। मुसाण=भोमका। आगूंच=पैलां सूं। तिणखलौ=तृण, तिनकौ। घाण-मथाण=मन में मंथण, अंतद्वद्व। चीढा=करड़ा, आला-गीला। लांपै=आग लगावणी, बाल्णौ। ओझक नै=जिझक नै, डरनै। ठायैसर=जग्यांसर, जथास्थान। मांझल रात=आधी रात, मझ रात।

सवाल

विकल्पाऊ पडून्तर वाळा सवाल

1. व्यंग्य 'मित्युरासौ' में लेखक रौ मूळ ध्येय काँई है ?

(अ) आपरै मित्रां री हंसी उडावणी	(ब) मित्यु-संस्कार री जाणकारी देवणी
(स) घरवाळां री चिंता प्रगट करणी	(द) मानवी संवेदनावां जगावणी

()

2. 'मित्युरासौ' में लेखक नैं आपरी मौत रौ—

(अ) पैलां ई आभास होयग्यौ	(ब) सुपनौ आयौ
(स) द्रिस्टिंत देख्यौ	(द) डर लाग्यौ

()

3. शंकरसिंह राजपुरोहित नैं राजस्थानी अकादमी रौ 'पैली पोथी पुरस्कार' किण पोथी माथै मिल्यौ—

(अ) रुळपट रासौ (काव्य)	(ब) सुण-अरजुण (व्यंग्य-संग्रे)
(स) गणनायक (उल्थौ)	(द) आभै रै उण पार (कविता-संग्रे)

()

4. 'मित्युरासौ' व्यंग्य रै लेखक शंकरसिंह राजपुरोहित रौ गांव आऊवा किण रूप में प्रसिद्ध है ?

(अ) मित्यु रौ गांव।	(ब) गुणीजनां रौ गांव।
(स) गदर रौ गांव।	(द) गोरङ्ग्यां रौ गांव।

()

5. व्यंग्य 'मित्युरासौ' में अखबार में 'सोग-संदेस' देवण सारू लेखक रौ किसौ फोटू टाळीज्यौ ?

(अ) छुरंगै फेंटा वाळौ	(ब) गोळ साफा वाळौ
(स) पिचरंगी पाघ वाळौ	(द) धोळा पोतिया वाळौ

()

साव छोटा पडून्तर वाळा सवाल

1. शंकरसिंह राजपुरोहित रौ जलम कद अर कठै होयौ ?
2. 'मित्युरासौ' किण विधा री रचना है ?
3. 'मित्युरासौ' में मौत रौ सुपनौ टूट्यां पछै लेखक नैं किण बात रौ रंज है ?
4. लेखक 'मित्युरासौ' री सरुआत में सार असार किणमें समझै ?
5. लोक में कैवत मुजब जलम अर मरण किण समै आछौ मानीज्यौ है ?

छोटा पडून्तर वाळा सवाल

1. 'मित्युरासौ' रै व्यंग्यकार री मित्यु अर सुरग-नरक नैं लेयनै काँई धारणा है ?
2. लेखक आज रै जुग में अखबार में 'सोग-संदेस' री जरूरत क्यूं अर कियां बताई है ?
3. लेखक 'मित्युरासौ' में आपरै घरवाळां री मनगत बाबत काँई लिख्यौ है ?

4. 'प्रित्युरासौ' में शवयात्रा री बगत चौरायै माथै काँई दरसाव है ?
5. 'प्रित्युरासौ' व्यंग्य रै मार्फत लेखक काँई संदेस देवै ?

लेखरूप पढ़ूत्तर वाला सवाल

1. "व्यंग्य 'प्रित्युरासौ' में मृतक रै प्रति लोगां री दोघाचिंती अर मनगत रौ सांगोपांग वरणाव हुयौ है। इण कथन री पुष्टि में आपरा विचार राखौ।
2. "व्यंग्यकार 'प्रित्युरासौ' रै मार्फत पाठकां रै मनोरंजन रै सागै-सागै वंरै व्यंग्य रूपी चूंठिया भरण रौ ई काम कर्ख्यौ है।" इण कथन री विरोळ दाखला देयनै करौ।
3. 'प्रित्युरासौ' व्यंग्य रचना बाबत विस्तार सूं आपरा विचार प्रगट करौ।

नीचै दिरीज्या गद्यांसां री प्रसंगाऊ व्याख्या करौ।

1. म्हँ वौ दरसाव कियां भूल सकूं हूं, जद म्हारै मरियां सूं पैलां ई म्हारै मरण री त्यास्यां बरतीजण लागगी ही। छैली सांसां सूं पैली ई म्हनै मांचै सूं हेठै पधराय दियौ हौ। पिलंग सूं सिरख-पथरणा सांवटीजग्या हा अर अेक लीरझीर दरी अंगणै बिछाईजगी ही। बडेरां रौ कैवणौ हौ कै मांचै माथै सांस निकळ्यां नरक में ई ठौड़ नीं मिळै। जे म्हनै इण बात रौ पैली ठा होवतौ तौ घर में कदैई मांचौ ई नीं बपरावतौ।
2. सुख-दुख में पाड़ोसी ई आडा आवै, सो वै ऊभा ई आयग्या। लोक में कैवत है कै जलम तौ रात रौ अर मरण परभात रै। पण म्हँ मर्खौ जणै ना तौ रात ही अर ना परभात। सिंझ्या री चारेक बजी ही। औ बगत म्हारै चाय पीवण रौ होया करतौ, पण अबै कुण म्हारौ बाप चाय चढावै हौ अर वा ई मुड़दै नैं पावण सारू? म्हारी लोथ नैं बाळ्यां बिना तौ पाड़ोस्यां रा चूल्हा ई कोनी जग सकै।
3. ज्यूं ई परिक्रमा देयनै म्हारौ बडोड़ौ बेटौ म्हारै लांपौ लगावण लाग्यौ कै म्है पिलंग माथै सूं ओझक नै ऊभौ होयग्यौ। म्हारी आंख खुलगी। म्हनै मरण रौ इत्तौ डर नीं लाग्यौ, जित्तौ सुपनै में लांपै रौ लाग्यौ। सुपनौ टूटतां ई म्हारी आतमा पाछी ठायैसर आयगी, जकी मांझळ रात में काँई ठा कठै-कठै भटकनै आयी ही। दिनुगै अखबार में फोटू छोडनै म्हारौ कठैई नांव ई कोनी छप्यौ। थे ई बतावौ, पछै म्हारी आतमा नैं सांयती कियां मिळती!

□गद्य-काव्य

नुकती-दाणा

गोविंद अग्रवाल

कवि परिचै

गोविंद अग्रवाल राजस्थानी भासा री मुडिया लिपि रा देस रा नामी जाणकार हा। आपरौ जलम 17 अगस्त, 1922 नै होयौ। इतिहास, साहित्य अर लोक-संस्कृति विसय रा शोधकार्या में आप देस-विदेस रा केई शोधार्थीयां रौ मारग-दरसण कर्त्त्यौ। हिंदी अर राजस्थानी में लगोलग अर समरूप सिरजण कर्त्त्यौ। सन् 1960 सूं 1965 ताँई उणां इतिहास रा स्रोता, घटनावां, लोकगाथा, लोकगीतां अर लोकगाथा आद माथै 1500 पानां री प्रामाणिक अर तथ्यपरक सामग्री संकलित-संपादित करनै राजस्थानी सारू लूंठौ काम कर्त्त्यौ। आपरौ औं कारज राजस्थानी री लूंठी हेमाणी है। आपरी चावी-ठावी रचनावां में 'राजस्थानी लोककथावां', 'राजस्थानी कहावत कोश', 'राजस्थानी लोककथा कोश' (दो भाग) अर गद्यकाव्य री रचना 'नुकती-दाणा' प्रमुख है। श्री अग्रवाल राजस्थानी अर हिंदी री 21 पोथ्यां लिखी, जिणमें इतिहास अर लोक-साहित्य रौ वरणन, शोधपरक अर सरावणजोग है। 350 रै लगैटगै वांग शोधपत्र देस री ख्यातनांव पत्र-पत्रिकावां में छप्या। वै चूरू में 'नगरश्री' लोक-साहित्य संस्थान री थापना करी अर इण संस्थान सूं 'मरुश्री' नांव सूं 1971 सूं 1987 ताँई शोध-पत्रिका ई निकाळी, जिणरा केईक विसेसांक शोधार्थीयां सारू घणा महताऊ अर संग्रेजोग है।

पाठ परिचै

आधुनिक काल रै गद्य-साहित्य री विधावां में गद्य-काव्य घणी बाल्ही विधा है, जिणमें भाव पद्य रौ अर भासा गद्य री आवै। गद्य अर पद्य रौ सरीर अर आतमा जैड़ौ मेल है। राजस्थानी में गद्य-काव्य लिखणियां में डॉ. मनोहर शर्मा, ठा. रामसिंह, चन्द्रसिंह बिरकाळी, गोविंद अग्रवाल, कन्हैयालाल सेठिया अर नूंवा लिखारा में विक्रमसिंह चौहान खास है। गोविंद अग्रवाल री पोथी 'नुकती-दाणा' सूं कीं टाळ्वीं गद्य-कवितावां अठै लिरीजी है। नीति, दरसण अर वैवार रौ बोध कम सूं कम सबदां में घणे असरदार ढंग सूं होवै। घमंड अर सरलता, अमीरी अर गरीबी रौ भेद अर मिनख री दीठ में माया रै असर रौ बारीक चित्रण आं रचनावां में होयौ है।

नुकती-दाणा

(1) माटी को दीवौ चिनो'क सो उजास देयनै भी आपकै काजळ सूं आपकी बिड़दावळी भींत ऊपर मांडै, पण आखै जगत में परगास देवणियौ सूरज कदै इसी बात मन में ई को ल्यावै नीं।

(2) मालदारां का पग तौ माया कै नसै सूं धरती पर टिकै कोनी अर गरीब कै दो पगां नैं कठैई ठौड़ कोनी, जद पछै आ धरती क्यां जोगी है?

(3) पाणी सूं भस्योड़ै कुंडे में टिकाणै सूं सीधी अर निरजीव लकड़ी भी बांकी लखावै जणा माया सूं भस्योड़ै बखारां कै बिचालै रैवणिया मिनख सीधा कियां रैवै?

गळगचिया

कन्हैयालाल सेठिया

कवि परिचै

कवि कन्हैयालाल सेठिया रोज जलम सन् 1919 में चूरू जिले रै सुजानगढ कस्बे में होया। आपरी भणाई-लिखाई घरां ई होयी। ‘धरती धोरां री’ अर ‘पाथळ अर पीथळ’ जैड़ी लोकप्रिय रचनावां रा सिरजणहार स्व. सेठिया री राजस्थानी अर हिंदी में पचास सूं बेसी काव्य-पोथां छप्योड़ी। जनकवि रै रूप में सुविख्यात कन्हैयालाल सेठिया मायड़ भासा राजस्थानी रा साचा पुजारी, टकसाली भासा रा जाणकार हा। वां मोकठी आध्यात्मिक अर दार्शनिक कवितावां ई लिखी। भारतीय समाज अर लोकमानस नैं आपरी लेखनी रै विसै बणावण वाला स्व. सेठिया आधुनिक काळ रा मौलिक अर मौजीज कवि मानीजै। राजस्थानी में आपरी 13 काव्य-कृतियां छप्योड़ी हैं, जिणां में रमणिया रा सोरठा, मोंझर, कूंकूं, गळगचिया, लीलटांस, धर कूचां धर मजलां, मायड़ रै हेलो, सबद, सतवाणी, अघोरी काळ, दीठ, कक्को कोड रो अर लीक-लकोळ्या खास हैं।

आधुनिक राजस्थानी कविता में सेठिया जी ओक न्यारी-निकेवढी पिछाण राखै। ओक संतअर दारसनिक सरीखौ गैरौ चिंतन, सबदां री बारीक कारीगरी, मीठी रसभरी अभिव्यक्ति आपरै काव्य री विसेसतावां हैं। मिनखापणै री मरजादा, चरित्र रै ऊज़वौ पख, देस अर समाज रै सुधार री हूंस, प्रकृति अर राजस्थानी भासा री पीड़ आपरै काव्य में सांगोपांग ढंग सूं प्रगट होवै।

पाठ परिचै

कन्हैयालाल सेठिया री गद्य-काव्य पोथी ‘गळगचिया’ मांय सूं कीं टालवीं गद्य-कवितावां इण पाठ में लिरीजी है। औ कवितावां मिनख-मानखै री सावळ ओळखाण करावै। तांबै अर माटी रै घड़ै रै दाखलौ प्रेम, ग्यान अर अपणायत रै घणौ झीणौ अरथ प्रगट करै। कोयल अर काग रै मीठा अर खारा बोलां रै आपरै असर है। जेवड़ी मिनख री कुबुद्धि अर गैलपणै नैं चौड़ै करै, तौ घड़ौ परिपक्वता मांगै। नीमड़ौ अर मतीरै री बेल लुळणौ अर धरातळ सूं जुड़नै आगै बधण री साख भैर, तौ पानड़ै जैड़ा मिनख मूळ सूं टूटनै आगै बधै जरूर है पण क्यां जोगा ई नीं रैवै। मूळ सूं जुड़ाव जरूरी है। इण गद्यकाव्य री भासा आलंकारिक अर भाव गागर में सागर ज्यूं है।

गळगचिया

(1) तांबै रै कळसौ माटी रै घड़ै नैं कैयौ, “घड़ा, थारै में घाल्योड़ौ पाणी ठंडौ कियां रैवै अर म्हारै में घाल्योड़ौ तातौ कियां हो ज्यावै ?” घड़ौ बोल्यौ, “म्हैं पाणी नैं म्हारै जीव में जग्यां दचूं हूं अर तूं आंतरै राखै, औ ही कारण है।

(2) रुंख रै पत्तां में लुक्योड़ी कोयलड़ी बोली, “कूहूऽ॑” मारग बैंवता बटाऊ निजर उठायनै बोल्या, “आ कठैक बोली ?” रुंख री ऊंचली टोखी पर बैठ्यौ कागलौ बोल्या, “कुरां॑ कुरां॒॑” पण कोई आंख उठायनै ई नीं देख्यौ।

(3) मिनख कैयौ, “उळझ्योड़ी जेवड़ी, म्हैं तनैं सुळझायनै कितौ उपगार करूं हूं।” जेवड़ी बोली, “तूं किस्योक उपगारी है जकौ म्हारै सूं छानौ कोनी। कोई और नैं उळझाणै खातर ई मनै सुळझातौ होसी।”

(4) कुम्हार काचै घड़े नैं चाक सूं उतारनै न्यावड़े री उकळती भोभर में ल्या न्हाख्यौ। घड़ौ रोयनै बोल्यौ,
“विधाता, आ काई करी ?” कुम्हार हंसनै कैयौ, “पणिहारी रै सिर परां इयां सीधौ ही चढणौ चावै हौ के ?”

(5) नीमड़े रौ रुंख मरीरै री बेल नैं हंसनै कैयौ, “म्हारी टोखी तौ आभै नैं नावड़े है अर तूं धूळ पर ही
पसस्योड़ी पड़ी है ?” मरीरै री बेल बोली, “पैली थारै फळ कानी देख, पछै म्हरै सूं बात करजै।”

(6) पानड़ौ झरनै पाणी में पड़ग्यौ, डूब्यौ कोनी, तिरण लागग्यौ। मन में फुलीजनै रुंख नैं कैयौ, “म्हैं
किस्योक हुंस्यार तिराक हूं ?” सिंझ्या पड़तां इ रुंख कैयौ, “पानड़ा, ओकर अठीनै आईजै।” पण पानड़ौ रोवतौ सो
बोल्यौ, “म्हारै सारै री बात कोनी।”

(7) पान पीळा पड़ता देखनै माळी रौ चैरै पीळौ पड़ग्यौ, पण फळ पीळा पड़ता देखनै माळी रै मूँडे पर ललाई
आयगी।

⌘⌘

अबखा सबदां रा अरथ

दीवौ=दीपक, दिवलौ। उजास=प्रकास, उजाळौ। बिड़दावळी=जस रौ गीत। चिनोक=थोड़ोक, छोटोक। मालदार=धनी,
अमीर। बांकी=टेढी। कळसौ=तांबै रौ छोटौ मटकौ। तातौ=गरम। आंतरै=दूर। रुंख=पेड़। बटाऊ=राहगीर, पंथी।
टोखी=ऊंची डाळी। जेवड़ी=रस्सी। चाक=जिण माथै गीली माटी नैं कुंभार आकार देवै। भोभर=जगता खीरा रै
ऊपरली गरम राख। ललाई=लालिमा, चैरै रौ चिळकास। फूलीजनै=गरब सूं, घमंड सूं।

सवाल

विकल्पाऊ पद्धतर वाळा सवाल

1. पाठ में आयौ गद्य-काव्य गोविंद अग्रवाल रै किण संग्रे सूं संकलित है ?

- | | |
|-------------------------|----------------|
| (अ) राजस्थानी लोककथावां | (ब) सीपी |
| (स) वंदनमाळ | (द) नुकती-दाणा |

()

2. कन्हैयालाल सेठिया री किण पोथी सूं गद्य-काव्य रा अंस लिरीज्या है ?

- | | |
|-------------|---------------|
| (अ) लीलटांस | (ब) मींझर |
| (स) गळगचिया | (द) अघोरी काळ |

()

3. माटी रौ दीयौ आपैरै काजळ सूं भींत माथै काई मांडे ?

- | | |
|-------------|---------------|
| (अ) चित्राम | (ब) बिड़दावळी |
| (स) मांडणा | (द) साखियौ |

()

4. मिनख जेवड़ी नैं क्यूं सुळ्जावै ?

- | | |
|----------------------------|-----------------------------|
| (अ) दूजै नैं उळज्जावण सारू | (ब) गाय बांधण सारू |
| (स) मांचै री देवण सारू | (द) चारै रौ भारै बांधण सारू |

()

साव छोटा पढूत्तर वाला सवाल

1. माझी रों चैरौं पीळौं क्यूं पडै?
2. कुम्हार काचै घडै नैं चाक सूं उतारनै कठै न्हाख्यौ?
3. किण रै पगां नैं धरती माथे ठौडै नॊं मिळै?
4. घडै में पाणी ठंडौ रैवण रों कांई कारण बताइज्यौ हैं?

छोटा पढूत्तर वाला सवाल

1. पाणी रै कुंड में पड़ी लकड़ी किणरै प्रभाव रै कारण टेढी लखावै?
2. माटी रों दीयौ अर सूरज समाज में कैदा मिनखां रा प्रतीक हैं?
3. कोयल अर काग रै बहानै रचनाकार कांई बात कैवै?
4. गोविंद अग्रवाल कुणसी संस्था रों थापना करी अर बठै सूं किसी शोध-पत्रिका निकाली?
5. कवि कन्हैयाला सेठिया रों चार पोथ्यां रा नांव लिख्यौ।

लेखरूप पढूत्तर वाला सवाल

1. “कन्हैयालाल सेठिया रों पोथी ‘गळगच्चिया’ रों गद्य कवितावां मिनख खातर मोटी सीख है।” इण कथन नैं सिद्ध करौ।
2. तांबे रै कल्सै अर माटी रै घडै बाबत सेठियाजी रा विचार लिख्यौ।
3. गोविंद अग्रवाल रै गद्य-काव्य में आयोड़ा मूळ भावां नैं लिख्यौ।
4. कन्हैयालाल सेठिया रै गद्य-काव्य रों मूळ भावना समझावौ।

नीचै दिरीज्या गद्यकाव्य अंसां रों प्रसंगाऊ व्याख्या करौ।

1. माटी को दीवौं चिनोंक सो उजास देयनै भी आपकै काजल सूं आपकी बिड़दावळी भींत ऊपर मांडे, पण आखै जगत में परगास देवणियौं सूरज कदै इसी बात मन में ई को ल्यावै नॊं।
2. पाणी सूं भर्योडै कुंड में टिकाणै सूं सीधी अर निरजीव लकड़ी भी बांकी लखावै जणा माया सूं भर्योडै बखारां कै बिचालै रैवणिया मिनख सीधा कियां रैवै?
3. मिनख कैयौं, “उळझ्योड़ी जेवड़ी, म्हें तनैं सुळझायनै कित्तौ उपगार करूं हूं।” जेवड़ी बोली, “तूं किस्योक उपगारी हैं जकौं म्हरै सूं छानौं कोनी। कोई और नैं उळझाणै खातर ई मनै सुळझातौ होसी।”
4. नीमडै रों रुँख मर्तीरै री बेल नैं हंसनै कैयौं, “म्हारी टोखी तौ आभै नैं नावडै हैं अर तूं धूळ पर ही पसर्योड़ी पड़ी है?” मर्तीरै री बेल बोली, “पैली थारै फळ कानी देख, पछै म्हरै सूं बात करजै।”

□उल्थौ

साहित्य रौ मकसद

प्रेमचंद

उल्थाकार : नन्द भारद्वाज

उल्थाकार परिचै

हिंदी अर राजस्थानी रा कवि, कथाकार, समीक्षक अर संस्कृतिकर्मी रै रूप में ख्यातनांव नंद भारद्वाज रौ जलम बाड़मेर रै माडपुरा गांव में 1 अगस्त, 1948 नै होयौ। राजस्थानी में ‘अंधार पख’ (कविता-संग्रे), ‘दौर अर दायरो’ (आलोचना), ‘साम्ही खुलतौ मारग’ (उपन्यास), ‘बदलती सरगम’ (कहाणी-संग्रे) छप्योड़ी पोथ्यां। हिंदी में ई अेक कहाणी-संग्रे अर तीन कविता-संग्रे छप्योड़ा। साहित्यिक पत्रिका ‘हरावळ’ रौ केई बरसां संपादन। ‘तीन बीसी पार’ (राजस्थानी कहाणी संकलन) अर ‘रेत पर नंगे पांव’ (हिंदी कविता संचयन) रौ अन.बी.टी. सारू अर ‘जातरा अर पड़ाव’ (राजस्थानी कविता संकलन) रौ साहित्य अकादेमी सारू संपादन। राजस्थानी अकादमी, बीकानेर सूं नरोत्तमदास स्वामी गद्य पुरस्कार (1984), साहित्य अकादेमी पुरस्कार (2004), के. के. बिड़ला फाउंडेशन कानी सूं बिहारी पुरस्कार (2008), सूचना अर प्रसारण मंत्रालय सूं भारतेंदु पुरस्कार (2010) अर राजस्थानी भाषा, साहित्य एवं संस्कृति अकादमी रै सूर्यमल्ल मीसण शिखर पुरस्कार समेत केई संस्थावां सूं सम्मानित। दूरदर्शन जयपुर रै वरिष्ठ निदेशक ओहदै सूं सेवानिवृत्त।

पाठ परिचै

‘कुछ विचार’ नांव री पोथी में प्रेमचंद रा हिंदी निबंध है, जिणां मांय अेक निबंध ‘साहित्य का उद्देश्य’ ई महताऊ है। सन् 1936 में प्रगतिशील लेखक संघ रै ‘लखनऊ अधिवेशन’ में प्रेमचंद सभापति रै आसण सूं जिकौ भासण दियौ, उणनैं ई ज्यूं रौ त्यूं इण निबंध में अंवेस्यौ है। इणी निबंध रौ राजस्थानी उल्थौ ‘साहित्य रौ मकसद’ नांव सूं ख्यातनांव कवि-कथाकार नन्द भारद्वाज आपरी पोथी ‘आलोचना री आधार भोम’ मांय सामल कर्यौ है।

इण निबंध मांय बताईज्यौ है कै साहित्य रौ मकसद प्रगतिशीलता होवै। सिरजक जद समाज में सुख रौ अभाव देखै, तद उणरै मन मांय असंतोष रा भाव जाग जावै अर वौ उणरै प्रतिकार मांय जिकौ सिरजण करै, वौ सिरजण प्रगतिशील सिरजण होवै। साहित्य आपरै समै रौ प्रतिबिंब होवै अर साहित्यकार-कलाकार मनगत सूं ई प्रगतिशील होवै। इणरै सागै ई लेखक सिरजण री उपयोगिता माथै ई जोर देवै। लेखक कैवै कै सिरजक आपरी कला रै फूरठापै सूं परिवेस रै विगसाव में सैयोग देवै अर उणनैं समाज सारू उपयोगी बणावै। इणरै सागै ई साहित्य रौ मकसद जथारथ रौ चित्रण करणौ पण है। लेखक कैवै कै बंगलां अर म्हैलां में इज साहित्य रौ वास नीं होवै, गांवां रा झूंपड़ां अर गरीबी मांय भी साहित्य रौ समान रूप सूं वास होवै। लेखक नैं आपरै सिरजण में समाज रै जथारथ नैं प्रगट करणौ चाईजै। साहित्य रौ मकसद मनोभावां नैं संवेदनसील बणावणा भी है। निबंधकार कैवै कै रचनाकार में जित्ती ज्यादा संवेदना होसी, उणरी रचना बित्ती ई ऊंचै दरजै री होसी।

प्रेमचंद मनोरंजन सूं ई बेसी मानसिक संस्कारां अर जीवणमूल्यां माथै जोर देवै। निबंधकार रौ कैवणौ है कै साहित्य सूं ई मन रौ संस्कार होवै। साहित्य रौ अेक मकसद समाज रा सुख-दुख आखै मिनख-समाज सम्हीं लावणा अर समाज मांय सेवा-भावना रौ बधेपौ भी है। इणरै सागै ई साहित्य नैं सत्ता लारै चालण री ठौड़ उणरै आगै मसाल दिखावण रौ कारज करणौ चाईजै अर मिनखाचारै रा ऊज़वा आदर्शा री थापना करणौ चाईजै। साहित्य रौ

मकसद दलित, पीड़ित अर पिछड़योड़ा लोगां री हिमायत करणौ भी है। इणरै सागै ई भला मिनखां में बधेपौ करणौ, जीयाजूण रै साच रौ जथारथ प्रगट करणौ, कमी-बेसी नैं उजागर करणौ, मनोरंजन अर सुंदरता रौ मंडण करणौ, आमजन री भासा में जथारथ, आदर्श अर कर्मठता रौ संदेस देवणौ भी साहित्य रौ मकसद होवै। निबंधकार कैवै कै म्हारी दीठ में खरै साहित्य वौ ईज है, जिणमें उंचौ चिंतन, स्वाधीनता रा भाव, सुंदरता रौ सार, सिरजण री आतमा अर जीयाजूण रै जथारथ रौ उजाळौ होवै।

साहित्य रौ मकसद

साहित्य में वा इज रचना कथीजै, जिणमें कोई गाढौ साच उजागर होयौ व्है, जिणरी भासा मीठी, मंज्योडी अर सोवणी व्है अर जिणमें मन अर मगज माथै असर राखण री कूवत व्है अर साहित्य में आ खासियत पूरसल उणी औस्था में पैदा व्है, जद उणमें जीवण रौ साच अर मन री ऊर्मा परगट व्है। साहित्य री अलेख्यु परिभासावां करीजी, पण म्हरै विचार सूं उणरी सगव्यं सूं आछी परिभासा जीवण री आलोचना व्है, भलाई वा निबंध रूप में व्है, भलाई कथा या काव्य सरूप में, उणनै आपां रै जीवण री निरपेख आलोचना अर अरथावणी करणी चाईजै।

आपां जिण जुग नैं अबार पार कियौ, उणनैं जीवण सूं कोई मतळब कोनी हौ। आपां रा साहित्यकार कल्पना री अेक स्निस्टी ऊभी करनै उणमें मनचींता तिलस्म बांध्या करता। कठै ई फसाने-अजायब री दास्तान ही, कठै ई दास्ताने-खयाल री अर कठै चंद्रकांता संतति री। आं कथावां रौ मकसद फगत मनोरंजन हौ अर आपां रै अजब प्रेम-रस री धाप। साहित्य रौ जीवण सूं कोई लगाव व्है, आ बात कल्पना सूं परे ही। कथा कथा है, जीवण जीवण, दोनूं अेक-दूजै री विरोधी चीजां जाणीजती। कवियां माथै ई व्यक्तिवाद रौ रंग चढियोड़ौ हौ, प्रेम रौ सिरै रूप वासनावां री पूरती करणौ हौ अर फूर्तरापै रौ आंख्यां नैं।

निस्चै ई कविता अर साहित्य रौ मकसद आपां रै मनोभावां रै आवेग नैं बधावणौ व्है, पण मिनख रौ जीवण फगत नारी-पुरुस प्रेम रौ जीवण नौं व्है। जिकौ साहित्य सिणगारू मनोभावां अर वां सूं उपजण वाळै वैराग, निरासा इत्याद ताई मैदूद व्है— जिणमें दुनियां अर दुनियां री अबखायां सूं छेडौ राखणौ ई जीवण री सारथकता समझी व्है, काई वौ आपांरी विचार अर भाव सूं जुडियोड़ी जरूरतां पूरी कर सकै? सिणगारू मनोभाव मानवी जीवण रौ फगत अेक अंग व्है अर जिकौ साहित्य घणकरौ इणी सूं ताल्लुक राखतौ व्है, वौ उण जात अर उण जुग सारू गरब करण री बात नौं व्है सकै अर नौं इणरी आछी रुचि रौ परियांग ई व्है सकै।

कवियां री रचना ई वारंरी जीवारी रौ साधन ही अर कविता री कदरदानी रईसां अर अमीरां टाळ दूजौ कुण कर सकै? आपां रै कवियां नैं आम जीवण रौ आमनौ करण अर उणरी असलियत सूं रूबरू होवण रा कै तौ औसर ई नौं हा या हरेक छोटै-बडै माथै कीं इण भांत री मनोगत गिरावट छायोड़ी ही कै मानसिक अर बौद्धिक जीवण रह्यौ ई कोनी।

म्हे इणरै दोस उण बगत रा साहित्यकारां माथै नौं राख सकां। साहित्य आपरै जुग रौ पड़बिंब व्है। जिका भाव अर विचार लोगां रै हीयै नैं परस करै, वै ई साहित्य माथै ई आपरी छाया राखै। औडै अबखै अर गिरावट वाळै बगत में लोग कै तौ रळी करै कै अध्यात्म अर वैराग में मन रमावै।

जद साहित्य माथै संसार रै विणास रौ रंग चढियोड़ौ व्है, उणरै अेक-अेक सबद वैराग में ढूब्योड़ौ व्है, बगत री उल्टी चाल रै रोवणै सूं भरियोड़ौ व्है अर सिणगारू भावां रौ पड़बिंब बण्योड़ौ व्है, तौ समझ लेवौ कै जात जड़ता अर हाण रै पंजां में अळूडियोड़ी है अर उणमें उद्यम अर जूझण रौ बळ बाकी नौं बच्यौ। उण उंचा अर उजलै जीवण रा सपनां बिसराय दिया है, उणरै मांय दुनियां नैं देखण-समझण री सगती लोप व्हैगी है।

पण म्हांरी साहित्य री तास में तेजी सूं बदल्याव अवस आयौ। अबै साहित्य फगत मन-बिलमाव रौ साधन नों रह्यौ, मनोरंजन सूं अलायदा, उणरौ कीं औरुं मकसद बण्यौ है, अबै वौं फगत नायक-नायिका रै संजोग-विजोग री कथा नों सुणावै, बल्कै जीवण री अबखायां माथै विचार करै अर वांरौ निवेड़ौ करै। अबै वौं स्फूरती अर प्रेरणा सारू अजब, इचरजभरी घटनावां नों सोधै अर नों अनुप्राप री खोज करै, पण उणरी वां सवालां में रुचि बधी है, जिका समाज अर मिनख माथै गैरौ असर राखै। उणरी आलै दरजै री मौजूदा कसौटी अणभूती री वा तेजी अर रफत है, जिणसूं वौं आपां रा भावां अर विचारां में गति अर वेग पैदा करै।

आपां जीवण में जिकौं कीं देखां, कै जिकी आपां पर बीतै, वै ई अणभव अर वै ई घाव कल्पना में पूगनै साहित्य सिरजण री प्रेरणा उपजावै। कवि या साहित्यकार में अणभूती रौ जित्तौ तीखौ आवेग व्है, उणरी रचना उत्ती ई आकरसी अर आलै दरजै री व्है। जिण साहित्य सूं आपां री रुचि नों जागै, आत्मिक अर मानसिक तोस नों मिलै, आपां रै चित्त में सगती अर गति नों पैदा व्है, आपां रै हीयै में रूप-राग नों जागै, जिकौं आपां रै मांय साचौं संकल्प अर अबखायां नैं काबू करण री साची इंद्धा-सगती नों पैदा करै, वौं आज आपां सारू अकारथ है। वौं साहित्य कैवाण रौ कोई इधकारी कोनी।

आधुनिक साहित्य में हकीकत बयान करण री प्रवृत्ति इत्ती बध रैयी है कै आज री कहाणी जठै तांई संभव व्है, परतख अणभवां री सींव सूं बारै नों जावै, आपां नैं फगत इत्तौ ई सोचण सूं संतोस नों व्है कै मनोविग्यान री दीठ सूं सगवा ई चरित मिनखां सूं मेल खावता है, म्हे आ तसल्ली पण चावां कै वै साच-माच रा मिनख व्है अर लेखक आपरी बणती कोसीस में वांरै ई जीवण चरित रौ वरणन कियौ है, क्यूंकै कल्पना सूं घडियोड़ा मिनखां में म्हांरौ विस्वास कोनी, वांरा कारज अर विचार म्हांरी चेतणा माथै कीं असर नों राखै। म्हांनै इण बात री तसल्ली व्है जावणी चाईजै कै लेखक जिकी रचना करी है वा परतख अणभवां रै आधार माथै करी है अर चरितां री जबान में वौं खुद बोलै।

म्हांरी सगळी निबल्यां री जिम्मेवारी म्हांरी कुरुचि अर आपसी प्रेमभाव री कमी री वजै सूं है। जठै साची सुंदरता अर प्रेम रौ विस्तार है, वठै कमजोरियां कठै रैय सकै। प्रेम ई तौ अध्यात्म सरूपी भोजन व्है अर सगळी कमजोरियां इणी भोजन रै नों मिळणै या दूसित भोजन रै मिळण सूं पैदा व्है। कव्याकार आपां रै चित्त में सुंदरता रौ मनोभाव पैदा करै अर प्रेम रौ गरमास। उणरौ अेक वाक्य, अेक सबद, अेक संकेत इण भांत आपां रै मांय जा बैठै कै म्हांरौ अंतस उजास सूं भरीज जावै, पण जद तांई कव्याकार रूप-रळी सूं धापनै मस्ती में नों व्है अर उणरी खुद री आतमा खुद उण जोत सूं उजासित नों व्है, वौं आपां नैं उजास किण भांत देय सकै।

सवाल इण बात रौ है कै सुंदरता काई चीज है? खुलै रूप में औं सवाल नूंवौं पण लागै, क्यूंकै सुंदरता नैं लेयनै म्हरै मन में कोई संकौं कै बैम कर्दैइ रैवै ई कोनी। म्हे सूरज रौ ऊगणौं अर ढूबणौं देख्यौं है, दिनुगौं अर सिंझ्या री लालिमा देखी है, सुंदर सौरम सूं भरियोड़ा फूल देख्या है, मधरी बोलियां बोलण वाळी चिड़कल्यां देखी है, कळ-कळ संगीत उच्चारती नदियां देखी है, निरत करता झरणा देख्या है, आ ई कुदरत री रूपाळी सुंदरता है।

औं दरसाव देखनै आपां रौ अंतस क्यूं खिल जावै? इण वास्तै कै आं मांय रंग अर धुन रौ आछौ मेल व्है। साजां रौ सुर-मेल ई संगीत रै मोवणैपण रौ कारण व्है। आपां री रचना ई तत्त्वां रै समानुपाती संजोग सूं बणी है, इण वास्तै म्हांरी आतमा सदीव उणी समानता अर आपसी ताळ-मेल री खोज में रैवै। साहित्य कव्याकार रै अध्यात्मी ताळ-मेल रौ परतख रूप है अर औं ताळ-मेल ई उण सौवणै सरूप री सिरजणा करै, विणास नों। वौं विस्वास, साच, हमदरदी, न्याव-प्रेम अर ममता रै भावां री स्निस्टी करै। जठै औं भाव है, वठै ई लूंठौं टिकाव अर जीवण है, जठै इणरौ अभाव है, वठै ई फूट, विरोध अर स्वारथ है— वैर-विरोध, दुस्मीचारौ अर मौत है। औं अळगाव-कुदरती विरोध जीवण रौ अैनांण है, ज्यूं रोग कुदरत रै विरोध में आहार-विहार री निसांणी व्है। जठै कुदरत सूं अनुकूलता अर ताळ-मेल है, वठै अंवळाई अर आप-मतळबीपणौ किण भांत कायम रैय सकै। जद आपां री आतमा कुदरत रै

खुलै वायुमंडल में पली-पोसी व्है, तौ नीचता अर कुटव्हाई रा कीड़ा खुदोखुद हवा अर उजालै में खतम व्है जावै। कुदरत सूं न्यारौ व्हैयनै खुद में ई सीमित व्है जीवण सूं ई आ सग़ली मनगत अर भावगत परेसानियां पैदा व्है। साहित्य आपां रै जीवण नैं सुभाविक अर स्वाधीन बणावै। दूजा सबदां में उणी वजै सूं मन संस्कारी बणै। औं ई उणरौ मूळ मकसद व्है।

साहित्यकार या कल्याकार सुभाव सूं ई प्रगतिसील व्है, जे औं उणरौ सुभाव नौं व्हैतौ तौ स्यात वौ साहित्यकार ई नौं व्हैतौ। उणनैं आपरै मांय ई अेक कमी-सी लखावै अर बारै पण इणी कमी नैं पूरी करण सारू उणरी आतमा बेचैनै रैवै। आपरी कल्पना में वौ मिनख अर समाज नैं सुख अर बंधन-मुगती री जिण औस्था में देखणी चावै, वा उणनैं दीखै कोनी। इणी वास्तै मौजूदा मानसिक अर समाजू औस्थावां सूं उणरौ काळजौ चूंटीजतौ रैवै। वौ आं अप्रिय औस्थावां रौं अंत कर देवणौ चावै, जिणसूं कै औं संसार में जीवण अर मरण सारू सग़वां सूं आछी जिग्यां व्है जावै। आई पीड़ अर औई भाव उणरै काळजै अर मगज नैं काम में उळझायां राखै। उणरौ पीड़ सूं भर्खोड़ौ हीयौ इण बात नैं झेल नौं पावै कै अेक समुदाय क्यूं समाजू नेम-कायदां अर रुद्धियां रैं बंधन में झिल्योड़ौ कल्पेस भोगतौ रैवै? क्यूं नौं औड़ौ सरंजाम कियौ जावै कै वौ गुलामी अर गरीबी सूं मुगती पा जावै? वौ इण वेदना नैं जित्ती बेचैनी सूं अणभव करै उत्ती ई उणरी रचना में सगती अर साच पैदा व्है।

म्हनैं आ बात कैवण में कीं हिचक कोनी कै म्हें दूजी चीजां री भांत कल्वा नैं ई उपयोग री ताकड़ी माथै तोलूं निस्चै ई कल्वा रौं मकसद फूठरापै री आदत नैं पोखणौ व्है अर वा आपां रैं अध्यात्म-आणंद री कूंची व्है, पण औड़ौ कोई रुचिगत मानसिक अध्यात्म आणंद कोनी, जिकौं आपरै उपयोग रौं पाखौं नौं राखतौ व्है। आणंद खुद में अेक उपयोग-सम्मत चीज व्है अर उपयोग री दीठ सूं अेक ई चीज सूं आपां नैं सुख पण व्है अर दुख ई। आधै में छायोड़ौ गैरुं वरणौ उजास निस्चै ई अेक मोवणौ दरसाव व्है, पण असाढ में जे आधै में वैड़ी रंगत छा जावै, तौ वा म्हारै जीव नैं राजी करण वाली नौं व्है सकै। उण बगत तौ आधै में काळी-काळी घटावां देखावां ई म्हांरौ जीव राजी रैवै। फूलां नैं देखनैं म्हे इण वास्तै राजी व्हां कै वारै लारै फळ आवण री आस व्है। कुदरत सूं आपणै जीवण रौं सुर मिलायां राखण में म्हानैं इण वास्तै अध्यात्म सुख मिलै कै उण सूं म्हांरौ जीवण विगसै अर पोखीजै। कुदरत रौं विधान बुद्धि अर विकास व्है अर जिकां भावां, अणभूतियां अर विचारां सूं म्हानैं आणंद मिलै, वै इणी बधापै अर विगसाव में मददगार व्है, कल्याकार आपरी कल्वा सूं रूप री स्थिस्टी करनै हालात नैं विकास सारू उपयोगी बणावै।

भाईचारौ अर बराबरी, सभ्यता अर प्रेम समाजू जीवण री सरूआत सूं ई आदर्शवादी लोगां रा सौवणा सपना रह्या है, धरमाचारी लोग धारमिक, नैतिक अर अध्यात्म रा बंधनां सूं इण सपनै नैं साचौं बणावण रा लगूलग पण निरफळ जतन करता रह्या है। महात्मा बुद्ध, हजरत ईसा, हजरत मुहम्मद इत्याद सग़वा पैगंबरां अर धरम धोरियां नीती री नींव माथै आ बराबरी री इमारत ऊभी करणी तेकड़ी, पण किणी नैं कामयाबी नौं मिळै अर छोटै-बडै रौं भेद जिण निरमम रूप सूं पैदा व्हेतौ रह्यौ है, स्यात् कर्दई नौं व्हियौ।

‘अजमायोड़ौ नैं अजमावणौ मूरखाई व्है’, इण कैवत रै मुजब जे अबै ई आपां धरम अर नीती रौं पल्लौ पकड़नै बराबरी रै ऊंचै मकसद तांई पूणणौ चावां तौ नाकामयाबी ई मिलैला। कांई आपां इण सपनै नैं किणी उछांछलै मगज री उपज समझनै बिसराय देवां? तद तौ मिनख री तरक्की अर पूरणता सारू कोई आदर्श ई बाकी नौं रैवैला। इणसूं तौ आछौं है कै मिनख रौं वजूद ई मिट जावै। आदर्श नैं आपां सभ्यता री सरूआत सूं पाळ्यौ है, जिणरै वास्तै मिनख, भगवान जाणै कित्ती कुरबानियां करी है, जिणरै नतीजै सारू धरमां री नींव पड़ी। मानवी समाज रौं इतिहास जिण आदर्श नैं हासल करण रौं इतिहास है, उणनैं सग़वां सारू मान्य समझनै, अेक अमिट साच समझनै, आपां नैं तरक्की रै मैदान में पांवडौ राखणौ है। आपां नैं अेक औड़ौ संगठण नैं पूरी तरै सूं मुकम्मल बणावणौ है, जठै बराबरी फगत नीतिगत बंधनां माथै आधारित नौं रैयनै, ज्यादा ठोस रूप हासल कर लेवै, आपां रै साहित्य नैं उणी आदर्श नैं आपरै साम्हीं राखणौ है।

म्हानै फूठरापै री कसौटी बदलणी पड़ेला । अबार तांई आ कसौटी अमीरी अर भोग-विलास रै ढंग री ही । आपां रौ कलाकार अमीरां रौ पल्लौ पकड़योड़ै रैवणौ चावतौ, वांरी कद्रदानी माथै उणरौ वजूद टिक्योड़ै हौ अर वांरै ई सुख-दुख, आसा-निरासा, होड अर वैर-विरोध री अरथावणी कला रौ मकसद हौ । उणरी निजरां अंतैपुर अर बगलां कांनी उठती, झूंपड़ा अर खंडहर उणरै ध्यान रा इधकारी नीं हा । वांनै वौ मिनखीचारै रै दायरै सूं बारै समझतौ । कदैई आंरी चरचा करतौ ई तौ फगत चिगाळी काढण सारू । गांव रै आदमी रौ देहाती पैरवास अर तौर-तरीकां माथै हंसण सारू, वांरौ सीन-काफ सही नीं व्हेणौ कै मुहावरै रौ गळत उपयोग उणरै व्यंग-विडरूप री काम-चलाऊ सामग्री ही । वौ मिनख है, उणरी काया में पण काळजौ है अर उणमें ई हूंस है, आ कला री कल्पना रै बारै री बात ही ।

कला नांव हौ अर अबार ई है, सांकड़ै रूप पूजा रौ, सबद-योजना रौ, भाव-निबंध रौ । उणरै वास्तै कीं आदर्श कोनी, जीवण रौ कोई मकसद कोनी— भगती, वैराग, अध्यात्म अर दुनियां सूं छैडौ उणरी सगळां सूं ऊंची कल्पनावां है, म्हारै उण कलाकार रै विचार सूं जीवण रौ चरम मकसद औं ई है । उणरी दीठ अबार इत्ती विसाल कोनी कै जीवण रै संग्राम में सुंदरता रौ परम विगसाव देख सकै । उपवास अर नरमाई में ई सुंदरता रौ वजूद संभव है, आ बात स्यात् उणनै कबूल कोनी । उणरै वास्तै फूठरापौ रूपाळी लुगाई है— उण टाबरां वाळी गरीब, रूप-बिहूणी लुगाई में नीं, जिकी टाबर नैं पाळी माथै सुवाण्यां बिनां परसेवौ बहावै, उण निस्चै कर राख्यौ है कै रंग्योड़ा होठां, गालां, अर भूंवारां में निस्चै ई फूठरापै रौ वासौ है, उणरै वास्तै उळइयोड़ै केसां, फेफी आयोड़ा होठां अर कुम्हळयोड़ै रूप री अगवाणी करण री ताब कठै?

ओं ओछी दीठ रौ दोस है । जे उणरी फूठरापौ देखण वाळी दीठ में विस्तार व्है जावै तौ वौ देख सकै कै रंग्योड़ै होठां अर गालां री आड में जे रूप रौ गीरबौ अर निठुराई छिप्योड़ै है, तौ आं मुरझायोड़ा होठां अर कुम्हळयोड़ा गालां रै आंसुवां में त्याग, सरधा अर तकलीफां सैवण री नरमाई है । हां, वां में सफाई कोनी, दिखावौ कोनी, ऊपरी कंवळाई कोनी ।

म्हानै कला जोबन रै प्रेम में व्याकळ है अर आई बात नीं जाणै कै जोबन छाती माथै हाथ राख्यै कविता पढण, नायिका री निठुराई माथै रोवण कै उणरै रूप-गुमेज अर चोंचलां माथै माथै धूण्यां सूं नीं संज आवै, जोबन नांव व्है आदर्शवाद रौ, हींयाणी रौ, अबखायां रौ आमनौ करण वाळी इंछा रौ, त्याग रौ ।

म्हानै अमूमन आ सिकायत व्है कै साहित्यकारां सारू समाज में कोई जिग्यां कोनी— खासकर भारत रा साहित्यकारां सारू । केई बारला सभ्य मुलकां में तो साहित्यकार समाज रौ माणजोग सदस्य व्है अर बडा-बडा अमीर अर सरकार रा मंत्री तकात वां सूं मिळाप में आप सारू गरब री बात समझै, पण हिंदुस्तानी मिनख तौ अबार तांई मध्यकाळ री औस्था में पङ्घाई है । जे साहित्यकार अमीरां रौ ओलियाड़ बणण रौ जीवण अपणाय लियौ व्है अर आन्दोलनां, हलगलां अर क्रांतियां सूं बेखबर होय, जिकी समाज में व्हे रही है, आपरी न्यारी दुनियां बणाय उणमें ई हंसतौ-रोवतौ व्है, तौ इण दुनियां में उण सारू जिग्यां नीं व्हैण में कोई अन्याव कोनी ।

साहित्यकार रै साम्हीं आजकाल जिकौ आदर्श राखीज्यौ है, उणरै मुजब साहित्य री प्रवृत्ति अहंवाद कै व्यक्तिवाद तांई सीमित नीं रही, वौ मनोविग्यानी अर समाजू व्है, अबै वौ व्यक्ति नैं समाज सूं न्यारौ करनै नीं देखै, पण समाज रै अेक अंग सरूप देखै, इण वास्तै नीं कै वौ समाज माथै हकूमत करै, इणनै आपरै स्वारथ-पूरती रौ औजार बणावै— जाणै उणमें अर समाज में कोई सनातन वैर-विरोध व्है, बल्कै इण वास्तै कै समाज रै वजूद रै साथै ई उणरौ वजूद कायम है अर समाज सूं अळगौ व्हियां उणरौ मोल नाकुछ रै बरोबर व्है जावै ।

आपां मांय सूं जिकां नैं सगळां सूं आछी सीख अर सगळां सूं आछी मानसिक सगत्यां मिळ्योड़ै है, वां माथै समाज बाबत वांरी कीं जिम्मेवारी पण है, म्हे उण मानसिक पूंजीपती नैं पूजनीक नीं मानां, जिकौ समाज रै धन सूं ऊंची पढाई हासल करनै उणनै आपरै स्वारथ-साधण में लगावै । समाज सूं निजी लाभ उठावणौ औड़ै काम व्है, जिणनै कोई साहित्यकार पसंद नीं करैला । इण मानसिक पूंजीजीवी रौ फरज है कै वौ समाज रै लाभ नैं आपरै निजू

लाभ सूं बधीक ध्यान देवण जोग समझै— आपरै हूनर अर हुंसियारी सूं समाज नैं बधीक सूं बधीक लाभ पुगावण री कोसीस करै।

जे आपां अंतराष्ट्रीय साहित्यकार सम्मेलनां री रपट पढां तौ आपां देखांला कै औडौ कोई सास्त्र-सम्मत, समाजूँ इतिहासू अर मनोविग्यानी सवाल नैं है, जिण माथै उणमें विचार नैं व्हियौ व्है। इणरै उल्टौ म्हे खुद रै ग्यान नैं जद देखां तौ म्हानै खुद रै अग्यान माथै लाज आवै। म्हे समझ राख्यौ है कै साहित्य रचना सारू तौ बस तुरत-बुद्धि अर तेज कलम व्हेणी घणी, पण आई सोच म्हरै साहित्यिक पतन रै कारण है, म्हानै आपरै साहित्य रै माप-जोख ऊंचौ करणौ व्हैला, जिणसूं के वौ समाज री बधीक अणमोल सेवा कर सकै, जिणसूं समाज में उणनै वौ औहदौ अर आदर मिळै, जिणरौ वौ हकदार व्है, जिणसूं वौ जीवण रै हरेक पख री आलोचना-विवेचना कर सकै अर आपां दूजी भासावां अर साहित्य रै औंठवाडौ खायनै नैहचौ नैं करां, खुद पण उण पूंजी नैं औरूं बधावां।

जिकां नैं धन-दौलत वालही लागै, साहित्य रै मिंदर में वां सारू कोई जिग्यां नैं व्है। अठै तौ वां सेवकां री दरकार है, जिकां सेवा नैं ई आपरै जीवण री सारथकता मानी व्है, जिकां रै हीयै में दरद री तड़फ व्है अर प्रीत री हूंस व्है। आपरी इज्जत तौ खुद रै हाथ व्है। जे आपां साचै मन सूं समाज री सेवा करांला तौ मान-सम्मान अर ख्यात स्सै कदम चूमैली— फेर मान-सम्मान री चिंता आपां नैं व्है ई क्यूं? अर उणरै नैं मिळण सूं आपां नैं निरासा क्यूं व्है? सेवा में जिकौ अंतस रै आणंद व्है, वौई म्हांरौ पुरस्कार है— म्हानै समाज माथै आपरै बडपण जतावण, उण माथै आपरै रौब जमावण री हवस क्यूं व्है? दूजां सूं बधीक आराम सूं रैवण री इंछा ई क्यूं संतावै? म्हे तौ समाज री धजा लेय आगै चालण वाला सिपाही हां अर सादै जीवण साथै ऊंची निजर राखणी म्हरै जीवण रै मकसद व्है। जिकौ मिनख साचौं कलाकार है, वौ स्वारथी जीवण रै प्रेमी नैं व्है सकै, उणनैं तौ आपरै मन री तुस्टी वास्तै दिखावै री जरूत नैं व्है, उणसूं तौ उणनैं घिरणा ई व्हैणी चाईजै। म्हां साहित्यकारां में करम-सगती री पण कमी लखावै, औ अेक कड़वौं साच है। पण म्हे उण कानी सूं आंख बंद कोनी कर सकां। अबार ताईं म्हे साहित्य रै जिकौ आदर्श म्हरै साम्हीं राख्यौ है, उण वास्तै करम री जरूत नैं ही।

जद ताईं साहित्य रै काम फगत मन-बिलमाव रै सामान जुटावणौ, फगत लोरियां गा-गायनै सुवाणणौ, फगत आंसू ढळकायनै जीव हळकौ करणौ है, तद ताईं उण वास्तै करम री जरूत नैं ही, वौ अेक दीवानौ है, जिणरौ गम दूजा खावता। पण म्हे साहित्य नैं फगत मन-बिलमाव अर विलास री चीज नैं समझां। म्हांरी कसौटी माथै वौ ई साहित्य खरौं जाणीजैला, जिणमें आला दरजै रै चिंतण व्है, आजादी रै भाव व्है, सुंदरता रै सार व्है, सिरजण री आतमा व्है, जीवण रै साच रै उजास व्है— जिकौ म्हरै मांय आगै बधण रै आवेग, आफळ अर बेचैनी पैदा करै, सुवाणै नैं, क्यूंकै अबै औरूं सोवणौ मित्यु री निसांणी है।

⌘⌘

अबखा सबदां रा अरथ

मकसद=उद्देस्य, ध्येय। फूठरापौ=सुंदरता, सौंदर्य। ताल्लुक=तल्लौ-मल्लौ, संबंध। पड़बिंब=प्रतिबिंब, प्रतिष्ठबि। निवेड़ौ=निष्कर्ष, निरणै, न्याव। अंवल्लाई=गोतौ, टेढौ अर लांबौ मारग। कुटलाई=मिजलापणौ, कुटिलता। वजूद=आपौ, अस्तित्व। परसेवौ=पसीनौ। हूंस=लगन, लगाव, प्रबल इंछा। अळगौ=न्यारौ। ओलियाड़=हेठवाल। चिगाली=कूट काढणी, चिगाणौ। लोप=अदीठ। बधीक=ज्यादा, बेसी। बिसराय=भुलावौ। उपजण=निपजण। अंतस=हियौ, हिवडौ। रूपाळी=फूठरी, सौवणी। ख्यात=जस, ख्याति। कंवलाई=नरमाई। सरंजाम=बंदोबस्त। अबखायां=बाधावां। अकारथ=बेकार, बिरथा। आफळ=खेचल, प्रयत्न। उछांछळै=बोछरडौ, अचपळै।

सवाल

विकल्पाऊ पड़तर वाळा सवाल

साव छोटा पड़ुत्तर वाला सवाल

1. संगीत रै मोबाइल पर कारण कांई होवै ?
 2. साहित्य आपां रै जीवण नैं कांई बणावै ?
 3. किणा रौ सुभाव प्रगतिसील होवै ?
 4. साहित्य नैं आपाए जुग रौ कांई मान्यौ जावै ?

छोटा पड़त्तर वाला सवाल

1. कुदरत री रूपाळी सुंदरता काई है ?
 2. साहित्य कैवावण रौं सही हकदार कुण है ?
 3. साहित्य सिरजण री प्रेरणा कियां उपजै ?
 4. साहित्यकार रैं साम्हीं आजकाल किसौं आदर्श राखीज्यौं हैं ?

लेखरूप पड़त्तर वाला सवाल

1. साहित्य रौ खास मकसद कार्ड-कार्ड होवै ?
 2. साहित्यकारां नैं फूठरापै री कसौटी किण भांत बदल्णी पडैला ?
 3. प्रेमचंद रै मुजब आज रै साहित्य मांय कार्ड बदल्वाब आयौ है ?
 4. आधुनिक साहित्य मांय हकीकत बयान करणै प्रवृत्ति किण भांत बध रैयी है ?

नीचै दिरीज्या गद्यांसां री प्रसंगाऊ व्याख्या करौ।

1. कवियां री रचना ई वांरी जीवारी रौ साधन ही अर कविता री कदरदानी रईसां अर अमीरां टाळ दूजौ कुण कर सकै? आपां रै कवियां नैं आम जीवण रौ आमनौं करण अर उणरी असलियत सूं रूबरू होवण रा कै तौ औसर ई नॊं हा या हरेक छोटै-बडै माथै कॊं इण भांत री मनोगत गिरावट छायोड़ी ही कै मानसिक अर बौद्धिक जीवण रह्हौ ई कोनी।
2. सवाल इण बात रौ है कै सुंदरता काईं चीज है? खुलै रूप में औं सवाल नूंवौ पण लागै, क्यूंकै सुंदरता नैं लेयनै म्हारै मन में कोई संकौं कै बैम कर्दैइ रैवै ई कोनी। म्हे सूरज रौ ऊगणौं अर डूबणौं देख्यौं है, दिनुगै अर सिंझ्या री लालिमा देखी है, सुंदर सौरम सूं भरियोड़ा फूल देख्या है, मधरी बोलियां बोलण वाळी चिङ्कल्यां देखी है, कळ-कळ संगीत उच्चारती नदियां देखी है, निरत करता झरणा देख्या है, आ ई कुदरत री रूपाळी सुंदरता है।
3. म्हांरी कळा जोबन रै प्रेम में व्याकळ है अर आइ बात नॊं जाणै कै जोबन छाती माथै हाथ राखनै कविता पढण, नायिका री निठुराई माथै रोवण कै उणरै रूप-गुमेज अर चोंचलां माथै धूण्यां सूं नॊं संज आवै, जोबन नांव व्है आदर्शवाद रौ, हींयाणी रौ, अबखायां रौ आमनौं करण वाळी इंछा रौ, त्याग रौ।
4. साहित्यकार रै साप्हीं आजकाल जिकौं आदर्श राखीज्यौ है, उणरै मुजब साहित्य री प्रवृत्ति अहंवाद कै व्यक्तिवाद ताईं सीमित नॊं रही, वौ मनोविग्यानी अर समाजू व्है, अबै वौ व्यक्ति नैं समाज सूं न्यारौ करनै नॊं देख्यै, पण समाज रै ओके अंग सरूप देख्यै, इण वास्तै नॊं कै वौ समाज माथै हकूमत करै, इणनैं आपरै स्वारथ-पूरती रौ औंजार बणावै।

□जूनौ काव्य

रणमल्ल छंद

श्रीधर व्यास

कवि परिचै

श्रीधर व्यास आदिकाळ रै वीर रसात्मक कवियां री पांत में सिरमौर कवि मानीजै। ‘रणमल्ल छंद’ आंरी औतिहासिक, वीर रसात्मक खंडकाव्य री अमोलक रचना है। व्यास ब्राह्मणां रौ ओक उपवरग, उपाधि अर राजकीय पद मानीजै। ‘रणमल्ल छंद’ रै अलावा दूजी रचनावां में ‘भागवत दसम स्कंध’ (127 छंद), ‘सप्तसती’ (120 छंद) आद रौ उल्लेख मिलै। कवि श्रीधर व्यास रै जीवण परिचै अर रचना-संसार री घणी जाणकारी कोनी मिलै। इण सारु शोध री दरकार है। कवि प्राकृत, संस्कृत अर फारसी रै सागै अपभ्रंस रा चोखा जाणकार हा, जिणरी बानगी ‘रणमल्ल छंद’ रचना भैर। श्रीधर व्यास ‘रणमल्ल छंद’ रै पाण इतिहास में रणमल्ल राठौड़ नै ओक सुभट, भड़-किंवाड़, कमधज अर वीरवर रै रूप में अमर कर दियौ। अनेक विद्वान श्रीधर व्यास नै रणमल्ल रौ राजकवि मानै अर कई विद्वान उणनै राज रै पुरोहित रै रूप में स्वीकारै। श्रीधर व्यास रौ परिचै काळै रै अंधारै कूवै में रैवतौ जे पूना डेकन कॉलेज रै सरकारी संग्रहालय मांय मौजूद पांडुलिपि में प्रतिलिपिकार उणरी पुष्पिका में ‘श्रीधर व्यास कृत रणमल्ल छंद’ नीं लिखतौ। राजस्थानी रै आदिकालीन वीर रसात्मक रचनावां में ‘रणमल्ल छंद’ खंडकाव्य आपरी महताऊ ठौड़ राखै।

पाठ परिचै

रणमल्ल आपै बगत रौ सुभट अर भड़-किंवाड़ जोधा है। ‘रणमल्ल छंद’ में रणमल्ल रै ही वीरत्व रौ बखाण है। आथूणै भारत में उण वेळा री उथल-पुथल रौ साचौ चित्राम इण काव्य में मिलै। दिल्ली रौ तुगलक सुल्तान नासिरुद्दीन मुहम्मद शाह रा नियुक्त कर्योड़ा सूबेदार जफरखां सन् 1398-99 में ईंडर (गुजरात) माथै दूजी बार हमलौ करस्यौ। उण वेळा ईंडर राव रणमल्ल राठौड़ अर जफरखां रै बीचालै जकौ जुद्ध होयौ, कवि उणरौ इज सांगोपांग ढंग सूं ओजपूरण वरणाव करस्यौ है। इचरज भरचै ढंग सूं रणमल्ल परंपरागत सैली सूं जुद्ध कर खान सेना नैं धरासाही कर न्हाखी अर जीत रौ सेवरौ आपै सिर बांध्यौ। उण बगत इण जीत रौ घणौ जबरौ असर पड़्यौ। रणमल्ल आपै रण-कौसल सूं अनमी अर हिंदू संस्कृति नैं पोखण वाळा रावां-उमरावां मांय धरमांध अर जुलमी यवनां रै खिलाफ जुद्ध करण री हूंस जगाई। रणमल्ल आपै बूकियां रै ताण उण बगत में कई जुलमी यवन सासकां नैं धरासाही करस्या।

‘रणमल्ल छंद’ छंद-संज्ञक काव्य परंपरा री पांत री आदिकालीन वीरसपरक ओक औतिहासिक खंडकाव्य रचना है, जिण मांय रणमल्ल रौ जुद्ध-कौसल अर उणरौ सूरापण रौ घणौ ओजपूरण अर उछाव-उमाव सागै अद्भुत वरणन कवि श्रीधर व्यास करस्यौ है।

रणमल्ल छंद

// दूहू //

साहस वसि सुरताण दळ, समुहरि जिम चमकंत।
तिम रणमल्लह रोस वसि, मूँछ सिहरि फुरकंत॥

// सारसी //

फुरफरहि लंब अलंब अंबरि नेज निकर निरंनर।
भरभरहि भेरि भयंक भू कर भरळि भूरि भयंकर।
दड़दड़ी दड़दड़ कारि दड़वड़ देसि दिसि दिसि दड़वड़।
संचरइ सक सुरताण साहण साहसी सवि संगरइ॥

// दूहू //

साहस वसि सुलतान दळ समुहरि जिम दमकंत।
तिम तिम ईडर सिहर वरि, ढोल गहिर ढमकंत॥

// सारसी //

ढम ढमइ ढम ढम कर ढूंकर ढोल ढोली जंगिया।
सुर करहि रण सरणाइ समुहरि सरस रसि समरंगिया।
कल्कल्कहि काहल कोडि कलरवि कुमल कायर थरथरइ।
संचरइ सक सुरताण साहण साहसी सवि संगरइ॥

// चुप्पइ //

रा असि सरिसु बाहु उठ भारिअ,
बुल्लाइ हठि हेजब हक्कारिअ।
मुझ सिर कमल मेच्छ पय लग्गाइ,
तु गयणंग (भ)णि भाण न उग्गाइ॥
बिबहर भरि बुंबारव वज्जाइ,
जळहर जिम सींगणि गुण गज्जाइ।
बहु बलकाक करइ बाहुब्बलि,
धंधलि धड़ धरइ धरणी तलि॥
अरियण दारण ! दीन अभयकर,
पंडरवेस थया निब्बय धर।
बंभण बाल बंदि बहु किज्जाइ,
धा कमधज्ज धार करि लिज्जाइ॥

अबखा सबदं रा अरथ

तिम=ज्यूं ही। रोस=रीस। वसि=रै कारण। फुरकंत=फुरकण लागी। लंब=मोटी। अलंब=छोटी। अंबरि=आकास। नेज=धवजा। भेरि=जुद्ध में बाजण वालौ वाद्य। दड़दड़ी=वाद्ययंत्र। देसि=देस। दिसि-दिसि=दसूं दिसावां। सुरतांण=सुलतान। दल्ल=सेना। जंगिया=जंगी। समुहरि=हरावल, सेना रै सबसूं आगलौ भाग। समरंगिया=जुद्ध रा रसिया। काहल=जुद्ध-वाद्य। कल्कलिया=काहल सूं निकल्योड़ी ध्वनि। थरथरइ=कांपणौ। रा=राजा, राव। असि=तलवार। बाहु=बाजू, बूकिया। मेच्छ=यवन, मुस्लिम आक्रमणकारी। पय=पग। लगगइ=लागणौ। गयणगणि=आकास, गिगन, आधौ। भांण=सूरज। उगगइ=ऊगणौ। बुल्लइ=बुलावणौ। हेजब=दूत। हक्कारिअ=संबोधन करणौ। बुंबारव=जुद्ध रौ अेक वाद्ययंत्र। भेरि=रण रौ वाद्ययंत्र, रणभेरी। जळहर=बादल, मेघ। सींगणि=धनुसां री प्रत्यंचावां। बहु=घणा। बलकाक=यवन (बलक देस रा)। बाहूबलि=बाजू (बूकियां रौ जोर)। धरणी=धरती। अरियण दारण=सत्रुवां सूं मुक्त करणवाला। दीन अभयकर=हे दीन अभयकारी, गरीब नैं भयमुक्त करण वालौ। पंडरवेस=यवन। थया=होयग्या। निब्भय=भयमुक्त। बंमण=ब्राह्मण। बाळ=अबलावां। बहु=घणा। कमधज्ज=रणमल्ल, राठौड़ीं री उपाधि। धार=जुद्ध।

सवाल

विकल्पाऊ पड़ूतर वाला सवाल

1. 'रणमल्ल छंद' रा कवि कुण है ?

(अ) सालिभद्र सूरि	(ब) समय सुंदर
(स) पृथ्वीराज राठौड़	(द) श्रीधर व्यास

()

2. 'रणमल्ल छंद' किण काल री रचना है ?

(अ) रीतिकाल	(ब) भक्तिकाल
(स) आदिकाल	(द) आधुनिककाल

()

3. 'रणमल्ल छंद' री भासा किण भांत री है ?

(अ) मालवी मिश्रित राजस्थानी	(ब) व्यंग्यमूलक
(स) अपभ्रंस मिश्रित जूनी राजस्थानी	(द) हिंदी मिश्रित राजस्थानी

()

4. 'रणमल्ल छंद' काव्य रौ नायक कुण है ?

(अ) दुर्गादास	(ब) सातल सोम
(स) हमीर चौहान	(द) रणमल्ल

()

साव छोटा पड़ूतर वाला सवाल

1. रणमल्ल किण सागै अर कद जुद्ध कर्खौ ?
 ()
2. रणमल्ल छंद में आयोड़ा छंदां रा नांव लिखौ।
 ()

3. रणमल्ल री मूँछां किणनैं देखनै रीस सूँ फुरकै ?

4. यवन सैनिक किणनैं बंदी बणावै ?

छोटा पडूत्तर वाळा सवाल

1. धरती माथै कुण आतंक अर धूध मचा राखी ही ? अर किण भांत ?

2. दूत रा वचन सुणनै रणमल्ल री कांई दसा होवै ?

3. दूत रै संदेसै रै जबाब में रणमल्ल कांई वचन बोलै ?

लेखरूप पडूत्तर वाळा सवाल

1. रणमल्ल छंद री काव्यगत विसेसतावां लिखौ।

2. रणमल्ल छंद में छंद अर अलंकारां री ओप माथै टीप लिखौ।

3. रणमल्ल छंद मांय रणमल्ल रौ अनमी सुभाव अर उण रा मायड़ भोम सारू विचारां नैं लिखौ।

4. रणमल्ल छंद रौ भावगत फूठरापौ उदाहरण सागै लिखौ।

नीचै दिरीज्या पद्यांसां री प्रसंगाऊ व्याख्या करौ।

1. ढम ढमइ ढम ढम कर ढूंकर ढोल ढोली जंगिया।

सुर करहि रण सरणाइ समुहरि सरस रसि समरंगिया ॥

2. रा असिसिरिसु बाहु उठा भारिअ, बुल्लइ हठि हेजब हक्कारिअ।

मुझ सिर कमल मेच्छ पय लगइ, तु गयणंग (भ)णि भाण न उगगइ ॥

3. बिबहर भरि बुंबारव कज्जइ, जळहर जिम सर्झगणि गुण गज्जइ।

बहु बलकाक करइ बाहुब्बलि, धंधलि धड़ धरइ धरणी तलि ॥

□लोक-काव्य

ढोला-मारू रा दूहा

पाठ परिचय

‘ढोला-मारू रा दूहा’ राजस्थानी रौं ओक लोक प्रसिद्ध जूनौं गाथा-काव्य है। आ ‘गाथा’ दूहां में रच्छोड़ी ओक औड़ी प्रेमगाथा है जिकी राजस्थान ई नीं, इणरी सींवां वाला प्रांतां में ई घणी लोकचावी रैयी है। इणरी लोकप्रियता रौं प्रमाण औं है कैं इणरौं कोई न कोई दूहौं थेट गांव में रैवणियौं अणपढ आदमी भी आपरी जबान माथै राखै। इण बाबत औं दूहौं इणरी साख भरै—

सोरठियौं दूहौं भलौं, भल मरवण री बात।
जोबन छाई धण भली, तारां छाई रात॥

‘ढोला-मारू रा दूहा’ प्रेमगाथा होवतां थकां ई इणरौं सिणगार वरणाव घणी मरजादा सूं रच्छोड़ी है। राजस्थानी भाव अर भावना सूं इणरी आत्मा सराबोर है। साहित्यकारां री दीठ मांय इणरौं काव्य-सौष्ठव सांगोपांग है। औं ओक गाथा-काव्य है।

‘ढोला-मारू रा दूहा’ रौं रचयिता कुण हौं अर इणरी रचना कद होयी, इण सारू विद्वानां रा न्यारा-न्यारा मत है। कीं विद्वानां री दीठ सूं आ ‘गाथा’ किणी खास कवि री कृति नीं होयनै मौखिक परंपरा रै जूनै काव्य जुग री ओक खास काव्य-कृति है, तौ कीं इणनै कवि ‘कल्लोल’ री काव्यकृति मानै। कीं विद्वान जैनकवि कुसळ्लाभ नैं इणरौं रचयिता मानै। पण आं धारणावां रा कोई पुख्ता प्रमाण नीं मिलै। इण खातर इणरै विसै में डॉ. माताप्रसाद रौं औं विचार लय पड़तौं लागै कैं ‘ढोला-मारू रा दूहा’ रौं सिरजण-काळ अर उणरौं सिरजक अग्यात ई है। विद्वानां री मानता है कैं असली काव्य सरुआत में सगढ़ौं ई दूहां में हौं, पण समै रै साथै लोग दूहा भूलता गया अर इणी बिचै कीं दूहा बचग्या, ज्यांरै कथासूत्र ओकदम विडरूप होयग्यौ। इण कथासूत्र नैं मिलावण खातर जैनकवि कुसळ्लाभ वि. सं. 1618 रै लगैटगै चौपाइयां बणाई अर दूहां रै बिचै जोड़-जोड़नै कथासूत्र नैं संवारियौ। औं काम जैसलमेर रै रावळ हरराज रै समै होयौ। कीं विद्वान ‘ढोला-मारू रा दूहा’ रौं बगत संवत 1000 रै लगैटगै बतावतां कुसळ्लाभ अर रावळ हरराज रै समै नैं कूंतता थका इण रचना रौं सिरजण काळ वि. सं. 1450 सूं पैली मानै।

कथा-सार

देस-काळ रै किणी टैम पूगळ में पिंगळ अर नरवर में नळ नाव रा राजा राज करता हा। समै रै संजोग सूं पूगळ देस में ओक बार काळ पड़ग्यौ। राजा पिंगळ परिवार समेत राजा नल सूं पुष्कर में मिल्या। राजा पिंगळ रै मारवणी नांव री ओक कन्या ही अर नळ रै ढोला उर्फ साल्हकुंवर नांव रौं राजकुमार हौं। उण टैम ढोला नैं देखनै राजा पिंगळ री राणी इण माथै रीझग्नी ही अर राजा माथै जोर देयनै आपरी कन्या मारवणी रौं व्याव उणरै सागै कराय दियौ। उण बगत ढोलौं तीन अर मारवणी फगत डोढ बरस री ही। टाबर होवण रै कारण राजा पिंगळ आपरी लाडल मारवणी नैं नरवर नीं राखनै पाछा आवतै समै पूगळ लेय आया।

...यूं करतां-करतां केरइ बरस बीतग्या। बठीनै राजा नळ पूगळ नैं घणौं अळगौं अर उणरौं मारग अबखौ समझनै ढोला रौं दूजौ व्यांव माल्वै री राजकुमारी माल्वणी रै साथै कर दियौ। इणसूं पैली होयोड़े व्यांव री बात नैं वै ढोला नैं नीं बताई। व्यांव होयां ढोलौं अर माल्वणी प्रेम रै सागै राजसी ठाठ-बाट अर आंणद सूं रैवण लाग्या।

उठीनै पूगळ में मारवणी बड़ी होयी । अेक दिन सपना में उणनै ढोलो दिखै । ढोला रै रूप-रंग नै देखनै उण रै मन में प्रेमभाव जागै तद उणरी साथण रै मारफत उणरी मां बतावै कै जकौ उणरै सपना में आयौ है वौ तौ उणरै सायबौ है । आ बात सुणनै मारवणी ढोला रै विरह में कुदरत रै सागै अेकमेक होयनै संताप करै । पूगळ रा राजा ढोला ताँइ संदेसा भेजै, पण मालवणी री चतुराई रै कारण वै ढोला तक नीं पूग सकै । छैकड़ अेक ढाढ़ी रै साम्हीं मारवणी आपरी प्रेम भावनावां नैं उजागर करै जिणनैं ढाढ़ी काव्य रूप में मांड ढोला ताँइ पुगावै ।

ढाढ़ी मारवणी री संदेस लेयनै गुप्ताऊ रूप सूं नरवर पूगै अर आपरै गावणै-बजावणै री कव्वा रै बल्बूतै आपरी समझदारी सूं वौ ढोला ताँइ उण संदेस नैं पूगाय देवै । ढाढ़ी रै मारफत मारवणी री सुंदरता, प्रेम अर समरपण भाव री जाणकारी मिल्यां पछै ढोलौ खुद उण सूं मिल्ण री सबव्वी आफळ करै पण सोरै सांस पार नीं पड़ै । ढोलौ कीं दिनां पछै मालवणी री विणती नैं अजाणी कर ऊंट माथे सबाव होयनै पूंगळ देस पूगै । जठै राजा पिंगळ ढोला नैं बधावै, जोरदार मान-मनवार करै । राजकुमारी मारवणी मोद मनावै अर उणरी साथणियां मंगळ गावै । कीं समैं रै पछै ढोलौ अर मारवणी राजा पिंगळ सूं सीख लेयनै नरवर पूगै । इण बिचालै कई अंतर्कथावां ई आवै, जिणमें मारवणी नैं पीवणौ सांप खावणौ, अेक जोगी रै प्रताप सूं पाछी जीवती होवणौ, ऊमरा-सूमरा री सेना सूं मुकाबलौ करणौ अर कुदरत री विपदावां भेळी है ।

इण पाठ में मारवणी ढाढ़ी नैं आपरै मन री बात बतावती थकी समझावै कै वा ढोला रै प्रेम में किण भांत रमियोड़ी है अर उणनैं ढोला ताँइ काँइ संदेस पूगावणौ है, इण भाव सूं ओत प्रोत दूहा लिरीज्या है । औं दूहा काव्य-कला री दीठ सूं बेजोड़, भासा री दीठ सूं सहज है, जिका प्रेम, विरह अर कुदरती फूठरापै री साख नैं सवाई करै ।

ढोला-मारू रा दूहा

सोरठौं

जेती जड मनमांहि, पंजर जइ तेती पुळङ्ग ।
मनि वइराग न थाइ, वालंभ वीछडियां तणी ॥

दूहा

फूलां फलां निघट्टियां, मेहां धर पड़ियांह ।
परदेसां का सज्जणा, पत्तीजूं मिल्लियांह ॥
सालूरा पाणी विना, रहइ विलक्खा जेम ।
ढाढ़ी, साहिब सूं कहइ, मो मन तो विण एम ॥
पावस मास विदेस प्रिय, घरि तरुणी कुळसुध्ध ।
सारंग सिखर, निसद करि, मरइ स कोमळ मुध्ध ॥
तुंही ज सज्जण मित तूं, प्रीतम तूं परिवांण ।
हियड़ि भीतरि तूं वसइ, भावइं जांण म जांण ॥
हूं बल्हिहारी सज्जणां, लज्जणां मो बल्हिहार ।
हूं सज्जण पग पानही, सज्जण मो गल्हार ॥
लोभी ठाकुर आवि घरि, काँइ करइ विदेसि ।
दिन दिन जोवण तन खिसइ, लाभ किसाकउ लेसि ॥
बहु धंधाळ आव घरि, कासूं करइ विदेस ।
संपत सघवी संपजे, आ दिन कदी लहेस ॥

अवसर जे नहि आविया, वेळा जे न पहुत।
सज्जण तिण संदेसड़इ, करिज्यउ राज बहुत॥

सोरठौ

संभारियां संताप, वीसारियां न वीसरइ।
काळेजा बिचि काप, परहर तूं फाटइ नहीं॥

दूहा

यहु तन जारी मसि करूं, धूंआ जाहि सरग्गि।
मुझ प्रिय बदल होइ करि, वरसि बुझावइ अग्गि॥
भरइ, पळटुइ भी भरइ, भी भरि भी पळटेहि।
ढाढी हाथ संदेसड़ा, धण विललंति देहि॥
दूहा संदेसा मिसइं, दीधा तिणां सिखाइ।
प्रीतम आगळि वीनती, करिया इण विधि जाइ॥

ढाढियां रौ नरवर जावणौ

स्रवण संदेसा सांभळे, ढाढी किया प्रयाण।
मागरवाळ जु आविया, देसे साल्ह सुजाण॥

⌘⌘

अबखा सबदां रा अरथ

पंजर=पिंजरा (अस्थिपंजर)। आगळी=आगै वाळी। वइराग=वैराग, विरक्ति। सांभळे=सुणणौ, सांभळणौ। वालंभ=बालम, प्रियतम। प्रयाण=प्रस्थान। पतीजूं=भरोसौ करूं, पतीजणौ। मागरवाळ=याचक। साल्ह=साल्हकंवर (ढोला रौ नांव)। सालूरा=मेंडक, डेडरिया। सुजाण=स्याणौ-समझणौ, चतुर। जेम=जियां, जिसौ। एम-इयां, इसौ। पावस=बिरखा री रुत, चौमासौ। सारंग=मोर। मरइ=प्रित्यु, मौत। परिवाण=प्रमाण। वसइ=वासौ करै, रैवै। धंधाळू=धंधा वाळौ। संभारियां=याद करणौ। परहर=छोडणौ, छिटकावणौ। पळटुइ=पलटै, बदलै। विललंती=विल्लाप करती, विलखती।

सवाल

विकल्पाऊ पड़ुतर वाळा सवाल

1. ढोला रा पिता कठै रा राजा हो ?

- | | |
|---------------|------------|
| (अ) पूंगळ देस | (ब) नळ देस |
| (स) धूंधळ देस | (द) जळ देस |

()

2. मारवणी रै पिता रौ नांव कांई हो ?

- | | |
|---------------|----------------|
| (अ) राज पिंगळ | (ब) राजा नरवर |
| (स) राज गजराज | (द) राजा साल्ह |

()

()

साव छोटा पड़त्तर वाला सवाल

1. राजा पिंगल किण देस रौ राजा हो ?
 2. ढोला री धण मारवणी किण देस री राजकुमारी ही ?
 3. 'विललंती' सबद रौ कार्ड अरथ हवै ?

छोटा पड़ुत्तर वाला सवाल

1. मारवणी किणसू प्रेम करै ?
 2. मारवणी रौ संदेस ढोला ताई कुण पूगावै ?
 3. ढोला-मारू री कथा कार्ड है ?

लेखरूप पड़त्तर वाला सवाल

1. ढोला-मारू री कथा रौ सार लिख्यौ।
 2. मारवणी रै विरह भाव नैं उजागर करै।
 3. मारवणी ढाढी सागै ढोला नैं कार्हि संदेस भेजै?

नीचै दिरीज्या दूहां री प्रसंगाऊ व्याख्या करौ।

1. फूलां फळां निघट्यां, मेहां धर पड़ियांह ।
परदेसां का सज्जणा, पत्तीजूं मिल्यांह ॥
 2. पावस मास विदेस प्रिय, घरि तरुणी कुळसुध्य ।
सारंग सिखर, निसद् करि, मरइ स कोमळ मुध्य ॥
 3. अवसर जे नहि आविया, वेळा जे न पहुत् ।
सज्जण तिण सदेसड़इ, करिज्यउ राज बहुत् ॥
 4. स्वरण संदेसा सांभळे, ढाढी किया प्रयांण ।
मागरवाळ जु आविया, देसे साल्ह सुजांण ॥

□रास

वीसलदेव रास

नरपति नाल्ह

कवि परिचै

कवि नरपति नाल्ह आदिकाळ अर मध्यकाळ रै संधिकाळ रा मौजीज कवि मानीजै। नाल्ह आंरै मूळ नांव अर ‘नरपति’ पदवी रै रूप में विद्वानां मानी है। कवि भाट जाति सूं जाणीजै। आंरी लिख्योड़ी रचना ‘वीसलदेव रास’ 14वीं सदी री रचना मानीजै अर कवि री भासा भी अजमेर रै आसै-पासै री लखावै, पण प्रामाणिकता रै सागै कवि रै जलम अर दूजी रचनावां रौ परिचै नीं मिळै। इण रचना रै अलावा कवि रै व्यक्तित्व अर कृतित्व री खोज शोध रौ विसय है। कवि रासपरक काव्य-सैली रौ पुख्ता जाणीकार है। कवि री आ रचना लौकिक, प्रेमाख्यान, सिणगारपरक, गीत अर नाच-सैली री अमोलक रचना है। राजस्थानी साहित्य में नरपति नाल्ह नांव रै जैन कवि री उल्लेख 16वीं सदी में मिलै अर कवि भाण री रचना ‘हमीर दे चउपई’ वि. सं. 1538 में भी नाल्ह रौ नांव मिलै पण औं दोनूं नरपति नाल्ह सूं मेल नीं खावै। कवि री आ अेक रचना ही उणनैं राजस्थानी आदिकालीन रासपरक काव्य-सैली रौ मौजीज कवि बणावै।

पाठ परिचै

‘वीसलदेव रास’ आदिकालीन राजस्थानी साहित्य में रास-संज्ञक, विरहपरक, गेय काव्य री घणी महताऊ रचना है। सिणगार रस रै वियोग पख नैं प्रगट करता थकां बारहमासा काव्य-सैली री रीति रौ निरवाह इण काव्य नैं दूजा काव्यां सूं ऊचै दरजे रौ थरयै। राजमती री विरह-वेदना बारह मास री न्यारी-न्यारी दसावां में ओपतै, ऊडे भावां सागै सांगोपांग ढंग सूं प्रगट होयौ है। औतिहासिक चरित्र माथै आधारित औं गेय काव्य री पांत में आवै। रास रा मूल तत्त्वां रौ इण मांय सांतरौ मेल होयौ है। इण री भासा राजस्थानी रै सागै-सागै उत्तर अपभ्रंस काळ री भासा सूं मेल खावै। इण री भासा जूनी राजस्थानी मानीजै। इण काव्य में अेक ही तरै रौ खास छंद प्रयोग में आयौ है। उण जुग रै सामाजिक-सांस्कृतिक परिचै रै सागै-सागै उण बगत रै लोकाचार, रीति-रिवाज, नेगचार, उत्सव आद रौ भी बखाण इण काव्य में मिलै।

कथासार

धार नगरी रै राजा भोज पंवार री बेटी राजमती रौ ब्यांव अजमेर रा राजा वीसलदेव सूं होवै। ब्यांव में राजा भोज घणै चाव सूं वीसलदेव नैं उण बगत रा नामी ठिकाणा, रजवाड़ा, राज रा नगर, हाथी-पालकी, दासियां आद उपहार में देवै। ब्यांव पछै अजमेर आयां वीसलदेव नैं आपरै सवा लाख घोड़ां, सात सौ हाथियां, गढ अर मिंदर रै वैभव नैं देखनै मन में घमंड आयग्यौ। उणरै इण घमंड नैं राजमती लख लेवै। लारलै जलमां रा पाप अर विधाता री लेखनी रौ लेखौ इण जलम में भोगणौ पड़ै। राजमती रै मूँडे सूं निकल्या ताता अर अकरा बोल राजमती रै संजोग नैं विजोग में बदल देवै। राजमती वीसलदेव नैं कैवै कै आप इण बात रौ घणौ घमंड मत करौ, आप जिसा घणा ही वैभवसाली राजा धरती माथै बिराजै है अर उड़ीसा रै राजा रै तौ खाणां में हीरा निपजै है।’’ औं ताता बोल वीसलदेव

रै मन-मगज में कील ज्यूं गड जावै। राजा वीसलदेव बारह बरस ताँई उड़ीसा जावण रौ प्रण कर्खौ। राजा नैं मनावण रा धणा ही उपाय कर्खा, पण वीसलदेव राजमती अर राजपाठ नैं छोडनै उड़ीसा सिधारग्या। इण बिछोह में राजमती रै घणौ विजोग होयग्यौ। बारह बरसां ताँई वा विरह रै ताप में नित तपती, कळपती अर झुरती रैयी। विरह रै ताप सूं पंजर होयगी अर आखर बारह बरसां पछै वीसलदेव धन-माल सांगै पधारस्यौ। राजमती रै पाढौ संजोग-सुख होयगौ।

वीसलदेव रास

(1)

चालियउ उलगाणउ कातिग मास।
छोडीया मंदिर घर कविलास॥
छोडीया चउबारा चउखंडी, तठइ पंथ सिरि नयणा गमाइया रोइ।
भूख गई त्रिस ऊचटी, कहि न सखीय नींद किसी परि होइ॥

(2)

मगसिरियइ दिन छोटा जी होइ।
सखीय संदेसउ न पाठवइ कोइ॥
संदेसइ ही बज पड़यउ, ऊंचा हो परबत नीचा घाट।
परदेस पर भुइं गयउ, तठइ चीरीय न आवइ न चालए बाट॥

(3)

देखि सखी हिव लागउ छइ पोस।
धण मरतीय को मत दीयउ दोस॥
दुखि दाधी पंजर हुई, धान न भावए तज्या सिरि न्हाण।
छाहडी धूप न आलिंगइ, देखतां मंदिर हुयउ मसांण॥

(4)

माह मास इसीय पडइ ठंठार।
दाधा छइ बनखंड कीधा हो छार॥
आप दहंती जग दहाउ, तूं तड उवइगउ रे आविज्यो करह पलाणि।
जोवन छत्र उमाहियउ, म्हाकी कनक काया माहे फेरेबी आण॥

(5)

फागुण फरहरचा कंपिया रुँख।
 चितइ चमकियउ निसि नींद न भूख॥
 दिन राया रितु पालटी, महांकउ मूरख राउ न देषइ आइ।
 जीवउं तउ जोवन सखी, फरहरइ चिंहु दिसि बाजइ छइ बाइ॥

(6)

चत्र मासइ चतुरंगी हे नारि।
 प्रीय बिण जीविजइ किसइ अधारि॥
 आज दीसइ सु काल्हे नहीं, म्हे किउं होली हे खेलण जांह।
 उलगांणइ की गोरडी, म्हांकी आंगुळी काढतां निगलीजइ बांह॥

(7)

बइसाखइ धूर लूणीजइ धान।
 सीला पाणी अर पाका जी पान।
 कनक काया घट सीचिजइ, म्हांकउ मूरख राउ न जाणए सार।
 हाथ लगामी ताजणउ, ऊभउ सेवइ राज दुआर॥

(8)

देखि जेठाणी हिव लागउ छइ जेठ।
 मुह कुमलाणा नइ सूक गया होठ॥
 मास दिहाडउ दारूण तवइ, धण कउ हे धरणि न लागए पाठ।
 अनल जळइ धण परजळइ, हंस सरोवर छँडि गयउ ठांउ॥

(9)

आसाढइ धुरि बाहुड़या मेह।
 खलहल्या खाळ नइ बह गई खेह॥
 जइ रि आषाढ न आवइ, माता रे मइगल जेउं पग देइ।
 सद मतवाव्या जेउं ढुळइ, तिहि धरि ऊलग काइ करेइ॥

(10)

सावण बरसइ छइ छोटीय धारि।
 प्रीय विण जीविजइ किसइ अधारि॥

सह कोइ खेलइ काजळी, तठइ चिड़ीय कमेड़ीय मंडिया आस।
बाबहियउ प्रीय प्रीय करइ, मोनइ अणख लगावइ हो सावण मास॥

(11)

भाद्रवइ बरिसइ छइ गुहिर गंभीर।
जळ थळ महियल सहु भर्खा नीर॥
जागे कि सायर ऊलटयउ, निसी अंधारीय बीज खिवाइ।
बादळ धरती स्यउ मिल्या, मूरख रात न देखइ जी आइ।
हूं तो गोसामी नइ एकली, दुइ दुख नाल्ह किउं सहणा जाइ॥

(12)

आसोजइ धण मंडिया आस।
मंडिया मंदिर घर कविलास॥
धउळिया चउबारा चउखंडी, साधण धउळिया पउलि प्रकार।
गउख चढी हरखी फिरइ, जउ घर आविस्यइ मंध भरतार॥

काव्य रौ सार

कवि बारहमासा रीति सूं बारह महीनां री रितुवां रौ महीनै वार चित्रण करता थकां राजमती री मनोदसा अर विरह री वेदना रौ इण भांत वरणन कर्खौ है—

1. पीव परदेस बैठ्या है। काती रौ महीनौ लागग्यौ। देव री पूजा पतिदेव बिना कियां होवै। देव मिंदर छूटग्या। पौढण सारू ऊंचा मैल-मालिया छूटग्या। चौक, मालिया सगळा धणी बिना सूना। नित प्रियतम आवण री राजमती बाट जोवै। उण रा नैण नित आंसूङ्गाँ रै कारण मगसा पड़ेरैया है। विरह री पीड़ा सूं भूख अर तिस उचटगी। है सखि ! नींद काई होवै, म्हनैं तौ इणरौ बोध तक नीं है।

2. मिगसर रै मास में दिन घणा छोटा होवै। प्रियतम रौ संदेसौ भी नीं आवै। संदेसै माथै जाणै बाधा रौ पड़दौ पड़ग्यौ। पीव रै मारग ऊंचा-ऊंचा भाखर है अर नीची-नीची घाटग्यां। म्हारौ भरतार परदेसी धरा पर है। जठै सूं कोई चिट्ठी-पत्री कै संदेसौ नीं आवै अर ना ही सखरौ मारग। रस्तौ घणौ अबखौ है।

3. हे सखि, देख ! अबै पोस रौ महीनौ लाग्यौ है। राजमती रा विरह री पीड़ा सूं प्राण निसरै। इणरौ दोस म्हनैं (राजमती) नीं लागै। इण विरह री दांझ में बछ्नै राजमती पंजर होवै है। नित रौ न्हावण छूटग्यौ। धान भी नीं भावै। तावड़ौ अर छियां रौ आलिंगन भी रुचिकर नीं लागै। उणरौ मन रूपी मिंदर पीव रूपी देव बिना कोरौ मसाण ज्यूं लखावै।

4. माघ रै महीनै में हाड कंपावण वालौ सी पड़ै। इण हाडकंपाऊ सियालै सूं सगळा रुंख अर वन बल्ग्या अर राख ज्यूं होयग्या। ठंठार खुद ठरै अर आखौ जगत धुजावै। राजमती री विरह पीड़ा ठंठार ज्यूं परकत रौ कण-कण ठारै, इण भांत लखावै। राजमती वीसलदेव नैं बिना रुक्यां बेगा आवण री अरदास करै। इण देह अर रूप रूपी ऊंठ रै पलाण कसण सारू बेगौ आवण री विनती करै। जोबन रौ छत्र घणौ ऊंचौ कैयनै वा आपरी स्वर्ण-काया री वीसलदेव नैं आंण देवै अर मिळण सारू बेगा पधारण रौ विनय करै।

5. फागण आपरै उफाण माथै है। रुंख कंपकंपावै। मनडौ घणौ अधीर है। दिन-रात भूख नीं लागै। फागण में दिन घणा सुहावणा होय जावै। रितु भी आपरै मिजाज पलटै। पण राजमती रौ मूरख राव परदेसां सूं घरां नीं पधारै। उणरै जोबन रौ आधार उणरौ प्रियतम है। फागण में बायरौ चारूं दिस में घणौ जोर सूं बाजै।

6. चैत्र मास में नारी रौ हिवडौ अर पहनावौ अलेखूं रंगां वाल्लौ होवै। पण पीव रै बिना इण वेळा राजमती रै पति बिना जीवण अर रंग रौ कार्ह आधार? आज री वाल्ही वेळा काल नीं रेसी। औ बातां अर रंग काल कोनी रैवै। राजमती किण सागै होल्ही खेलण जावै? उणरौ सायबौ परदेसां अर वा विरह री पीड़ा में दाझीजै। उणरै आंगल्ही री अंगूठी उणरै बाह ताई निसरण लागी। उणरौ डील इत्तौ पतल्हौ होयग्यौ है।

7. बैसाख महीनौ सरू होवतां ही पाक्योडौ धान काढणौ सरू होय जावै। पाणी सीतल लागै अर रुंख रा पाना पाका पढ़ जावै। म्हारै मूरख पीव मनडै रौ मरम अर रुत रौ सार नीं समझै। जोबन नैं रोकणौ किणी रै वस में नीं है।

8. हे जेठाणी, देख अबै जेठ रौ महीनौ लागग्यौ है। जेठ री तपती सूं मूंडौ कुम्हव्यावण लाग्यौ है अर होठ सूकण लाग्या है। जेठ रै महीनै में दिन भयंकर तपै। धणी सूं मिलण किण विध होवै? बल्हती पून में धरती अर धण दोनूं परजल्हीजै। हंस सरोवर छोडनै ठाडै ठांच चला गया।

9. आसाढ महीनै रै आवतां ई घणौ जोरदार मेह आयौ है। खाल्ला अर नाला पाणी सूं खल्कण लाम्या। खेह बैवण लागी। इण वेळा बादल मदमस्त हाथी ज्यूं आभै में बरसता फिरै। हमेसा मतवाला ज्यूं मिजाज लियां जल बरसावै। पण उणरौ पति इण रुत में परदेस बसै तौ वा कार्ह कर सकै है अर्थात उण खातर आ वेळा आणंद री नीं विरह री पीड़ा बणै।

10. सावण महीनै में बादल्लौ सूं नेह्नी-नेह्नी बूंदां बरसै, पीव रै बिना अेक विरहणी रै जीवण रौ कार्ह आधार होय सकै। सगल्ही सखियां काजल्ली तीज रै तिंवार में रमै। चीड़ी-कमेड़ी रै भी आस बंधै अर वै आपरै आलणौ बणायनै नेह सूं रसै-बसै। बाबहिया (पैया) पीहु-पीहु रौ कलरव अर विलाप करै। पीहु-पीहु रौ विलाप अर औ सावण रौ महीनौ म्हणैं ईसकै रौ दुख देवै अर म्हैं पीव रै बिछोह में दुख भोगूं।

11. भादवै रै महीनै में बादल गरजणा रै सागै भारी बरसै। च्यारूंमेर जल ही जल। जल-थल अेक होय जावै। जाणै धरती माथै सागर आयनै उलट्यौ होवै। अंधारी रातां में मेघ अर बीजल्ली गरजणा सागै चमकै। बादल अर धरती अेक होय जावै। पण म्हारै मूरख राव परदेसां सूं घरां नीं पधारै। हे ईश्वर, म्हैं इण वेळा अेकली हूं। दो-दो दुख भेळा भुगतूं— अेक तौ विजोग अर दूजी बिरखा री आ सुहावणी रुत, दोनूं कीकर सहीजै?

12. आसोज रौ महीनौ लागतां ही आसा बंधै। घर, मिंदर अर कविलास सगल्ला में नूंवौपण अर आसा रौ संचार होवै। चौबारा, पोळ आद ऊजला धवळ होय जावै। ऊचै गवाक्ष माथै चढनै राजमती हरख सूं फिरै, कदास घर आवै म्हारा परदेसी पीव।

॥३॥

अबखा सबदां रा अरथ

चालियउ=चाल्यौ। उलगांणउ=प्रवासी। कातिग मास=काती रौ महीनौ। कविलास=ऊंची अट्टालिका, कैलास। चउबारा=चौबारौ, चौक। चउखंडी=चौखंडौ मालियौ। नयण=नैण। त्रिस=तिरसा, प्यास। ऊचटी=गयी, उच्चट। सखीय=सखि। मगसिरिइ=माघ महीनौ। संदेसउ=संदेसौ। न पाठवइ=नीं भेजै। बज=वस्त्र, कपड़ौ। परदेसे=विदेस में। भुई=भूमि। चीरीय=पत्र, चिट्ठी। बाट=मारग। चालए=चालै। पोस=पौह रौ मास। लागउ=लाग्यौ। छह=है। धण=पत्नी। दीयउ=देवणौ। दाधि=बाल्हणौ। पंजर=अस्थिपंजर, कंकाल होवणौ। तज्या=छोड दिया, त्यागणौ।

छाहड़ी=छियां। आलिंगइ=गळै मिळणौ। इसीय=इसौ। ठंठर=हाडकंपाऊ सियालौ। वनखंड=जंगल। उवइगउ=तेजी सूं। पलाणि=ऊंठ माथै पिलाण कसणौ। उमाहियउ=उमंग सूं फैला लियौ। फेरबी=फिरा दी। आण=दुहाई। फरहर्ख्या=फहराईजै। चितइ=हिवडौ, हीयौ। चमकियउ=अधीर, आकळ-बाकळ। राया=सुहावण। राउ=राजा, पीव। चिहू=चारू। दिसी=दिसावां। बाइ=बायरौ, हवा। जांह=जाऊं। अलगाणइ=परदेसी पीव। गोरड़ी=धण, स्त्री। बइसाखइ=बैसाख रौ महीनौ। धुर=सरू में। लूपीजइ=काटणौ, निकाळणौ। सीला=सीतळ। अरु=अर। राउ=राजा। ताजणउ=ताजणौ, चाबुक। आसाढ़इ=आसाढ मास। बाहुड़या=आया। मेह=बिरखा। खेह=खंख, रजकण, गरद। जेठ=ज्यूं। खलहल्या=खळ-खळ बैवणौ। माता मझगल=मस्त हाथी। दुळइ=मदरौ-मदरौ चालणौ। सत्रावण=सावण मास। छह=है। धार=बिरखा री धारा। जीवियइ=जीवण रौ। बाबहियउ=पैपैयौ। अनख=ईसकै री पीड़। भाद्रवइ=भाद्रवौ। गुहिर=गैरौ। सायर=सागर। उलटयउ=उलटियौ। निसि=रात। बीज=बीजळी। स्यउं=दोनूं। दुइ दुख=दोनूं दुख। आसोजइ=आसोज रौ मास। धवळिया=सफेद, धोव्या। पहिल=पोळ, प्रतोळी। गउख=गवाक्ष, गोखौ।

सवाल

विकल्पपाऊ पडूत्तर वाळा सवाल

1. राजमती किणरी बेटी ही—

- | | |
|-----------------|----------------|
| (अ) राजा भोज री | (ब) अचलदास री |
| (स) आनंदपाल री | (द) वीसलदेव री |

()

2. वीसलदेव नैं तानौ कुण मार्खौ—

- | | |
|--------------|-----------------|
| (अ) राजा भोज | (ब) उणरौ मंत्री |
| (स) राजमती | (द) उणरी माता |

()

3. वीसलदेव प्रवास माथै किण ठौड़ गयौ—

- | | |
|-----------|------------|
| (अ) बंगाल | (ब) गुजरात |
| (स) मालवा | (द) उड़ीसा |

()

4. राजमती रौ विरह वरणन किण सैली में होयौ है—

- | | |
|-------------------|-----------------|
| (अ) वचनिका सैली | (ब) संवाद सैली |
| (स) बारहमासा सैली | (द) दवावैत सैली |

()

साव छोटा पडूत्तर वाळा सवाल

1. राजमती रै पिव अर पिता रौ नांव बतावौ।

2. वीसलदेव कित्ता बरसां ताईं प्रवास माथै रैया ?

3. ठंठार किण महीनै में ठरै ?
4. किण मास में दिन सुवावणा लागै ?

छोटा पडूत्तर वाळा सवाल

1. माघ रै महीनै ठंठार किण भांत री पडै ?
2. राजमती रै विजोग रै कारण बतावौ ।
3. बिरखा रुत विरहणी माथै काँई असर न्हाखै ? लिखौ ।
4. “आसोज रै महीनै नूंवौपण अर उल्लास लावै ।” इण कथन नैं समझावौ ।

लेखरूप पडूत्तर वाळा सवाल

1. “वीसलदेस रास में राजमती रै विजोग सांगोपांग ढंग सूं बारहमासा सैली में प्रगट होयौ ।” इण कथन नैं दाखला देयनै सिद्ध करौ ।
2. बारमासा री रितुवां रै प्रभाव लिखौ ।
3. वीसलदेव रास री काव्यगत विसेसतावां लिखौ ।
4. वीसलदेव रास रै सार आपैरे सबदां में लिखौ ।

नीचै दिरीज्या पद्यांसां री प्रसंगाऊ व्याख्या करौ—

1. मगसिरियइ दिन छोटा जी होइ ।
सखीय संदेसउ न पाठवइ कोइ ॥
संदेसइ ही बज पड़यउ, ऊंचा हो परबत नीचा घाट ।
परदेस पर भुइं गयउ, तठइ चीरीय न आवइ न चालाए बाट ॥
2. चेत्र मासइ चतुरंगी हे नारि ।
प्रीय बिण जीविजइ किसइ अधारि ॥
आज दीसइ सु काल्हे नहीं, म्हे किउं होळी हे खेलण जांह ।
उलगांणइ की गोरडी, म्हांकी आंगुळी काढतां निगलीजइ बांह ॥
3. सावण बरसइ छइ छोटीय धारि ।
प्रीय विण जीविजइ किसइ अधारि ॥
सह कोइ खेलइ काजळी, तठइ चिडीय कमेडीय मंडिया आस ।
बाबहियउ प्रीय प्रीय करइ, मोनइ अणख लगावइ हो सावण मास ॥

□ सबद-वाणी

सबद

सिद्धाचार्य जसनाथ

कवि परिचै

राजस्थानी साहित्य रे इतिहास में मध्यकाल री थितियां मुजब भगती री भागीरथी लावण में अठै रा संतां अर संत-संप्रदायां रौ घणौ योग रैयौ। समाज में उण बगत ईश्वर जैड़ी अदीठ सत्ता रै वास्तै विश्वास अर आत्मबल देवण खातर अठै अनेक संत संप्रदायां री थरपणा होयी। संस्थापक संत अर वांरा चेला (शिष्य-परंपरा) आपरी साधना, अनुभव, ईश्वरीय प्रेम, जीवण मूल्यां अर नीति सूं जुङ्ड़ोड़ौ काव्य राजस्थानी साहित्य नैं सून्प्यौ। लोकभासा में सरल अर सहज भाव सूं संतां री वाणियां, सबद-साखियां, जलम-झूलणा आद रै रूप में संतां रौ औं काव्य संत-साहित्य रै नांव सूं जाणीजै, जिण रौ खास उद्देश्य लोककल्याण रौ रैयौ। आं रचनावां में काव्य-गुण, दोष अर व्याकरण रै नेमां री पालणा माथै निजर नीं राखीजी, क्यूंके संत कवियां री दीठ मानखै री भलाई माथै ही।

संत-संप्रदायां री परंपरा में जसनाथी संप्रदाय ई ओक है। इण रा प्रवर्तक संत जसनाथजी हा। आं रौ जलम वि. सं. 1539 में काति महीनै री चानणी इग्यारस रै दिन बीकानेर जिलै रै कतरियासर गांव में होयौ। आपरै मां-बाप रै विसय में खास जाणकारी नीं लाधै। हमीरजी जाट अर वांरी जोड़ायत रूपादे जसनाथजी नैं बेटा ज्यूं पाळ-पोसनै मोटा कर्हा। औड़ी मान्यता ई है कै जसनाथजी आनैं मारग में पड़ा लाधा हा, जिणानैं बेटा रै ज्यूं इण जोड़ै सूं लाड-प्यार मिल्ह्यौ। बारह बरसां री ऊमर में कांकड़ मांय सांदियां चरावती बगत बाल्क जसवंत री गुरु गोरखनाथ सूं भेंट होयी। गोरखनाथजी ‘गुरु सबद’ दियौ। बाल्क जसवंत सूं जसनाथजी नांव होयग्यौ। इण बाबत ओक उक्ति चावी है—

संवृं पनरै इक्यावनै, आसोजी सुद पाय।
वां दिन गोरखनाथ सूं, जसवंत जोग पठाय॥

जप-तप, जोग-साधना करतां वि. सं. 1563 में आसोज सुद सातम रा आप कतरियासर में समाधि लेयली। उण बगत जसनाथजी 24 बरसां रा हा। कतरियासर जसनाथी पंथ रौ पवित्र तीरथ मानीजै। जसनाथजी, विश्नोई पंथ रा प्रवर्तक संत ‘जांभोजी’ अर राठौड़ां री कुल्लदेवी भगवती ‘करणीजी’ रै बगत रा संत होया। आप मुगती खातर गुरु रौ मारग दरसण अर नांव-सिमरण री लगन नैं घणी महताऊ मानता। वांरी वाणियां में ब्रह्मा, विष्णु, महेश अर राम-कृष्ण रा नांव आया है, पण मुगती वास्तै वै निरसुण निराकार री उपासना नैं सिरै मानी। वै करमवाद रा खरा समर्थक हा। वांरी मानणौ हो कै मिनख नैं उणरी करणी रौ फळ जरूर मिल्है। जैड़ा करै, वैड़ा भरै अर भोगै। आपरी शिष्य-परंपरा में ई केर्ह संत कवि ज्यूं- करमदास, देवोजी, चोखनाथजी, हरोजी, सोभोजी सोनी, पांचोजी अर 18वीं सदी में नामी संत कवि लालनाथजी होया।

पाठ परिचै

इण पाठ मांय जसनाथजी रै सबदां रा कर्ह अंस लिरीज्या है। जियोजी ब्राह्मण नैं तत्त्व-ग्यान करायौ, जगत-पिता परमेसर सूं भेंट रौ आध्यात्मिक मारग बतायौ। आप कैवै— ‘धरती अर इंद्र रौ जोड़ौ अमर है, दूजा जोड़ा तौ बिछडण वाला ई है।’ वै नासवान देह, आछी करणी अर सिमरथ गुरु-ज्ञान री बात अठै करी है, जिणरा साखीधर वांरी सबद-वाणियां हैं।

सबद

धरती इन्द सिरो जुड़ावो, नित लग नेह सनेहा ।
 अमी मंडल में बाजा बाजै, बरस सवाया मेहा ।
 इन्दर बरसै धरती सोसै, ऊँडा बैसैं तेहा ।
 धरती माता सरब संतोखै, रूप छत्तीसौं ऐहा ।
 काँई रे पिराणी खोज नैं खोजै, खाख हुवै भुस खेहा ।
 काची काया गळ-बळ जासी, कुं-कूं बरणी देहा ।
 हाडां ऊपर पून ढुळैली, घण हर बरसै मेहा ।
 माटी में माटी मिल जासी, भसम उडै हुय खेहा ।
 हुय भूतला खाख उडावै, करणी रा फळ ऐहा ।
 करणी हीणा नित पिछतावै, लाधै न गुरु का भेवा ।
 पौरे गुरु नैं जोय पिराणी, आवै पापां रा छेहा ।

बुधबायरां नैं आपरा उपदेसां रौ इमरत पाय जसनाथजी हरिभजन री बात कैवै । बिन हरि नैं पिछाण्यां मिनख सींग-पूँछबायरौ ढोर है, बिना कणुका वालौ बूमणौ है । औसर चूक्यां पछै पिछतावौ ई लारै रैवै । आप गो-रिछ्या री बात कर अहिंसा रौ पाठ पढावै । गाय रौ महत्व अर उणरा रुखाला सूरज-चांद नैं बतावै—

गाय न गोखी शीसो सूअर, न चीनो हरियाई ।
 बै बिमुणा विमुख हांडै, कण बिन कुगस गाई ।
 रण में पंछी तिस्यो मरियो, ओसर चूको डाई ।
 सांभळ मुल्ला, सांभळ काजी, सांभळ बकर कसाई ।
 किण फरमाई बकरी बिरदो, किण फरमाई गाई ।
 गाय गोरख नैं इसी पियारी, पूत पियारो माई ।
 फिर चरि आवै सांझ दुहावै, राख लेवै सरणाई ।
 थे मत जाणो रुळी फिरै है, चांदो-सूरज गिंवाली ।

कूड़ा-कपटी, ठगोरा अर राम-नाव री भगवां चादर पैर्योड़ा धरम रा धाड़ायतां नैं सावचेत करै । साच, सील, मीठा बोल, जीव रिछ्या, परोपकार, हरिभजन अर हरिकथा साचा संतां रा गुण है । नीति-उपदेस रा कीं उदाहरण अठै देखणजोग है—

जत-सत रै 'णा कूड़ न कै 'णा, जोगी तणी सहनाणी ।
 मनकर लेखण तनकर पोथी, हरगुण लिखो पिराणी ।
 अर्मीं चवै मुख इमरत बोलो, हालो गुरु फरमाणी ।
 गाय 'र गाडर भैंस 'र छाली, दुय दुय पिवो पिराणी ।
 सिरज्या देव अर्मीं रा कूंपा, गळबी काट न खाणी ।
 जे गळ काट्यां होय भलेरो, अपरो काट पिराणी ।
 कांटो भागां थरहर कांपो, पर जिवडो यूं जाणी ।
 कुंडा धोवै करद पलारै, रगत करै महमाणी ।
 सै नर जाणे सुरगे जास्यां, कोरा रह्या अयाणी ।

झूठां नैं जमदूत धर्वैला, भाड़ धर्वैं ज्यूं धाणी।
बल-बाकल भैरुं री पूजा, गोरख मना न माणी।
साधां नै इन्द्र लोके वासो, देव तणी देवाणी।
साधु हिंयर हिंडोलै हींडा, पुंता सुरग बिवाणी।

2

अबखा सबदां रा अरथ

सिरो=श्रेष्ठ । अर्मी=इमरत । सौसे=सोंखणौ, चूसणौ । रूप छत्तीसो ऐहा=प्रकृति रै छत्तीसूं रूपां रौ वरणन करणौ । खोज नै खोजै=लाध्योड़ी चीज नैं काईं सोधणौ । खाख=भसमी, राख । पून=हवा, वायरौ । घण हर बरसै मेहा=चिता री अगन सूं जकौ धूंकौ उठेला वौ हवा रै योग सूं पाणी नैं सोखनै थारै हाडां माथै बादल रै रूप में बरसैला । भूतल्ला=भूतल्लियौ, चक्रवात । वाइन्दा=झांझावात । छेहा=अंत । शीसो=खरगोश । चीनो=पिछाणौ । हरिभाई=परम प्रभु । बिमुणा=लज्जाहीण । विमुख हांडै=उलटौ मारग पकड़नै गोता खावणा । कुगस गाई=फूस, फोफलिया, अनाज रांछिलका, थोथा । रण=अरण्य, जंगल । विरदो=वध करौ, मारौ । सरणाई=दूध देयनै ई गाय सरण में राखै । गिंवाळी=गवालिया, रुखाळा । जत=संयम । फरमाणी=आदेस । गाडर=भेड़ । अर्मी रा कूंपा=दूध रूपी अमृत भंडार । गळबी=गळा करद, छुरी । पलारै=धार देवै । महमाणी=बखाण करणौ, गुण बखाणौ । भाड़=भड़भूंजा, धान सेकण वाढौ । हियर=हाथी-घोडा ।

सवाल

विकल्पाऊ पडून्तर वाळ सवाल

5. जसनाथजी जीवित-समाधि ली, जणां वांरी ऊमर ही—
(अ) 25 बरस (ब) 24 बरस
(स) 29 बरस (द) 39 बरस ()

6. संत-संप्रदायां रै मूळ में किसी परंपरा चालै ?
(अ) गुरु-शिष्य परंपरा (ब) देवी-देवतावां री परंपरा
(स) देव-पुजारी परंपरा (द) खाली गुरु परंपरा ()

साव छोटा पड़ूत्तर वाला सवाल

1. जसनाथी संप्रदाय रौ मोटौ तीरथ-धाम किसौ गिणीजै ?
 2. जसनाथजी रौ बाल्पणै में काँई नांव हो ?
 3. जसनाथजी नैं 'गुरु-सबद' कुण दियो ?
 - 4.. जसनाथजी किणनैं तत्त्व-ज्ञान दियौ हो ?
 5. 'फिर चरि आवै सांझा दुहावै' किणरै सारू कथीज्यौ है ?

छोटा पड़ुत्तर वाला सवाल

1. जसनाथी संप्रदाय रा जीव-मुगती खातर काँई विचार है?
 2. संत-काव्य रूपां में किणी तीन रा नांव लिखौ।
 3. जसनाथजी परमात्मा रै किण रूप रा उपासक हा?
 4. जसनाथजी री रचनावां रा मूळ विसय काँई रैया है?
 5. ‘धरती इन्द सिरो जुड़ावो’ रा भाव काँई है?
 6. ‘कांटो भागां थरहर कांपो’ में कवि काँई कैवणी चावै?

लेखरूप पडत्तर वाळा सवाल

1. जसनाथजी रै जीवण अर सबद-साहित्य सूं काई सीख मिलै ?
 2. जसनाथजी रै सबद-साहित्य रा भाव आज रा जुग में ई धणा महताऊ है। इणरौ खुलासौ करौ।
 3. “संत जसनाथजी रो सबद-साहित्य सांचै अरथां में मिनख रो मारग-दरसण करै।” इण कथन माथै आपरा विचार राखौ।
 4. संत-साहित्य अर उणरा महत्व नैं दाखला देयनै समझावौ।

नीचै दिरीज्या पद्यांसां री प्रसंगाऊ व्याख्या करौ ।

1. काईं रे पिराणी खोज नैं खोजै, खाख हुवै भुस खेहा ।
काची काया गळ-बळ जासी, कूँ-कूँ बरणी देहा ।
हाडां ऊपर पून ढुळैली, घण हर बरसै मेहा ।
माटी मैं माटी मिळ जासी, भसम उडै ह्य खेहा ॥

2. माटी में माटी मिळ जासी, भसम उड़ै हुय खेहा।
हुय भूतवा खाख उडावै, करणी रा फळ ऐहा।
करणी हीणा नित पिछतावै, लाधै न गुरु का भेवा।
पूरै गुरु नैं जोय पिराणी, आवै पार्ण रा छेहा॥
3. गाय न गोखी शीसो सूअर, न चीनो हरियाई।
बैं बिमुणा विमुख हाँडे, कण बिन कुगस गाई।
रण में पंछी तिस्यो मरियो, ओसर चूको डाई।
सांभल मुल्ला, सांभल काजी, सांभल बकर कसाई॥
4. कांटो भागां थरहर कांपो, पर जिवड़ो यूं जाणी।
कुंडा धोवै करद पलारै, रगत करै महमाणी।
सै नर जाणे सुरगे जास्यां, कोरा रह्या अयाणी।
झूठां नैं जमदूत धवेला, भाड़ धवैं ज्यूं धाणी॥

□ भक्ति-काव्य

देवियांण

ईसरदास बारठ

कवि परिचै

ईसरदास बारठ रौ जलम बाड़मेर जिलै रै गांव भादरेस में वि. सं. 1595 री चैत सुद नवमी नै होयौ। वाँरै पिता रौ नांव सूराजी बारठ अर माता रौ नांव अमरा बाई हौ। बाल्पणै में ई मां-बाप चालता रैया जणै वांग काकोसा आसोजी बारठ वाँनै पाळ-पोसनै मोटा कस्ता अर ठेठ ताँई आपरौ माइतपणौ निभायौ। ईसरदासजी रै जलम नै लेयनै औ दूहौ चावौ है—

पनरा सौ पिच्छाणकै, जलम्या ईसरदास।
चारण वरण चकार में, उण दिन हुकौ उजास॥

आसोजी ई ईसरदासजी नै पढाया-लिखाया अर काव्य-सिरजण री सीख ई वाँनै आपरै काकोसा सूं ई मिल्ही। ईसरदासजी रा दोय व्यांव होया। पैली जोड़ायत देवलबाई सूं दो बेटा जगोजी अर चूंडोजी रौ जलम होयौ। जोड़ायत री मौत सूं वाँरै मन में विजोग रै कारण वैराग भाव आवण लागौ जणै काकोसा आसोजी हवा-पाणी बदलावण खातर वाँनै द्वारका लेयग्या। आवती बगत गुजरात रै जामनगर रावल जाम री सभा में गिया, उठै ईसरदासजी री काव्य-प्रतिभा सूं रावल जाम रीझग्या। राजपंडित पीतांबर भट्ट उणां री काव्य-हटोटी सूं राजी होया अर भगवद्काव्य रचण री सीख दीवी। आगै जायनै ईसरदासजी पीतांबर भट्ट नै आपरौ गुरु मान धरमग्रंथां रौ सार समझियौ अर आपरी रचनावां में गुरु नै अंजस ई दियौ। ईसरदास बारठ जामनगर में इज रैया अर काका आसोजी पाढ़ा भादरेस आयग्या हा। रावल जाम अवसूरा साखा रा चारण पेमा भाई गढवी री बेटी राजबाई सूं ईसरदासजी रौ दूजौ व्यांव करायौ। राजबाई री कूख सूं कवि रै तीन बेटा— गोपाल्दासजी, जैसाजी, कान्हदासजी अर अेक बेटी रौ जलम होयौ। बेटी मीसण साखा रा चारणां में परणायोडी ही। ईसरदासजी रा वंसज आज ई है। रावल जाम ईसरदासजी नै संचाणो, रंगपुर, बीरबदरका, गूंढो आद केई गांवां री जागीर दीवी। रावल जाम सूं वाँनै ‘क्रोडप्रसाव’ मिल्ण रौ उल्लेख ई नैणसी री ख्यात रै दूजै भाग में मिल्है।

आप जीवण रा पड़ा दिनां वै आपरै गांव भादरेस आयग्या। गांव में रैवता थकां ई लूणी नदी रै काठै आप अेक कुटिया बणाई अर जीविया जठै ताँई उण कुटिया में भगवद्-भजन करतां 80 बरसां री उमर में आपरौ सरीर छोड़ परलोक सिधाया। मध्यकाल रा अलेखूं संत-कवियां में ईसरदासजी ई रौ चाव नांव हो। वै ‘ईसरा सो परमेसरा’ रै नांव सूं ओळखाण बणायी। आपरै जीवणकाल री केई चमत्कारिक घटनावां चावी है। लोकप्रवाद अर दंतकथावां में लोकमानस आपरौ विस्वास रुखालै। वाँरै बगत रा कवियां अर उणरै पछै होया भक्त-कवियां, जिणां में मांडण, नाभादास, राघवदास, रामदास, परसराम रत्नू रा नांव आवै, आपरी भक्तमाल अर दूजी रचनावां में ईसरदासजी रौ उल्लेख घणी श्रद्धा साथै कस्तौ है। ईसरदास री फुटकर रचनावां रै साथै भक्तिप्रक काव्य रचनावां में हरिरस, गुण रास लीला, गरुड़ पुराण, देवियांण, गुण आगम, गुण वैराट, भगवत हंस, बाललीला, निंदास्तुति चावी है। मध्यकालीन थितियां मुजब आप वीर रसात्मक काव्य ‘हालां-झालां रा कुंडलिया’ रौ सिरजण कस्तौ जिकी वीर-काव्यां री सिरै ओळी में आवै। आपरी भक्ति रचनावां में ‘हरिरस’ जित्ती चावी-ठावी रचना है, ‘देवियांण’ सकि री सरब व्यापकता रौ वरणाव करण वाली उत्ती इज चावी रचना मानीजै।

पाठ परिचै

महात्मा अर महाकवि ईसरदास कृत 'देवियांण' देस रै सांस्कृतिक इतिहास, भूगोल, प्राकृतिक परिवेस रै चित्रण साथै भक्ति, ग्यान अर वेदांत रै अद्वैत दरसण नै उजागर करण वाली नामी रचना है। इण कारण ई भक्ति रचना 'हरिस' रै ज्यू ई 'देवियांण' ई भक्त रै हिरदै रौ कंठहर बण्योड़ी है।

देवियांण देवी री सरब व्यापकता नैं दरसावतौ स्तुति-काव्य है। डिंगळ री इण सक्ति-भक्ति री रचना में चार (4) मंडल छंद, पिच्यासी (85) छंद भुजंगी अर अंत में तीन (3) छप्पय देयनै कविय रचना नैं पूरी करी है। वेद, महाभारत, रामायण, पुराण, भागवत, सब में वा सरब सक्ति ई विराजमान है। अठै तांई कै आ सगली प्रकृति जिणमें परबत, सागर, नदियां, सूरज, चांद, आधौ, बादला, मेह, बीजली, धरती रा कण-कण में सक्ति रौ ई संचरण है। इण आवगै ब्रह्मांड में औड़ी कोई ठोड़ कोनी कै औड़ी कोई वस्तु कोनी, जिणमें सक्ति रौ रूप अर नांव नीं होवै। देवियांण सक्ति-भक्ति री अनूठी रचना है। डिंगळ-सैली में ऊंचै सुर रै साथै इणरौ पाठ करीजे।

ईसरदास बारठ री भक्ति रचनावां में 'हरिस' में परम पिता परमेसर रै गुणां रौ बखाण अर सरब व्यापकता है तौ 'देवियांण' में जगत री जननी भगवती रै गुणां अर सरब सक्ति होवण रा बखाण अर अरदास है। इण पाठ में 'देवियांण' रा कीं छंदां री बानगी दिरीजी है। कवि इण पोथी में लियोड़ा छंदां में केई नदियां रा नांव लेयनै कैवै कै— हे देवी भागीरथी (गंगा), गंडकी, गोगरा, रामगंगा (राम रा चरण पखारण रै कारण रामगंगा), सरस्वती, जमुना अर श्री (सरी) नांव वाली लोकमाता (सिद्धा) आप ई है। आप ई त्रिवेणी संगम प्रयाग अर त्रिस्थली— हरिद्वार, प्रयाग, काशी में दैहिक, भौतिक अर दैविक तापां रौ नास करण वाली है। हे देवी, सिंधु, गोदावरी अर माही रै साथै गोमती दमण गंगा (धम्पला), बाणगंगा, नरबदा, सरयू, गल्लका अर तुंगभद्रा आद बारहमास बैवण वाली गंभीर (सदा नीरा) नदियां आपरौ इज सरूप है। देस रै दिखणाद में बैवण वाली कावेरी, ताप्ति, कृष्ण, कपिला अर पैली खल्कतौ महानद (सोन), आथूण-धुराऊ में सतलज, भीमा (महान), कुंवारी नदी (सुसीला, सील नैं धारण कर्ष्योड़ी), आकास-पताळ में बैवण वाली गुप्तगंगा, पवित्र प्रगट अर अप्रगट सगली नदियां आपरा इज तौ रूप है।

हे देवी ! समदर में निपजण वाली सीप में, स्वाति नखत री छांट इमरत बण जावै, वा मेह री छांट आप ई है। आ पचास करोड़ योजन भूखेतर वाली पिरथी आपरौ इज पवित्र सरूप है। समदर में लैरां या छौलां आपरौ ई रूप है। सागर में उठण वाली लैरां आप ई है, सागर में लैरां बण आप ई हिलोळा लेवौ अर आधै में बादला बण गड़गड़ाट करण वाली सक्ति आप इज हौ। हे देवी ! अगन री झाळ (लपट, ज्वाला) में, बादलां में बीजली री पल्क अर आकास में जकौ तेज है वौ आपरौ ई है। आकास में तेजरूप (अनल पंछी) रै रूप में भमण वाली आप ई है। मानव रै रूप मित्रुलोक में रमण करण वाली ई आप हो।

हे देवी ! पताल में सेसनाग रै रूप में धरती नैं धारण करण वाली, सुरग में देवतावां रै रूप में निवास करण वाली, अधिकारां रौ भोग-उपभोग करण वाली आप ई है। परमात्म रूप में आप हरेक सरीर में बसण वाली है। आवगै ब्रह्मांड में सून-निराकार रूप में आप इज लीन है। हे देवी ! आप आत्मा रै रूप में भौतिक देह रौ संचालण करौ। सरीर रूप में आत्मा नैं आणंद देवण वाली, वन-उपवन में बसंत री सोभा आप ई है। अगन (दावानल) रूप में आप ई वनां नैं बालण वाली हो। सिरजण, पालण अर संहार सब आपरा ई रूप है। हे देवी ! वेदां रै रूप में आप ई ब्रह्मा री वाणी है। योगियां में आप मच्छेन्द्रनाथ हौ अर्थात् योग रै रूप में आपरैं कोई जाणै तौ वौ मच्छेन्द्रनाथ ई जाण सकै। राजा बलि में दानदाता री सक्ति ही, वा आप ई है। दानियां में राजा बलि आप हौ अर्थात् बलि दान रूप में आपनै ई देवण वाली होयौ। सत रै रूप में राजा हरिश्चंद्र आपरैं ई सिद्ध कर्थौ। सत रूप में हरिश्चंद्र री सिद्धता आप ई है। योगियां रौ योग, दानवीरां री दानवीरता अर सतवादियां रौ सत आप ई हो।

हे देवी ! ब्रह्मा, विष्णु, महेस में आपरी ई सत्ता, आपरी ई सक्ति (परब्रह्म स्वरूपा) बिराजमान है। चार वाणी (परा, पश्यन्ति, बेखरी, मध्यमा), चार योनियां (जरायुज, अण्डज, स्वेदज, उद्भिज), पंचभूत (आकास, हवा, पाणी, अग्न अर पिरथी), प्राणियां में प्राणवायु (सांस) स्वरूपा आप इज तौ हो। हे महादेवी ! मन, पवन, माया, मुक्ति, करम-प्रारब्ध अर परिस्म धरम चेतना (जीव) अर काया सरबस आप ई हौ। आपरी गति अर गैराई (तत्त्व) नैं कुण जाण सकै ? जिनरै माथै आपरी किरपा होवै उणरी गति नैं आपरै ई आसरौ है।

इण भांत कवि भगवती रै अदीठपण, असीम रूप नैं प्रकृति रा कण-कण री मणिमाळ में गूँथण रा जाझा जतन करूया है। डिंगळ री इण काव्यकृति रौ अेक-अेक छंद देवीप्यमान मणी है, जिण सूं तत्त्व-ग्यान रा किंवाड़ खुलै अर अंतस उजास सूं सरोबार होवै।

अेक अखंड देवी रा अलेखुं नांव अर रूपां री न्यारी-न्यारी व्यंजना भक्तकवि करै। कवि मुजब हवा, पाणी, नदी, समदर, झरणा, बादला, आभौ, बीजली रा पल्का, मेघां री गड़गड़ाट अर सीप में स्वाति री छांट सब देवी रा ई रूप है। परतख अर अपरतख में ई देवी री सत्ता बिराजमान है। पौराणिक देवीसक्तियां अर लोकसक्तियां रै रूप में वा अेक सक्ति ई न्यारा-न्यारा नांवां अर रूपां में ओळखीजै। सिरजण, पालण अर संहार तीनूं रूपां रौ जबरौ चित्रण कवि करै। वन, उपवन, कांकड़, परबत, गढां-कोटां-मढां, झाड़-झांखाड़ अर ऊजड़ मैदान कोई ठौड़ औड़ी नौं जठै सक्ति रौ वास कोनी। प्रकृति रा कण-कण में अदीठ सक्ति बिराजमान है। इणमें कवि विष्णु रा अनेक अवतारां रौ वरणन कर उण रूप में ई सक्ति री सत्ता नैं बताई है। जिण मिनख या मानवी में जिकी विसेसता है उणमें सक्ति रूप विराजित है। सतवादियां रौ सत, दानवीरां री दानवीरता, जोगियां रौ जोग, रङ्गाव्हां रौ रङ्ग (वाद, जिद), धीरजवानां रौ धीरज, सीलवानां रौ सील आचरण, अहंकारियां रौ दंभ, बळसालियां रौ बळ, धरम रुखाव्हां रौ धरम... सब उण भगवती रा ई रूप अर नांव है। वेद, महाभारत, रामायण, पुराणां, गीता सब में देवी रौ ई रूप अर सत्ता विराजित है। ‘देवियां’ ग्रंथ में संस्कृति री पिछाण, इतिहास रौ ग्यान, धरम री मरजाद, भूगोल री ओळखाण, प्रकृति रा विध-विध रूप उण परम दैवीय सक्ति रै रूप में ई देखीजै। ग्यान री गोख, भक्ति री गंगा अर वेदां रौ सार इणमें मिलै। अद्वैत दरसण री सत्ता नैं उजागर करण वाली आ डिंगळ रचना फगत रचना कोनी, सबद चित्राम में घणी चतुराई अर अंतस री निजरां दीठोड़ी ख्यांतीला कारीगर रै हाथा साचोड़ै अनुभवां समचै ढाळ्योड़ी सक्ति री या देवी री साकार मूरत है। वा मूरत आखै ब्रह्मांड री नियामिका उण सक्ति री सरब व्यापकता में अेकता अर अखंडता नैं उजागर करै।

देवियां

(मूल्पाठ)

देवी नाम भागीरथी नाम गंगा,

देवी गंडकी गोगरा रामगंगा;

देवी सर्सती जम्मना सरी सिद्धा,

देवी त्रिवेणी त्रिस्थली ताप रुद्धा । 1

देवी सिन्धु गोदावरी मही संगा,

देवी गोमती धम्मला बाणगंगा;

देवी नर्मदा सारजू सदा नीरा,

देवी गल्लका तुंगभद्रा गंभीरा । 2

देवी कावेरी तापि क्रस्ना कपीला,
 देवी सोण सतलज्ज भीमा सुसीला;
 देवी गोम गंगा देवी वोम गंगा,
 देवी गुप्त गंगा सूची रूप अंगा । 3

देवी सागर सीप में अमी श्रावे,
 देवी पीठ तव कोटि पच्चास पावै;
 देवी वेल्सा रूप सामंद वाजे,
 देवी बादलां रूप गैणांग गाजै । 4

देवी मंगला रूप तू ज्वालमाला,
 देवी कंठला रूप तू मेघ काला;
 देवी अन्नलं रूप आकास भम्मे,
 देवी मानवां रूप मृतलोक रम्मे । 5

देवी पन्नगां रूप पाताळ पेसे,
 देवी देवता रूप तू स्नग्ग देसे;
 देवी प्रम्म रे रूप पिंड पिंड पीणी,
 देवी सून रे रूप ब्रह्मांड लीणी । 6

देवी आतमा रूप काया चलावे,
 देवी काया रे रूप आतम खिलावे;
 देवी रूप वासन्त रे वन्न राजे,
 देवी आग रे रूप तू वन्न दाझे । 7

देवी वेद रै रूप तू ब्रह्म वाणी,
 देवी जोग रै रूप मच्छंद्र जाणी;
 देवी दान रे रूप बलराव दीधी,
 देवी सत रे रूप हरचंद सीधी । 8

देवी ब्रह्म तू विस्नू अज रुद्र राणी,
 देवी वाण तू खाण तू भूत प्राणी;
 देवी मन तू पवन तू मोख माया,
 देवी क्रम्म तू ध्रम्म तू जीव काया । 9

अबखा सबदां रा अरथ

रामगंगा=राम रा चरण पखारण रै कारण रामगंगा। त्रिवेणी=प्रयाग (गंगा-जमुना-सरस्वती रौ संगम-थल), ताप रुद्धा=त्रयताप नैं मिटावण वाली। धम्मला=दमण गंगा। मही=माही नदी। संगा=साथै। सारजू=सरयू नदी (अयोध्या में)। सदा नीरा=बारहमास बैवण वाली। भीमा=महान, भीमकाय नदी। सुसीला=सील नैं धार्योड़ी, कंवारी नदी। गोम=पाताल गंगा। वोम=आकास, व्योम। सूची=पवित्र, निरमल। अलंबे=आसरो देवण वाली, आश्रयरूप। सरी सिद्धा=श्री (सरी) लोकमाता (सिद्धा)। स्त्रिस्थली=हरिद्वार, प्रयाग, काशी। अमीश्रावे=स्वाति नखत री इमरत-बूद। वाजे=हिलोरा लेवणा। दीधी=देवणो, दानरूप। सीधी=सिद्धि रै रूप सिद्ध करणो। गैणांग गाजे=बादल्वं री गड़गड़ाट। मंगळा=अग्न। वांण=वाणी। कंठळा=बीजळी। खांण=चार योनियां। अन्नलं=अनल पंछी। भूत प्राणी=पंचभूत अर प्राणवायु। रम्मे=रमण करणौ। मोखमाया=माया, मोक्ष। प्रम्म=परतात्मा। पीठ=क्षेत्र, भूखेत्र। पिंड पिंड पीणी=प्रत्येक सरीर में रैवण वाली। कोटि पचास=पचास करोड़ योजन भूमि। सून=शून्य, निराकार। लीणी=लीन हौ, आपरी ई सत्ता है। वासंत=बसंत। राजे=सोभायमान। दाझे=बळणौ, दहन। आग=दावानळ। आतम खिलावे=सरीर रूप में आतमा नैं आणंद देवण वाली। काया चलावे=सरीर रौ निर्वहन करण वाली।

सवाल

विकल्पाऊ पढ़ूत्तर वाला सवाल

1. ईसरदास बारठ रौ जलम कद होयौ—

- | | |
|------------------|------------------|
| (अ) वि. सं. 1214 | (ब) वि. सं. 1595 |
| (स) वि. सं. 1667 | (द) वि. सं. 1415 |

()

2. ईसरदास बारठ री जलमभोम रौ नांव है—

- | | |
|------------|-------------|
| (अ) जामनगर | (ब) जूनागढ |
| (स) भादरेस | (द) बीकानेर |

()

3. ईसरदास री रचनावां में वीर रस री रचना है—

- | | |
|-----------------------------|-------------|
| (अ) हालां-झालां रा कुंडलिया | (ब) गुण आगम |
| (स) देवियांण | (द) हरिस |

()

4. ईसरदास बारठ नैं 'क्रोड़पसाव' दियौ—

- | | |
|-----------------|------------------|
| (अ) हरराज भाटी | (ब) मुहणोत नैणसी |
| (स) आसानंद बारठ | (द) रावळ जाम |

()

साव छोटा पढ़ूत्तर वाला सवाल

1. टाबरपणा में ईसरदास जी रौ पाल्ण-पोसण कुण अर क्यूं कर्खौ ?

2. देवियांण में किणरौ वरणन होयौ है ?

3. ईसरदास रौ मन उदास अर बैरागी क्यूं होयौ ?
4. ईसरदास नैं अध्यात्म अर धारमिक रचनावां री सीख किणसूं मिळी ?
5. जामनगर रौ रावळ ईसरदास बारठ माथै राजी क्यूं होयौ ?

छोटा पडूत्तर वाला सवाल

1. आसोजी ईसरदासजी नैं द्वारका क्यूं लेयग्या, इणसूं उणां रै जीवण में काँई बदलाव आयौ ?
2. ईसरदास रै जलम नैं लेयनै कथीज्यौ दूहौ लिखौ।
3. ईसरदास री भक्ति रचनावां मांय सूं किणी चार रा नांव लिखौ।
4. ईसरदासजी नैं जामनगर रावळ सूं जागीर में मिळ्या गांवां रा नांव लिखौ।

लेखरूप पडूत्तर वाला सवाल

1. ईसरदास रै जीवण री सामान्य ओळखाण करावौ।
2. ईसरदासजी री ‘देवियांण’ रौ सांगोपांग वरणाव आपरै सबदां में करौ।
3. ईसरदासजी री रचनाव ‘देवियांण’ में देवी रै रूप री विविधता में ओकेता रौ जिकौ वरणाव होयौ है, दाखला देयनै विरोळ करौ।

नीचै दिरीज्या पद्यांसां री प्रसंगाऊ व्याख्या करौ—

1. देवी नाम भागीरथी नाम गंगा,
देवी गंडकी गोगरा रामगंगा;
देवी सर्सती जम्मना सरी सिद्धा,
देवी त्रिवेणी त्रिस्थली ताप रुद्धा।
2. देवी सागर सीप में अमी श्रावे,
देवी पीठ तव कोटि पच्चास पावै;
देवी वेळसा रूप सामंद वाजे,
देवी बादल्यां रूप गैणांग गाजै।
3. देवी पन्नगां रूप पाताळ पेसे,
देवी देवता रूप तूं स्नग देसे;
देवी प्रम्म रे रूप पिंड पिंड पीणी,
देवी सून रे रूप ब्रह्मांड लीणी।
4. देवी ब्रह्म तूं विस्नू अज रुद्र रांणी,
देवी वांण तूं खांण तूं भूत प्रांणी;
देवी मन तूं पवन तूं मोख माया,
देवी क्रम्म तूं ध्रम्म तूं जीव काया।

□रासौ-काव्य

राम रासौ

माधवदास दधवाड़िया

कवि परिचै

मारवाड़ परगना रै रेण ठिकाणां रा अचलदास रायमलोत रा कामदार अर पछै बढ़ूंदा रा चांदा वीरमोत रा राजकवि (पोळपात) रैया चूंडा दधवाड़िया रै घैरे वि. सं. 1615 रै लगैटगै माधवदास दधवाड़िया रौ जलम होयौ। राम रासौ जैड़ा महाकाव्य री रचना कर आप कवि-कुळ नै अंजस दियौ। वीरता अर भक्तिपरक इण महाकाव्य री रचना सूं रीझ नै जोधपुर महाराजा सूरजसिंह अपरनाम सूरसिंह कवि माधवदास दधवाड़िया नै वि. सं. 1654 री फागण सुद बीज नैं सोजत परगना रौ नापावास गांव देयनै आधमान दियौ। जोधपुर राज्य री बही रै मुजब महाराजा सूरसिंहजी माधवदास दधवाड़िया नैं मेड़ता परगना रौ जारोड़ा बैणां नांव रौ गांव इ इनायत करियौ। आपरी दूजी छोटी रचना 'गज-मोख निसांणी' ई भक्ति-रचना रै रूप में घणी चावी है। भक्तिकालीन कवियां में राम रासौ रा रचयिता माधवदास दधवाड़िया री बडाई में बीकानेर महाराजा पृथ्वीराज राठौड़ रौ कैयोड़ी औ दूहौ कवि रा व्यक्तित्व नैं उजागर करै—

चूंडै चत्रभुज सेवियौ, ततफळ लागौ तास।
चारण जीवौ चार जुग, मरौ न माधवदास॥

(इस अरदास रै फळसरूप चूंडा रै घैरे माधवदास जलमियौ। हे माधवदास, थूं जुगां-जुगां ताँई जीवतौ रह, थारी सिरजण खिमता सूं औ जस अमर व्है जावै।)

माधवदास दधवाड़िया री आपरै इस्टदेव रै वास्तै पूरी सरधा, निस्काम भक्ति, अटूट विस्वास, अटळ आस्था रै कारण आपरै जीवण में केई चमत्कारी घटनावां घटी। आं घटनावां रा दाखला 'रामरासौ' रा संपादक शुभकरण देवल इण ग्रंथ री भूमिका में दिया है, जका बांचणजोग है। श्री देवल 'राम रासौ' रै संपादन साथै कविकुळ सूं संबंधित केई दूजी जाणकारियां कराई हैं। अरथ, भाव अर काव्य-सौष्ठव साथै इण महाकाव्य नैं पाठकां सारू सरल बणावण रौं अबखौं काम पूरौं कर जातीय रिण अर पितृरिण सूं उरिण होया है। माधवदास दधवाड़िया रा वंसज होवण रौं प्रमाण 'राम रासौ' री भूमिका लिखनै आप दियौ है। आपरी लेखणी नैं घणा रंग।

पाठ परिचै

माधवदास दधवाड़िया रचित 'राम रासौ' मूळ रूप सूं अेक भक्ति परक महाकाव्य है। राजस्थानी साहित्य में रासौपरक काव्य री आपरी जबरी परंपरा रैयी है। 'रासौ' काव्य में वीर वरणन कर्यौ जावै या औ मानीजै कै 'रासौ' वीरकाव्य ई होवै। आदिकाल सूं ई अठै रास, रासु, रासउ अर रासौपरक रचनावां री परंपरा रैयी है, जिणरौ खास अरथ रसपरक रचना ई लगायौ जाय सकै। जूनी जैन रचना भरतेश्वर बाहुबलि रास रै पछै अनेक रासपरक जैन रचनावां में रेवगिरि रास, जीवदया रास, आबू रास, तेजसार रास आद रा नांव गिणाया जाय सकै, जिणां में सांत रस रै साथै उपदेसां अर वरणन री प्रधानता रैयी है। देस-काळ अर थितियां मुजब वीरता इण संस्कृति में इत्ती घुळगी-इत्ती रळगी कै कोई पण इणसूं ठळर नीं निकळ्यौ। अठै रा कवियां भक्ति रै साथै वीरता, सिणगार रै साथै वीरता,

प्रेमार्थ्यानां रै साथै वीरता रौ वरणन कर इण बात नैं सिद्ध करदी कै राजस्थानी संस्कृति बहुरंगी है अर वीरता उणरी असली ओळखाण है। वीरता रै पाण सगळा रंग उणनै मिलिया है। राम रासौ में ई भक्ति रै साथै वीरता रौ वरणाव पुरजोर होयौ है। ज्यूं वेलिकार पृथ्वीराज राठौड़ सिंणगार ग्रंथ गूंथ 'र वेलि में कृष्ण-सिसुपाल जुद्ध में वीर रस रौ वरणन करियां बिना नीं रैया, उणीज भांत राम-रावण जुद्ध में वीर रस रौ सांगोपांग वरणन 'राम रासौ' में होयौ है। संपादक इणरी छंद संख्या 1600 मानी है। इणमें अनेक छंदां रौ प्रयोग करिज्यौ है, जिणमें दूहा, सोरठा, पद्धरी, रसावव्य, झूलणा, मोतीदाम, गाहा, कवित, चौपाई, बिअक्खरी छंदां रा नांव गिणाया जाय सकै।

तुलसीदास कृत रामचरितमानस ज्यूं इणमें ई बालकांड, अयोध्याकांड, अरण्यकांड, किस्कंधाकांड, सुंदरकांड अर लंकाकांड रै पछै उत्तरकांड है, उणी भांत पूरा सात अध्यायां में पूरी रामायण राम रासौ रै नांव सूं लिखीजी है। राजस्थानी भासा रै रामकाव्य री आपरी इधकाई है। इण काव्य रै वरणन में बात कैवण रौ आपरौ न्यारौ ढब, केर्इ सिल्पगत अर रूपगत विसेसतावां देखीजै। राम रा रूप वरणन में जिकी ओपमावां कवि दी है, वै साव निकेवली। राम रै विसाल अर मोटौ लिलाड़ तीनूं लोकां रा स्वामी होवण रौ परिचै देवै। भौहां जाणै कामदेव रौ तण्योड़ै धनुस, सरीर हाथी जैड़ै पुस्ट, कान कामदेव री सवारी मछली जैड़ा रूपाला, कांधा शिवजी रै वाहन नंदी जैड़ा बल्वान, हीरकणां ज्यूं दीपता अर बुगलां री डार जैड़ा धोला अर बिरला दांत, धनुस रा निचला भाग या सिरा ताँई पूगण वाला विलक्षण लांबा हाथ आद ओपमावां कित्ती मौलिक लागै। राम रासौ में तुलसीदास जी कृत मानस री चौपाई 'ढोल गंवार सूद पशु नारी, सकल ताड़ना के अधिकारी' रौ लोप कर कवि सामाजिक समानता रा भाव उजागर करै।

'राम रासौ' भक्तिकाव्य है। इणमें भक्ति रै भावां री प्रधानता है। आज रै जुग में ई राम जैड़ा व्यक्तित्व, जीवण-आदर्शा, जीवण-मूल्यां री समाज में घणी जरूरत है। मिट्टा मानवी मूल्यां रै इण जुग में विगयान ज्यूं-ज्यूं आगै बधियौ, मिनख लाई होवतौ गयौ। अबै वौ अेक कल्पपुरजौ बणनै रैयग्यौ है। मिनखपणा नैं राखण वास्तै इण काव्य नैं पढावण री घणी दरकार है। पारिवारिक साख नैं सवाई कर आपरौ जीवण देस-समाज अर परोपकार में लगावण वाला, जीवण में अबखायां सूं लड़ैर आगै बधण वाला, त्याग, समरण, सहजता, हेत-अपणायत री मिठास वाला अेक सार्वभौमिक पात्र री आज रै जुग में घणी जरूरत है। उण पात्र रा चरित्र नैं पढ़ैर छात्र अवस ई वांग गुणां नैं अंगैजैला। इणीज विस्वास साथै 'राम रासौ' महाकाव्य रै अंस री बानगी इण पाठ में राखीजी है।

'राम रासौ' रै इण अंस में उण बगत रौ वरणन है जद कैकयी राजा दशरथ सूं दोय वरदानां में पैलौ राम नैं चवदै बरस रौ बनवास अर दूजौ भरत नैं राज देवणौ मांगै तद राजा दशरथ रघुवंसियां री रीत मुजब 'प्राण जाय पर वचन न जाई' रै कारण कैकयी रै वाद आगै हार जावै पण राम जैड़ा वाल्हा सपूत नैं बनवास भेजण री बात सूं अथाग सोग रा समदर में ढूब जावै। प्रसंग उण सूं आगै रौ है कै दशरथ री इण दसा नैं देख मंत्री सुमंत्रजी राम नैं बुलावण आवै अर कैवै कै आपनैं राजा दशरथजी याद करै। उणी बगत राजतिलक खातर होवण वाला जप, यज्ञ आद रै पछै गुरु वसिष्ठ नै दक्षिणा में दस हजार गायां श्रीराम दी अर रूपाला मदमस्त हाथी माथै बिराजनै राम-लक्ष्मण दोनूं भाई राजा दशरथ कनै जायनै प्रणाम कस्य। राम नैं देखतां ई भावी दुख रौ सोच नै संवेदना रै साथै राजा दशरथ राम रौ लाड कर्खौं, पछै बांधां में भरनै रोवण लागा। कैकयी री सगळी करतूत बताई कै वा किण तरै म्हारै साथै छळ करनै म्हनै वचनां में बांध्यौ अर अबै थारै वास्तै चवदा बरसां रौ बनवास अर दूजौ भरत नैं राज देवणौ मांगियौ है। श्रीराम पिता दशरथ नैं धीरज देवै, समझावै अर आपरै वास्तै सौभाग्य री बात मानै। वै कैवै कै सतवादियां सारू वचन तौ भाटै अर लोह माथै खेंच्योड़ी लकीर ज्यूं अमिट होवणी चाईजै। हे पिताजी! आप दुखी मत होवौ, म्हैं आपरै वचन परवाण वन में जाय सरीर नैं तपाऊंला। अरथात सगळी विपदावां (सियाल्लौ, उन्हाल्लौ, बिरखा में पड़ण वालौ सी, लूवां, ओळा) नैं झेलूंला अर सुखां रौ त्याग करूंला। बिचालै ई कैकयी राम री बातां री हांमळ भरै अर कैवै कै पिता री आग्या मानण वालौ पुत्र ई साचै अरथां में पुत्र बाजै। श्रीराम कैकयी नैं भरोसौ दिरावतां कैवै कै हे माता! आपरै

जायोड़ी भरत अयोध्या रौ राज करैला अर महें वन में रैयनै तीन लोक रा राज-सुख नैं भोगूंला, जिणमें माता-पिता री आग्या रौ पाळण अर छोटै भाई भरत रै प्रति हेत रौ भाव है।

इणरै पछै माता कौशल्या नैं समझावतां राम कैवै कै हे माता! महाराज त्रिया-चरित्र नैं समझ नॊं सक्या अर कैकयी री बातां में आयग्या तौ ई काईं होयौ, वै आपरा पति अर म्हारा पिता है। उणां री निबल्लाई (विस्यासक्ति, स्त्री पेटे प्रेम रै वसीभूत होवणौ) दूजां साम्हीं प्रगट नॊं करता थकां उणां नैं पूजनीक अर आदरजोग ई मानणौ म्हारौ फरज है। माता गरभ धारण कर पुत्र नैं जलम देवण सूं लेयनै मोटौ होवण ताईं उणरौ पाळण-पोसण करण रै कारण सरब पूज्य है। माता री ठौड़ ऊंची है अर उणरी आग्या ई पुत्र नैं मानणी चाईजै। राम अठै आपरी बात नैं मजबूत करण सारू परसुराम रौ दाखलौ ई देवै जिकौ पिता री आग्या सूं माता 'रेणुका' नैं मार दी ही अर पिता सूं मिळण वाळा वरदान अर आसीस सूं पाढ़ी जींवती ई कर दी ही। अठीनै लक्ष्मण सेसनाग रा अवतार है, उणां नैं रीस आवणी सुभाविक है। वै आपरौ सामधरम निभावतां कैवै कै महें म्हारा स्वामी राम री भलाई वास्तै भरत अर अयोध्या तौ काईं, तीनूं लोकां नैं मिटावण री खिमता राखूं। पण राम आपरै भाई लक्ष्मण नैं नीठ सांत करै, उणां रै साहस, वीरता अर सामधरम री बढाई करै। आगै राम कैवै कै महें सपनै में ई पिता री आग्या नैं नीं टाळ सकूं अर अयोध्या रै राज रौ भोग नॊं कर सकूं।

कवि कैवै कै इण भांत राम माता कौशल्या सूं आसीस ली। माता सूं विदा लेवतां लक्ष्मण ई राजसुख नैं छोड साथै चालण वास्तै राम रै साम्हीं देखण लागै। राम छोटा भाईं री अपणायत अर सामधरमी आगै लाचार हा, सो माता सुमित्रा री आग्या लेवण वास्तै भेजिया। माता सुमित्रा लक्ष्मण नैं साथै ले जावण री अरदास राम सूं करै तौ राम लक्ष्मण री रिछ्या रौ भरोसौ माता नैं देवै। माता सुमित्रा लक्ष्मण नैं घणी भोल्लावण देवै कै हरमेस माता-पिता जाणनै सीता-राम री आग्या रौ पाळण करजै। सीता नैं म्हरै ज्यूं अरथात माता ज्यूं आदर दीजै अर दशरथ जैड़ा राघव (राम) नैं जाणजै। जठै सीता-राम रैवै उठै ई अयोध्या रौ राज अर सुख है। सीता-राम री सेवा लारली केई-केई पीढियां नैं तारण रौ काम करैला, जिणरौ फळ लक्ष्मण थर्नै लेवणौ है। माता सुमित्रा लक्ष्मण नैं करतव्य रै पाठ पढावै।

कवि कैवै कै सीता जद सादा वेस में राम नैं देखै तौ अचूंभौ करै अर पूछै कै आपरै साथै तौ अबार भांत-भांत रा गाजा-बाजा, विरुदावली गावणिया बंदीजन, छत्र-चंवर, साथै आपरा साईनां सखा होवणा चाईजै, जिका हाथियां-घोड़ां माथै बैठा छैल-छबीला लाड-कोड करता आवै, पण औं दरस नॊं देखनै म्हनैं वैम है कै अवस ई राजतिलक में कीं विघ्न पड़ग्यौ है। श्रीराम सीता नैं सगढ़ी बात समझावै अर वन में साथै नॊं चालण री सीख देवै। माता री सेवा रौ भार सूंपणी चावै। कांकड़ रा डरावणा जिनावरां अर अबखायां नैं बतायनै सीता नैं अयोध्या में रैवण रौ कैवै, पण सीता आपरा पडूत्तरां में कैवै कै राम आपरै साथै म्हनैं काईं डर है अर जठै आप हौं उठै म्हरै वास्तै सातूं सुख है। सीता रा द्रिद निस्त्रै आगै राम नैं साथै चालण री हामल भरणी पड़ै। इण भांत सीता, राम अर लक्ष्मण बनवास सारू व्ही होवै। माता कौशल्या राम नैं सीता अर लक्ष्मण री रिछ्या करण वास्तै भोल्लावण देवै। श्रीराम माता कौशल्या नैं भरोसौ दिरावै कै सीता म्हारी जोड़ायत है, अरधांगनी है अर लक्ष्मण जीमणौ हाथ है। अरथात जीवण रौ अभिन्न अंग। महें प्राण-प्रण सूं आं री रिछ्या करुला। पिता री आग्या रौ पाळण, धरम री थरपणा, अत्याचार रौ अंत कर पूरण संतोस सुख नैं धारण कर सीता अर लक्ष्मण रै साथै राजी-खुसी पाढ़ौ अयोध्या आवूला।

जटायु प्रसंग : मिनख रौ पसु-पंखेरुवां साथै आद जुगाद सूं संबंध रैयौ है। पंखेरुवां में ई संवेदना होवै। वै आपरै धरम निभावण में कर्दै-कर्दै मिनखां सूं आगै निकळ जावै। जटायु रा प्रसंग में उणीज मानवी संवेदना नैं मांसाहारी डरावणौ जीव विडरूप जटायु रै मिस महाकाव्यकार उकेरणी चावै। रावण जद सीता रौ हरण कर रथ में बैठायनै ले जावै तौ सीता रौ विलाप सुण जटायु उणनैं ढाबणी चावै। दुस्त रावण नैं कायरता रा वचन कैवै कै वौ इत्तौ बल्लवान होयनै अेकली जाण सीता रौ हरण करस्तौ है। राम नैं ललकारणौ है। रावण उणनैं कैवै कै अरे मूरख! दूजां रै वास्तै म्हरै हाथां सूं क्यूं मरणौ तेवड़यौ है। परोपकार अर कर्तव्य री ओळखाण करावतौ जटायु आपरी चूंच अर पंजां

सूं रावण रै सरीर में घाव करै। रावण ओकर तौ घायल होयनै रथ नैं थांभै पण अंत में रावण रा बळ आगै बूढा जटायु नैं हारणौ पड़ै। रावण तलवार सूं उणरी पांछ्यां बाढ देवै तौ वौं धरती माथै जाय पड़ै। ठौड़-ठौड़ तलवार रा घावां सूं घायल जटायु पड़यौ है। वौं सीता नैं पुत्री सीता कैवै। दशरथ सूं आपरी मित्रता री ओळखाण करावतां पिता ज्यूं सीता री रिछ्या करणी चावै पण कर नैं सकै। अठीनै राम अर लक्ष्मण सीता नैं सोधता-सोधता आवै अर मारग में रथ रा टुकडां साथै पांछ्यां, चूंच आद कठोड़ा पड़या देखै अर जटायु नैं देखनै उणनैं आपरी गोद में लेय उणरी देही माथै हाथ फेरै। जटायु राम नैं कैवै कै म्हैं आपनैं मूँढौं कीकर दिखावूं। म्हैरै देखतां रावण सीता नैं लेयग्यौ अर म्हैं उणनैं छोडाय नैं सक्यौ। जटायु में कर्तव्य निभावण रा गुण है तौ वीर जित्तौ दरप ई। उणनैं इण बात री आत्मगलानि है कै वौं सीता नैं रावण सूं नैं छुडाय सक्यौ।

जटायु रा धरमजुद्ध सूं राम घणा राजी होया। जटायु नैं पितृसखा, पितानुज, वीर सिरोमणी जैड़ा सबदां सूं आदर दियौ। इण भांत श्रीराम जटायु रौं उद्धार कस्यौ। अंत समय में भगवान राम रा कर-कमलां रौं परस पायनै गिद्धराज मुगती रौं मारग लियौ। गिद्धराज जटायु रौं त्याग, समरपण भाव मिनखां नैं सीख देवै तौ श्रीराम रौं जटायु रै वास्तै पिता बराबर सम्मान जीव समानता, जीवदया अर राम रा आदर्श अर जीवण-मूल्यां रौं पाठ पढावै।

राम रासौ

अयोध्या-कांड

छंद बिअखरी

कहै सुमित्र दरिसंण काजा। रांम पधारौ त्रेड़े राजा ॥1॥
 तांम रांम जप होम धांम तस। दीवी वसिष्ठ धेन सहंसदस ॥2॥
 चढिया आैण हसती चौदंती। पहूंता रांम लषंमण नरपती ॥3॥
 दसरथ धांम तांम रघुनंदन। वेगि पधारि कियौ पग वंदन ॥4॥
 देखि रांम दसरथ सु दुःखित। मेल्हि धाह लागी गलि मुखित ॥5॥
 इण राख्व कैकई अभाणी। मो सौं छळ करि वाचा मांगी ॥6॥
 पैनो राघव वनि पठावौ। भरथ राज अभिषेक करावौ ॥7॥
 अहित पिता जणि करौ अवग्या। अहं बंधु लै राज अजोध्या ॥8॥
 राजा सुंणै पयंपै राघव। ताइ वडाई वंसि नहीं तव ॥9॥
 मुखि भाखियो सु क्यूं मेटिजै। पाथरि लौह रेख पेखीजै ॥10॥
 पिता सति वाचा नै पाळै। जळ वनि सीत अंग तन जाळै ॥11॥
 पिता हुकंमि मैं त्यागौं प्राणा। राजपाट सुंदर सुख राणा ॥12॥
 सुर्णौं राम कैकई संपेखै। सोई पुत्र जो पिता संतोखै ॥13॥
 थापै राज अजोध्या सुत थारौ। है मां त्रिभवण राज हमारौ ॥14॥
 सुखनिधि राघव वन संग्रहिया। राजा मुरछगत होइ रहिया ॥15॥

त्रियाजीत पंणि प्रिया तुम्हारा । मदनांजित तोय पिता हमारा ॥16॥
 पिता सति वाचा पाळीजै । माता वाच तो काइ मेटीजै ॥17॥
 उदर मांझ दस मास अधारै । वलै वरस दस पोषी वधारै ॥18॥
 पिता हुकुंमि रेणका पहारै । माता परसरांमि मां मारै ॥19॥
 भणै लखमंण हितु भंगीजै । माता ध्रित पिता सु मुणिजे ॥20॥
 ध्रित मो ऊभै लखमंण भाखै । राघव रौ टीलौ कुंण राखै ॥21॥
 सहित अजोध्या भरथ संघारै । मुर ही भंवण कहै तौ मारै ॥22॥
 मैं जांणौं तो पौरिष लषमंण । तू अवतार सेस संहसफण ॥23॥
 राघव कहै त्रिहूं भवंणां रण । तो सौं कुंण मंडै दसरथ तण ॥24॥
 मैं किम पिता हुकुंमि मैटीजै । लाख करै तोई राज न लीजै ॥25॥

××

माता सीख रघुपति मांगै । तांम लषमंण राज तियागै ॥26॥
 कहै सुमित्रा आया कीजै । लषमंण बंधव साथै लीजै ॥27॥
 प्रांण हीतै मौनौं बहु प्यारा । निषष न मेल्हो लषमण न्यारा ॥28॥
 कहै सुमित्रा राम सेव करि । अनंत कोटि कुल लषमंण उघरि ॥29॥
 लषमंण सीता मौनै लेखै । दरसथ सरिसा राघव देखै ॥30॥
 सरिखौं वन अजोध्या संपति । रहैतां जांणै संगि रघुपति ॥31॥
 पुत्र ऊभै मां लगा पाए । सीता धांम श्रीराम सिधाए ॥32॥
 सीता सुवर विलोकी सुज । धरै न सीसि छत्र चम्मर धज ॥33॥
 सर वाजित्र न वंदिण साथी । हैमर रथ हसम न हाथी ॥34॥

××

मोनौं वनि मेल्हंण मा त्रेही । छल्यौ दसरथ भरत सनेही ॥35॥
 सीता इहे सीख संभरीजै । कौसल्या री श्रेव करीजै ॥36॥
 भरता सौं यम सीता भाखै । पलक न जीऊं दरसंण पाखै ॥37॥
 बदै राम वनि सिंघ र वारण । दैति नाग राखिस दुःख दारण ॥38॥
 सकल सदुःख यंद्र पदवी सुख । मोनूं तहां जहां श्रीवर मुख ॥39॥
 सीता हेक मनि देखै संगि । सती पहुंचि कहीयौ श्री रंगि ॥40॥

××

भणै कौसल्या राम संभरीजै । रिछ्या सीत लषमंण करीजै ॥41॥
 मो सीता अरधंग्या माता । भुजा दाछिणी लषमंण भ्राता ॥42॥
 सीता लषमंण सहित सजोध्या । अहं आइ हें बहुत अजोध्या ॥43॥

जटायु प्रसंग

सोरठा (दूहा)

अळगौ जाय रथ आंणि । सीता वैसांणी सती ।
 प्रभु वाकारि न पाणि । चोरी हरि घरि चातियौ ॥1॥
 ग्रीध औळखी गद्दूरि¹ (गरूर²), सीता क्रोसंती सती ।
 उडै जटायु अडू रि । रथ लंकेसर रोकियौ ॥2॥
 रथ ग्रधराज म रोकि । जांवण दे रामंण जपै ।
 ले मेल्हिसि जंमलोकि । मूरिख कांय परकाजि मरै ॥3॥
 रामंण दसरथ राय । मीत सखा नित माहरै ।
 जनक सुता किम जाय । व्रिध हौं ग्रीध ऊर्भै वधु ॥4॥
 जुध दहकंध जटायु । चंच नखां पंख चापटां ।
 रथ भागौ पंख राय । छत्र धजा घोड़ा सहित ॥5॥
 साचवि आवध सूर । भिड़ि दसमुख वीसे भुजे ।
 चंच पांखां कीय चूर । गोडवियौ राकस गिरध ॥6॥
 ग्रीध वडौ गजगाह । कीधौ वहि दहकंध सौं ।
 सजि कंध रथ सीताह । गौ मारगि गयणां गिरै ॥7॥

××

चंचा चूर थियांह । पड़िया दल तुंदल पगां ।
 पांखां पींजरीयांह । अंत वेळा आया अनंत ॥8॥
 रुळतै वाखर रंगि । गोद लियौ राघव गिरध ।
 जीतौ तैं रंण जंगि । आखिसि हौं दसरथ अनुंज ॥9॥
 मुख जिंगि देखौ मोर । सास थकै लंकेसवर ।
 जोवणवंत सजोर । व्रध मो वधि लेगौ वधू ॥10॥
 रीझे ग्रीध रघुराय । सूरां निधि दसरथ सखा ।
 जंण वैकुंठ जटाय । पहुंचायौ वैकुंठ पति ॥11॥

॥॥

अबखा सबदां रा अरथ

काजा=वास्तै, कारण । त्रेड़े=बुलावै । तांम=उणीज बगत । धांम=महल । संहसदस=दस हजार । आंणि=आया, आयनै ।
 वेगि=जलदी, उणीज टैम, अविलंब । धाट्ठ=बांग देयनै रोवणौ । लागी गळि=गळै लगाया । वाचा=वचन । पैनौ=पैलौ ।
 पठावौ=भेजौ । पयोंपै=कैवै, कैवणौ । पाथरि, लोह=पत्थर अर लोह री लकीर, द्रिढ निस्त्रै । पेखीजै=रैवणौ चाईजै,
 देखणौ चाईजै, कहीजै । संपेखै=कैवै (समझावण रा भाव सूं) । संग्रहिया=बहीर होया । मदनांजित=आसक्त स्त्री रै
 वस में । पणि=पण, परंतु । पोखी=पाळ-पोखनै बडौ करणौ । त्रियजीत=स्त्री री बातां में आयोड़ौ, उणै वस में
 होयोड़ौ । रेणका=रिसी जमदग्नि री जोड़ायत अर परसुराम री माता, सती नारी । भणै=कैवै । मुणिजै=मानीजै ।

ऊभै=म्हारै होवता थकां। टीलौ=राजतिलक। भवंण=त्रिभुवन, तीनूं लोकां नै मिटावण री बात। पोरिष=बळ, पौरुष, साहस, वीरता। सेस सहसफण=सेसनाग, सहस्र फणां वाढौ सांप। सीख=विदा, जावण सारू आग्या। मोनौं=म्हनैं, मनै। हीतौं=सूं। निमष=क्षण, अेक पलक ई। अनंत कोटि कुळ=करोड़ां पीढियां। उधरि=उद्धार होवै। सीता मौनै लेखै=सीता नै म्हारै बराबर देखजै, मतळब माता ज्यूं। सरिसा=सरीखा, तुल्या, ज्यूं। सुवर=श्रेष्ठ वर। सर=अवसर। वाजिग=बाघ, बाजा। वदिण=बिरुदावली गावण वाळा। हेमर रथ=सज्योड़ै रथ। साथी=बरोबर री उमर वाळा सखा। भरता=पति। सौं=सूं। यम=इण भांत, इण तरै। भाखै=कैवै। पाखै=अभाव में, दरसण बिना। वारण=हाथी, भयानक डरावणा जानवर। दैति=दैत्य। राखिस=रागस, राक्षस। दारण=दारुण। यंद्र पदवी सुख=इन्द्रलोक जैड़ै या सातूं सुख। संभरीजै=सुणौं। भणै=कैवै। रिख्या=रिछ्या, रक्षा। सजोध्या=वचन पाळणा कर्नै सुख-संतोस रै साथै। वैसांणी=बैठाई। आंणि=लेयनै। वाकारि=ललकारियौ। पांणी=मरजादा, लज्जा होवती तौ। ओळखी=पिछाण ली। गद्दू रि (गरूर)=स्वाभिमानी सती नारी। अद्दू रि=निरभीक। जपै=कैवै। मेल्हिसि=भेज देवूला। परकाजि=परायां वास्तै। मीत सखा=गैरा मित्र। ब्रिध=मित्रता रौ विरद नीं लजाऊं। पंखराय=महाबली जटायु, गिद्धराज। साचवि=कृत संकल्पित देखनै। गोडवियौ=धरासायी। गजगाह=महाग्रीव जटायु। कीधौ वहि=प्रहार करियौ। गयणांगिरै=आकास मारग सूं। दल तुंदळ=आपस में व्हिया संघर्ष सूं, प्रहार सूं। पांखां पींजरीयांह=पींज्योड़ी रुई जैड़ी पांख्यां, बिखस्योड़ी पांख्यां। वेळा=बगत, समै। जिणि=मत। सूरा निधि=वीर सिरोमणी।

सवाल

विकल्पाऊ पडूतर वाळा सवाल

1. ‘राम रासौ’ रा रचनाकार है—

- | | |
|------------------|-----------------------|
| (अ) राव रणमल्ल | (ब) ईसरदास |
| (स) चांदा वीरमोत | (द) माधवदास दधवाड़िया |

()

2. ‘राम रासौ’ रौ काव्य-रूप है—

- | | |
|-----------------|---------------|
| (अ) चम्पु काव्य | (ब) महाकाव्य |
| (स) खंड काव्य | (द) काव्य-गीत |

()

3. माधवदास दधवाड़िया नै नापावास गांव री जागीर दी—

- | | |
|----------------------------|-------------------------|
| (अ) अचलदास रायमलोत | (ब) महाराजा मानसिंह |
| (स) जोधपुर महाराजा सूरसिंह | (द) आं मायं सूं कोई नीं |

()

4. ‘राम रासौ’ में वरणन रौ विसय है—

- | | |
|--------------------------|-----------------------------|
| (अ) राम अर रावण रौ जुळ्ड | (ब) कैकयी री करतूत रौ वरणन |
| (स) भरत अर राम रौ मिळाप | (द) राम रौ आवगौ जीवण-चरित्र |

()

साव छोटा पडूत्तर वाला सवाल

1. माधवदास दधवाड़िया रै पिता रौ नांव काँई हौ ?
2. माधोदास दधवाड़िया रा इस्टदेव कुण हा ?
3. लक्ष्मण री माता रौ नांव काँई हौ ?
4. 'जटायु' सूं आप काँई समझौ ?

छोटा पडूत्तर वाला सवाल

1. 'राम रासौ' में महाकाव्य री विसेसता सारू कोई तीन रौ वरणन करौ।
2. श्रीराम कित्ता बरसां वास्तै बनवास गिया अर क्यूं ?
3. बनवास में राम रै साथै कुण-कुण गिया, उणां रौ राम सूं काँई संबंध हौ ?
4. 'जटायु' किणरी रिछ्या करणी चावै अर क्यूं ?

लिखरूप पडूत्तर वाला सवाल

1. 'राम रासौ' ओक महाकाव्य है। इणरी काव्यगत विसेसतावां रौ वरणन करौ।
2. आज रा जुग में 'राम रासौ' महाकाव्य री प्रार्सांगिकता दाखलां समेत बतावौ।
3. पाठ में आया 'राम रासौ' रै काव्यांस रौ भाव आपरै सबदां में लिखतां इणरी विसेसतावां नैं उकेरौ।
4. "जटायु प्रसंग में आयौ वरणन मानवी संवेदनावां नैं जगावण वालौ है।" इण कथन नैं पुख्ता करण सारू प्रसंग री विरोळ करौ।

नीचै दिरीज्या पद्यांसां री प्रसंगाऊ व्याख्या करौ।

1. माता सीख रघुपति मांगै। तांम लषमंण राज तियांगै॥
कहै सुमित्रा आग्या कीजै। लषमंण बंधव साथै लीजै॥
2. भरता सौं यम सीता भाखै। पलक न जीऊं दरसंण पाखै॥
वदै रामं वनि सिंघ र वारण। दैति नाग राखिस दुःख दारण॥
- 3 रथ ग्रधराज म रोकि। जांवण दे रामंण जपै।
ले मेलहिसि जंमलोकि। मूरिख कांय परकाजि मरै॥
4. मुख जिणि देखौ मोर। सास थकै लंकेसवर।
जोवणवंत सजोर। ब्रध मो वधि लेगौ वधू॥

□डिंगल गीत

आयौ इंगरेज मुलक रै ऊपर

बांकीदास आसिया

कवि परिचै

कविराज बांकीदास आसिया रौ जलम वि. सं. 1828 में मारवाड़ रियासत (जोधपुर) रै भांडियावास गांव में होयौ। आप डिंगल रा चावा-ठावा कवि अर जोधपुर महाराजा मानसिंह रा क्रिपापात्र हा। बांकीदास बहुभासाविद् अर इतियास रा लूंठा जाणकार हा। संस्कृत, डिंगल, पिंगल, प्राकृत, अपभ्रंस, फारसी, ब्रज, व्याकरण अर ज्योतिष रा आधिकारिक विद्वान् रै रूप में इणां री घणी ख्याति रैयी। बांकीदास महाराजा मानसिंह (जोधपुर) रा क्रिपापात्र तो हा ई, साथै ई राजकवि अर काव्य-गुरु हा। महाराजा उणां नैं महाकवि रै साथै कविराजा रै विरद सून नवाजिया हा।

इणां रा रच्योड़ा लगै-टगै चाळीस ग्रंथ अर सैकड़ू डिंगल गीत मिलै। इणां री भासा प्रौढ़, मंज्योड़ी अर सरस-सहज होवणै रै साथै घणी असरदार है। इणां नैं अलंकारां रौ ई गैरौ ग्यान है। डिंगल रा सिरै रचनाकार बांकीदास रा रच्योड़ा ग्रंथां मांय सूर छत्तीसी, सींह छत्तीसी, वीर विनोद, धबल पच्चीसी, दातार बावनी, नीति मंजरी, सुपह छत्तीसी, कृपण दर्पण, मोहमर्दन, कुकवि बत्तीसी, गजलक्ष्मी झमाल, नखशिख, संतोष बावनी, सुजस छत्तीसी, कायर बावनी, कृपण पच्चीसी अर वचन विवेक पच्चीसी आद ग्रंथ घणा चावा है। आं ग्रंथां रै टाल भुरजाल भूषण, गंगालहरी, मान जसो मंडण अर बांकीदास री ख्यात घणा उल्लेखजोग ग्रंथ है। इणां रा रच्योड़ा डिंगल गीत साहित्य अर इतिहास री दीठ सून सिरै है। औ वि. स. 1890 मांय दिवंगत हुया।

पाठ परिचै

इण संकलन में बांकीदास रौ अेक डिंगल गीत सामल करीज्यौ है, जिकौ उणां री अंग्रेज विरोधी भावना नैं प्रगट करै। कवि गीत में खरी-खरी बतावतौ कैवै कै अंगरेज आज आपां रै मुलक ऊपर आय रैया है, जिणां नैं रोकण रा जतन करीजणा चाईजै। आपां रा बडेरा जिका धरती रै खातर मर मिठ्या पण आपरी धरती दूजां रै हाथां नैं जावण दी। जिका अंगरेजां सून मोरचा लिया, साम्हीं पग रोपिया, उणां नैं इण गीत में बिडाईज्या है। गीत में देस-प्रेम (धरती-प्रेम) री सांगोपांग वंदना करीजी है। कैवण रौ मतल्लब औं कै राजस्थानी साहित्य जगत में बांकीदासजी अेक लूटां कवि है जिका देस में सब सून पहला आजादी री अलख जगावण सारू आपरी आवाज बुलंद करी—‘आयौ इंगरेज मुलक रै ऊपर’। इण महान कवि री देस री आजादी सारू औं ओळियां आम जनता में नून्वौ जोस भरण रौ काम करै।

देस माथै अंगरेजी राज रा बधता दबदबा अर अंगरेजां री ‘फूट न्हाखौ अर राज करौ’ री खोटी नीत सून देसी राजावां अंगरेजी सत्ता नैं अंगेजण लागग्या अर ओस-आराम करणौ सरू कर दियौ। आं सगळी बातां सून सावचेत करतां कवि औं गीत लिख्यौ। इणमें जातीय अेकता री बात ई कवि करी है। देस-रिछ्या रौ भार जनता रै कांधै राखतां कविराज बांकीदास आसिया सगळां नैं चेतावै, चावै हिन्दू व्हौ कै मुसल्मान, वीरता किणी री बपौती कोनी।

आयौ इंगरेज मुलक रै ऊपर

आयौ इंगरेज मुलक रै ऊपर, आहस लीधा खैचि उरां।
 धणिया मरै न दीधी धरती, धणियां ऊभां गई धरा ॥11॥

 फौजां देख न कीधी फौजां, दोयण किया न खळ्ण-डळ्ण।
 खंवां खांच चूडै खांवद रै, उणहिज चूडै गई यळा ॥12॥

 छत्रपतियां लागी नंह छांणत, गढपतियां धर परी गुमी।
 बळ नंह कियौ बापडा बोतां, जोतां-जोतां गई जमी ॥13॥

 दुय चत्रमास बाजियौ दिखणी, भोम गई सो लिखत भवेस।
 पूगौ नहीं चाकरी पकडी, दीधौ नहीं मरैठौ देस ॥14॥

 बाजियौ भलौ भरतपुर वाढौ, गाजै गजर धजर नभ गोम।
 पहिलां सिर साहब रै पडियौ, भड़ ऊभै नंह दीधौ बोम ॥15॥

 महि जातां चींचातां महिला, औ दुय मरण तणां अवसांण।
 राखौ रे किहिंक रजपूती, मरद हिन्दू की मुस्सलमांण ॥16॥

 पुरजोधांण उदैपुर जैपुर, पहु थांरा खूटा परियांण।
 आैंके गी आवसी आैंके, बाकै आसल किया बखांण ॥17॥

6

अबरखा सबदां रा अरथ

इंग्रेज=अंग्रेज (ब्रिटिस कंपनी) | खांवद=खसम, धर्णी | मरैठै=मराठा | भड़=जोधा | यल्ला=इल्ला, धरती | दुय=दो, दोय | दोयण=सत्र | महि=धरती | पुरजोधांण=जोधपुर | बांकै=बांकीदास | बखांण=विरुद्द, बिडद, सरावणा |

सवाल

विकल्पाऊ पडत्तर वाळा सवाल

1. कवि मुलक रै ऊपर किण रै आवण री बात करै ?

(अ) रंगरेज

(ब) चंगेज

(स) मृगराज

(द) अंगरेज

()

साव छोटा पडूत्तर वाळा सवाल

1. बांकीदास रै रच्यौड़े किणी दो ग्रंथां रा नांव लिखौ।

2. 'कवि मरण तणां अवसाण किणनै बतायौ है ?

3. बांकीदास रौ जलम चारण समाज री किण साखा में हुयौ ?

छोटा पडूत्तर वाळा सवाल

1. कवि भरतपुर वाळां री तारीफ किण भांत करी है ?

2. बांकीदास रै मुजब अंगरेजां री नीत कैडी ही ?

3. कवि 'आयौ इंगरेज मुलक रै ऊपर' गीत में किणरी तारीफ अर क्यूं कीनी ?

लेखरूप पडूत्तर वाळा सवाल

1. अंगरेज हुकूमत सूं चेतावणी देवतौ कवि काई कैवणौ चावै ? समझावौ।

2. बांकीदास री साहित्य-साधना उजागर करौ।

3. अंगरेज विरोधी गीत 'आयौ इंगरेज मुलक रै ऊपर' रौ सार लिखौ ?

नीचै दिरीज्या पद्यांसां री प्रसंगाऊ व्याख्या करौ।

1. आयौ इंगरेज मुलक रै ऊपर, आहस लीधा खैंचि उरां।

धणिया मरै न दीधी धरती, धणियां ऊभां गई धरा ॥

2. बाजियौ भलौ भरतपुर वाळौ, गाजै गजर धजर नभ गोम ।

पहिलां सिर साहब रौ पड़ियौ, भड़े ऊभै नंह दीधौ बोम ॥

3. पुरजोधांण उदैपुर जैपुर, पहु थांरा खूटा परियांण ।

आकै गी आवसी आकै, बाकै आसल किया बखांण ॥

॥अध्यात्म-पद्॥

आत्म-संबोध

श्रीमद् जयाचार्य

कवि परिचै

तेरापंथ धरमसंघ रा चौथा आचार्य श्रीमद् जयाचार्य राजस्थानी साहित्य रा ऊजळा नखत हा। लारला दोय सौ बरसां रा सिरै रचनाकारां नैं देखां तौ उणमें जयाचार्य रौ नांव पैली पांत में आवै। आप गद्य अर पद्य, दोनूं विधावां में समरूप सिरजण करस्तौ। आपरै सगळौ साहित्य तीन लाख पद्यां रौ है। आज पैली औ देखण में अर सुणण में नौं आवै कै अेक कवि रा इत्ता पद्य है। आपरै श्रीमुख में सुरसती रौ वासौ हो, जिकौ बोलता वा रचना बण जावती। आप आशु कवि हा।

श्रीमद् जयाचार्य रौ जलम जोधपुर संभाग रै रोयट गांव में वि. सं. 1860 री आसोज सुदी चवदस नैं होयौ। आपरा पिता रौ नांव आईदान जी अर माता रौ नांव कल्लू बाई हो। आप ओसवाळौ री ‘गोलछा’ साखा में जलम्य। आपरै जलम रौ नांव जीतमल हो। आपसूं पैलां दोय बेटा कल्लू बाई री कूख सूं जलम्य। 1863 में अचाणचक घर-परिवार माथी आई विपदां सूं होझै-होझै पूरै परिवार में ई वैराग रौ भाव जागण लागण्यौ अर सताजोग जैन मुनि रा मारग-दरसण सूं 1869 वि. सं. में घर रा पांचूं ई सदस्य जैन दीक्षा अंगीकार करली अर साधु बणग्या। बालक जीतमल, जिकौ आगै चालनै श्रीमद् जयाचार्य रै नांव सूं ख्यातनांव होयौ, दीक्षा री बगत फकत नौ बरसां रौ हो। मुनि हेमराजी आपरा शिक्षा-गुरु हा। आपरै ग्यान री जोत में ठौड़-ठौड़ चौमासौ करतां बारह बरसां ताँई श्रीमद् जयाचार्य आगम ग्रंथां रौ गैराई सूं अध्ययन करस्तौ। अनुशासन, निमता अर खिमता रै पाण आपरै साहित्य री नौंव पक्की बणती गई। जलम सूं जिकौ काव्य-कुशलता रौ गुण हो, वौं चावौ होयौ अर दीक्षा रै दोय बरसां पछै फकत 11 बरसां री ऊमर में ‘संतगुणमाला’ नांव री पैली रचना लिखी। छोटी ऊमर पण मन नैं काबू कर बांधणौ, निष्ठा अर समरपण भाव जैड़ा गुण आपनैं गुरु हेमराजजी सूं विरासत में मिल्या हा। आपरा ऊंचा आचार-विचार अर बुद्धि री खिमता रै पाण आपरा दीक्षा-गुरु आचार्य ऋषिराय, धरमसंघ रै नेम मुजब आपनैं अग्रणी अवस्था पछै युवाचार्य अवस्था में खुद रा उत्तराधिकारी बणाया। ऋषिरायजी रै सुरगवास पछै वि. सं. 1909 में माघ री पून्य नैं आप आचार्य री गादी बिराज्या। आचार्य रै रूप में आप तीस बरसां ताँई तेरापंथ धरमसंघ री सेवा करी। संघ नैं घणौ मजबूत बणायौ। आपरै सेवाकाळ रौ बगत इण धरमसंघ रौ सुवरणकाळ हो, जिणमें इणरौ च्यारूं खूंटां विगसाव होयौ। आप आपरै धरमसंघ री जूनी अर नूंवी परंपरा रा समन्वयक बण्या। जयाचार्यजी सिरजणधरमी अर साहित्यप्रेमी हा। आपरै बगत में साहित्य री घणी अंवेर राखीजी। आप आपरै धरमसंघ में अनुशासन अर व्यवस्था सुधार रा केर्द नेम-कायदा बणायनै प्रशासकीय कुशलता रौ परिचै दियौ।

श्रीमद् जयाचार्य राजस्थानी रै मांय अेक नूंवी गीत-विधा री सरूआत करी जिकी ‘ठहका’ नांव सूं चावी होयी। आप उण बगत तेरापंथ धरमसंघ में साम्यवादी विचारां री नौंव राखी जद देस में समाजवाद कठैर्द नैडौ-आगौ ई कोनी हो। जीवण रा 77 बरस पूरा कर वि. सं. 1938 री भादवा बदी बारस रै दिन सिंझ्या री बगत आप परलोकधाम सिधारग्या। आपरै व्यक्तित्व घणौ प्रभावी हो— खरहरा, पण छरहरौ डील, नेन्हा-नेन्हा हाथ-पग, सांवळौ रंग, मोटौ लिलाड़, दीपतौ उण्यारौ, हियै रा ऊजळा, दृढ़ संकल्पी, बुद्धिबल री खिमता अर समाजवादी चिंतन-साधना रा सजग अर सावचेत पौरैदार हा।

आप राजस्थानी रा वीर रसावतार सूरजमल्ल मीसण री जोड़ रा आशु कवि हा। आपरौ साहित्य विविधरूपा हो। आप राजस्थानी रा सिरमौर सिरजणकार रै रूप में जाणीजै। आप मौलिक सिरजण रै साथै अनुवाद रौ काम ई घणोई कर्ख्यौ। प्राकृत भासा रा जैन आगमां रौ राजस्थानी उल्थौ कर्ख्यौ। प्रबंध-काव्य, जीवण-चरित्र, भक्ति-काव्य, संस्मरण, कथाकोश, जोड़, इतिहास इत्याद री राजस्थानी रचनावां लिखी। आप अठारै बरस री ऊमर में प्राकृत रै सबसूं गूढ़-गंभीर अरथ वावौ आगमग्रंथ ‘पत्रवणा’ री राजस्थानी पद्य टीका करनै तेरापंथ में राजस्थानी रा संत ग्यानेश्वर बणग्या, जिण भांत कै महाराष्ट्र रा संत ग्यानेश्वर सोळा बरस री ऊमर में ‘गीता’ री ग्यानेश्वरी टीका लिखी ही। आप उणीज परंपरा नैं आगै बधायनै राजस्थानी रा बेजोड़ संतकवि बणग्या।

पाठ परिचै

राजस्थानी भासा रौ जैन-काव्य विविध अर विसाल है। राजस्थानी साहित्य रा आदिकाळ सूं ई जैन रचनाकारां रै घणौ योगदान रैयौ। आपरै धरम नैं आधार बणायनै आखौ जैन-काव्य जैनाचार्या, तीर्थकरां, बलदेवां, वासुदेवां, जैन मुनियां, सतियां अर धार्मिक शासकां सूं संबंधित कथा-काव्य, चरित-काव्य, उत्सव-काव्य, नीति-उपदेस अर स्तुति-काव्य रै रूप में मिलै। जैन रचनाकार आपरै लेखन री न्यारी सैली में रचनावां रौ सिरजण कर्ख्यौ। आदिकाळ सूं लेयनै आधुनिक-काळ ताई जैन-सैली रौ अखूट साहित्य भंडार न्यारी-न्यारी विधावां अर काव्य-रूपां में लाधै। आं रूपां में—विवाहलौ, धमाळ, फागु, संधि, धवल, हींयाव्यी, सलोक, ढाळ, चौढालियौ, रसावला, बारहमासा अर केई संख्यापरक काव्यरूप आं रचनावां में देख्या जाय सकै।

श्रीमद् जायाचार्य सरल, सहज राजस्थानी भासा रा सबदां नैं परोटां औड़ी रचनावां लिखी कै जन-साधारण रै हियै ढूक सकै। इण पाठ में आत्म-संबोध रै रूप में आपरी रचना रा कीं पद लिरिज्या है, जिणमें जप-तप, आत्म-कल्पना, मन-बुद्धि री थिरता, धीरता, समता भाव, भलाई, शांति, सास्वत सुख अर केई औगुणां में— रीस, निंदा, ईसकौ, कटुसबद आद री बात करतां आत्मचिंतन सूं खुद नैं जाणणौ, आपरी खामियां नैं देखणौ, चोखी सीख मानणी अर धरम री मरजाद में रैवणौ, धरम रौ पाळण करणौ आद आं पदां रै रूप में जीवण रौ सार है।

आत्म-संबोध

जीता! जनम सुधार, तप जप कर तन ताइयै।
 छिन मांहि तन छार, दिन थोड़ा में देखजै॥1॥
 जीता! निज दुख जोय, कुण कुण कष्टज भोगव्या।
 अब दिल में अवलोय, ज्यूं सुख लाहिये शासता॥ 2॥
 स्नेह-राग संताप, जीता! निश्चय जाणजै।
 समझावे चित्त थाप, आप सुख-दुख बहुला अख्या॥ 3॥
 स्तुति जस और प्रशंस, हिवड़े सुण नवि हरखिये।
 अवगुण द्वेष न अंस, सुण तूं जय! निज सीखड़ी॥ 4॥
 क्रोध-अगन उपसंत, खिम्या चित्त धारै खरी।
 धीर गंभीर धरंत, कठिन वचन नवि काढियै॥ 5॥
 जय! सागर सम जाण, महिमागर मुनिवर सही।
 अखिल परम्पर आण, अल्प दिवस में अचल सुख॥ 6॥

वेरी मान बिखेर, (जय) नरमाई गुण नीपजै।
हिवड़े पर गुण हेर, निज ओगुण सुण निद मा॥ 7॥
जय निज-आदि सुजोय, विविध पणै तूं दुख लह्यो।
अल्प-कठिन अवलोय, थोपै तूं किण कारणै?॥ 8॥
जय ! खिम्या वर टोप, वचन-समिति बख्तर प्रष्ट।
अधिक गुणागार ओप, आतम गढ आराधिये॥ 9॥
भू सम जय ! गंभीर, निष्पकम्प मन्दर-गिरी।
हेरे निज गुण हीर, ध्यान सुधारस ध्यायनै॥ 10॥
धर धन्नो चित्त धीर, अल्प काळ आराधिये।
तूं कर धर तप-तीर, सखरी सुण ‘जय’ सीखड़ी॥ 11॥
उळझ्यो काळ अनाद, अंतर ‘जय’ गुण ओळखो।
प्रवर प्रशांत प्रसाद, धर खिम्या वर खांत सूं॥ 12॥
चतुराई चित्त चिंत, सुध निज कारज साधिये।
मत कर बीजो मिंत, आतम मिंत जय ! अचल कर॥ 13॥
जय ! अंतिम जगदीस, कुण-कुण तप अप खार किया।
धरम खिम्या जगदीस, अष्ट न तप आदर सकै॥ 14॥

॥॥॥

अबखा सबदां रा अरथ

ताइये=दुख देवणौ, सतावणौ। अबलोय=देखणौ। शासता=सास्वत, हरमेस रैवण वाल। समभावे=सुख अर दुख में ऐक समान रैवणौ, सगळ्हं रै वास्तै समता रा भाव। उपसंत=उपजावणौ, उत्पन्न होवणौ। खिम्या=क्षमा करणौ, माफ करणौ। अखिल=पूरौ, आखौ, संपूर्ण। विखेर=बिगड़णौ, मान मिटावणौ, खंडित करणौ। हेर=तलास, खोज। बख्तर=कवच। आराधिये=ध्यान देवणौ, पूजा-उपासना। ओळखौ=पिछाणौ, जाणौ। अघ=पाप, नीच करम।

सवाल

विकल्पाऊ पडूत्तर वाला सवाल

1. राजस्थानी भासा रै जैन-साहित्य है—

- | | |
|--------------------|-----------------|
| (अ) अबखौ अर दोरौ | (ब) सरल अर सहज |
| (स) विविध अर विसाल | (द) गैरौ अर गूढ |

()

2. जैन रचनाकार किण सैली में रचनावां करी ?

- | | |
|--------------------|--------------------|
| (अ) जैन-सैली में | (ब) डिंगळ-सैली में |
| (स) पिंगळ-सैली में | (द) लौकिक-सैली में |

()

3. घणकरा जैन कवियां रा विसय रैया है ?
 (अ) वीरता अर सिणगार (ब) बात बणाव अर चमत्कार
 (स) धरम-नीति अर उपदेश (द) तीनां मांय सूं कोई नीं
 ()
4. जयाचार्य किण पंथ रा हा ?
 (अ) तेरापंथ (ब) दादू पंथ
 (स) लालदासी पंथ (द) गूदड़ पंथ
 ()
5. जयाचार्य दीक्षा री बगत हा—
 (अ) 12 बरसां रा (ब) 9 बरसां रा
 (स) 13 बरसां रा (द) 7 बरसां रा
 ()

साव छोटा पडूत्तर वाळा सवाल

1. जयाचार्य रौ बाल्पणै रौ नांव काँई हो ?
2. जयाचार्य रौ जलम कद अर कठै होयौ ?
3. जयाचार्य रा माता-पिता रौ नांव लिखौ।
4. जयाचार्य रा शिक्षा-गुरु कुण हा ?
5. जयाचार्य री लिखी किणी ऐक रचना रौ नांव लिखौ।

छोटा पडूत्तर वाळा सवाल

1. जयाचार्य किणरी जोड़ रा अर कैड़ा कवि हा ?
2. जयाचार्य में काँई-काँई गुण हा ?
3. आचार्य बणियां पछै जयाचार्य काँई-काँई काम कर्हा ?
4. जयाचार्य रौ बारलौ व्यक्तित्व कैड़ी हो ?

लेखरूप पडूत्तर वाळा सवाल

1. राजस्थानी साहित्य में जैन साहित्य रा योगदान नैं समझावौ।
2. जयाचार्य रै व्यक्तित्व अर कर्तृत्व रौ वरणन करौ।
3. जयाचार्य रै जीवण सूं काँई सीख मिळै ? समझावौ।

नीचै दिरीज्या पद्यांसां री प्रसंगाऊ व्याख्या करौ।

1. जीता ! जनम सुधार, तप जप कर तन ताइये।
 छिन माहि तन छार, दिन थोड़ा में देखजै ॥
2. स्नेह-राग संताप, जीता ! निश्चय जाणजै।
 समभावे चित्त थाप, आप सुख-दुख बहुला अख्या ॥
3. क्रोध-अग्न उपसंत, खिम्या चित्त धारै खरी।
 धीर गंभीर धरंत, कठिन वचन नवि काढिये ॥

॥पद्॥

भक्ति रा पद

भक्त कवयित्री समान बाई

कवयित्री परिचै

साहित्य-समाज में 'मत्स्य री मीरा' रै नांव सूं आपरी ओळखाण राखण वाली भक्त कवयित्री समान बाई रै जलम वि. सं. 1882 में होयौ। समान बाई राजस्थानी रा चावा कवि अर विद्वान रामनाथ कविया री लाडेसर धीव हा। रामनाथ कविया रौ खास ठिकाणौ सीकर जिलै रौ नरसिंघपुरा गांव हो। आपरा परिवार नैं सीकर नरेस बल्वंतसिंघ सूं तिजारा में 'सियाळी' गांव री जागीर मिळ्योड़ी ही। सियाळी में इज समान बाई रौ जलम होयौ। बल्वंतसिंघ रै पछै विजयसिंघ गादी माथै बैठा। वै सियाळी गांव री जागीर जबत करली अर बदला में सटावट गांव दियौ, जठै आज ई समान बाई रै पीहर वालां रा वंसज बसै। बाल्पणै सूं ई समान बाई नैं आपरा परिवार में लाड, अपणायत अर विस्वास मिळ्यौ जिणसूं उणां में आतमविस्वास रौ बल हरमेस बण्यौ रैयौ। बाल्पणै में मिळ्योड़ी हेत, अपणायत सूं सरोबार वांरौ पूरौ जीवण सहज अर सरल रूप सूं चालतौ रैयौ। 13 बरस री छोटी उमर में ई आपरौ ब्यांव अलवर जिलै रा माहुंद गांव में ठा। रामदयालजी साथै होयौ। ठा. रामदयालजी चावा कवि उम्मेदारामजी रा पड़पोता हा। अठै कैवण रौ अरथ औं ईज है कै समान बाई नैं काव्य सिरजण रौ गुण आपरै पिता सूं बीजरूप में मिळ्यौ, वौं पतिकुल में अंकुरित होयनै हरियै धान रै रूप में ऊग्यौ। बगत रै साथै धान पाव्यौ, जिणरौ लाटौ लाटीज्यौ उणां री अमोलक रचनावां रै पाण अर साहित्य समाज रा पाठक उणरौ रस लेवै।

ब्यांव रै पछै ई समान बाई आपरा पति साम्हीं भरोसै रै साथै आ बात राखी कै वै इण नासवान देही नैं भगवत-भजन, साधना अर उपासना में लगावणी चावै। पति रामदयालजी वांरी मरजी रौ सम्मान करता थकां हामल भरी। धरम रुखाल्ण वाली, प्रभु-भजन में लीन रैवण वाली जोड़ायत समान बाई सूं वै आपरौ भाग सरायौ। समान बाई रै कोई संतान कोनी ही। कुळ या वंस चलावण वास्तै आप आपरै परिवार सूं ई गंगासिंघ नै खोल्लै लियौ। समान बाई रौ आखौ जीवण तीरथ, वरत अर दान-पुन में बीत्यौ। अेक किंवदंती है कै समान बाई वृन्दावन गया उठै श्रीरंगजी रा मिंदर में कृष्ण रा सेँनरूप दरसण आपनैं होया। उणरै पछै आंख्यां में कृष्ण री उणीज मूरत नैं बसायनै वै आंख्यां रै पाटौ बांध लियौ। फेर वां निजरां सूं संसार नीं देख्यौ। वि. सं. 1942 री सावणी अमावस रै दिन आपरी देह परम गति पूरी जठै ताँई आप वौं कौल निभायौ।

समान बाई री रचनावां राजस्थानी साहित्य जगत में निकेवली पिछाण बणावै। आप मुक्तक काव्य रै रूप में केई गीत लिख्या, जिणमें ईस महिमा, श्रीकृष्णोपमा, उपमा श्रीराधिका, विनय रा पद अर कृष्ण लीला रा स्फुट पदां री बानगी सरावण जोग है। वै बन्ना-बन्नी नैं राम अर सीता रा प्रतीक मान नै ब्यांव रा गीत लिख्या जिकां नै 'सौळ' कैवै। औं गीत घणा चावा है। ब्यांव रै मंगल मौकै औं गीत घणै चाव सूं गाईजै। वै 'पति सतक' री रचना कर पति नैं परमेसर जितौ आधमान दियौ अर पत्ती धरम सूं उरिण होवण रौ जतन कर्त्त्यै।

समान बाई राम अर कृष्ण दोनूं रा पद लिख्या। श्रीकृष्ण आपरा इस्टदेव है। इण वास्तै कृष्ण री लीलावां में वांरौ मन घणौ रस्यौ। आपरै पदां में अंतस-अरदास है। माधुरी भाव, दास्य, सखा अर सरणागति रौ भाव वाँरै पदां री विसेसता है। कवयित्री रौ मूळ भाव भक्ति रौ रैयौ है। काव्य-सिरजण री खिमता वाँनै जलमधूंटी साथै मिळी।

सवैया, पद्मरी, कवित्त जैड़ा छंदां में वांसी रचनावां री बानगी देखीजै जिकौ उणां रै सास्त्रीय-ग्यान नैं उजागर करै। कवयित्री रै जीवण में किणी वस्तु रै अभाव कोनी है। पीहर अर सास्पैरे में आपनै पूरी सुख-सुविधावां मिली। ओक उक्ति याद आयगी कै 'जे सुख में सिमरण करै तो दुख काहे को होय', सुख सूं गृहस्थ में रैवता थकां भक्ति अर वैराग रै भाव अर साधना अवस ई आपैर पूरबलै भव रा संस्कारां रै फल हो।

समान बाई सारू 'मत्स्य री मीरां' रै जिकौ भाव बण्यौ उणनै लेयनै ई कीं बात करणी चावूला। मीरां बाई री पिछाण मुलकां चावी है। पण समान बाई नैं मीरां रै जीवण साथै जोड़ां तौ केर्इ बातां में समानता दीखै। दोनूं कृष्ण भक्त कवयित्रियां ही। सामंती समाज सूं दोनां रै जुड़ाव रैयौ। घर में रैवता थकां दोनां नैं भणण-पढण रै अवसर मिळ्यौ। आपैर इस्टदेव सूं अलौकिक प्रेम अर भक्ति रा रंग में रंगीजनै दोनूं ई गृहस्थ जीवण रै त्याग करूँ। दोनूं कवयित्रियां रा पद गेयता रा गुणां रै कारण आज ई केर्इ राग-रागिनियां में चाव सूं गाईजै। जीवण रै बगत अर थितियां भलाईं काईं रैयी होवौ, पण दोनूं में जलम सूं ई भक्ति रा संस्कार हा। समान बाई रै जीवण अर काव्य रचनावां नैं लेयनै केर्इ आलेख छप्योड़ा है, पण आपैर काव्य सिरजण री सगळी सामग्री री अंवेर करनै पोथी-रूप देवण रै अंजस जोग काम डॉ. मंजुला बारठ करूँ। 'भक्तिमति समान बाई : जीवन अर काव्य' पोथी सूं कीं टाळवां पद इण पाठ में लिरीज्या है।

पाठ परिचै

कवयित्री समान बाई रा पदां में विसय-विविधता निजर आवै। आपरा इस्टदेव रै जलम, जलम री टैम होवण वाळा उच्छब अर मात-पिता रै राजीपौ, उणां रा लाड-कोड, सार-संभाळ रै रूपाळौ चित्रण आप करूँ। माता जसोदा रौ लाड-लडावण रौ, आपैर लाल नैं सुख देवण रै, पाल्ण-पोसण रै निराळौ रूप समान बाई रै पदां में मिळै। कृष्ण नैं पोढावण रा जाझा जतन माता जसोदा करै। पिलंग, बिछावणा, ऊपर ओढण री साल सब इधकाई लियोडा है। नींद में वांरै पैस्योड़ा मुगट अर झुगलिया सूं अबखाई नीं होवै, इण वास्तै वानै खोलनै अळगा मेलै तौ घुळमी आंख्यां में काजळ स्यात सुख देवण वाळौ व्है। सूत्योड़ा टाबर माथै मायड़ नैं घणौ सनेव-हेत आया करै, इण वास्तै आपरी निजर सूं बचावण खातर ई काजळ सारणौ नीं भूलै। सूत्योड़ा लाल माथै ई सनेव बिरखा करती माता जसोदा थेपड़ नैं लोरी गावै (हालरिया हुलरावै)। शुकदेव मुनि, शारदा अर शिवजी माता जसोदा रै भाग री बडाई करै। जिण छवि रा दरसण वास्तै देवता ई तरसै, समान बाई खुद आपरा भाग सरावै। अंतस री निजरां सूं आप भगवान रै बालरूप रा दरसणां रौ लाभ लियौ। 'पोढावणौ' सबद आदर सूचक है। पण कोई मां टाबर वास्तै इण सबद रै प्रयोग नीं करै। कवयित्री रा इस्टदेव कृष्ण अठै माता री गोद सूं पलंग माथै सोवै तौ समान बाई 'पोढण' सबद काम में लेवै। 'पिलंग' सबद ई म्हारी जाण में 'पालणौ' री तुलना में व्यापकता रै सूचक है। औं इज कारण कै आप पोढण वास्तै 'पालणा' री नीं 'पिलंग' री बात करै। बालरूप वरणाव में तौ 'पालणौ' ई आवणौ चाईजै पण श्रीरंगजी री मूरत सूं निजरामेलै करण वाळी कवयित्री वांरै विराट रूप, व्यापकता, बडा होवण रै कारण पिलंग माथै पोढावण रै वरणन करै।

भगत अर भगवान रै मिळाप अलौकिक है। प्रियतम रूप में भगवान श्रीकृष्ण रै पधारणौ अर रात ढल्यां पछै पोढणौ। वै काची नींद सूं जाग नीं जावै, क्यूंकै परभात होवतां ई च्यारुंमेर पंछियां रै चैंचाट, बिलोवणा रा झरड़ाटा, गवाल्ड्यां रा हाका, गायां अर बाछड़ां रै रम्भावणौ अर गुजरणियां रै पगां री झांझर रा झीणा-झीणा सुर सुणीजणा सरू व्है जावै। कवयित्री रा प्रियतम मोहन चिमक नै उठ नीं जावै, वांसी नींद ओझक नीं जावै, इण सारू कित्ता-कित्ता जतन कवयित्री करै कै जाणै परभात रा सगळा कारज ई ढब जावै, अगुणौ बारणौ जड़ देवै नै पड़दौ ताण देवै, जिणसूं सूरज रै तेज रौ पळकौ ई नीं पड़ै। आथूणौ बारणौ खोलावै जिणसूं हवा आवती रैवै। सेवकां नैं कैवै कै ऊपर अटारी माथै जायनै पंछियां नैं उडावता रैवै। सब पौरदारां नैं सावचेत करदौ कै कोई बैरै सूं मांयनै नीं आवै। परभात री नींद गैरी अर मीठी होया करै, उणरौ सुख श्रीकृष्ण नैं मिळै, इण वास्तै अर परभात री बेळा सांत भाव सूं पोढ्योड़ा

भगवान रा दरसण आपनैं होवता रैवै, इण कारणै समान बाई परभात रा उण बगत नैं जाणै बांधणौ चावै। नींद री अचेतन अवस्था में अेक चेतन झांकी रा दरसण पद री विसेसता है।

सगळी गोपियां माथै आपैर निरमल अर निस्छळ प्रेम री बिरखा करण वाळा कृष्ण नैं चन्द्रावळी नांव री अेक सखी, जिणरौ कृष्ण रै वास्तै प्रेम इधकौ ई हौ, वा सखी ओळबा देवती कैवै कै म्है इतरी भोळी कोनी सांवरिया। कृष्ण! थूं दूजां सूं हंस-हंस नै बोलै अर म्हरै कनै आवतां ई दांतां आंगळी लाग जावै। किणी रै थूं अगड़ (गळे रै गैणौ) घड़ावै अर म्हरै सूं बोलता नैं ई जोर आवै। उणां सारू लायोडी सगळी भेंट पाछी साम्हीं मेलती कैवै कै ल्यौ, जावौ किणी दूजी सखी री ई झोळियां भरै। जावौ थानै कित्ती बार (16 बार) कैय दियौ कै अबै मांयनै मत आवै। आ सगळी लड़ाई हाव-भाव सूं निजरां आवै। श्रीकृष्ण, चंद्रावळी रै ओळमां रै सभाव पळ्योड़ा है। चंद्रावळी ई क्यूं राधा, रुकमण, सत्यभामा अर ब्रज री गोपियां जिकी उणां रै दरसण नैं तरसती। निजरां सूं कृष्ण ओळळ नीं व्है जावै, इण वास्तै वानै मनावती अर पाछी रुस जावती। कृष्ण री अेक मुळक माथै ई पाछी राजी व्है जावती। अठै औं ओळमो फगत चंद्रावळी रै कृष्ण रै वास्तै अछेह प्रेम रै प्रतीक है। 'अगड़' अठै 'हियै रौ हार' मतलब घणौ वाल्हौ हो सकै।

श्याम रै आयां बिना गोपियां नैं आवडै ई तो कोनी। वा इज चंद्रावळी जिकी 16 बार बरजनै घर में नीं आवण देवै, वा ईज पाछी मनवारां करनै बुलावै। पिलंग माथै बैठायनै पान री मीठी मनवार करै अर जिण बैरण जीभ सूं वा कृष्ण नैं ताना दिया उणनैं बाळण री, माथै लूण भुरकावण री बात करै। कृष्ण जिकौ सगळां रै प्राणाधार है, सगळां रै वाल्हौ है, उणरै प्रेम माथै तौ सगळां रै बरोबरी रै हक है, पछै मिळण नै घरै आवतां ई वा जिकी राड़ करी, उणरै पिछतावौ करै। वौ राड़ रै बगत औळै ई गियौ कै कृष्ण सूं मीठी बंतळ नीं व्ही। पण अबै चंद्रावळी आपरी बातां सूं कृष्ण नैं राजी कर लिया। रीस, आमनौ अर मनावणौ, राजीपौ, औं प्रेम रा न्यारा-न्यारा रूप है। कृष्ण री अछेही प्रीत रा सजीव चित्राम मांड नै कवयित्री समान बाई आपरै जीवण संवरै। चंद्रावळी में कवयित्री रै खुद रै आतमभाव ई निजर आवै।

गोपियां रै साथै कवयित्री री ई आ मनसा है कै कृष्ण रा दरसण अर वारंसौ साथ हरमेस मिळै। आपैर इस्टदेव री बाट जोवती कित्ती आकळ-बाकळ है वारंरी दसा। जीव तड़पै, मन डैर, लोकलाज आडी आवै। प्रकृति उणां री उडीक नैं अर तिरस नैं बधावै। चौमासै री रुत में विजोग री पीड़ सर्वाई होयनै तड़पावै। औं बगत कीकर बीतैला? घणा दिन ई कोनी, 'परसूं' रै उल्लेख पद में व्हियौ है। दो दिन रै बिछोह ई भक्त रै वास्तै, प्रेमीजण वास्तै इत्तौ दोरै व्है, जिणरौ सांतरौ अर मरम परसी वरणन कवयित्री करै। उड़ेर जावणी चावै, पण उडण वास्तै पांख्यां चाईजै। रितु वरणन— मेह रै बूठणौ, काळी कांठल मेह चढणौ, मोर, पपैयां, डेडरियां अर बरसाती जीवां रै बोलणौ, बाग-बगीचा में फूलां रौ सरस होवणौ, औं सिणगार वरणन रा उद्दीपन रूप है। विजोग में औं सगळी थितियां दुख देवण वाळी अर चिड़ावण वाळी लागै। फूल रही बैरण सरसूं अर 'खड़ी तरसूं' में नारीगत ईसका रा भाव ई दीखै। पण औं सब लोक-व्यवहार री बातां है; काव्य री बानगी है। समान बाई आपरै स्याम नैं पुकार करै कै आपरा दरसण बिना तरसूं हूं। दरसणां री त्रिस्पा अर चावना है।

दास्य भाव रै औं पद, जिणमें भक्त कवयित्री री अरदास रै ढंग कितरै इधकौ है। खुद नैं औंगुणां री जाज बतावै अर औंगुणां नैं गुण में बदलण री अरदास करै। 'जाज' बतावण लारै भाव औं है कै भगवान तौ भवसागर पार करावण वाळा है, इण पुकार सूं दासी री औंगुण रूपी नाव नै ई पार लगाय लेवैला। दूजौ पद सरणागति रै भाव रै है कै आप नाथां रा नाथ है, म्हनैं भूलजौ मत अर भोळावण काँई देवै कै राधा, रुकमण, सत्यभामा, कुबजा ज्यूं म्हनैं ई राखजौ। कित्तौ गैरौ भाव है इणमें। राधा अर कृष्ण तौ अभेद है। दोनूं अेक ई है। रुकमण, सत्यभामा कृष्ण री पटराणियां है अर कुबजा दासी है। पैली प्रेमभक्ति अर पछै अधिकार अर उणरै पछै लारै जावतां 'कुबजां ज्यूं संग लीजो जी'। हर रूप अर दसा में समान बाई कृष्ण रै चरणां में सरणौ चावै। 'निरंजन' रूप में निरगुण भाव बण जावै।

सातवौं पद पुकार रौ है, जिणमें भगवान रा बिरद याद दिरावतां कवयित्री सरणौ चावै। हे जगत रा ईस ! ज्यूं पूतना नैं माता जसोदा री गति दी, गज रौ उद्धार कर्यौ, गरुड़ नैं छोड़ेर आप पाला ई दौड़नै उणरी रिछ्या करी, भक्त प्रह्लाद री रिछ्या वास्तै नरसिंघ रूप धर्यौ अर आप खम्भा मांयनै प्रगट होया। ध्रुव नैं तारियौ, उणनैं अखंड राज दियौ। कवयित्री कैवै कै म्हरै में इत्ती सामरथ कोनी अर मति ई कोनी कै आपरा गुण गाय सकूं, पण आपरौ विरद है कै सरणौ आयोड़ां नैं सरणौ देवौ। हे सांवरिया ! म्हें ई आपरी सरण में आई हूं।

आठवां पद में कवयित्री रौ भाव जीवण-दरसण सूं जुड़योड़ौ है। संकट भलाई काया रौ होवौ या भौतिक सुखां रौ अभाव। दुख में भगवान नैं ई याद करीजै। आध्यात्मिकता रै साथै कवयित्री भगवान सूं केर्इ सवालां रा पढूतर माँगै। समान बाई कैवै कै जीव तौ अविनासी ब्रह्म ई है। जीव ब्रह्म है तौ पाप-पुनर, जलम-मरण, आगोतर अर पूरबला भव रा जंजाळ उणरे साथै क्यूं जोड़या ? तुळसीदासजी मानस में केर्इ मानस रोगां रौ वरणाव करै, उणमें दूजां रै सुख सूं दुखी होवणौ ई अेक मानस-रोग है। हत्या करणी, संत नैं सतावणौ, परायौ धन खोसणौ, औं सब पाप-करम बताईज्या है। औं पाप पूरबला जलम में करुयोड़ा होवै तौई आगोतर में भुगतणा पड़े। किण देह रा दंड किणनैं भुगतणा पड़े ? औं काईं आपरौ न्याव ? आप तौ भक्ता नैं दुख नैं देवौ, वानै नैं सतावौ, पण औं म्हें नौं कैवूं सगळौ जगत कैवै। म्हें तौ कदैई आपरा गुण नौं गाया होवूंला, इण वास्तै आप भुगतावौ या दुख देवोला तौ म्हें सहन करूंला, म्हें तौ तांबौ हूं, सोनौ कोनी जिकौ तपावण सूं सवायौ चमकै। उपालंभ, ओळबौ है, जिणमें व्यंग्य है। आप है तौ सोळवौ सोनौ, इण कारण डोढा बोलां सूं भगवान नैं सावचेत करै। कवयित्री हरि नैं सावचेत करतां कैवै कै औड़ी भूल फेर मत करजौ, इणमें तौ आप ई ठगीजोला ! आपरी भक्ति रौ दान मिलै वा पात्रता म्हरै में कोनी, पण म्हें वौ पात्र बणण री पूरी खेचल करूंला। समभाव सूं दुख नैं ई सुख मान नैं भोगूंला, औड़ी भावना भगत री बणै तौ भगवान नैं आपरा नियम बदलणा पड़े। ईस भगती में विध-विध भाव अर विसय आपै काव्य री विसेसता है। अेक-अेक पद अर गीत न्यारी खिमता लियोड़ा निजर आवै।

भक्ति रा पद

(1)

जसोदा राणी लाला कूं पौढावै ॥ टेक ॥
रतन जड़ित को पलंग ढळावै, ऊपर वस्त्र बिछावै।
जरी बाफता को धरै गींदवो, कुसुम सुगंध लगावै।
ताज झुगलिया खोल धरे है, अंजन दृगन लगावै।
ले गोदी पौढाय स्याम को, ऊपर साल उढावै।
पलंग पास बैठी बड़ भागण, हालरिया हुलरावै।
सो छवि सुक सारद सिव निरखै, 'समनी' भाग सरावै।

(2)

जा दासी ग्वाला नैं कीज्यो, बाल्या गाय मिलावै री ॥ टेक ॥
बांद्योड़ो बाल्यो बोलैगो, मोहन ओझक जागै री।
अब तो रैन रही बस थोड़ी, टुक-इक लोयण लागै री।

धीरै बोलो, धीरै चालो, जनि झांझर झाणकाओ री।
 अब जनि दही बिलोवो कोई, न परभाती गावो री।
 पूरब द्वार पै परदा करदो, लेवो खोल पछियारै री।
 चहुं ओरन पंछी न बोले, कोई बैठो जाय अटारी री।
 पहरायत चौकस सब करद्यो, भरि नींद पिया सब सोवै री।
 ‘समनी’ कूँ स्याम प्रभात समै, हरि को दरसण फिर होवै री।

(3)

सांवरिया म्हे काई ऐसा भोवा जी॥ टेक॥
 हंसि हंसि प्रीति करत औरन सूँ म्हासूँ बोलत मोवा जी।
 बीनै तो थे अगड़ घड़ावो, म्हां सूँ मीठा न बोला जी।
 हमां धरिगा सो लेय पधारो, वींका ही भरज्यो झोवा जी।
 बार रहो भीतर जनि आवो, बरज दिया बर सोवा जी।
 प्रेम की राड़ निजर में ही जाणै, नाहिं बहें छै गोवा जी।
 ‘समनी’ के स्याम हंसे सुनि के, चन्द्रावलि के रोवा जी।

(4)

घर आवो जी स्याम भलाई सूँ॥ टेक॥
 बैठो पलंग पान मुख लीजै, राजी करूँ अब काई सूँ।
 जालू जीभ लूण भरूँ यामें, राड़ि करी आताई सूँ।
 तुम सूँ कौन और मोहि प्यारो, जीवन म्हांको थाई सूँ।
 ‘समनी’ के स्याम रिझाय लियो है, चन्द्रावलि बाताँ ई सूँ।

(5)

हरि कैहर गये परसूँ परसूँ कब आवेगी बैरन परसूँ॥ टेक॥
 मन चाहत है उड जाय मिलूँ पर, उड्यो न जाय बिना पर सूँ।
 घन घोर घटा बिजली चमके, मेह कहे बरसूँ बरसूँ।
 दादुर मोर पपीहा बोलै, कोयल बोल मधुर सुर सूँ।
 फूल रहे बाग बगीचा ही फूल्याँ, फूल रही बैरण सरसूँ।
 ऐसी न करूँ, कुण लाज डरूँ, आंगन बीच खड़ी तरसूँ।
 कहत ‘समान’ सुणो ब्रजनंदन, हरि दरसन बिन मैं तरसूँ।

(6)

सांवरा थांका दासी नै कदे तो याद कीज्यो जी ॥ टेर ॥
 मैं औगुण की झाज सांवरा, (म्हारा) औगुण गुण कर लीज्यो जी ।
 मैं अनाथ तुम नाथ जगत के, भूल बिसर मत दीज्यो जी ।
 राधा, रुकमणि अरु सतभामा, कुबजा ज्यों संग लीज्यो जी ।
 कहत 'समान' सुणो जी निरंजन, (म्हारो)चित्त चरणां में लीज्यो जी ।

(7)

हेलो म्हारो सुणज्यो जी जगदीश,
 जगतपति जग रखवाला रै मुरली वाला रै ॥ टेक ॥
 प्रथम पूतना मारण कारण, कुच रै विष लपटायो रै ।
 उनको जसमत की गत दीनी, सुरग पठाई रै ।
 गज अर ग्राह लड़े जल भीतर, लड़त-लड़त गज हास्यो रै ।
 गज की बेर पयादेहि धाये, गरुड़ बिसास्यो रै ।
 खंभ फाड़ नरसिंग रूप धास्यो, हिरण्यकुश रिपु मास्यो रै ।
 उनको सुत प्रहलाद उबास्यो, धूजी तास्यो रै ।
 मैं मति हीन कछु नहीं लायक, कौन भाँति गुण गाऊं रै ।
 कहै 'समान' सुणो सांवरिया, शरण आऊं रै ।

(8)

नाथ क्यों एतो कष्ट सहायो, वाको कारण मैं नहीं पायो ॥ टेक ॥
 जीव ब्रह्म सम वेद बतावत, पाप पुण्य क्यों ल्यायो ।
 जो ओ जीव ब्रह्म ही होतो, क्यों जंजाल लगायो ।
 कंठ किसी को मैं नहीं काट्यो, ना कोई संत सतायो ।
 पर सुख देख दुःख नहीं मान्यो, पर धन खोस न खायो ।
 सो पूरबला पाप कह्या छै, तुम नहीं न्याय चलायो ।
 बीं देही तो कर्म किया छा, ईनैं क्यूं भुगतायो ।
 जगत कहै हरि भगत न तावै, मैं तोको कब गायो ।
 सोनो वहै तो भदै सवायो, तामो वृथा तपायो ।
 कहत 'समान' सहो हरि मैं तो, जो तुमने भुगतायो ।
 ऐसी भूल फेर मत कीज्यो, यह तो अकल ठगायो ।

6

अबखा सबदां रा अरथ

पौढावै=सोवाणै। जडित=बण्योड़ै। जरी बाफता=कलाकृत रै काम, आरी-तारी रै काम। अंजन=काजळ, सुरमौ।
 दृगन=आंख्यां। बड भागण=मोटा भाग वाढ़ी। हालरिया=टाबर, लाल। हुलरावै=थपकी देवणौ, लोरी रै साथै।
 ओद्धक=चिमकनै उठणौ। टुक इक=अेक पल भरी। लोयण=लोचण, आंख्यां। रैण=रात। झांझरा=पायल, घूंधरावा
 वाढ़ी। जनि=मत, बरजणै रै रूप में। पछियारै=लारै या आथूणौ। अटारी=मकान रै ऊपरलौ भाग। अगड़=गढ़ै रै भारी
 गैणौ। धरिंगा=धरणौ, मेलणौ। वींका=उण रा, वीं रा। बरज दिया=मना करूँ। बर सोळा=सोळा बार, केर्ड बार।
 रोळा=हाका। गोळा=हाथापाई, बास्तु। बहै छै=चालै। जाळूँ=बाळूँ, जळाऊँ। लूण=नमक। राड़ि=झगड़ै, लड़ई।
 दादुर=मेढक, डेडरिया। पर=पांख। बैरण=दुस्मण, सत्रु। औगुण=अवगुण। बिसर मत=भूलौ मत। जसमत=जसोदा,
 यसोदा। गत=गति (मुगती, मोक्ष)। ग्राह=अजगर। बेर=बारी। पयादेहि धाये=पाळा दौड़िया, उभराणा भाज्या।
 बिसास्यौ=भूलग्या, छोड़नै। धूजी तास्यौ=धुव भक्त नै तिरायौ। खोस=माडाणी लेवणौ, खोसणौ। जंजाळ=माया मोह।
 पूरबला=पूरब जलम रा, पैलड़ा। भुगतायौ=दुख देवणौ। तावै=सतावणौ, दुख देवणौ। तामौ=तांबौ, अेक धातु।
 ब्रथा=बिरथा, अैच्छौ, बिना काम। भदै सवायौ=घणौ होवै, चमक बधै। सह्यो=सहन करूँ।

सवाल

विकल्पाऊ पडत्तर वाळा सवाल

साव छोटा पडूत्तर वाळा सवाल

1. समान बाई रै जीवण री तुलना किण भक्त कवयित्री सूं करी जावै ?
2. समान बाई रौ सुरगवास कद होयौ ? बरस अर तिथि लिखौ।
3. समान बाई आपरी आंखां माथै पाटी क्यूं बांधी ?
4. 'मत्स्य री मीरां' बाजण वाळी भक्त कवयित्री रौ नांव काई है ?

छोटा पडूत्तर वाळा सवाल

1. समान बाई री रचनावां रौ मूळ विसय काई है ?
2. समान बाई री रचनावां रौ कोई अेक पद लिखौ।
3. भक्त कवयित्री समान बाई रौ जीवण किण कामां में बीत्यौ ?
4. "सोनौ व्है तो भदै सवायो, तामो वृथा तपायो।" इण ओळ्ठी रौ भाव लिखौ।
5. "पर-धन खोस न खायो।" कवयित्री किणनैं अर क्यूं कैवै ?

लेख रूप पडूत्तर वाळा सवाल

1. भक्त कवयित्री समान बाई रौ जीवण-परिचै लिखौ।
2. समान बाई री रचनावां रौ भाव आपरै सबदां में लिखौ।
3. "समान बाई नैं 'मत्स्य री मीरां' रै नांव सूं जिकी पिछाण मिळी, उणरौ कारण भक्ति-काव्य सिरजण रैयौ।" इण कथन माथै आपरा विचार लिखौ।
4. भक्त कवयित्री समान बाई री भक्ति किण भांत री ही। भक्ति-भावना नैं प्रगट करण वाळा पदां रौ भाव लिखौ।

नीचै दिरीज्या पद्यांसां री प्रसंगाऊ व्याख्या करौ।

1. जसोदा राणी लाला कूं पौढावै ॥ टेक ॥
रतन जडित को पलंग ढवावै, ऊपर वस्त्र बिछावै।
जरी बाफता को धरै गोंदवो, कुसुम सुगंध लगावै।
2. धीरै बोलो, धीरै चालो, जनि झांझर झाणकाओ री।
अब जनि दही बिलोवो कोई, न परभाती गावो री।
पूरब द्वार पै परदा करदो, लेवो खोल पछियारै री।
चहुं ओरन पंछी न बोले, कोई बैठो जाय अटारी री।
3. सांवरिया म्हे काई ऐसा भोवा जी ॥ टेक ॥
हंसि हंसि प्रीति करत औरन सूं म्हासूं बोलत मोवा जी।
बीनै तो थे अगड़ घड़वो, म्हां सूं मीठा न बोला जी।
हमां धरिगा सो लेय पधारो, वीका ही भरज्यो झोवा जी।
4. गज अर ग्राह लड़े जळ भीतर, लड़त-लड़त गज हास्यो रै।
गज की बेर पयादेहि धाये, गरुड़ बिसारचो रै।
खंभ फाड़ नरसिंग रूप धास्यो, हिरण्याकुश रिपु मास्यो रै।
उनको सुत प्रहलाद उबास्यो, धूजी तास्यो रै ॥

□डिंगळ-छंद

तमाखू री ताड़ना

ऊमरदान लाळ्स

कवि परिचै

ऊमरदान लाळ्स रै पिता रौ नांव बख्तीराम लाळ्स हौ। इणां रै बाळपणै मांय ई माता-पिता रौ सुरगवास होयग्यौ हो। गांव मांय जमीन-जायदाद रै झगड़ा-टंटा सूं काया होयनै औ रामस्नेही संतां रा कंठीबंध शिष्य होयनै जोधपुर आयग्या अर खेड़ापा शाखा रै रामद्वारै में रैवण लागग्या। जोधपुर में रैवता थकां औ दरबार स्कूल मांय चौथी कक्षा तांई पढाई करी। इणरै पछै औ कवि गणेशपुरी रै कनै डिंगळ अर पिंगळ काव्य री शिक्षा ग्रहण करी। दरबार स्कूल रै शिक्षक पं. नर्बदाप्रसाद भार्गव सूं अंगरेजी भासा सीखी।

जोधपुर रै पं. देवराजजी रै पिता सूं औ ज्योतिष अर संस्कृत रौ लूंठौ ग्यान ई हासल कर्स्यौ। मोर्ट्यारपणै मांय औ ओक कानी स्वामी दयानंद सरस्वती रै आर्य समाज रै वैदिक सिद्धांतां रै साथै पाखंड-खंडन रा अकाट्य तरक सुण्या, तो दूजै कानी बेमन साधु बण्योड़ा केर्इ लोगां नैं नजीक सूं देखण रौ मौकौ मिळ्यौ, जिका चादर री ओट में आदर पावण रै साथै व्यभिचार में रव्योड़ा हा। सो औ साधु-वेस नैं तिलांजली देय दीवी अर गिरस्थ बणग्या। पछै जोधपुर राज्य रै घोड़ा रै रिसाळै मांय नौकर होयग्या। औ दयानंद सरस्वती रै संपर्क में ई रैया अर वांसूं घणा सबला प्रभावित होया। इणां री प्रतिभा, काव्य-सगती अर वाणी-कला सूं हर कोई प्रभावित होया। इणां री रचनावां पैती बार वि. सं. 1964 में ‘ऊमर-काव्य’ नांव सूं पोथी रूप में प्रकासित होयी। परोपकारी, साहसी, सत्यवक्ता अर निष्कपट होवण सूं आंरौ व्यक्तित्व घणौ प्रभावशाली हो। वि. सं. 1960 फागण सुदी तेरस नैं कंठबेल री बीमारी सूं आंरौ सुरगवास होयग्यौ।

पाठ परिचै

कुंडलिया अर छप्पय छंदां रै जरियै ‘तमाखू री ताड़ना’ मांय कवि तमाखू रै साथै-साथै अमल नैं ई बुरौ बतायौ है। विसन तौ कोई ई क्यूं नीं होवै। खोटौ ई होवै। तमाखू खावणिया अर पीवणिया अर अमल लेवणियां रा काईं ई भूंडा हवाल होवै— इणरौ चित्राम इण काव्य मांय हे। कवि तमाखू पीवणियां नैं कायर पुरुस बताया है। उणां री समाज मांय काईं इज्जत रैय जावै, इणरौ साचौ वरणाव कर्स्यौ है। काव्य रै आखिर में कवि कैवै कै अबै तौ जाग जावौ, जीवण रूपी हीरौ हाथ लाग्योड़ा है, औ मत गमावौ, क्यूंके फेर पाछौ मिळण वालौ नीं है। कैवण रौ मतलब औ है कै इण मिनखाजूण में किणी भांत रौ नसौ-पतौ नीं करणौ चाईजै।

तमाखू री ताड़ना

छप्पय

समज तमाखू सूगली, कुत्तो न खावै काग।
 ऊंट टाट खावै न आ, अपणो जाण अभाग।
 अपणो जाण अभाग, गजब नहिं खाय गधेड़ो।
 शूकर भूंडी समज, निपट निकळे नहिं नैड़ो।
 बुरा पशु बच जाय, अहरनिस खाय न आखू।
 बडा सोच री बात, तिका नर खाय तमाखू॥१॥

तारत रो निज तनय, नारदो ओर सनाती।
 मार अमोलक मित्र, सदा उलटी संगाती।
 पाद तणों परधांन, गाद रो सांप्रत गोटो।
 असुभ चले को अनुग, मूत रो भाई मोटो।
 हिया सूं भीड़ होको हमें, राज भलाईं राख लो।
 आप सूं अरज इतरी अवस, चुपके पाणी चाख लो॥२॥

भरियो भरियो भणें, प्रथम आरम्भ पहिचांणें।
 झाड़ो झाड़ो जपे, जुगत आखर में जांणें।
 चुगल सुरन्दर चाव री, टहल नारी घरटूंटी।
 मोरो माथो मेल, फेर हिरदै री फूटी।
 राम सूं विमुख रोवण रसा, धूम्रपान मुख में धैरै।
 तूं देख सिकल होके तणी, क्यूंरि अकल हांणी करै॥३॥

कुंडलिया

पिये तमाखू कापुरस, सापुरसां हिय साल।
 सालै निस दिन समझाणां, चालै चाल कुचाल।
 चाल खोटी चलै चूकग्या नर चतुर।
 अहह सोचै न अति दुर्व्यसन दुसह उर।
 दुळक आखू अकल घरो घर टीवणां।
 पुरस कापुरस जे तमाखू पीवणां॥४॥

होको लेतां हाथ में चेतो गयो चुल्याय।
 पड़ै धमाधम पदमणां अधमाधम अकुल्याय।
 उरड़ अकुल्याय आघा पड़ै आय अत।
 पड़ावै माजनूं लाजनूं खो अपत।
 रीछ लै तमाखू दाम दै रोकड़ा।
 हकंड भूंडा लगै हाथ में होकड़ा॥५॥

होको लेतां हाथ में चेतो गयो चुल्लाय।
 पड़ै धमाधम पदमणां अधमाधम अकुल्लाय।
 उरड़ अकुल्लाय आधा पड़ै आय अत।
 पड़ावै माजनूं लाजनूं खो अपत।
 रीछ लै तमाखू दाम दै रोकड़।
 हकंड भूंडा लगे हाथ में होकड़॥६॥

छप्पय

सूळी देवै सहज, देय दै फांसी देखो।
 मिरघी लकवै मांहि, उभय अंतर अवरेखो।
 जान्हौ डैरू जोय, बिगत दुख भेद बतावो।
 आधासीसी आंख, जुवर कुण सूळ जतावो।
 ब्राह्मण गाय हित्य विषै, नीच ऊंच निरखो नमण।
 तिम अमल तमाखू तोल लो, कुण घटो बढतो कमण॥७॥

जेर हवालै जांण, चढावै गद्दै चोडै।
 बेड़ी लीनां बहै, खास पग धरदै खोडै।
 बरणैं दोढीवंद्य, देत इक देस निकाळो।
 बूडो पाणी बीच, बिसन सूं काया बालो।
 खाणनै पीण आधा खिसक, लागा लपक लकूंदरा।
 इम अमल तमाखू है उझै, एकण बिल रा ऊंदरा॥८॥

अमल लियां तन अजक, भाल धरणी भिड़ जासी।
 होको पीनां हाय, सहस गुण मन सिड़ जासी।
 अमल लियां सूं उदक, एक पीढी मुख आगै।
 होको दै निज हाथ, सात पीढी जळ सागै।
 नहिं सही जाय जद ढै निडर, कही जाय मोटी कथा।
 बय बखत अमोलक क्वै वृथा, विमळ हिये खोटी व्यथा॥९॥

तीन लोक को मोल, जाय तन सुकवि जगावै।
 हीरो लागो हाथ, पुनरभव फेर न पावै।
 ठाला भूला ठोठ, कुबध नहिं छोडै काल्हा।
 पुण्य गया परवार, व्यसन जद लागा वाल्हा।
 बिन राम भजन खोवै बखत, उलझ अमल होकां अठै।
 इक सास अंतपुळ में अहह, कोड़ि महोर मिलणी कठै॥१०॥

अबखा सबदां रा अरथ

सूगली=गंदी, हेय। टाट=बकरी। शूकर=सूअर। तिका=जिका। कापुरस=कायर, कपूत। सापुरस=सज्जन। माजनौ=प्रतिस्ठा, इज्जत। उरड़=आवेग सूँ। अमल=अफीम। आफळै=संघर्षरत, जूँझणौ। ढोर=पासु। ढोळै=दुरबल पसु, जका खुद नीं उठै सकै, बेसकै पड़णौ। नासेटू=किणी री तलास में फिरणियौ।

सवाल

विकल्पाऊ पड़तर वाळा सवाल

()

()

3. ऊमरदान तमाखू पीवणियां नैं कैडो पुरुस बतायौ है—
 (अ) कायर (ब) प्रेमी
 (स) बुद्धिमान (द) वीर

()

साव छोटा पड़ूत्तर वाला सवाल

1. ਊਮਰਦਾਨ ਡਿੰਗਲ ਅਤੇ ਪਿੰਗਲ ਕਾਵਿ ਰੀ ਸ਼ਿਕਸ਼ਾ ਕਿਣਸੂਂ ਪ੍ਰਾਪਤ ਕਰੀ ?
 2. ‘ਤਮਾਖੂ ਰੀ ਤਾਡਨ’ ਮੌਕੇ ਕਿਣ ਛੱਦਾਂ ਰੈ ਪਾਣ ਤਮਾਖੂ ਵਿਸ਼ਨ ਨੈਂ ਬੁਰੈ ਬਤਾਯੈ ਹੈ ?
 3. ਤਮਾਖੂ ਪੀਬਣਿਆਂ ਰੀ ਸਮਾਜ ਮੌਕੇ ਕਾਂਝ ਇੱਜਤ ਰੈਵੈ ?

छोटा पड़ूत्तर वाला सवाल

1. ਊਮਰਦਾਨ ਲਾਕਸ ਰੈ ਪਾਰਿਵਾਰਿਕ ਜੀਵਣ ਰੋ ਪਰਿਚੈ ਦੇਵੈ।
 2. ਕਵਿ ਰੈ ਮੁਜਬ ਕੁਣਸਾ ਜਾਨਵਰ ਤਮਾਖੂ ਨੌ ਸ੍ਥਾਗਲੀ ਸਮਝ ਨੰ ਖਾਵੈ ?
 3. ਊਮਰਦਾਨ ਲਾਕਸ ਕੁਣਸੈ ਸੱਪ੍ਰਦਾਯ ਰੈ ਸ਼ਤਾਂ ਰਾ ਕੰਠੀਬੰਧ ਚੇਲਾ ਬਣਾ ਅਰ ਬਾਦ ਮੌਂ ਕਾਈ ਸੀਖ ਮਿਲੀ ?

लेखरूप पड़त्तर वाळा सवाल

1. कवि तमाखू अर अमल रा कार्हि-कार्हि औगुण बताया है ? खुलासौ करौ।
 2. ऊमरदान रै व्यक्तित्व अर कृतित्व नैं उजागर करौ।
 3. “तमाखू री ताड़ना मांय राजस्थानी रै वैण सगाई अलंकार रौ ओपतौ प्रयोग कथ्य री महत्ता अर सोभा बधावण रौ सामरथ राखै।” कथन नैं दाखलां समेत पुख्ता करौ।

नीचै दिरीज्या पद्यांसां री प्रसंगाऊ व्याख्या करौ।

1. समज तमाखू सूगली, कुत्तो न खावै काग।
ऊंट टाट खावै न आ, अपणो जाण अभाग।
अपणो जाण अभाग, गजब नहिं खाय गधेड़ो।
शूकर भूंडी समज, निपट निकळै नहिं नैड़ो।
2. पिये तमाखू कापुरस, सापुरसां हिय साल।
सालै निस दिन समझाणां, चालै चाल कुचाल।
चाल खोटी चलै चूकग्या नर चतुर।
अहह सोचै न अति दुर्व्यसन दुसह उर।
3. अमल लियां तन अजक, भाल धरणी भिड़ जासी।
होको पीनां हाय, सहस गुण मन सिड़ जासी।
अमल लियां सूं उदक, एक पीढी मुख आगै।
होको दै निज हाथ, सात पीढी जळ सागै।
4. तीन लोक को मोल, जाय तन सुकवि जगावै।
हीरो लागो हाथ, पुनरभव फेर न पावै।
ठाला भूला ठोठ, कुबध नहिं छोडै कालहा।
पुण्य गया परवार, व्यसन जद लागा वालहा।

□कविता

सुपनौ आयौ

हीरालाल शास्त्री

कवि परिचै

हीरालाल शास्त्री रौ जलम 24 नवंबर, 1899 में जोबनेर में होयौ। आप प्रगतिसील काव्यधारा रा कवि मानीजै। आजादी रै बगत लोगां में आपरी कविता रै सायरै अर आपरै ओजपूरण सुर सूं आजादी री अलख जगायी। गणेशीलाल व्यास 'उस्ताद' अर भैरुलाल 'काळाबादळ' रै साथै जनवादी सुर में सुर मिलायनै लोकगीतां री धुन माथै कविता बणायनै देस में आजादी री चेतना नैं चेतन करी। आम जन खातर आप काव्य, गीत, कविता री सिरजणा करी। हीरालाल शास्त्री प्रगतिसील धारा रा साचै अरथां में जनकवि हा। जन-जागरण सारू राजस्थानी कविता अर गीत रौ स्हराँ लेयनै आप जन-जन में देसप्रेम अर बल्लिदान री भावना भरी अर समाज रै विकास सारू सांगोपांग प्रयास कर्स्यौ। जद जनता गुलामी री बेड़यां में कसमसीजै ही अर जंग रा ढोल बाजण री वेळा घणी नैड़ी ही उण वेळा लोगां में आतम-बल्लिदान री भावनावां भरण वाळी कवितावां आप लिखी। आप वनस्थली विद्यापीठ री स्थापना करी। 28 दिसंबर, 1974 में आपरौ सुरगवास होयग्यौ।

पाठ परिचै

'सुपनौ आयौ' कविता प्रगतिसील अर मार्क्सवादी विचारधारा री पांत री सखरी रचना है, जिणमें जनवादी सुर निगै आवै। धरती माथै कवि मोटौ बदलाव चावै, जिणमें पूंजीवाद अर सोसण रौ नास होवै अर निबळां रौ समानता साथै राज होवै। कवि रौ सुपणौ सामाजिक, आरथिक अर राजनीतिक बदलाव रौ प्रतीक है। औं सुपणौ ऊपर सूं दीखण में जितौ सांत लखावै, बितौ ई मांय सूं गरीबी, भूख, सोसण, असमानता सूं उपज्योड़ौ असंतोस अर रीस है। कवि रौ ध्येय है कै भेदभाव रौ अंत होवणौ इज चाईजै। कवि रौ मन बदलाव खातर घणौ अधीर है। उणरौ अवचेतन मन भी आम आदमी री पीड़ सूं दुखी है। सुपणां में भी आ इज पीड़ निगै आवै। विचारां रै भतूल्लियै मन रै आंगणै सुपणा रै पाण काळी-पीछी आंधी उठै अर आ आंधी विरोध अर रीस रौ इज प्रमाण है जठै आम जन में आमूल्यवूल बदलाव री भावना है। जळ अर थळ रौ अेक होवणौ असमानता रौ नास है अर मोटी क्रांति रौ प्रतीक है। भूमि रौ संपटपाट होवणौ पूंजीवाद रौ नास अर आम आदमी रै मजबूती रौ पड़बिंब है। पहाड़ां रौ टूट जर्मीं में मिळणौ, जळ-थळ अेक होवणौ, टीबा अर नदी रौ बदलाव, ऊंचै रौ नीचै उतरणौ, निबळां रौ मजबूत होवणौ, खजाना खाली होवणा अर गरीब रौ पेट भरणौ सगवा विचार अेक नूंवै जुग री कल्पना करै, जठै गरीब रौ पेट भर्योड़ौ है, उणरी द्युंपड़ी म्हैल ज्यूं होवै अर जठै भेद अर सोसण नै समाज में ठौड़े नीं हैं। कवि रौ विस्वास है कै अेक दिन म्हराँ औं सुपणौ अवस साच होसी। कुल मिळायनै 'सुपणौ आयौ' कविता घणी असरदार, ओजपूरण, सीधी अर बदलाव रै मिजाज री है।

सपनौ आयौ

सपनौ आयौ अेक घणौ जबरौ रे
 सपनौ आयौ ।
 काळी-पीली आंधी उठी
 चाल्यौ सूट घणौ जबरौ रे
 सपनौ आयौ ।
 थळ को होग्यौ जळ, थळ जळ को
 संपट पाट घणौ जबरौ रे
 सपनौ आयौ ।
 ढुंगर टूट जर्मी में मिळग्या
 देख्यौ ख्याल घणौ जबरौ रे
 सपनौ आयौ ।
 चौरस भोम में ढुंगर बणग्या
 माया जाळ घणौ जबरौ रे
 सपनौ आयौ ।
 टीबा ऊठ नदी बै लागी
 फैल्यौ पाट घणौ जबरौ रे
 सपनौ आयौ ।
 नदियां सूख 'र टीबा बणग्या
 बेढब भूड घणौ जबरौ रे
 सपनौ आयौ ।
 ऊंचा छा सो नीचा उतर्स्या
 निचलौ ठाठ घणौ जबरौ रे
 सपनौ आयौ ।
 टणका छा सो निमवा होयग्या
 निमवा राज घणौ जबरौ रे
 सपनौ आयौ ।
 म्हैलां की तो टपरी बणगी
 टपरी म्हैल घणौ जबरौ रे
 सपनौ आयौ ।
 तोसाखाना खाली होग्या
 खाली पेट भस्यौ जबरौ रे
 सपनौ आयौ ।
 म्हांकौ सपनौ साचौ होसी
 समझौ भेद घणौ जबरौ रे
 सपनौ आयौ ।

॥॥

अबखा सबदां रा अरथ

ଘଣୀ=ବହୁତ, ଜ୍ୟାଦା । ଜବରୀ=ଜୋରଦାର । ଡୁଙ୍ଗର=ପରବତ । ଭୋମ=ଭୂମି । ଟୀବା=ଟୀଲା, ଧୋର । ମୈଲାଂ=ମହଳାଂ । ସାଚୌ=ସଚୌ ।

सवाल

विकल्पाऊ पडतर वाळ सवाल

साव छोटा पडूत्तर वाला सवाल

- ‘सपनौ आयौ’ कविता किण कवि री रचना है ?
 - ‘सपनौ आयौ’ कविता में कवि किणरी कल्पना करै ?
 - ‘टणका’ अर ‘निमला’ सबदां रौ अरथ बतावौ ?
 - आजादी री लाडाई रै समै क्रांति रौ माध्यम काई हौ ?

छोटा पड़ूत्तर वाला सवाल

- ‘सपनौ आयौ’ कविता रौ भाव-सौंदर्य बतावौ।
 - कवि लोकधुनां री मारफत कविता क्यूँ करता ?
 - आजादी रै आंदोलन रै समै कविता में फूटरापौ अर सिणगार क्यूँ नीं है ?
 - ‘संपट पाट घणौ जबरौ रे’, इण ओळी रौ आसय बतावौ।

लेखरूप पढ़ूत्तर वाळा सवाल

1. 'सपनौ आयौ' कविता री भाव दाखला देयनै समझावौ।
2. "सपनौ आयौ कविता प्रगतिशील धारा री जनवादी कविता है।" इन कथन नैं कविता रै माध्यम सूं सिद्ध करौ।
3. 'सपनौ आयौ' कविता रै माध्यम सूं कवि लोगां नैं काँइ संदेस देवणौ चावै ? समझावौ।

नीचै दिरीज्या काव्यांसां री प्रसंगाऊ व्याख्या करौ।

1. सपनौ आयौ अेक घणौ जबरौ रे

सपनौ आयौ।

काळी-पीछी आंधी उठी

चाल्यौ सूंट घणौ जबरौ रे

सपनौ आयौ।

2. टीबा ऊठ नदी बै लागी

फैल्यौ पाट घणौ जबरौ रे

सपनौ आयौ।

नदियां सूख 'र टीबा बणग्या

बेढब भूड घणौ जबरौ रे

सपनौ आयौ।

3. टणका छा सो निमळा होयग्या

निमळा राज घणौ जबरौ रे

सपनौ आयौ।

म्हैलां की तो टपरी बणगी

टपरी म्हैल घणौ जबरौ रे

सपनौ आयौ।

□ कविता

मरण-पंथ रा पंथी

सुमनेश जोशी

कवि परिचय

सुमनेश जोशी रो जलम जोधपुर में होयौ। आप डील-डॉल सूं सैंठा, काम-काज में मैनती, लगन रा पक्का अर कलम रा धणी हा। सरीर मुजब ई मन ई मोटी हौ आपरौ। देसी राज्यां री राजनीतिक क्रांति में आपरै त्याग अर बल्दिन री चरचावां घणी चावी है। देस रै वास्तै साची प्रीत रै कारण वै राज री नौकरी छोड़-छिटकायनै आंदोलनकारियां रै भेळा भिल्गया। संवेदनसील होवण रै कारण वै घर-परिवार सूं बेसी देसहित में आपरै करतव्य रौ पाठ्ण करस्थौ। जोशी आपरै गीतां अ रचनावां सूं क्रांतिकारियां में जोस जगायौ, उणां नै चेताया। क्रांति रा गीत लिखणा कवि रौ करम हौ। सामंती जुलमां सूं आंती आयोड़ा मिनखां नै उबारण वास्तै लेखणी रौ जोर लांठौ हौ। आपरा गीत आजादी सारू लड़िण्या सिपायां खातर जीवण-जड़ी हा। जणा-जणा रा मूँडा माथै उणां रै गीतां रा बोल, उणरा भाव सूं जायोड़ी ओज हौ। औ गीत क्रांति री लपटां में ‘बल्ती में पूळा’ रौ काम करस्थौ। आजादी रै पछै ई कवि आपरी कलम हेटी नै न्हाखी। उणीज ओज अर जोस सूं नूंवै उछाह साथै नव-निरमाण रा गीत लिख्या। आपरौ गीत संग्रे राजस्थान सरकार रै सार्वजनिक संपर्क कार्यालय सूं छपियो हौ। केई अबखायां अर मानसिक चिंतावां रै पछै ई सुमनेशजी में आस-विस्वास, हिम्मत, मरदानी गाडां-गाडां भरसोड़ी ही। आपरा गीतां में औ सगळी विसेसतावां है। सेनानियां रै इतिहास रौ अेक मोटौ ग्रंथ ई आप छापियौ। इणरै ओळ्वावै मायड़भोम रा वां सपूतां नै सद्धांजली दी।

पाठ परिचय

‘मरण-पंथ रा पंथी’ क्रांतिकारी कवि सुमनेश जोशी री रचना है। इण रचना में कवि रै सुभाव मुजब त्याग अर बल्दिन री बात प्रतीकां रै ओळ्वावै कहीजी है। अेक बीज आपरौ आपौ मेटै जद अणगिण रुंख ऊगै। बादल खुद नै मिटावै जद बिरखा बूठै। दीवौ बल्नै उजास रै पसराव करै। झरणौ परबतां सूं नीचै आवै जटै ताई ई उणरौ रूप रैवै पछै वौ नदी-नाढां रौ रूप लेय लेवै। कवि कैवै कै औ मानखौ बीज सूं ऊयोड़ा रुंखां नै, दिवलै रा उजास नै, बिरखा अर बैंवता झरणां नै देखै, उणरै लारै जिकौ त्याग है उणनै अर आपौ मेटण री बात कुण देखै? आ तौ उणां री नियति है। घणा रंग वां धरती रा जायोड़ां नै, जिका खुद मिटर समाज अर देस नै कौं देयनै जावै। त्याग अर बल्दिन देवणिया जस री बाट नै जावै। उणां रा जस गीत गाईजै कै नै। वानै कोई याद करै कै भलाई नै करै। आपरौ फरज, करतव्य समझनै वै करम करै। इण माटी रा सपूतां में अर प्रकृति रा कण-कण में त्याग अर समरपण रा भाव है। अेक रो विणास अर दूजै रो सिरजण, आ प्रकृति री रीत है। कर्मठता, त्याग, बल्दिन, समरपण री सीख इणसूं मिलै तौ नव-सिरजण री प्रेरणा ई आं प्रतीकां सूं मिलै। सहज अर सरल सबदां में कवि आपरै अंतस रा भावां नै उकेरिया है। ‘मरण-पंथ रा पंथी’ मतल्ब जिका मित्यु रै मारग आगीवाण होयनै चालै अर समाज नै नूंवी दिसा देवै।

देस री आजादी में कितरा मायड़ भोम रा सपूत बीज बण आपरौ बल्दिन दियौ। बदलै में आजादी रूपी हरियल रुंख री छिया आपां नै सूंपी। आजादी रूपी महल नै ऊभौ करण खातर कित्ताक अचलेसर नौंव नीचै दबिया होवैला, काई उणां रा बल्दिन नै आपां याद करां? खुद नै मिटावण वाला वै सपूत, वै स्वतंत्रता सेनानी जस रा भूखा कोनी हा। कवि इण गीत सूं वां स्वतंत्रता सेनानियां रै त्याग अर बल्दिन नै याद करै।

मरण-पंथ रा पंथी

माटी में मिल गया बीज जद,
 ऊँग्या रुँख हजारा
 आपौ मेट, मिट्यौ जद बादल,
 फूटी जळ री धारा

दिवलो जळ-बळ मिल्यौ खाक में,
 कस्चौ जोत उजालौ
 मरण बांध कूद्यौ सिखरां सूं
 वौ झरणौ मतवालौ

वौ झरणौ मतवालौ—
 उण रौ मरण-पंथ कुण देखै
 जग तौ प्रीत करै ज्योती सूं
 बळणौ करमां लेखै

बीज गया पाताळ,
 धरण सूं ऊंचा तरवर छाया
 नीवां में गड गया—
 उणां रा गीत न कोई गाया

कोई गावै गीत, न गावै,
 उणनैं कद अभिलासा
 मरण-पंथ रा पंथी तौ बस,
 करम करण रा प्यासा

धिन-धिन वै धरती रा जाया,
 जो निज आपौ मेट
 नयौ रूप आकार धरा नैं,
 जो कर जावै भेट

अबखा सबदां रा अरथ

ऊग्या=ऊगणौ, उदय होवणौ। आपौ=असित्व। मेट=मिटायनै। फूटी=बरसी। खाक=समाप्त, मिटणौ। सिखरां=ऊंचा परबत सूं। मतवाळौ=अहम वाळौ, मद वाळौ, गीरबै सूं भस्योड़ै। बळणौ=दीयै रौ जगणौ, बाती री लौ लागणौ। तरवर=रुंख, बिरछ। अभिलासा=चावना, मनसा, इच्छा। गड गया=दबग्या, माटी रै नीचै दबणौ। धिन-धिन=धन्य-धन्य, लखदाद। नयौ रूप=नव सिरजण, नूंवौ निरमाण।

सवाल

विकल्पाऊ पढूत्तर वाळा सवाल

1. कवि सुमनेश जोशी किण भांत रा मिनख हा—
 (अ) डील-डौल, कलम नै काम सूं महाप्राण। (ब) सांस लेवण में अल्पप्राण।
 (स) डील-डौल सूं मोटा मतवाळा। (द) इण मांय सूं ओक ई नीं।
 ()

2. सुमनेश जी रैवासी हा—
 (अ) बीकानेर (ब) जैसलमेर
 (स) पूगळ (द) जोधपुर
 ()

3. “‘धिन-धिन वै धरती रा जाया’”, इणमें ‘धरती रा जाया’ है—
 (अ) बादळ, बीज, माटी। (ब) मायड़ भोम रा सपूत।
 (स) नदी, नावा, झरणा। (द) अचर अर चर जगत।
 ()

साव छोटा पढूत्तर वाळा सवाल

1. सुमनेश जोशी किण भांत रा गीत लिख्या ?
2. कवि सुमनेश जोशी नौकरी छोड'र कांई काम कर्ह्यौ ?
3. ‘मरण-पंथ रा पंथी’ कुण हा ?
4. बादळ आपरौ आपौ मेटनै कांई बरसावै ?

छोटा पढूत्तर वाळा सवाल

1. रुंख ऊग्य रै लारै कवि किणरौ किण भांत त्याग बतावै ?
2. कवि सुमनेश जोशी रै व्यक्तित्व री चार विसेसतावां बतावौ।
3. कवि री रचनावां रौ संग्रै कठै सूं छपियौ अर गीतां रा भाव कांई हा ?

लेखरूप पढूत्तर वाळा सवाल

1. कवि सुमनेश जोशी रै व्यक्तित्व अर कुतित्व ऊपर लेख लिखौ।
2. ‘मरण-पंथ रा पंथी’ कविता रौ भाव आपरै सबदां में लिखौ।

3. कवि सुमनेश जोशी री दीठ में मरण-पंथ रा पंथी किण मारग चालै अर औ अंबल्हौ मारग समाज नैं काँइ देवै ?
आपैरे विचारां सूं खुलासौ करौ।

नीचै दिरीज्या पद्यांसां री प्रसंगाऊ व्याख्या करौ—

1. माटी में मिल गया बीज जद, ऊऱ्या रुऱ्ख हजारा
आपौ मेट, मिठ्यौ जद बादळ, फूटी जळ री धारा
2. कोई गावै गीत, न गावै, उण्णैं कद अभिलासा
मरण-पंथ रा पंथी तौ बस, करम करण रा प्यासा
3. धिन-धिन वै धरती रा जाया, जो निज आपौ मेट
नयौ रूप आकार धरा नैं, जो कर जावै भेट

□कविता

लिछमी

रेवतदान चारण

कवि परिचै

राजस्थानी कविता सूं जन-जागरण रा भाव विकसित करण वाळा आधुनिक रचनाकारां मांय कवि रेवतदान चारण री खास भूमिका है। कवि रौ जलम जोधपुर जिले रै मथाणिया गांव में सन् 1924 नै होयौ। परम्परागत चारण-सैली री जूनी-डिंगल कविता री जागां कवि रेवतदान, जनचेतना रै काव्य री सिरजणा करी। ‘चेत मानखा’, ‘धरती रा गीत’ अर ‘उछाळौ’ कवि री चरचित काव्य-पोथ्यां हैं। आप केंद्रीय साहित्य अकादेमी सूं पुरस्कृत रेवतदान आपरी कवितावां अर गीतां रै पाण सोसण, अत्याचार अर अन्याव रै खिलाफ जन-जागरण रा भावां नैं जगावण रौ सरावण जोग प्रयास करूँयौ। ‘इंकलाब री आंधी’, ‘लिछमी’ अर ‘माटी थनैं बोलणौ पड़सी’ कवितावां इण दीठ सूं आपरी खास ओळखाण करावण वाळी कवितावां हैं। भाव, भासा अर कथ्य असरदार अर हिरदै में जोस अर उछाह रा भाव भरण री सामरथ राखै। आप राजस्थानी भासा री मान्यता सारू ई समरपित हा, पण मान्यता री आ टीस मन में ई रैयगी। 17 जून, 1997 नै जोधपुर में आपरौ सुरगवास होयग्यौ।

पाठ परिचै

रेवतदान चारण सोसण मुगत समाज री थापना रा हिमायती हा। करसा अर मजदूरां रै दुख-दरद सूं जुड़नै समाज सापेक्ष सामाजिक क्रांति री बात करी। आपरी रचना ‘लिछमी’ मांय काळ सूं बाथेड़ी करता करसा अर मजूर करड़ी मैणत रै उपरांत लिछमी रै नीं तूठण री व्यथा कथीजी है। कवि लिखै कै जिकौ करसौ मैणत करनै अबखायां रौ सामनौ कर लिछमी नैं पाळी-पोसी वा इतरी गुणचोर है कै धनवानां रै घरै जाय बैठी। कवि कैवै कै हे लिछमी! इण तरै कळपता प्राणां नैं अधमस्या छोडनै मत जा अर जे जावणौ इज है तौ आं अधमरिया प्राणां नैं खत्तम करनै जा। जे विधाता रै चितेरा हाथां सूं थारौ सिरजण होयौ है तौ मजूर आपरी मैणत सूं थारौ सिणगार करूँयौ है। आपरै रगत सूं थारै मैंदी लगाई है। आपरै घर-घर री जोत बुझायनै फगत थारी जोत करी है। पण हे लिछमी, दिवाळी रै दिन मजूरां रै औसानां रौ मोल चुकायां बिना ई वारंी सगळी आसावां माथै पाणी फेर थूं धनवानां री हवेल्यां जा चढी। थूं हरमेस भला अर भोव्हा लोगां नैं ठगती आयी है। ‘धान खावै मांटी रौ, गीत गावै बीरै रा’ पण अबै थनै औं गीत नीं गावण देवांला। जे थूं नीं मानी अर जावण री कैयौ तौ थारी जीभ डांम देवांला, आंख फोड़ देवांला। सेठां रै घरै जावण री तेवड़ेला तौ थारा हाथ हथकड़यां सूं अर पग बेड़यां सूं जकड़ देवांला, अठै ताईं कै थनैं पांगळी भी कर सकां हां। हे लिछमी! दीपमाळा रै लारै थारी हिरदै री काळख साफ निगै आवै। हे लिछमी! थारी चूंदडी रा झपेटा सूं इण भोव्हा ढाळा करसै री आसावां रूपी दीवट नैं बुझायनै मत जा।

लिछमी

ओढ्यां जा चीर गरीबां रा, धनिकां रै हियौ रिझाती जा
चुंदडी रै अेक झपेटौ दै, औ लिछमी दीप बुझाती जा !

हळ बीज्यौ सींच्यौ लोही सूं तिल-तिल करसौ ढीज्यौ हौ
ऊंनै बळबळतै तावडियै, कळकळतौ ऊभौ सीझ्यौ हौ
कुण जांणै कितरा दुख झेल्या, मर खपनै कीनी रखवाळी
कांटां-भुट्टां में दिन काढ्यां, फूलां ज्यूं लिछमी नै पाळी
पण बण-ठण चढगी गढ-कोटां, नखराळी छिण में छोड साथ
जद पूछ्यौ कारण जावण रौ, हंस मारी बैरण अेक लात
अधमरिया प्रांण मती तड़फा, सूळी पर सेज चढाती जा
चुंदडी रै अेक झपेटौ दै, औ लिछमी दीप बुझाती जा !

जे घडी विधाता रूपाळी, सिणगार दियौ है मजदूरां
रखडी बाजूबंद तीमणियौ, गळहार दियौ है मजदूरां
लोही में बोटी बांट-बांट, जिण मेंहदी हाथ लगाई ही
फूलां ज्यूं कंवळा टाबरिया, चरणां में भेंट चढाई ही
घर री बू-बेठ्यां बिलखी, पण लिछमी थनै सजाई ही
इक थारी जोत जगावण नै, घर-घर री जोत बुझाई ही
पण औन दिवाळी रै दिन बैरण, साम्ही छाती पग धरती
दुमकै सूं चढी हवेली में, मन मरजी रा मटका करती
जे लाज बेचणी तेवड़ली, तौ पूरो मोल चुकाती जा
चुंदडी रै अेक झपेटौ दै, औ लिछमी दीप बुझाती जा !

इतरा दिन ठगती रैई है, थूं भोळी बण छळ जाती ही
खाती ही रोटी मांटी री, पण गीत वीरै रा गाती ही
जे हमें जाण रै नाम लियौ, तौ जीभ डांम दी जावैला
जे निजर उठी महलां कांनी, तौ आंख फोड़ दी जावैला
जे हाथ उठायौ हाकै नै, नागौरी गहणौ जड़ दांला
जे पग धर दीनां सेठां घर, तौ पगां पांगळी कर दांला
महलां गढ-कोटां-बंगळां रा, वै सपना हमें भुलाती जा
चुंदडी रै अेक झपेटौ दै, औ लिछमी दीप बुझाती जा !

अबखा सबदां रा अरथ

चीर=ओढणी, चूनड़ी। हियौ=मन। रिज्जाती=राजी करती। झपेटौ=फटकारौ। बीज्यौ=बोयौ, तोप्यौ। लोही=रगत, खून। छीज्यौ=दुख पायौ। गढ़-कोटां=मैल-मालियां। तड़फ़ा=तकलीफ देवणौ। रूपाळी=फूठरी, सुंदर। कंवळा=कोमल। बिलखी=अभावग्रस्त। तेवड़ली=धारली, निस्वै कर लियौ। छळ=धोखौ। मांटी=घरधणी, मोट्यार। डांम=सळाख नैं गरम करनै सरीर रै चेपणी, डील नैं दागणौ। हाकौ=जोर सूं दकालणौ। पांगळी=दिव्यांग, पगां सूं लाचार।

सवाल

विकल्पाऊ पडूत्तर वाला सवाल

1. रेवतदान चारण किण काव्यधारा रा कवि है ?

(अ) छायावादी	(ब) कलावादी
(स) राष्ट्रवादी	(द) प्रगतिवादी

()

2. रेवतदान चारण रौ जलम कठै होयौ ?

(अ) मथाणिया (जोधपुर)	(ब) देशनोक (बीकानेर)
(स) कोठारिया (उदयपुर)	(द) हरमाड़ा (जयपुर)

()

3. कवि रै मुजब लिछमी किणरौ हियौ रीझावै ?

(अ) किसानं रौ	(ब) मजूरां रौ
(स) धनिकां रौ	(द) राजावां रौ

()

4. 'चुंदी रौ अेक झपेटौ दै', अठै झपेटौ सूं काई अरथ है ?

(अ) झटकौ	(ब) फटकारौ
(स) लटकौ	(द) लैरकौ

()

साव छोटा पडूत्तर वाला सवाल

1. मर-खप नै लिछमी री रुखाळी कुण करै ?
2. लिछमी नैं कुण सिणगारै ?
3. लिछमी नैं पांगळी करण री बात कवि उणरै कठै जावण रै कारण करै ?
4. रेवतदान चारण री एक कविता पोथी रौ नांव बतावौ।

छोटा पडूत्तर वाला सवाल

1. कवि रेवतदान चारण रौ संखेप में परिचै लिखौ।
2. रेवतदान चारण आपरी कवितावां रै पाण किणरै खिलाफ जन-जागरण रा भावां नैं जगावण रौ प्रयास कस्यौ ?
3. 'लिछमी' कविता में कवि री काई अरदास है ?
4. लिछमी कविता री कोई दो ओळ्यां लिखौ।

ਲੇਖਰੂਪ ਪੜ੍ਹਤਰ ਵਾਲਾ ਸਵਾਲ

1. “ਲਿਛਮੀ ਕਵਿਤਾ ਪ੍ਰਗਤਿਸੀਲ ਕਾਵਧਾਰਾ ਰੀ ਸਾਂਵਠੀ ਰਚਨਾ ਹੈ।” ਇਣ ਕਥਨ ਰੌ ਖੁਲਾਸੌ ਕਰੋ।
2. ਰੇਵਤਦਾਨ ਚਾਰਣ ਰੀ ‘ਲਿਛਮੀ’ ਕਵਿਤਾ ਰੈ ਭਾਵਾਂ ਰੌ ਫੂਠਰਾਪੌ ਦਾਖਲਾ ਦੇਧਨੈ ਉਜਾਗਰ ਕਰੋ।
3. ‘ਲਿਛਮੀ’ ਕਵਿਤਾ ਰੈ ਧਾਣ ਕਵਿ ਕਾਂਝ ਕੈਵਣੌ ਚਾਵੈ? ਆਪਰੈ ਸਬਦਾਂ ਮੌ ਸਮਝਾਵੋ।
4. ‘ਲਿਛਮੀ’ ਕਵਿਤਾ ਰੀ ਸਿਲਪਗਤ ਵਿਸੇਸਤਾਵਾਂ ਦਾਖਲਾ ਦੇਧਨੈ ਉਜਾਗਰ ਕਰੋ।

ਨੀਚੈ ਦਿਰੀਜ਼ਾ ਕਾਵਾਂਸਾਂ ਰੀ ਪ੍ਰਸੰਗਾਊ ਵਾਖਿਆ ਕਰੋ।

1. ਕੁਣ ਜਾਂਣੈ ਕਿਤਰਾ ਦੁਖ ਝੋਲਿਆ, ਮਰ ਖਪਨੈ ਕੀਨੀ ਰਖਵਾਲੀ
ਕਾਂਟਾਂ-ਭੁਟਾਂ ਮੌਂ ਦਿਨ ਕਾਢਿਆਂ, ਫੂਲਾਂ ਜ਼੍ਯੂਂ ਲਿਛਮੀ ਨੈ ਪਾਲੀ
ਪਣ ਬਣ-ਠਣ ਚਢ਼ਹੀ ਗਢ-ਕੋਅਂ, ਨਗਰਾਲੀ ਛਿਣ ਮੌਂ ਛੋਡ ਸਾਥ
ਜਦ ਪ੍ਰਹੁੜੀ ਕਾਰਣ ਜਾਵਣ ਰੌ, ਹੱਸ ਮਾਰੀ ਬੈਰਣ ਐਕ ਲਾਤ
2. ਜੇ ਬਡੀ ਵਿਧਾਤਾ ਰੂਪਾਲੀ, ਸਿਣਗਾਰ ਦਿਧੀ ਹੈ ਮਜਦੂਰਾਂ
ਰਖਡੀ ਬਾਜੂਬਾਂਦ ਤੀਮਣਿਯੌ, ਗਲਹਾਰ ਦਿਧੀ ਹੈ ਮਜਦੂਰਾਂ
ਲੋਹੀ ਮੌਂ ਬੋਟੀ ਬਾਂਟ-ਬਾਂਟ, ਜਿਣ ਮੌਂਹਦੀ ਹਾਥ ਲਗਾਈ ਹੀ
ਫੂਲਾਂ ਜ਼੍ਯੂਂ ਕੰਵਲਾ ਟਾਬਰਿਆ, ਚਰਣਾਂ ਮੌਂ ਭੇਂਟ ਚਢਾਈ ਹੀ
3. ਇਤਰਾ ਦਿਨ ਠਗਤੀ ਰੈਈ ਹੈ, ਥੂੰ ਭੋਲੀ ਬਣ ਛਲ ਜਾਤੀ ਹੀ
ਖਾਤੀ ਹੀ ਰੋਟੀ ਮਾਂਟੀ ਰੀ, ਪਣ ਗੀਤ ਵੀਰੈ ਰਾ ਗਾਤੀ ਹੀ
ਜੇ ਹਮੋਂ ਜਾਣ ਰੌ ਨਾਮ ਲਿਧੌ, ਤੌ ਜੀਭ ਡਾਂਮ ਦੀ ਜਾਵੈਲਾ
ਜੇ ਨਿਜਰ ਤਠੀ ਮਹਲਾਂ ਕਾਂਨੀ, ਤੌ ਆਂਖ ਫੋਡ ਦੀ ਜਾਵੈਲਾ

□ कविता

कतनी बार मर्सु / काजली तीज

रघुराजसिंह हाड़ा

कवि परिचै

रघुराजसिंह हाड़ा रोज जलम 31 मार्च, 1933 में राजस्थान रे अेक छोटे-से गांव चमलासा (खानपुर-झालावाड़) में होयौ। आपरी शिक्षा अम.अे. बी.अेड. ताई होयी। आप नूंवी धारा रा कवि मानीजै। आपरा गीत, कविता सामाजिक अर सांस्कृतिक परंपरा रा सबल पारखी रेया है। आपरी गिणती राजस्थान रे मंच रा कवियां में होवै। सिणगार, प्रेम, राजस्थान री प्रकृति रौ सुरंगौ चित्रण, अठै री संस्कृति, रीत-रिवाज रौ निभाव, देसहित अर उणरी रक्षा री ललकार आपरै काव्य रौ प्राण है। मिनख-मानखै रै संघर्ष अर अबखायां, हिवडै नैं परस्पर वाळी मारमिक वेदना आपरै काव्य में रचै-बसै। हाड़ाजी रौ काव्य सामाजिक सरोकार रौ काव्य है। राजस्थानी गीत-कविता री मिठास देस रै खूणै-खूणै पुगावण रौ जस आपरै नाव है। आपरी प्रमुख काव्य-कृतियां में 'अणबांच्या आखर', 'घूघरा', 'हरबोला', 'फूल केसूला फूल', 'क्यूं म्हां पढां', 'म्हारौ गांव' अर 'भूतपट्टी छै' आद सामल है। आप हिंदी में कई रचनावां लिखी है। 'गीत-गद्य' (गद्य-काव्य) अर 'रंग अर सौरभ' आपरी संपादित कृतियां है। राजस्थान रे माध्यमिक शिक्षा बोर्ड अर विश्वविद्यालयां रे पाठ्यक्रम में आपरी रचनावां सामल है। आकासवाणी अर दूरदरसण सूं आपरै काव्यपाठ रौ प्रसारण लगोलग होवतौ रैवै। लारलै 45 बरसां सूं साक्षरता आंदोलण सूं आपरौ गैरौ जुड़ाव रैया है। आप साहित्य अकादमी, नई दिल्ली रै राजस्थानी परामर्श मंडळ अर राजस्थानी भाषा, साहित्य एवं संस्कृति अकादमी, बीकानेर री कार्यकारिणी में ई सदस्य रैया है।

आपनै राजस्थान साहित्य अकादमी, उदयपुर कानी सूं 'विशिष्ट साहित्यकार सम्मान', जनवादी लेखक संघ, कोटा कानी सूं 'ठाडा राही' स्मृति पुरस्कार, जिला प्रशासन, झालावाड़ सूं 'साहित्य सम्मान' मिळ चुक्या है।

पाठ परिचै

'कतनी बार मर्सु' कविता आपरै कविता-संग्रे 'फूल केसूला फूल' सूं लिरीजी है। इण कविता में जग री पग-पग माथै निज स्वारथ अर छळ-कपट री नीत रौ खुलासौ करीज्यौ है। मिनख जमारै में जलम लेयनै मिनख नीं होवण री पीड़ पण इण कविता में है। कवि मिजल्या मिनखां री स्वारथ-नीत अर दिखावटीपणै रौ दाखलौ देता बतावै कै हर जलम में इण नीत रै कारण दुख अर पीड़ रै सिवाय कीं नीं मिळै। लोगां री अपणायत झूठी अर खोटी है। अपणायत रा रिस्ता-नाता निजू लाभ वास्तै थोथा है। छळ अर फरेब जग में घणौ है। मिनख री जूण केसूलै फूल दाईं दिखावटी अर गुणबायरी है। कवि जग रौ मनोवैग्यानिक अर सांतरौ चित्राम इण कविता में मांडण्यौ है।

कवि रघुराज सिंह हाड़ा रो दूजी कविता 'काजली तीज' वारी काव्यकृति 'अणबांच्या आखर' सूं सामल करीजी है। सन् 1962 रै भारत-चीन जुद्ध रै प्रसंग नैं लेयनै राजस्थान रै सगळै भूखेतर में चाव सूं मानीजण वालै तिंवार 'काजली तीज' रै मारफत अठै री वीर नारी रै वीर भावां नैं कवि सबदां रै सांचै चोखा ढाक्या है। निजू सुख आगै देस माथै बैरी रौ संकट घणौ मोटौ। वीर धण आपरै फौजी धणी नैं इण तीज माथै सीमा माथै मोरचौ संभालण रै संदेसौ अर अरदास करै। वा आपरै सायब नैं वां वीरां रै मारग चालण री बात कैवै, जका धण रौ चूड़ै नीं लजावै। तिंवार रै ओलावै कवि री वाणी नारी रै मुख सूं देस रक्षा सारू संदेसौ देवै।

कतनी बार मरूं

कतनी बार मरूं, म्हूं कतनी बार मरूं ?
उगता सूरज ज्यूं उठ, पाछी कतनी बार मरूं ?

जद जनमूं जद बा ही पीड़ा,
वै का वै नरकां का कीड़ा,
ऊही ढोबौ बोझ दना को कुण पै भार धरूं ?
म्हूं कतनी बार मरूं ?

या चौफेरूं फीकी हांसी,
झूठा अपणापण की फांसी,
सैं सँझ्या चमनी को बझबौ, कतनी बार मरूं ?
म्हूं कतनी बार मरूं ?

दौड़ा-दौड़ मचाता सावा,
मंदरा-मंदरा तपता आवा,
काची मटकी बेच ठगोरी, कितना बार मरूं ?
म्हूं कतनी बार मरूं ?

जे मांगै मीठी मनव्हारां,
नैणां मद की धारा,
बेसोरम बण-बण केसूलौ, कतनी बार मरूं ?
म्हूं कतनी बार मरूं ?

काजळी तीज

भोळी बाईसा का प्यारा बीर, तीज पै मत आज्यौ ।
खण लिया छै काजळी तीज, तीज पै मत आज्यौ,
सायब मत आज्यौ ।

म्हनैं याद छै हंदळोटा घलग्या
गीतां का बांध बलम खुलग्या
उर उळझी सतरंग डोर
पणघटां लटका कर रिया मोर
मिटी नैए पण माता की पीड़

ख्रींचस्यौ उत्तर में कोई चीर,
हिंवाळौ खाली करवाज्यौ, सायब मत आज्यौ।

धरती मैं चीर धानी ओढ़यौ
मैहो म्हारा आंगण ई धोग्यौ
म्हूं सुणरी मेघ मल्हार
हाय ! पण दमना सब सणगार
चाटस्यौ हरियाळी बारूद
माय को मती लजाज्यौ दूध,
स्वाग को चुड़लौ उजलाज्यौ, सायब मत आज्यौ।

गजरा में याद हथकड़यां की
बींदी में ठेस बरदड़यां की
केई हंस-हंस जीके हेज
छोड़ग्या जनवासा की सेज
खुगाळी में फांसी की याद
हे म्हारा भगतसिंह आजाद,
शहीदां की गेल्यां जाज्यौ, सायब मत आज्यौ।

आजादी का सरदार सजग
सीमां का पहरादार अडग
नभ नीड़े परबत शिखरां पै
म्हारा कंवळ बरफ की डगरां पै
म्हनैं छोड़या सारा चैन
गैल में बैठी बछा 'र नैन,
पाग को मान बचा लाज्यौ, सायब मत आज्यौ।
भोळी बाईसा का प्यारा बीर, तीज पै मत आज्यौ।
खण लिया छै काजळी तीज, तीज पै मत आज्यौ,
सायब मत आज्यौ।

⌘⌘

अबखा सबदां रा अरथ

ढोबौ=ढोणौ । बझबौ=बुझणौ, निंदीजणौ । बेसोरम=गंधहीण, सोरमविहूणौ । केसूलौ फूल=केसरिया पण गंधहीण
फूल, रोहिड़े रौ फूल । चौफेरूं=च्यारूं पासी । मनव्हारां=मनवारां । खण=प्रण, प्रतिग्या । साहब=पिव, धणी । उर=काढ़जौ,
हिवड़ौ । चीर=वस्त्र, ओढणौ । हिंवाळौ=हेमाळौ, हिमालय । मल्हार=संगीत री अेक बिरखा-राग । सणगार=शृंगार ।
स्वाग=सुहाग । चुड़ला=सुहाग रौ चूड़ौ । गेल्यां=मारग, रस्तै । कंवळ=कमल, सीस कुंवर । अडग=अडिग । जाज्यौ=जावौ ।
सावा=ब्यांव आद रौ सावौ । आवा=माटी रा भांडा नैं पकावण सारू आंच ।

सवाल

विकल्पाऊ पडूत्तर वाळा सवाल

1. 'कतनी बार मरुं' कविता किण कविता-संग्रे सुं लिरीजी है ?

- | | |
|------------------|--------------------|
| (अ) हरबोला | (ब) घूघरा |
| (स) म्हारौं गांव | (द) फूल केसूला फूल |

()

2. 'काजळी तीज' कविता किण कविता-पोथी सुं लिरीजी है ?

- | | |
|-------------------|----------------------|
| (अ) अणबांच्या आखर | (ब) क्यूं म्हां पढां |
| (स) रंग अर सौरम | (द) गद्य-गीत |

()

3. 'काजळी तीज' कविता किण रस री रचना है ?

- | | |
|-----------|--------------|
| (अ) वीर | (ब) वात्सल्य |
| (स) हास्य | (द) सिणगार |

()

4. रघुराजसिंह हाडा री जलम कद होयौ ?

- | | |
|-------------------|--------------------|
| (अ) 21 नवंबर 1943 | (ब) 25 अप्रैल 1933 |
| (स) 31 मार्च 1933 | (द) 25 दिसंबर 1943 |

()

साव छोटा पडूत्तर वाळा सवाल

1. रघुराजसिंह हाडा री दो काव्य-कृतियां रा नांव बतावौ।

2. 'काजळी तीज' कविता में कुणसौ देस भारत माथे आक्रमण करै ?

3. देस री हरियाळी कुण चाट रैयौ है ?

4. कवि जगत रौ किसौ सुभाव बतायौ है ?

छोटा पडूत्तर वाळा सवाल

1. 'कतनी बार मरुं' कविता री सीख कांई संदेस देवै ?

2. 'केसूला फूल' रै पाण कवि कांई कैवणौ चावै ?

3. 'काजळी तीज' कविता देस रै मोट्यारां नैं कांई संदेसौ देवै ?

लेखरूप पडूत्तर वाळा सवाल

1. 'कतनी बार मरुं' कविता रौ मूळ भाव लिखौ।

2. रघुराजसिंह हाडा री काव्य-सैली री विसेसतावां दाखला देयनै बतावौ।

3. 'काजळी तीज' कविता रै मांय कवि रै मूळ भाव नैं आज रै संदर्भ में समझावौ।

नीचै दिरीज्या काव्यांसां री प्रसंगाऊ व्याख्या करौ।

1. दौड़ा-दौड़ मचाता सावा,
मंदरा-मंदरा तपता आवा,
काची मटकी बेच ठगोरी, कितना बार मरूं?
म्हूं कतनी बार मरूं?
2. गजरा में याद हथकड़यां की
बींदी में ठेस बरदड़यां की
केर्इ हंस-हंस जीके हेज
छोड़या जनवासा की सेज
खुगाळी में फांसी की याद
हे म्हारा भगतसिंह आजाद,
शहीदां की गेल्यां जाज्यौ, सायब मत आज्यौ।

□कविता

भासा सूं अरदास / ओळबौ

चंद्रप्रकाश देवल

कवि परिचय

आधुनिक राजस्थानी कविता रा ख्यातनांव कवि चंद्रप्रकाश देवल रौ जलम 14 अगस्त, 1949 नै उदयपुर जिलै रै गोटीपा गांव में होयौ। टाबरपण सूं ई सिरजण में आपरी रुचि रैयै। ‘पागी’, ‘कावड़’, ‘मारग’, ‘तोपनामा’, ‘राग-विजोग’, ‘झुरावौ’, ‘उडीक पुराण’ अर ‘तीजौ अयन’ आपरा चरचित कविता-संग्रह है। कविता रचन रै सागै आपरौ संपादन-कौसल ई सरावण जोग है। श्री देवल ‘वंश भास्कर’ रौ नौ भागां में बेजोड़ संपादन करैयौ। फ्योदोर दोस्तोयेवस्की रै उपन्यास ‘क्राइम एंड पनिशमेंट’ अर सैम्युअल बैकेट रै नाटक ‘वेटिंग फोर गोडो’, कविता पोथां ‘अकाल में सारस’ (हिंदी) ‘जटायु’ (गुजराती), ‘कर्हीं नहीं वर्हीं’ (हिन्दी), ‘शब्देर आकाश’ अर ‘श्री राधा’ (उड़िया), ‘न धुप्पे ना छाँवै’ (पंजाबी), ‘जाते दुरई जाई’ (बांगला) समेत केई पोथां रै राजस्थानी में उल्घौ करैयौ। आप साहित्य अकादेमी, नई दिल्ली रै राजस्थानी परामर्श मंड़ल रा संयोजक रैयै।

कवि चंद्रप्रकाश देवल नै भारत सरकार ‘पद्मश्री’ अलंकरण सूं सम्मानित करैयौ। साहित्य अकादेमी, दिल्ली रौ ‘राजस्थानी पुरस्कार’ अर ‘राजस्थानी अनुवाद पुरस्कार’, राजस्थान साहित्य अकादमी, उदयपुर रौ ‘मीरां पुरस्कार’, राजस्थानी भाषा, साहित्य एवं संस्कृति अकादमी, बीकानेर रौ ‘सूर्यमल्ल मीसण शिखर पुरस्कार’, राजस्थानी अकादमी, दिल्ली रौ ‘लखोटिया पुरस्कार’ अर के. के. बिड़ला फाउंडेशन रौ ‘बिहारी पुरस्कार’ ई आपनै मिळ्यौ।

पाठ परिचय

कवि चंद्रप्रकाश देवल री पोथी ‘तोपनामा’ मांय मिनख री आवगी जीवाजूण रौ म्यानौ परगलाई सूं निजर पसार देखीजै। नूंवी दीठ, नूंवी सोच, इधका बिंब साथै कैवण री कूंत साव निकेवली लखावै। पोथी री सगली कवितावां अेक सूं अेक सवाई अर अरथबोध में पूरसल संवेदना जगावण वाली, भावां रा सागर में ऊँडै तळ ताईं गोता लगावण वास्तै पाठकां नैं बांधण वाली है। आं सजोरी कवितावां मांय सूं दो कवितावां इण पाठ में राखीजी है—‘भासा सूं अरदास’ अर ‘ओळबौ’।

आं दोनूं कवितावां रौ आधार अेक पण भाव न्यारा है। आखर रा रूप, भेद अर उणरै मांयली तासीर नै समझण वाला कवि चंद्रप्रकाश देवल लिखै कै केई आखर औगणगारा, केई बादीला, नखराला, खुरदरा अर सुवांला होवै। केई आकरा तौ केई अंटाला। आखरां में इत्तौ भेद! बात कैवण रौ आपै-आपरौ न्यारौ-न्यारौ ढालौ व्है सकै। कैवत है कै बोली में विस अर इमरत दोनूं व्है। आपरै वास्तै गुणचोर वाला बोल औगणगारा, बात नौं मानण वाला बादीला, जिणां में मान-मनवार, संयोग सिणगार रौ वरणाव व्है वै नखराला अर वियोग सिणगार में पीड़ देवण वाला कै चुभण वाला बोल खुरदरा व्है सकै। मन नैं सुख अर संतोख देवण वाली बातां रौ वरणाव सुवांला आखरां में व्है सकै। करडौ साच, जिणमें रीस है, किणी रौ वाचौ या प्रण है, वै आकरा आखर हिया नैं बींधण वाला, केई ताना वाला डोढा बोल व्यंग्य बाण, जिकां नैं मिनख जीवै जठै लग नौं भूलै। कवि नैं आपरी भासा सूं हेत अर अपणास है, इण कारण वै

आं सगळा बोलां नैं आपरा अंतस में राख उणां रै माण राख्यै। कवि आपरी भासा रा सगळा आखरां सूं झोळी भर भासा नैं सिमरथ करणी चावै। कवि रै अंतस में साचै अरथां में भासा री चीरफाड़ करनै मरम जाणण वाढौ अेक भासा वैग्यानिक बैठौ है, जिकौ रोहिड़ा रा फूलां में सुगंध भरण री खिमता राख्यै। सबदां रा कारीगर कवि गुणबायरा अर फिजूल सबदां नैं ई अरथवान बणावण री उडीक में है। आप भासा सूं अरदास करै कै दया करनै म्हारा अधूरा अंतस में वास तौ कर। बिना भासा रै मिनख जाणै आधौ अधूरौ है। भासा ऊंकार रै रूप अर ऊंकार ब्रह्म है। ब्रह्म ई जीव है तौ भासा नैं अंगेजियां अर केवटियां इज मुगती है।

दूजी कविता ‘ओळबौ’में कवि आपरी पैलडी पीढी नैं ओळबौ देवै, जिकां मायड़ भासा री अंवेर नॊं करी, उणरी रिछ्या नॊं करी। कवि मुजब औ इज कारण रैयौ है कै मायड़ भासा री जिकी ठौड़ होवणी चाईजती, वा आज कोनी। कवि रा बोल काळजै लागै जैड़ा है। सांस अर बोली रौं गैरौं सगपण है। सांस रै साथै ई बोली रा बोल निकलै। मायड़ भासा नैं बोलतां जिण सुख रौं लखाव होवणौ चाईजै, उण ठौड़ अेक दुख होवै। मां रा परस सूं डील में गिलगिली अर हियौ हुलसै पण उणरी ठौड़ अेक सूळ चुभनै नासूर रौं रूप लेय लेवै— वा पीड़, वौ दरद सैन कोनी करीजै। कवि आपरी देह रै कंजी लागण री बात करै कै रोग में टसकणौ अर पांगळौ व्हिया पछै ठिरड़ीजणौ तौ सोरौ पण बिना आपरा बोलां रै, भासा रै जीवणौ घणौ दोरौ। कवि कैवै कै म्हैं लाख कोसिस करूं, रोवूं-कल्पूं पण उणां बडेरां नैं ओळबौ ई किणमें देवू, क्यूंके म्हरै कनै उणां री भासा कोनी रैयी। बात कैवण री आंट कवि चंद्रप्रकाश देवल री काव्य-खिमता नैं दरसावै। बिना आपरी मायड़ भासा रै मिनख मेहण्यां देवै। उकळतौ तेल बाळै ज्यूं वै बोल काळजै बाळै। पन्ना धाय वाढौ जमानौ अबै कोनी। दूजी भासा नैं जीवती राखण वास्तै, सिमरथ करण वास्तै म्हारी मायड़ भासा आपौ गमाय दियौ। आज आठां अर साचां रौं जमानौ कोनी। सामधरमियां री पूछ कोनी, भलौ करणवाळा मूरख गिणीजै। आपरी भासा नैं नूवै सीगै सूं अंवेरण री खेचल आं दोनूं कवितावां में सुभट निजर आवै। ‘अरदास’ अर ‘ओळबौ’ कैवण रा न्यारा रूप, पण जनमानस जिण रूप में समझ सकै, उणनैं आपरौ आपौ निजर आवैला। भासा जीवण रै वास्तै, विचारां रै प्रगटीजण वास्तै, खुद नैं खुद री ओळखाण करावण वास्तै किती जरूरी है। उणरी रुखाळी कीकर व्है सकै? कवि री अरदास, भासा रै वास्तै आपरौ हेज अर मिटती भासा रै वास्तै जिकी पीड़ है वा हरेक मानवी री पीड़ होवणी चाईजै। मायड़ भासा बिना कैडी ओळखाण अर कैडौ जीवण? कवितावां री अेक-अेक ओळी मरम परसी है। वा ऊंडी पीड़ अंतस में चेतना जगावती दीखै।

भासा सूं अरदास

जाणूं घणौ ई म्हैं
व्है केई सबद
अणूता ओगणगारा
केई व्है वां सूं न्यारा
केई बादीला
केई नखराळा
केई खुरदरा
केई सुंवाळा
केई अणूता आकरा
हियौ तोड़ लै औड़ अंटाळा
म्हारी आंख्यां री सौगन

झेलूंला अेकुका नै आपरी पलकां री झोळी
जिणसूं अरथवानं व्है म्हरी बोली ।
व्है केर्इ गुणबायरा-फिजूल
रंग राता रोहिड़ा रा फूल
व्है तौ व्है औड़ी तासीर वाळा
पण आवण रा मता सूं
अेकर म्हरी कांनी मूँडै तौ करै !
उडीकतौ थारी दयावती
ऊभौ थारै कोळै
म्हारी भासा !
अेकर तौ रैवास कर
म्हारै ई अधवीठे अंतस
म्हैं पूरण व्है जावूं
मर्खां मुगातर पावूं ।

ओळ्बौ

म्हारी पांसळी
थारै हेज री सूळ खुबै, मां
अर गिलगिली री ठौड़े
अेक पीवा जरद, दरद रै पसराव
म्हैं परसेवै घांण ।
बोलूं तौ किण आसरै
बडाउवां भासा गुमाय दी ।
लेहणौ छोडग्या व्हैता तौ थुड़तौ दिन-रात
बणती आफळ उतार देवतौ
मांदौ छोडग्या व्हैता
तौ ई टसक-टसक जीव लेवतौ
छोड जावता पांगळौ
तौ ठिरड़ आपरौ गात, हर जरै पूग जावतौ ।
कांन देय साबूत, बोल गुमायगा
दीसता-दासता फूठरा नै दागल कैवायग्या ।
अबै वांनै डाडतौ
घणी ई आफळ करूं
पण ओळ्बौ नॊं दिरीजै
आज चलण री भासा वै समझैला कोनी

अर म्हरै पाखती वांरी भासा रही कोनी ।
 मेहण्यां ई मेहण्यां सुणीजै
 चारूं दिस
 ताता तेल री छांट ज्यूं उफसावै काळजौ फाला ।
 आपरौ पूत मराय
 जाणै धाय-मां जीवायौ परायौ वंस
 औड़ा जीव आज रै जमारै
 लाख सांमखोर पण गिणीजै काला !
 ॥६॥

अबखा सबदां रा अरथ

ओगणगारा=ओगुणां वाळा, अवगुणां रा घर। क वरग, च वरग, ट वरग, त अर प वरग बिलटी रा आखरां रा
 मेळ सूं बोलीजै पण कहीजै वै स्पर्श आखर (स्वर रौ औगण) क्रतघन।

बादीला=आपरौ स्वभाव या बात नैं पकड़ण वाळा (जिही)। वरण या आखरां रै उच्चारण री न्यारी-न्यारी ठौड़ है— कंठ दंती, ओष्ठ, तालव्य, मूर्धन्य, उच्चारण स्थान नॊं बदळै, इण रूप में बादीला।

नखराळा=भाव-भंगिमा वाळा। हरेक वरग रा लारला तीन आखर (ग घ ङ....) अंतस्थ है, जिणमें उच्चारण री बगत झणकार होवै अर भाव-भंगिमा, हाव-भाव वाळा सबदां सूं ई मन री वीणा रा तार झणझणाट करै।

खुरदरा=दरदरा, कीं चुभणवाळा। श, ष, स, ह रै उच्चारण सूं कंठ में खाज-सी आवै, गुदगुदी होवै, इण रूप में खुरदरा आखर।

सुंवांळा=नरम, कंवाळा, मनभावणा। हरेक वरग रा दूजा आखर रै सिवाय सारा आखर अंतस्थ अत्यप्राण है, जिण में मिनख री संचित ऊर्जा खरच नॊं होवै अर्थात आराम देवण वाळा आखर।

आकरा=करड़ा, खारा। हरेक वरग रौ पैलौ-दूजौ आखर अर श, ष, ह औं अघोस या आकरा आखर गिणीजै, जिणां रै उच्चारण में खरखराट होवै।

अंटाळा=व्यंग्योकि वाळा या कैवण रै न्यारै ढंग ढाळै वाळा। अनुनासिक वरणां नैं अठै अंटाळा कैय सकां, जिणमें सांस नैं नाक सूं निकाळणी पड़ै। उच्चारण रै बगत आपरी न्यारी आंट वाळा।

रोहिड़े रा फूल=रूपाळा पण गुणहीण, देखावू। तासीर=आदत, प्रवृत्ति। दयावती=करुणा, दया, मेहरबानी। कोळै ऊभौ=बारणै रै कंवळै कनै खड़गौ। अधर्वीठै=अधूरौ, अपूरण। मुगातर=मुगती, मोक्ष। पांसळी=पसळियां। सूळ=कांटौ, बडौ कांटौ। पीळौ जरद= पीळौपटू, मवाद वाळौ नासूर, जूनौ घाव। परसेवै घांण=पीसना सूं लथपथ। बडाउवां=बडेरा, पूर्वज। गुमायदी=गवां दी, खोय दी। लेहणौ=करजौ। थुड़तौ=आफळतौ, कोसिस करतौ। ठिरड़तौ=घसीटतौ। गात=सरीर, डील। मांदौ=बिमार। पांगळौ=पगां सूं लाचार। दागल=दागदार, कर्वकित। डाडतौ=जोर सूं रोवतौ, अरड़वतौ। मेहण्यां=ताना, मेहणां। ओळबौ=सिकायत, उपालंभ। उफसावै=फुलावै। फाला=फोड़ा, पाणी सूं भस्योड़ौ दुखणियौ। धाय मां=मां टाळ दूध चूंघावण वाळी, पाळपोख करण वाळी। सांमखोर=स्वामिभक्त, देसभक्त।

सवाल

विकल्पाऊ पड़तर वाळा सवाल

साव छोटा पडूत्तर वाला सवाल

1. कवि चंद्रप्रकाश देवल रौ जलम कद अर कठै होयौ ?
 2. चंद्रप्रकाश देवल री दोये पोथ्यां रा नांव लिखौ।
 3. चंद्रप्रकाश देवल आपरी कविता में किणसु अरदास करै अर क्युं ?

छोटा पड़ूत्तर वाला सवाल

1. कवि चंद्रप्रकाश देवल आपरी कविता में किण तरै सबदां री बात करै ?
 2. चंद्रप्रकाश देवल किण-किण रचनावां रा राजस्थानी उल्था करूया ? नांव लिखौ।
 3. ‘ओळ्डो’ कविता में कवि पत्रा धाय री बात क्युं करै ?

लेखरूप पड़ूत्तर वाळा सवाल

1. कवि चंद्रप्रकाश देवल रै जीवण-परिचै अर सिरजण री साख रौ दाखला देयनै वरणाव करौ।
 2. आपरी मायड़ भासा सारू कवि चंद्रप्रकाश देवल रै मन में काईं पीड़ है? दाखलां समेत समझावौ।
 3. 'भासा सु अरदास' कविता रौ भाव आपरै सबदां में लिख्हौ।

नीचै दिरीज्या काव्यांसां री प्रसंगाऊ व्याख्या करौ।

1. जाणूं घणौं ई म्हैं
क्वै केर्इ सबद
अणूता ओगणगारा
केर्इ क्वै वां सुं न्यारा

केर्इ बादीला
 केर्इ नखराला
 केर्इ खुरदरा
 केर्इ सुंवाला
 केर्इ अणूता आकरा
 हियौ तोड़ लै औड़ अंटाला

2. उडीकतौ थारी दयावती
 ऊझौ थारै कोळै
 म्हारी भासा !
 अेकर तौ रैवास कर
 म्हारै ई अधवीठै अंतस
 म्हैं पूरण व्है जावूं
 मर्यां मुगातर पावूं ।
3. बोलूं तौ किण आसरै
 बडाउवां भासा गुमाय दी ।
 लेहणौ छोडग्या व्हैता तौ थुड़तौ दिन-रात
 बणती आफळ उतार देवतौ
 मांदौ छोडग्या व्हैता
 तौ ई टसक-टसक जीव लेवतौ
 छोड जावता पांगळौ
 तौ ठिरड़ आपरौ गात, हर जठै पूग जावतौ ।
 कांन देय साबूत, बोल गुमायगा
 दीसता-दासता फूठरा नै दागल कैवायग्या ।

□कविता

टूटी ओदणिये / अेक वाटली आटा नु हगु

डॉ. ज्योतिपुंज

कवि परिचै

डॉ. ज्योतिपुंज (जयप्रकाश पंड्या) रौ जलम 28 सितंबर, 1952 नै डूँगरपुर जिलै रै टामटिया गांव मांय होयौ। आपरा पिता स्व. घनश्याम शर्मा स्वतंत्रता सेनानी हा। भणाई में आप संस्कृत, इतिहास अर राजस्थानी में अम.अे. करी। अम.अे. राजस्थानी में स्वर्ण पदक विजेता पण रेया। आप बी.एड., पत्रकारिता मांय स्नातकोत्तर डिप्लोमौ, साहित्य-रत्न अर पीआई.डी. ई करी। अेक बरस अध्यापन रौ काम कर्स्यां पछै 1977 सूं आकाशवाणी मांय प्रसारण अधिशाषी, 1987 सूं 1991 तांई भारत सरकार रा क्षेत्रीय प्रचार अधिकारी (प्रतिनियुक्ति) अर 1991 सूं सेवानिवृत्ति तांई आकाशवाणी मांय कार्यक्रम अधिशाषी रै पद माथै काम कर्स्यौ। अबार आप स्वतंत्र लेखन करै।

आपरी पैली राजस्थानी कविता पोथी 'चन्नण ना छांटा' घणी चावी हुयी। 'बोल डूँगरी ढब ढबुक' कविता संग्रे माथै राजस्थानी भाषा, साहित्य एवं संस्कृति अकादमी, बीकानेर रौ सूर्यमल्ल मीसण सिखर पुरस्कार (1993) अर आपरा नाटक 'कंकू कबंध' माथै साहित्य अकादमी, नई दिल्ली रौ पुरस्कार (2000) मिळ्यौ। आपनैं महाराणा मेवाड़ फाउंडेशन रौ 'महाराणा कुंभा अवार्ड' अर 'संबोधन' मासिक पत्रिका रौ 'निरंजन नाथ आचार्य पुरस्कार' पण मिळ चुक्या है। आप राजस्थानी भाषा, साहित्य एवं संस्कृति अकादमी, बीकानेर री कार्यसमिति अर साहित्य अकादमी, नई दिल्ली री सलाहकार-समिति रा सदस्य रैय चुक्या है। आप दिखणादै राजस्थान रै आदिवासी अंचल (वागड़) री भासा-साहित्य अर संस्कृति री खूब सेवा करी अर राजस्थानी आंदोलन मांय सक्रिय भूमिका अदा करी है। आपरी राजस्थानी अर हिंदी मांय मोकळी पोथां छप चुकी है। गद्य अर पद्य दोनूं विधावां में सिरजण रै साथै-साथै आप अनुवाद पेटै ई सांतरौ काम कर्स्यौ है। आप उदैपुर री चावी साहित्यिक संस्था 'युगधारा' अर उणरी साखा 'राजस्थानी जाजम' री थरपणा करण वाळा साहित्यकार है।

पाठ परिचै

बोलियां किणी भासा री सिमरिधी री निसाणी होया करै। बीजा सबदां मांय कैय सकां कै बोलियां रौ समूह ई भासा होवै। अवधी, बघेली, छत्तीसगढ़ी, ब्रज, बांगरू, खड़ी, कन्नौजी, बुंदेली, मैथिली आद बोलियां हिंदी रौ रुतबौ बधावै तौ मेवाती, मेवाड़ी, मालवी, मारवाड़ी, हाड़ेती, दूँदाड़ी अर वागड़ी राजस्थानी नैं रातो-माती करै। डूँगरपुर, बांसवाड़ा अनै उदैपुर जिलै रै वागड़ खेत्र री बोली वागड़ी। डॉ. ज्योतिपुंज वागड़ी बोली री महक सूं राजस्थानी साहित्य नैं रातो-मातौ करणवाळा कवि है। आंरी कवितावां में वागड़ अंचल री ठेठ सबदावली रा ठाठ देख्या जाय सकै। आं कवितावां रै मारफत पढेसरी वागड़ अंचल में प्रचलित 'वागड़ी' बोली अर उणरै साहित्य री बानगी देख सकैला।

'टूटी ओदणिये' स्त्रैनांव री पैली कविता में कवि आदिवासी जनजीवण रौ जीवंत वरणन कर्स्यौ है। अेक मिनख री दुखदेणी दिनचर्या अर उणरै मांयली दोघाचींती नैं कवि घणै मरमपरसी ढंग सूं प्रगट कीनी है। सूरज वीं रै घर रौ छप्पर फाड़नै च्यानणौ न्हाखै। दूजी कानी वौ टूटी खाट री अदावण बांधतौ-बांधतौ घबरावण लागै, क्यूँकै पैलै दिन आथण कोई बेईमान हवा जोरा सूं उणनैं खाटली माथै पटक गी अर अदावण टूटगी। वौ बार-बार बांधै अर फेर वौ ई हाल। वौ कैवै— रोज चढती रात रा पास वाळै बाड़ मांय ऊर्यै मोगरै री कळियां उघड़वा लागै अर उणरी

मस्तानी सुगंध बाड़ माथै चढनै महै झालौ देवै अर महै डरतौ-डरतौ धीरै-सीक थोड़ै किंवाड़ उधाड़ूं जाऊं, पाढ़ै आवूं अर हिम्मत करनै बाड़ माथै चढनै फूल तोड़वा इज लागूं कै कूकड़ै बोल जावै अर महै धीरै-सीक छानै-छानै टूटी अदावण वाळी खाटली माय डूब ज्याऊं अर फाटी धोती ओढनै सोय जावूं।

इण कविता माय टूटी अदावण मेहनतकस मिनख री बदहाली रौ, तौ सूरज नूवै जुग रै नूवै ग्यान रौ अर मोगरै री महक खुसियां रौ प्रतीक है। कवि रौ आसय है कै सूरज रौ प्रकास अर मोगरै री महक मेहनतकस मिनख रै पांती नीं आवै। खून-पसीनौ बहावण रै उपरांत ई उणरै पांती तौ टूटी अदावण वाळी खाटली इज आवै। वौ सोसकां री बेर्इमानी रौ इतरौ सिकार है कै रोजी-रोटी रै जुगाड़ में पचतो रैवै, पण उणरी खाटली री अदावण ढीली री ढीली रैय जावै।

दूजी कविता ‘अेक वाटली आटा नु हगु’ सिरैनांव सूं है। अेक मंगतै रै मारफत कवि अठै भूख नैं बखाणी है। कवि री संवेदना कठै-कठै जायनै ठैरै, इणरौ उथळौ इण कविता सूं सोध्यौ जाय सकै। कवि अठै आपणै देस री सांस्कृतिक मरजादावां नैं, संस्कृति री अंतरधारावां नैं अर सामाजिक जागरण नैं आपरै पेट सूं जोड़ता थकां विकसित करण रौ जतन करूयौ है। रोज दिनुगौ भींत माथै टंग्योड़ै तंबूरौ उतरै अर आपरी बदनसीबी रौ गान घर-घर करै अर बजावण वाळै नैं दिरवा देवै आंतिडियां री खुराक अेक बाटकी आटो। कबीर रा निर्गुणी भजन सगुणा जावै अर गावणवाळै रै गळै अर सुणन वाळै रै कानां माय दोनां जणां रै बीच बंधवाय जावै अेक बाटकी आटै रौ रिस्तौ। कवि कैवै कै बजार री भीड़ नीं आवै इणरै बहकावै माय अर भीड़ रा मुखौटा धरती माथै जगां सोधवा माय आंधा, बोळा अर गूंगा होयग्या है अर पग सूजनै किणी भविस री जलम-पत्रिकावां बणा रैया है। तद तंबूरौ कैवै कै अबार औ जीवण बिजली रौ पंखो, कै बिजली रौ रेडियो, टेलिविजन कै चक्की बणग्या है। कोई पारकै करंट सूं जुड़योड़ै, बटण दबावै तौ चालू अर अेक बटण दब जावै तौ बंद। अेक बाटकी आटो कै पांच पइसां रौ सवाल है।

आ कविता दुनिया में बधती यांत्रिकता अर खूटती रागात्मकता कानी सानी करै। तम्बूरै रौ गान जिकौ हरेक मिनख सूं दिलां रौ रिस्तौ जोड़तौ, आज फगत अेक बाटकी आटौ मांगण रौ संज मात्र रैयग्या है। इण दीठ सूं लोग आंधा, बोळा अर गूंगा होयग्या है। लोगां रै चैरां री ठौड़ मुखौटा उग आया है। प्रगति री दिसा में बधता पग सूजग्या है। औड़ै में भविस कैडोक होवैलौ, आ बात सांप्रत दीख रैयी है। तंबूरै री पीड़ है कै दिलां रा तार बिखरग्या। जीवण किणी परायै तारां सूं अर इंसानी संबंध फगत पर्इसै सूं जुड़ग्या है।

टूटी ओदणिये

हूरज मारै घर ना
थापणा फोड़ी
मएं एरं नाकवा मांड्यौ है
नै मुं ?
मुं मारै अंदारा अवा मएं
खाटला नी टूटी ओदणिये
बांदतौ-बांदतौ
घबरावा मांड्यौ हूं
केम के कालै हांज नी
बईमान हवा
जोराइये मनै दाबी नै
खाटला ऊपर नाकी गई

नै ओदणिये तुङ्गी गई
 अबे मुं फिरी बांदु
 त 'फिरी कुणेक.... ?
 दाङ्गी सड़ती रातरै
 पाय वारा वाड़ा मएं
 उग्या मोगरा री करियै
 उगड़वा मांडै
 नै एनी मस्तानी सुगंध
 लोड़ मातै सड़ी
 ऊपरवाड़ी करी
 मनै ईसारौ करे
 नै मुं
 बीतौ-बीतौ
 धी१११रै रई नै
 कमाड़ उगादूं / थुड़ोक
 जऊं / पासौ आवूं
 पासौ जऊं
 हिम्मत करी
 लोड़ मातै सड़ी
 फुलू तुड़वास् जऊं / कै
 कूकडू बोली जाए
 नै मुं पासौ
 धी१११रै रई नै
 सानै-सानै
 टूटी ओदणिये वारा
 खाटला मएं
 गदी जऊं नै
 फाटी धोती ओड़ी नै
 हुई जऊं।

अेक वाटली आटा नु हगु

रोज हवारै
 भेत मातै टंगेलौ तंबूरौ उतरै
 नै एना बदनसीबी नु गान
 घेरै-घेरै करै
 नै बजाड़वा वारा नै
 अलावौ दै, आंतड़ियं नी खौराक
 अेक वाटली आटौ।

कबीर नं निर्गुणी भजन
 सगुणाई जएं गावा वारा नै गरा मएं
 हाम्बरवा वारा ना कान मएं
 नै बे नै बेसै
 बंदाई जाय अेक वाटली आटा नौ रिस्तौ।
 बजारी भीड़
 नती आवती एना बकाब्बा मएं
 भीड़ न मुडं
 धरती मातै जगा हौदवा मएं
 बांदर बैरं नै बोबडं थई ग्यं हैं
 नै पोग हूंजी नै
 कहयाक भविष्य नी
 जन्मपत्रिए बणावीस्या है
 तोय तंबूरौ कैय कै—
 “अवै त’आ जीवणी
 विजरी नौ बैजणौ
 के विजरी नौ रेडियौ, टेलीविजन
 कै सक्की बणीग्यू है
 कौणेक पारका करंट मएं
 जोडायलु
 बटन दबाते त’सालू
 नै अेक बटण दबी जाय
 त’बंद....
 अेक वाटली आटौ
 कै पांस पइसं नौ सवाल ।”

॥५॥

अबखा सबदां रा अरथ

ओदणिये=दावण, अदवायण, खाट रै पगाणै कानी री जेवडी। हूरज=सूरज। मारे=म्हरै। ना=रा। थापण=छप्पर,
 केलू, खपरेल। फोड़ी=फाडनै। मएं=मांय। एं=प्रकास। नाकवा मांडयो=नाखवा लाग्यो। ने=अनै। मुं=म्हूं, म्हैं।
 अंदरा=अंधारा। अवा=कोठडियै। खाटला=मांचली। नी=री। बांदतौ=बांधतौ। मांडगौ=लाग्यौ। केम के=क्यूंके।
 हांज=सांझ। जोराइये=जबरदस्ती, माडाणी, धिंगाणै। दाबी नै=दबायनै। फिरी=भळै। त’फिरी=तौ भळै। कुणेक=कोई
 आयनै। दाढ़ी=डैली, रोजीना। सड़ती=चढती। रातरे=रात नै। पाय वारा=पास वाव्य। वाडा मएं=बाड़ मांय। करिये=कळियां।
 उगड़वा मांडै=उघड़वा लागै। एनी=इणरी। लोड़=बाड़। मातै=माथै। सड़ी=चढी, चढनै। ऊपरवाड़ी करी=अतिक्रमण
 करै, ऊपर सूं होयनै घर रै मांय कानी आवै। मनै ईसारौ करै=म्हनै झालौ देवै। बीतौ=भयतौ, घबरावतौ। धी११७रे रई
 नै=चुप रैयनै। कमाड़=किवाड़। उगाडू=उघाडूं। थुड़ोक=थोड़ोक। जऊं=जाऊं। पासौ=पाछौ। तुड़वा=तोड़वा सारू।
 सानै=सानै=छानै=छानै। वारा=वाला। गदी जऊं=गड़ जाऊं, डूब जाऊं। ओड़ी नै=ओढनै। हुई जऊं=सोय जाऊं।
 वाटली=बाटकी। नु=रो। हगु=सगौ, संबंध, सगपण, रिस्तौ। हवारै=संवारै, परभातै। भेत=भीत। टंगेलौ=टंग्योड़ौ।

तंबूरौ=अेक भांत रौ बाजौ। एना=इणरी, आपरी। घेरै-घेरै=घर-घर। अलावौ दै=दिलवाय देवै। आंतडियं नी खौराक=आंतडियं री खुराक। नं=रा। सगुणाई जएं=सगुण होय जावै। गरा=गळा। हाम्बरवा=साम्भळवा, सुणवा। बे नै=दोनां रै। बेसै=बीचै, बीचाळै। बंदाई जाय=बंधवाय जावै। नती आवती=नहीं आवै, कोनी आवै। बकाब्बा मएं=बहकावै मांय। मुटं=मुखौटा। हौदवा=सोधवा, खोजवा, ढूँढवा। बांदर=आंधा। बैरं=बहरा। बोबडं=बबडी, गुंगा। थई ग्यं=होयग्या। पोग=पग। हूँजी नै=सूजनै। कइयाक=किणी। जन्मपत्रिए=जलम पत्रिकावां। बणावीर्या=बणाय रैया। अवे त'आ जीवणी=अब तो ओ जीवण। विजरी=बिजठी। बैजणो=बीजणो, पंखो। कै=या। सककी=चककी। कौणेक=कोई अेक। पारका=पराया। जोड़ायलु=जुड़योड़ै। सालू=चालू।

सवाल

विकल्पाऊ पडत्तर वाळ सवाल

साव छोटा पड़ूत्तर वाला सवाल

1. डॉ. ज्योतिपुंज रो जलम कठे होयौ ?
 2. डॉ. ज्योतिपुंज नैं कुणसी पोथी माथै साहित्य अकादेमी पुरस्कार मिळ्यौ ?
 3. ‘टूटी ओदणिये’ कविता मायं कवि किण जीवण रो जीवंत वरणन कीधौ है ?
 4. ‘अेक वाटली आटा नु हगु’ कविता मायं कवि किणरै मारफत भूख नैं बखाणी है ?

छोटा पड़त्तर वाला सवाल

1. राजस्थानी भासा री खास-खास बोलियां कुण-कुणसी हैं ?
 2. 'वागड़ी' किण खेत्र री बोली है ?
 3. कविता रौ नायक खाटली री टूटी ओदणिये बांदतौ-बांदतौ घबरावा क्यूँ लाग्यौ है ?
 4. 'टूटी ओदणिये' कविता रौ नायक फूल तोडवा जावै तौ काँई होय जावै ?

लेखरूप पडून्तर वाळा सवाल

1. “डॉ. ज्योतिपुंज री कवितावां में वागड़ अंचल री ठेठ सबदावली रा ठाठ देख्या जाय सकै।” पठित कवितावां रै आधार माथै खुलासौ करौ।
 2. ‘टूटी ओदणिये’ कविता री भाव-संवेदना आपरै सबदां में लिखौ।
 3. ‘अेक वाटली आटा नु हगु’ कविता में कवि काईं संदेस देवणो चावै? खुलासौ करौ।
 4. भाव अर कला पख री दीठ सूं डॉ. ज्योतिपुंज री काव्य कला री परख करौ।
- नीचै दिरीज्या पद्यांसां री प्रसंग समेत व्याख्या करौ।**

1. दाढ़ी सड़ती रातरै

पाय वारा वाड़ा मएं
उग्या मोगरा री करियै
उगडवा मांडे
नै एनी मस्तानी सुगंध
लोड मातै सड़ी
ऊपरवाड़ी करी
मनै ईसारौ करे
नै मुं
बीतौ-बीतौ
धी१११रै रई नै
कमाड़ उगाडूं / थुड़ोक
जऊं / पासौ आवूं
पासौ जऊं

2. तोय तंबूरौ कैय कै—

“अवै त’आ जीवणी
विजरी नौ बैजणौ
के विजरी नौ रेडियौ, टेलीविजन
कै सक्की बणीग्यू हैं
कौणेक पारका करंट मएं
जोडायलु
बटन दबाते त’सालू
नै अेक बटण दबी जाय
‘त’बंद....
अेक वाटली आटौ
कै पांस पइसं नौ सवाल।”

परिशिष्ट

□ राजस्थानी साहित्य रौ इतिहास

□ काव्य री परिभासा, तत्त्व, भेद, प्रयोजन
अर राजस्थानी छंद-अलंकार

□ राजस्थानी निबंध-लेखण

□ साहित्य-इतिहास


राजस्थानी साहित्य रौ इतिहास

विक्रम री नवीं सताब्दी सूं आपरौ आपौ लियां मरुभासा रै रूप में चावी राजस्थानी री पिछाण मुलकां चावी है। राजस्थानी भासा आपरी उत्पत्ति रै बगत सूं ई विद्वानां रै विचारां मुजब चालती आई है। इणरी उत्पत्ति नैं लेयनै भासाविद् ओक मत कोनी। अपभ्रंस रा 27 भेदां मांय सूं तीन अपभ्रंसां रौ चलण घणौ रैयौ— 1. सौरसेनी अपभ्रंस, 2. मरुगुर्जरी अर 3. नागर अपभ्रंस। राजस्थानी वास्तै ई औं तीन विचार चालै। केई मरुगुर्जरी अपभ्रंस सूं तौ केई नागर अपभ्रंस अर केई सौरसेनी सूं इणरी उत्पत्ति मानै। पण घणकरा विद्वान सौरसेनी सूं राजस्थानी री उत्पत्ति मानै, जिणरौ पसराव भूखेत्र घणौ हौं। आं विद्वानां मांय डॉ. मोतीलाल मेनारिया, डॉ. ऐल.पी. तैस्सीतोरी अर रिचार्ड पिसल रा नांव गिणाया जाय सकै। राजस्थानी इतरी सिमरथ भासा है अर इणरौ साहित्य-भंडार इतरौ अथाग है कै कालक्रम री दीठ सूं उणरी कूंत करणौ घणौ दौरौ काम है। विद्वानां रौ काम ई चिंतन अर कूंत रै है। इण रा इतिहास नैं लेयनै ई न्यारा-न्यारा बगत में बांधन री तजबीज घणा ई भासाविद् करी। राजस्थानी साहित्य रै इतिहास नैं लेयनै डॉ. मोतीलाल मेनारिया, डॉ. हीरालाल माहेश्वरी, पद्मश्री सीताराम लाळस, डॉ. पुरुषोत्तम मेनारिया अर अनेकूं विद्वानां काल-विभाजन करियौ। सगळा आपौ-आपरी दीठ सूं रचनावां नैं आदि, मध्य अर आधुनिक काल में बांठ्यौ है। कालक्रम साहित्य रै इतिहास रौ नेम है। इणनै न्यारा-न्यारा खंडां में बांटण सूं रचनावां री कूंत करणी सौरौ काम व्है जावै। इण वास्तै साहित्य-मीमांसक सगळी भासावां रा साहित्य नैं इणीज भांत विगतवार बांटता आया है। इतिहास री दीठ सूं जद किणी रचना री बात करां तौ उणमें उण बगत री थितियां मेळ खावै कै नीं, औं सब बातां ई विचार रा विसय होवै। साहित्य अर इतिहास रौ मणिकांचन जोग बणै। साहित्य अर इतिहास में किणी रचना रौ बगत बित्तौ मोल नीं राखै जित्तौ उणरै साहित्यिक सरूप अर विसय-वस्तु रौ मोल होवै। डॉ. पुरुषोत्तम मेनारिया री पोथी 'राजस्थानी साहित्य का इतिहास' में साहित्य रौ बगत इण भांत राखीज्यौ है—

सरू पैलड़ौ काल	—	वि. सं. 835 सूं 1240 ताँई
वीरगाथा काल	—	वि. सं. 1241 सूं 1584 ताँई
भक्ति काल	—	वि. सं. 1585 सूं 1913 ताँई
आधुनिक काल	—	वि. सं. 1914 सूं लगोतार

आ बात तौ आपां आछी तरियां जाणां हां कै साहित्य में समाज री सगळी थितियां रौ वरणन होवै। देस, काल, थिति रै बूतै ई साहित्य रचीजै। साहित्य में देस अर समाज री दसा अर दिसा दोनूं निजर आवै। राजस्थानी भासा रै सरुआती बगत में देस मांय असमानता, आपसी ईसका, बैर, सामाजिक विसंगतियां, विडरूपता, धारमिक मत-मतांतर, विदेसी हमलावरां सूं काठौ तछीज्योड़ौ मानखौ आपरै धरम रुखाळां री बाट जोवतौ हो। मुसल्मान हमलावरां रै साथै ई चारण कवियां रै उत्थान रौ औं बगत हो। चारण कवियां अपभ्रंस री निवृत्तिमूलक सांत-रस री काव्यधारा नैं प्रवृत्तिमूलक राजस्थानी रौ रूप दियौ। वीर साहित्य री रचना कर चारण कवि अठै रा वीरां में ओज भस्यौ। अठै रा वीर विजयश्री या वीरगति दो ई बात समझता। जुद्धां री इण भोम माथै पग-पग थरमापोली जैड़ा जुद्ध लड़ीज्या तौ लियोनिडाज जैड़ा जुद्ध-वीर घर-घर जलम्या। राजस्थानी काव्य में वीरोचित भावां रौ जबरौ वरणन मिळै। वीरगति पूर्णोड़ा वीरां रौ सुरग री अपछरावां वरण करण नै आवै। औड़ा पारलौकिक सुखां री अभिव्यंजना वीरकाव्य में करीजी है। राजस्थानी साहित्य रै विविध सरूपां नैं आपां नीचै मंड्योड़ा बिंदुवां सूं समझ सकां, जिणरी तालिका आगलै पानै पर दिरीजी है—

1. कालगत सरूप, 2. काव्यशास्त्रीय सरूप 3. सैलीगत सरूप 4. प्रवृत्तिमूलक अध्ययन 5. साहित्यिक सरूप।



औ बगत राजपूत सासकां रै बधापा रौ ई मानीजै । राजपूत सासकां रा राजदरबारां में अठै रौ साहित्य हरमेस पोखीजतौ रैयौ । राजपूत काल में अठै राजकवियां री ओक लूंठी परंपरा रैयी । राजस्थानी काव्य में वीरता, भक्ति अर सिणगार री रचनावां रौ बरोबर रचाव होयौ । आ बात न्यारी है कै कदई वीर रस री रचनावां घणी रचीजी तौ कदई भक्ति रस या सांत रस री । राजस्थानी साहित्य रा सरुआती बगत में जैन रचनाकारां रै घणौ सैयोग रैयौ । इणमें आचार्य हेमचन्द्र री व्याकरण सूं जुङ्योड़ी रचना, कवि स्वयंभू कृत 'पउम चरित' अर 'रिट्येमि चरित' जैड़ी रचनावां में रामकथा नैं आधार बणायौ तौ दूजी रचना में 'हरिवंस पुराण' है । स्वयंभू री छंदसास्त्र री रचना ई सामर्ही आवै ।

महाकवि पुष्पदंत 'महापुराण' री रचना करी, जिणमें त्रेसठ महापुरुसां रै चरित्र रौ वरणन मिळै । 'णायकुमार चरित' में नागकुमार संबंधी काव्य है । 'जसहर चरित' में यशोधरा रै चरित्र रौ वरणन है । कवि योगीन्दु जैन साधु हा । आपरी रचनावां में 'परमात्म प्रकास' अर 'योगसार' दूहां में रचित काव्य है । आचार्य हरिभद्र सूर जैन धरम अपणायौ, जदकै वै जलम सूं बामण हा । आप अनेक ग्रंथां री रचना करी, जिणमें 'ललित विस्तार', 'धूर्ताख्यान', 'संबोधन प्रकरण' अर 'जसहर चरित' खास है ।

हेमचन्द्र सूरि री काव्य-प्रतिभा रै कारण गुजरात नरेस सिद्धराज जयसिंघ सोलंकी घणौ मान दियौ अर इणां रै पछै ई आपरौ आव-आदर राजनरेसां में बधतौ गियौ । आप सिद्धराज री प्रेरणा सूं 'सिद्ध-हेम व्याकरण' री रचना करी । 'अभिधान चिंतामणि', 'काव्यानुशासन', 'छंदानुशासन', 'देसी नाममाळा', 'धातु पारायण', 'योगशास्त्र', 'शब्दानुशासन' जैड़ा नामी ग्रंथां री रचना कर राजस्थानी नैं सिमरथ करी । राजस्थानी रौ पैलड़ै साहित्य जिण माथै अपभ्रंस रौ पूरौ असर निजर आवै, उणमें जैन साधुवां, यतियां रा लिख्योड़ा चरित काव्य, कथा काव्य, उत्सव काव्य, नीति उपदेस अर स्तुतिपरक काव्य मिळै ।

डॉ. मोतीलाल मेनारिया आपरी पोथी 'राजस्थानी भाषा और साहित्य' में 50 नैड़ा जैन रचनाकारां रा नांव गिणाया है, जिका राजस्थानी रै प्राचीन काल रै साहित्य री साख ऊजाळी । 13वीं सदी रा केई जैन रचनाकारां अर वारी रचनावां में विजयसेन सूरि रौ 'रेवतगिरि रास', पल्हण कृत 'आबूरास', जिनभद्र सूरि कृत 'वस्तुपाल' अर 'तेजपाल प्रबंधावली' जैड़ा अलेखूं नांव अर रचनावां गिणाई जाय सकै । बारहमासा काव्य परंपरा में 'नेमिनाथ बारहमासा' पैली रचना बताई जावै । जैन रचनाकारां में नेमिनाथ अर राजमति रा चरित्र नैं लेयनै मोकळौ काव्य रचीज्यौ है । जैन कवि आपरी रचनावां में वस्तु, घटना, व्यक्ति, विसय री पूरी जाणकारी देवता । विवरणात्मक, भासा री सबव्याई, काव्यरूपां री विविधता— रास, रासौ, रासउ, चरित, चरित, धमाल, फागु, उत्सव, चउपई जैड़ा नांव आपरी रचनावां में जोड़ै नै उणनै न्यारी निकेवक्ती बणावण रौ जतन करता । जूना गद्य रा दाखला, गद्य रूपां री बानगी ई आं रचनावां री विसेसतावां रैयी । औतिहासिकता रा सैनाण, लोकभासा रौ प्रयोग, उपदेसात्मकता अर नैतिक आचरण री सीख आपरी रचनावां में सुभट निगै आवै । 1241 सूं 1584 रौ बगत राजस्थानी साहित्य में वीरगाथा काल रै नांव सूं जाणीजै । जुग बदल्याव रै साथै ई साहित्य री दिसा बदलै । इण जुग में पृथ्वीराज चौहान अर मोहम्मद गौरी रै बिचालै तराइन रौ अंतिम जुद्ध अर उणमें गौरी री जीत होयी । इणसूं जनमानस में प्रबल वीर भावना जागी । राजस्थान धरमजुद्धां रौ केंद्र रैयौ । जनमानस में औ भाव हा कै राजपूत सासक अर वीर सेनानायक ई वानै आं थितियां सूं उबार सकै । राजस्थानी कवियां ई वीरां में वीरता जगावण वास्तै वीर रस रौ सिरजण कस्तौ । इण जुग में केई जैन अर संत कवियां ई वीर रसात्मक रचनावां लिखी । भक्ति अर सिणगार रै साथै ई वीरता आपरौ बागौ पैर सामर्ही आई ।

राजस्थानी साहित्य रा वीरगाथा काल में पैला कवि सालिभद्र सूर होया, जिकां 1241 में 'भरतेश्वर बाहुबलि रास' काव्य री रचना कर रास परंपरा में वीर रस रै वरणन री सरुआत करी । इणीज काल रा दूजा कवियां में सारंगधर कृत 'हमीर रासौ', 'हमीर काव्य', बारूजी सोदा रा वीर रसात्मक 'गीत-छंद', श्रीधर व्यास कृत 'रणमल्ल छंद' इणी बगत री नामी रचनावां है । 'रणमल्ल छंद' में ईंडर रा राजा राव रणमल्ल अर पाटण रा सूबेदार मुजफ्फरसाह रै बिचालै होया जुद्ध रौ सजीव चित्राम कवि मांड़यौ है । औ औतिहासिक वीर काव्य अर चरित काव्य

ई है। शिवदास गाडण री 'वचनिका अचलदास खीची री' स्वतंत्रता री प्रतीक रूप रचना है। इणमें वीर राजपूतां रै साथै वीरांगनावां ई आपरै कर्तव्य रौ पाल्ण करण में लारै नीं रैवै। समाज रा दोनूं ई वरगां (नारी-पुरुस) में देसप्रेम अर स्वतंत्रता री गाढी मनसा अर वीरता रौ दरप, तेज दुस्मण रै साथै जूझ अर आत्मोत्सर्ग रौ जबरौ वरणन होयौ है। बादर ढाढी 'वीरमायण' में आपरै आश्रयदाता दला जोईया अर वीरमजी रै बिचाळै होयोड़ा जुद्ध रौ जबरौ वरणन करत्यौ है। पदमनाभ कृत 'कान्हड़े प्रबंध' में जालौर रा सासक सोनगरा चौहान कान्हड़े अर अलाउद्दीन रै जुद्ध रौ वरणन है। आ मोटी रचना चार खंडां में मिलै। कान्हड़े केई बरसां तांई जुद्ध कर वीरगति पाई। कान्हड़े रौ बेटौ वीरमदे ई पिता रै साथै जुद्ध करत्यौ, उणरौ वरणाव ई इणमें मिलै।

महाकवि चंद बरदाई कृत 'पृथ्वीराज रासौ' डिंगळ सैली री नामी वीर रसात्मक रचना है। इण रै रचनाकाल नैं लेयनै विद्वान अेक मत कोनी है। इत्तौ अवस है कै औ अेक महाकाव्य री ओळी में आवै जैड़ी मोटी ग्रंथ है। वीरगाथा काल में अनेक कवि अर कृतियां रा नांव गिणाया जाय सकै। राजस्थानी रै प्राचीन काल में 'वीसलदेव रासौ' नरपति नाल्ह कृत अेक चावी रचनावां है। 'ढोला-मारू रा दूहा', 'जेठवा-ऊजली रा सोरठा' अर केई प्रेमाख्यान ई इण बगत री चावी रचनावां है। 'ढोला-मारू रा दूहा' अेक जूनी लोकगाथा या लोककाव्य रौ रूप है। इणरौ रचनाकार कोई कवि कल्लोल नैं बतावै तौ केई कुशललाभ नैं बतावै। 'वीसलदेव रास' ई अेक प्रेमाख्यान इज है। इणमें अजमेर रा सासक वीसलदेव चौहान अर भोज परमार री बेटी राजमती री कथा रौ वरणाव है। राजमती रौ विरह वरणन, ढोला-मारू रा दूहा री नायिका मारवणी रै विरह सूं कम कोनी। आदिकाल में जैन सैली, चारण सैली रै साथै लोकसैली री रचनावां रौ चलण ई रैयौ। औ रचनावां लोकसैली रा नामी उदाहरण है।

भक्तिकाल (मध्यकाल)

लगोलग जुद्धां सूं जूझतौ मानखौ अबै उण अदीठ सकि री सत्ता नैं मानण लागग्यौ हो। देस में विदेसी हमलावरां रौ डर तौ हो इज, पण मांयली कळै ई दिनोदिन बधण लागगी ही। राजा तौ आप-आपरै राज री सीमावां बधावण में लाग्योड़ा हा। केई पथभ्रस्ट सासक मुगलां री अधीनता अंगेजली। धरम बदलण वास्तै जन समाज माथै पूरौ दबाव हो। इण बगत में केई संत संप्रदाय, साधु, जैन मतावलंबी अर भक्तकवि सगुण अर निरगुण भक्ति रै रूप में रचनावां कर जनमानस नैं धीरज बंधायौ, उणमें आस्था अर विस्वास जगायौ कै परमात्मा सब देखै। वौ अबखी वेळा में आपां री सहाय करैला।

इण भक्तिकाल रा कवियां में भक्त सिरोमणी मीरां बाई नैं कुण नीं जाए। आपरा कृष्ण-भक्ति रा पद तो जन-जन रा कंठहार रैयोड़ा है। आप पदावली, गीतगोविंद टीका, नरसीजी रौ मायरौ, सत्यभामाजी नूं रूसणूं आद रचनावां रौ सिरजण करत्यौ। कवि दुरसा आढा 'विरुद छिहतरी', 'किरतार बावनी', 'राउश्री सुरताण रा कवित्त' जैड़ी रचनावां रची। इणां में आश्रयदातावां रै गुण-जस रौ बखाण करण रै साथै दुखां सूं कळकळीजै मानखै री अबखायां नैं ई उजागर करीजी है। आप महाराणा प्रताप री वीरता रा दूहा ई लिख्या, जिका घणा चावा है। अकबर रै दरबार में रैवता थकां आप उणां रै खास दुस्मीं महाराणा प्रताप री वीरता रौ काव्य लिख्यौ। आ राजस्थानी कवियां री मोटी विसेसता रैयै है कै वै जिको ई लिख्यौ, साच लिख्यौ। आपरै आश्रयदाता री बात दाय आई तौ उणरौ जस गायौ अर वै कीं चूक करी तौ औ कवि वीसर काव्य रै रूप में आपरै राजावां नैं भांडतां अर भूंडतां ई जेज नीं करी। निडरता रै साथै न्याय री बात हरमेस मांडी। कदैई रिछ्या करण वास्तै तौ कदैई उणां नैं अधिकार दिरावण वास्तै तौ कदैई उणां रै साहस नैं बधावण वास्तै कवि कलम अर किरणाण दोनूं सूं सहित्य रै इतिहास री साख उजाली है।

भक्तिकाल रा कवियां में ईसरदास बारठ रौ नांव सिरैपांत में आवै। औ इज कारण है कै वानै 'ईसरा सो परमेसरा' रै विरुद सूं बखाण्यौ जावै। आप 'हरिस' जैड़ी भक्तिकाव्य समाज नैं सूंप्यौ। 'गुण भागवत', 'गुण आगम', 'देवियां', 'गुण वैराट' आद आपरी दूजी महताऊ भक्ति रचनावां है।

पृथ्वीराज राठौड़ कृत 'वेलि क्रिसन-रुकमणी री', 'ठाकुरजी रा दूहा', 'गंगाजी रा दूहा', 'दसम भागवत रा दूहा', 'वसदे रावउत', 'दसरथ रावउत' जैड़ी भक्ति रचनावां साम्हों आवै।

सायांजी झूला कृत कृष्णभक्ति काव्य री 'नागदमण' घणी चावी रचना है। इनमें कृष्ण रै साथै कालिया नाग रै जुद्ध रै वरणाव कवि रै काव्य-कौसल नैं उजागर करण वाढ़ौ है। आपरी दूजी रचनावां में 'रुकमणी हरण' अर 'रुकमणी मंगळ' ई चावी रैयी है।

भक्तिकाल या मध्यकाल रा कवि अर वांरी कृतियां में वीरभाण रतनू रै 'राजरूपक', हमीरदान रतनू कृत 'हमीर नाममाळ', 'लखपत पिंगळ', 'पिंगळ प्रकास', 'जटुवंस वंसावली', 'ब्रह्मांड पुराण', 'जोतिस जड़ाव', 'भागवत दरपण', 'भरतरी सतक' अर 'महाभारत रै अनुवाद' (छोटौ अर बड़ौ) खास है। इणी भांत करणीदान कविया री 'सूरज प्रकास', 'विडुद सिणगार' अर कवि मंछाराम कृत 'रघुनाथ रूपक गीतां री' छंदसास्त्रीय ग्रंथ है।

कृपाराम खिड़िया री रचनावां 'छंद चाल्कनेची' अर 'रजिया रा दूहा' ई घणी चावी रचनावां है। रामदान लाल्स कृत 'भीम प्रकास' अर 'करणी रूपक', किसना आढा कृत 'भीमविलास', 'रघुवरजस प्रकास' अर माधोदास दधवाड़िया री रचना 'राम रासौ' अर 'गजमोख' ई इण काल री महताऊ रचनावां मानीजै।

इण भांत राजस्थानी साहित्य रै मध्यकाल रै कवियां रा नांव गिणावां जिता ई थोड़ा है। इण काल में अलेखूं रचनाकार साहित्य भंडार नैं भरण रै लूंठौ काम करत्यै। मध्यकाल राजस्थानी भासा रै सुवरण-काल मानीजै, इनमें भक्ति रचनावां रै साथै वीरता अर सिणगार री महताऊ रचनावां रै ई सिरजण होयौ। भक्तकवियां री लेखनी ई वीरता रै वरणन करण में लारै नौं रैयी। भक्तकवि इसरदास बारठ री 'हाला-झाला रा कुंडलिया' वीर रस री लोकचावी रचना है। कवि रै मांय जिता भक्ति रा गुण हा, उणसूं कीं बेसी वीर भावां नैं उकेलण री कला ही।

राजस्थानी कवियां नैं वीर-काव्य रचण रै गुण जाणै जलम सूं मिल्हौ व्है, औड़ौ लखावै। पृथ्वीराज राठौड़ केर्ई भक्ति रचनावां रै साथै 'वेलि क्रिसन रुकमणी री' रचना करी जिकौ सिणगार रै काव्य मानीजै। कवि वेलि में इण बात री हामळ ई भरै— 'स्त्री वरणन पहिले कीजिए गूंथिए जेणि सिंगार ग्रंथ'। रुकमणी री वय-संधि औस्था रै नामी वरणन वेलि में होयौ है। उणरै साथै ई कवि राठौड़ री मोटी मनसा आ रैयी कै आपरा इस्ट रै वै कीकर सुमिरण करै, तौ भक्ति री भावना इणरै मूळ में रैयी। रुकमणी हरण री बगत कृष्ण, रुकमी अर सिसुपाळ रै साथै होयै जुद्ध रै ई जबरौ वरणन वेलिकार करै। केर्ई रूपक बांधतां, अलंकारां री छटा रै साथै वेलि में सिणगार, भक्ति अर वीरता तीनूं रसां री त्रिवेणी रा दरसण होवै।

कैवण रै मतल्ब औं कै औंड़ौ कोई कवि कोनी जिकौ भक्ति रै साथै वीरता रै काव्य नौं रचियौ व्है। औं कवियां रै सुभाव है। प्रकृति है, उणनैं छोड नौं सकै। मध्यकाल में अेकला हमीरदान रतनू री रचनावां माथै बात करां तौ विविध विस्यक सोध-ग्रंथ लिख्या जाय सकै। आप छंदसास्त्रीय रचनावां, जसोगान री रचनावां, भक्तिपरक रचनावां, जोतिस री रचनावां रै साथै अनुवाद री जिकी सरुआत करी वा अंजस जोग है। साहित्य रा भूखेत्र में न्यारा-न्यारा काव्यरूपां अर विसय री विविधता साथै लिखणिया औड़ा केर्ई कवि अर साहित्यकार राजस्थानी में निजर आवै। मध्यकाल में काव्य री तीनूं सैलियां— जैन सैली, चारण सैली अर लौकिक सैली में सिरजण होयौ।

जैन रचनावां में ज्यूं बारहमासा, फागु, रासउ, चउपई, धमाल, ढाल, चौढालियउ जैड़ा काव्य रूप रचीज्या, उणीज भांत चारण सैली में रासौ, रूपक, विलास, प्रकास, चरित, वेल, रसावला, झूलणा, नीसाणी, झमाल, कुंडलिया, कवित्त, दूहा अर छंदां रै नांव माथै अनेक काव्यरूपां में अखूट राजस्थानी रचनावां साम्हों आवै।

लौकिक सैली री बात आवै तौ मध्यकाल में भक्ति आंदोलन रै औड़ौ रूप निगै आवै जिणमें केर्ई संत संप्रदायां री महताऊ भूमिका पण रैयी। दादू पंथ रा प्रवर्तक संत दादूदयालजी, संत रज्जबजी, संत लालदासजी, संत मावजी, चरणदासजी, सिद्ध जसनाथजी अर रामस्नेही संप्रदाय में अनेक संत होया जिणां में रामचरण दास, हरिराम दास,

दयालदास, संत दरियावजी आद नामी है। बिश्नोई संप्रदाय रा प्रवर्तक संत जांभोजी ई आपरा सबद अर वाणियां सूं लोककल्याण रौ काम करत्थाएँ। इण बगत में केर्द जैन साधु-संत ई आपरी रचनावां लोकसैली में लिखनै जनता में भक्ति जगावण रौ काम करत्थाएँ। संतां री 'मंगल-विवाहलो', 'भक्तमाळ', 'परिचयी', 'वाणियां', 'साखी', 'सबद' अर 'सिलोका' जैड़ी रचनावां राजस्थानी साहित्य भंडार नैं भरण रौ अंजस जोग काम करत्थाएँ। लोकभासा में आपरी बात कैवणी, नैतिक आचरण, सगुण अर निरगुण भक्ति रा नेम-धरम अर ईस्वर रै वास्तै आस्था अर विस्वास आं संतां री रचनावां रौ मूल ध्येय रैयौ। जीव दया, परोपकार, पर्यावरण जैड़ा विसय ई आंरी रचनावां रा रैया। जित्तौ लूंठौ साहित्य चारण अर जैन सैली में लाधै बित्तौ इज सरावण जोग साहित्य संत कवियां रौ हैं। उणां रा भक्ति पदां में जीवण रौ सार निजर आवै। लोक सैली में भक्ति री निस्छल अर निरमल गंग-तरंगां में मानखै रा सगळा पाप धुप जावै। भवसागर पार करण वाळौ जहाज है— संत-काव्य।

इण भांत मध्यकाळ में सूरां, सापुरुसां अर सतियां री वीर वसुंधरा रै कारण अलेखूं कवियां री लेखणी रै बळ वीर, सिणगार, नीति अर भक्ति रौ साहित्य रचीज्यौ, तौ संत संप्रदाय ई धरम री जङ्ड नैं हरी करी। इणरै साथै ई लोक-साहित्य आपरी सगळी विधावां रै साथै पांगरत्थाएँ। लोक-साहित्य तौ लोक रौ साहित्य है। वौ लोक रै साथै ई जलम्यौ अर तर-तर बधतौ गियौ पण अबार ताई रौ लोक-साहित्य मौखिक सरूप में हो, अबै धीरे-धीरे सबदां में जड़ीज नै वौ आपरै सबळ रूप में साहर्णी आय रैयौ है। औ लोक-साहित्य पोथ्यां में अंवेरीजण लाग्यौ अर पांगरतां ई ओक हरियल रूंख ज्यूं फल्यौ अर फूल्यौ। भासाई दीठ सूं राजस्थानी अपग्रंस सूं न्यारी होवती गई। 16वीं सदी रै पछै तौ वा गुजराती सूं ई न्यारी होयनै ओक स्वतंत्र भासा रै रूप में निजर आवण लागी ही, अबै आ भासा आपरै बाल्पणै रा संगी-साथियां नैं छोड-छिटकाय राती-माती निजर आवण लागी ही।

मध्यकालीन गद्य

राजस्थानी रौ पद्य-साहित्य जित्तौ सिमरथ है, गद्य-साहित्य ई उत्तौ इज सिमरथ अर रातौ-मातौ है। राजस्थानी में प्राचीन गद्य रूप में विविध विसयक गद्य मिल्यै। जूनै राजस्थानी गद्य नैं विसय री दीठ सूं पांच भागां मांय बांटीज्यौ है—

धारमिक गद्य मांय टीका, टब्बा, टीप्पण, बालावबोध, पट्टावली अर गुर्वाली आवै। कोई भी धार्मिक ग्रंथ नैं समझण खातर उणमें कथावां दी जावती, उणां री विरोळ मूळ पाठ रै हेठै या अलग सूं देवता, वाँनै टीका कैवता। उणीज भांत टब्बा मूळ पाठ रै हासियै माथै लिखीजता। टाबरां नैं बोध करावण सारू, वाँनै धरम अर सदाचार री सीख 'बालावबोध' सूं दिरीजती। जातक कथावां रै रूप में इणरौ मैतव रैयौ है। इणमें सं. 1411 में खरतरगच्छ रा तरुणप्रभ सूरि री 'षडावश्यक बालावबोध' सब सूं जूनौ मान्यौ जावै। इणी भांत गुरु-चेलै री परम्परा नै निभावण सारू गुरु रै पछै चेलै नै पाट (गादी) माथै बैठायौ जावतौ, उणै इतिहास, गुरु अर चेलै रै परिचै नै इण विधा में परोट्यौ जावतौ, उणनै गुर्वाली कैवता। जैन परम्परा मांय वंशावली रौ दूजौ रूप गुर्वाली रौ रैयौ है। केर्द ओक्तिक ग्रंथ, कथा-ग्रंथ ई इण काल में लाधै।

ऐतिहासिक गद्य मांय वात, ख्यात, वचनिका, दवावैत, विगत, वंसावली जैड़ी गद्य विधावां आवै। 'वात' न्यारा-न्यारा विसयां नै लेय 'र रचीजी है। आधुनिक जुग री कहाणी परंपरा री जङ्डां जूनी वातां में गैरी गडियोड़ी है। औ वातां ऐतिहासिक, अद्वै ऐतिहासिक, धारमिक, नीति प्रधान अर जीवण रै हरेक प्रसंग सूं जुङ्योड़ी होवती। 'ख्यात' नै चरित्र ग्रंथ अथवा उर्दू-फारसी रै 'नामा' या 'आइन' रै नैड़ौ मान्यौ जाय सकै। ख्यात में घटना वरणन, चरित्र वरणन रै सागै ऐतिहासिक तथ्यां नै भी महत्त्व दिरीज्यौ है। इण में सिसोदियां री ख्यात, मुहणोत नैणसी री ख्यात, महाराजा मानसिंह री ख्यात, जोधपुर री ख्यात, उमरावां री ख्यात, बांकीदास री ख्यात सिरै ओळी में आवै। 'विगत' रै मांय ओक इज ठौड़, घटनावां, मिनखां अथवा जातियां रौ विगतवार वरणन करियौ जावै। इणमें मारवाड़ रा परगनां री विगत, मेवाड़ रा भाखरां री विगत, कछवाहा सेखावतां री विगत आद आवै। ओक इज परिवार कै जाति

रौ जद अेक वंस-बिरछ रूप में पीढ़ी-दर-पीढ़ी रौ गद्यात्मक वरणन करियौ जावै तौ वा रचना वंसावली रै नांव सूं ओळखीजै। राठौड़ां री वंसावली, महारावळ री वंसावली, झालां री वंसावली, राठौड़ राजावां री वंसावली, राजपूतां री वंसावली आद।

हकीकत सूं अरथ जथारथ रौ वरणन होवै। इणरौ उद्देस्य कोई घटना या खास बात री जाणकारी देवणी होवै। इणमें मनसब री हकीकत, हाडां री हकीकत, पातसाह औरंगजेब री हकीकत उल्लेखजोग है। इणीज भांत 'हाल' में भी हकीकत रै दाँई कोई खास घटना रौ ब्यौरौ दिरीजै। 'सांखला दहियां सूं जांगढू लियौ तेरौ हाल' इण रीत री अेक खास रचना है। 'वचनिका' सबद संस्कृत रै 'वचन' सबद सूं बणियौ है। गद्य-पद्य मिश्रित रचना जिणनै संस्कृत में चम्पू काव्य भी कैयौ जावै। इणमें अचलदास खीची री वचनिका, वचनिका राठौड़ रतनसिंह महेसदासौत री, जिन समुद्र सूरि री वचनिका, माताजी री वचनिका आद आवै। 'दवावैत' सबद री व्युत्पत्ति अरबी भासा रा सबद 'वैत' सूं मानी जावै। दवावैत में उर्दू अर फारसी रा सबद घणा मिळै। राजस्थानी भासा री सैं सूं जूनी दवावैत 'नरसिंहदास गौड़ री दवावैत' मानीजै। इणरै पछै 'महाराजा अजीतसिंह री दवावैत', 'असमाल देवड़ री दवावैत', 'महाराजा लखपत री दवावैत' चावी रैयी।

जूना राजस्थानी गद्य में अेक रूप कलात्मक गद्य रौ ई रैयौ। इणनै मन-बिलमाव रौ गद्य ई कैवै। कथा-वारतावां में प्रेम, वीरता, भक्ति अर हास-परिहास रौ रूप ई देखीजै। गद्य रै साथै रूपालौ पद्य, तौ केर्इ ठौड़ वरणन प्रधान गद्य में ओपमावां री झड़ी लगाय देवै। खीची गंगेव निंबावत रौ दोपहरौ में निंबावत सरदार रै दोपारां रै भोजन रौ सजीव अर सरब ओपमा सरूप वरणन है, तौ 'राजा राउत रौ बात बणाव' में कुंवर रौ रूप वरणन, सिकार वरणन रा दाखला पढण जोग है। राजस्थानी कलात्मक गद्य जितौ रूपालौ, पढण में असरदार लागै, तौ कठै-कठैर्इ इणमें लोकरंजण ई जुङ्योड़ी होवै। औड़ी रचनावां में पृथ्वीराज वाग्विलास, माणिक्य सुंदर सूरि कुतुहलम, सभाशृंगार, मुत्कलानुप्रास है। आं रै मांय अनेक विसयां रौ सरवांग पूरण मनोरम वरणन मिळै। बिरखा, सटरितु, बारहमासा रै रसवती वरणन रै साथै नगर वरणन ई होवै।

अभिलेखीय गद्य रै मांय सिलालेख, ताड़पत्र, भोजपत्र, ताम्रपत्र या दूजा धातुपत्रां माथै खुद्योड़ी गद्य आवै। इण तरै मिळण वालौ साहित्य राजज्ञावां, आदेसां, फरमाण, दान-पत्र, सम्मान-पत्र, पट्टा अर परवानां रै रूप में मिळै। जूना गद्य में अभिलेखां रौ गद्य घणौ महताऊ है। विविध विसयक गद्य मांय आयुर्वेद, जोतिस, व्याकरण जैड़ा अलग-अलग विसयां सूं जुङ्यिया ग्रंथ जैन अर जैनेतर सैली में मिळै। इणां में जोतिस, वैद्यक, व्याकरण विसयक गद्य मिळै। जोतिस में पंचांग, भौगोलिक जाणकारियां, जलमपत्रियां आद ई महताऊ ठौड़ राखै। इण तरै प्राचीन अर मध्यकालीन राजस्थानी गद्य रौ संसार घणौ लांठौ है। मध्यकाल में राजस्थानी भासा में बत्तौ अर असरदार गद्य रौ सिरजण होयौ। नांव अर रूप न्यारा-न्यारा रैवता थकां ई कदैर्इ रूपगत अेकता तौ कदैर्इ विसयगत अेकता रै कारण आपस में फूल री पांखडियां ज्यूं जुङ्योड़ी औ विधावां राजस्थानी साहित्य में आपरी सौरम बिखेरी। जूनै राजस्थानी गद्य री आपरी अलायदी ओळख है, जिकी दूजी भासावां रा साहित्य में स्यात ई लाधै। इणरै साहित्य भंडार सूं कित्ता-कित्ता ग्रंथ-रत्नां नै परोटतां इतिहासकारां राजस्थान प्रदेस रै इतिहास रौ रूप संवारियौ अर राजस्थानी साहित्य आं विधावां रै कारण आपरौ आपौ थापियौ।

आधुनिक काल

इण काल में दोय न्यारी थितियां में न्यारी काव्य-धारावां अर न्यारा विचारां नै बळ मिळ्यौ। आजादी सूं पैली रौ काल अर आजादी रै पछै रौ काल। दोनूं बगत चेतना जगावण वाला हा, पण विसय न्यारा हा। मोटै रूप सूं औ काव्य-चेतना रौ जुगा है। इण काल में देस माथै अंग्रेजी हकुमत, उणग अत्याचारां अर अन्यावां सूं मानखौ दुखी है। 'फूट घालौ अर राज करौ' वाली दोगली नीत नैं अपणायनै गोरां केर्इ रियासतां माथै हक जमाय लियौ। केर्इ राजा तौ

अंग्रेजां रै हाथ रा रमतिया हा। केर्इ राजा, सामंत, अंग्रेजां साथै राजीपा रौ सौदौ कर बैठा हा। इण जुग में ई देसप्रेमियां अर स्वाधीनता नैं पूजण वाळ्यां रौ घाटी कोनी है। राजस्थानी कवि आथूणी हवा साथै उठता काळा धूंवां सूं अणजाण कोनी हा; गोरी सरकार रै काळा मन नैं वै चोखी तरियां जाणता हा। अबै राजावां नैं विरुदावण री दरकार कोनी ही। कवियां परंपरागत काव्य री लीक छोड़ने अंग्रेजी सत्ता रै विरोध में काव्य करण लागा। अंग्रेजां री खोटी नीतियां अर वांरा कानून आगै तळ-तळीजतै मानखै नै न्याव दिशावण वास्तै आं कवियां री कलम चाली। देस में जनजागरण, देसप्रेम, वीरता अर स्वतंत्रता रौ पाठ पढावण वाळा इण जुग रा पैला कवि सूरजमल मीसण होया। वीर रसावतार रै रूप में चावा इण कवि री ‘वीर सतसई’ रौ अेक-अेक दूहों देसभक्ति अर स्वतंत्रता री सीख देवै, तौ कायरां-उर छैलका करै जैड़ा। रामनाथ कविया ‘द्रोपदी-विनय’ रै मिस नारी रै विद्रोही रूप नैं दरसायो। शंकरदान सामौर रा गोळी हंदा गीतां में अंग्रेजां नैं झूंपडियां रा धाड़ायती बताईज्या तौ केसरीसिंह बारठ, हिंगलाजदान कविया, माणिक्यलाल वर्मा, विजयसिंह पथिक जैड़ा कवियां अंग्रेजी सत्ता रौ खुलासौ करतां जनचेतना जगाई अर जनता में आजादी रौ सुर भस्यौ।

जनकवि ऊमरदान लाळ्स प्रगतिशील काव्यधारा री सरूआत करी। समाज नैं सांस्कृतिक अर सामाजिक उत्थान सारू चेतायौ। धरम रै नांव माथै होवण वाळा पाखंडां रौ खुलासौ करतां समाज-सुधारक अर जनकवि रौ काम सारूयौ।

राजस्थान रा कवि हरमेस थाकल मिनखां रौ साथ दियौ, रियासतां रा सामंतां, जागीरदारां, ठाकरां रा हेठवाळिया करसां अर मजदूरां रौ साथ देवता समाज रा आं ठेकेदारां नैं आडै हाथां लिया। जोसीला सबदां में वानै फटकारण रौ काम गणेशीलाल व्यास ‘उस्ताद’ जैड़ा जनकवि ई कर सकै। समाज रा हेठला तबकां रौ साथ देवणिया कवियां में रेवतदान चारण, उदयराज उज्ज्वल, हीरलाल शास्त्री अर जयनारायण व्यास जैड़ा कवि आगै आया। देसप्रेम, अेकता, अधिकारां वास्तै सावचेत करणौ, अशिक्षा नैं मेटणी, काम-धंधा अर मैनत री जै बोलावतां वरगभेद अर नारी जागरण री बात अंरी रचनावां में करीजी।

गांधीजी री अगवाई में देस री आजादी खातर जिकी लड़ाई छिड़ी, अठै रौ साहित्यकार ई उणसूं अळगौ अर अछूतौ नौं रैयौ। गांधीजी रै सत्य, अहिंसा, न्याय अर वांरा आदर्शा नैं लेयनै साहित्यकारां बोहल्लौ काव्य लिख्यौ। साथै ई राजनीतिक आंदोलन, समाज-सुधार, अछूतोद्धार, सामाजिक अेकता, कुटीर उद्योगां रै साथै गांधीवादी विचारां सूं ओतप्रोत कवियां अठै रामराज्य री कल्पना ई करी। आं सगळ्यां विसयां नैं लेयनै राजस्थानी में सैकड़ां रचनावां लिखीजी।

साहित्यिक दीठ सूं आधुनिक जुग में केर्इ नूंवी चिंतन धारावां रौ जलम होयौ। देस री आजादी पछै नूंवी काव्य चेतना री सरूआत होयी। प्रकृति संचेतनापरक काव्य में प्रकृति रौ मानवीकरण करीज्यौ। प्रकृति साथै मिनख रौ आद-जुगाद संबंध रैयौ है। मानखै रै हिरदै में लुक्योड़ी भावनावां प्रकृति रै कोमल-कठोर अर रूप-विडरूप रै मिस प्रगट करीजी है। प्रकृति-काव्य कै छायावादी-काव्य री अठै लंठी परंपरा रैयी। इण काल रा कवियां में-चंद्रसिंह बिरकाळी (बादली, लू), नारायणसिंह भाटी (सांझ), नानूराम संस्कर्ता (कल्याण, दसदेव), गजानन वर्मा (सोनो निपजै रेत में), कन्हैयालाल सेठिया (मर्मज्जर), कल्याणसिंह राजावत (परभाती), रेवतदान चारण (बिरखा-बीनणी), सुमेरसिंह शेखावत अर डॉ. मनोहर शर्मा आद रा नांव गिणाया जाय सकै।

प्रबंध-काव्यां रै साथै मुक्तक कविता रौ भी जोर रैयौ। प्रबंध-काव्य में रामायण, महाभारत, उपनिषद् अर पौराणिक विसयां नै आधार बणायनै धारमिक प्रबंध-काव्य लिखीज्या, तौ औतिहासिक, अर्द्धौतिहासिक, लोक-काव्य अर कल्पनाऊ प्रबंध-काव्यां रौ सिरजण ई अठै होयौ। अमृतलाल माथुर री ‘गीत रामायण’, मेघराज मुकुल री ‘सैनाणी’, डॉ. मनोहर शर्मा री ‘कुंजा’, ‘अमरफळ’, ‘पंछी’, ‘मरवण’, महावीर प्रसाद जोशी री ‘बिंदराबन’, ‘द्वारका’, ‘मथरा’, ‘अंतरधान’, श्रीमंत कुमार व्यास री ‘रामदूत’, सत्यप्रकाश जोशी री ‘राधा’, सत्यनारायण

'अमन' प्रभाकर री 'सीसदान', गिरधारीसिंह पड़िहार कृत 'मानखौ', करणीदान बारठ री 'शकुंतला' इत्याद प्रबंध-काव्यां रै रूप में मोटी अर लांबी काव्य-रचनावां लिखण री अठे लूंठी परंपरा रैयी है।

आधुनिक-जुग रा कवियां में कन्हैयालाल सेठिया री कविता में नूंवा बिंब-विधान साथै जीवण-दरसण रा भाव है। देस अर समाज रा बदल्ता रंग-रूप, ढब, जीवणगत, मानवी भावनावां रा सैंस रूप परगट करण में आधुनिक कवियां री लांबी पांत है, जिणमें तेजसिंह जोधा, मणि मधुकर, ओंकारश्री, पारस अरोड़ा, गोरधनसिंह शेखावत, भगवतीलाल व्यास, मोहम्मद सदीक, गजानन वर्मा, बुद्धप्रकाश पारीक, गणपतिचंद्र भंडारी, किशोर कल्पनाकांत, कल्याण सिंह राजावत, सुमनेस जोशी, सत्यप्रकाश जोशी, रघुराजसिंह हाडा, प्रेमजी प्रेम, सीताराम महर्षि, कानदान कल्पित जैड़ा अलेखूं कवियां आधुनिक कविता में नूंवा भावबोध, बिंब-विधान, प्रतीकां नैं लेयनै राजस्थानी कविता में नूंवा प्रयोग करूँ। धोरां वाला देस नैं जगावण वास्तै कदैई मनुज देपावत नैं आगै आवणौ पड़्यौ तौ कदैई 'मानखौ' री ऊंडी नींव राखण नैं गिरधारी सिंह पड़िहार जैड़ा सादगी वाला कवि नैं मुखरित होवणौ पड़्यौ। श्रीमंत कुमार व्यास नैं आपरी बात द्रोपदी, मीरां, मांडवी अर कैकयी रै ओळ्यावै कैवणी पड़ी।

आधुनिक राजस्थानी कविता नैं दूजी भासा री कवितावां रै सैंजोड़ लावण नै, उणरी कूंत करण वास्तै कविता में नूंवा-नूंवा रूप उकेरीजता रैया। बगत रै परवाण कवियां समाज री विडरूपता माथै रोस करता भांत-भांत सूं भावां री अभिव्यक्ति दी है। आं कवियां में मोहन आलोक, चंद्रप्रकाश देवल, सत्येन जोशी, हरमन चौहान, अस्तअलीखां मलकांग, पुरुषोत्तम छंगाणी, वीरेन्द्र लखावत, सत्यदेव संवितेन्द्र, श्याम महर्षि, सांवर दइया, नंद भारद्वाज, मीठेस निरमोही, आईदानसिंह भाटी, चैनसिंह परिहार, जुगल परिहार, ज्योतिपुंज, कुंदन माली, अर्जुनदेव चारण, शिवराज छंगाणी, रामेश्वरदयाल श्रीमाली, चेतन स्वामी, बद्रीदान गाडण, हरीश भादाणी, बी. अल. माली 'अशांत', मालचंद तिवाड़ी, लक्ष्मणदान कविया, रामस्वरूप किसान, मुकुट मणिराज, दलपत परिहार, वासु आचार्य, ओम पुरोहित 'कागद', शंकरसिंह राजपुरोहित, शिवराज भारतीय, नीरज दइया, अशोक जोशी 'क्रांत', गिरधरदान रतनू दासोड़ी इत्याद आज ताईं रा राजस्थानी कवि इण आधुनिक जुग में आवै।

आधुनिक कविता में प्रकृति चेतनापरक काव्य, प्रगतिशील काव्य, छायावादी काव्य, प्रतीकात्मक सैली रौ काव्य, नुंवै भावबोध अर जुगबोध रौ काव्य लिखीज्यौ। पारम्परिक काव्य रै साथै नूंवी कविता रौ बानौ पैराय कवियां जीवण रा सगळा प्रसंगां सूं जुङ्योड़ी रचनावां लिखी, आथूणै साहित्य में होवण वाला नूंवा प्रयोगां रौ असर मायड़ भासा माथै ई पड़ियौ, दूजी भासावां रै देखा-देखी उणां सूं सीख लेयनै राजस्थानी कवियां ई नूंवा-नूंवा काव्य रूपां नैं परोटण रा जतन करूँ, आपरी बात नैं कैवण री न्यारी आंट राखणिया कवियां में नारायणसिंह भाटी, तेजसिंह जोधा, पारस अरोड़ा, चन्द्रप्रकास देवल, मालचंद तिवाड़ी, अर्जुनदेव चारण रा नांव गिणाया जाय सकै, जिणां री कवितावां में चिंतन री नूंवी रीत निजर आवै।

राजस्थानी गजल प्रीत री कसक, मैफिलां री गायकी नैं छोडनै आम आदमी रै जीवण री गजल बणगी। आज री व्यवस्था रै खिलाफ बगावत रा तीखा तेवर रौ अंदाज अर व्यंग्य रौ मारक सुर आं गजलां में जबरौ दीखै। गजलकारां में सत्येन जोशी, नवल जोशी, रामेश्वरदयाल श्रीमाली, श्यामसुंदर भारती, भागीरथ सिंह भाग्य, जुगल परिहार, राजेन्द्र स्वर्णकार, सत्यदेव 'संवितेन्द्र' आद आवै। डांखला पांच ओळी वालौ वरणिक छंद है। अंग्रेजी रै लिमरिक छंद री बुगणट नैं अपणायनै राजस्थानी कवियां इणमें रचना रची। आपरी भासा नैं सिरमथ बणावण खातर दूजी भासावां रा छंदां नैं अपणाय आज रा कवियां भांत-भांतीला मनबिलमाऊ विसयां माथै 'डांखला' लिखिया। राजस्थानी में हास्य-व्यंग्य आरौ खास विसय रैयौ है। मोहन आलोक, विद्यासागर, श्यामसुंदर भारती, बजरंग सारस्वत 'गंगाशहरी' रा डांखला घणा सराईज्या। शिव पारीक री पोथी 'गळै में अटक्यौ डांखलै' नाम सूं सांम्ही आवै। डांखलै चुटकलानुमा काव्य रौ रूप है। आज री नूंवी चिंतन सैली अर सबदां री पकड़ आं डांखलां में निजर आवै।

काव्य-रूपां री इण जातरा में राजस्थानी कवियां जापानी छंद 'हाइकू' में ई आपरी हथौटी कसण रा जतन करै। भारत सूं चीन अर जापान में गयोड़ा बौद्ध धरम रा अनुयायी धरम उपदेस अर सीख री बात नैं थोड़ाक सबदां में कैवता। इण रचना-बंध नैं 'हाइकू' नांव दिरीज्यौ, जिणरी जड़ां भारतीय साहित्य सूं ई सींचीजी है। ध्यान, गैरा चिंतन सूं मन रा झीणा विचारां नैं कम सबदां में कैवण री कला रौं नांव 'हाइकू'। फगत (17) सतरा आखरां रौं नैनौं-सोक वरणिक छंद है- हाइकू। इणमें भासा अर भावां री सूक्ष्मता है। सांवर दइया, लक्ष्मीनारायण रंगा, नीरज दइया, भंवरलाल भ्रमर, सुमन बिस्सा, घनश्याम नाथ कच्छावा जैड़ा कवियां 'हाइकू' में आपरा विचार राख्या है। सोनेट राजस्थानी कविता आज री दौड़ में लारै नैं रेय जावै, इणरी पूरी खेचल अठा रौं कवि करतौं रैवै। वाणी रौं वर तौ मां सुरसत रा इण लाडलां नैं मिल्योड़ा है ई। 14 (चवदै) ओळी रा इण छंद में जीवण री जथारथ थितियां अर घटनावां रौं वरणाव, आपरै च्यारूंमेर रै वातावरण रौं सांच अर आपरै हियै रा निजू संबंधां री बात नैं घणा मरम परसी सबदां में कथीजण री कव्या राजस्थानी कवि मोहन आलोक री थाती है। 'सौ सोनेट' नांव री इण पोथी में 102 सोनेट छंद है। न्यारा-न्यारा विसयां में सबदां री कव्या अर भावां री परगवाई है। अंग्रेजी छंद नैं अपणाय आपरै हियै री बात उकेरण में राजस्थानी लारै नैं रेय। पढती बगत ई कठैर्ड अबखायी नैं लखवै कै इण छंद री पकड़ में राजस्थानी कवियां कीं खामी राखी होवै। इणरै पछै बीजीकावां ई राजस्थानी में रचीजी, जिणमें साव थोड़ाक सबदां में सार री बात कैवणी होवै। हिंदी री 'क्षणिकावां' ज्यूं जीवण रा आम-फेम प्रतीकां अर बिम्बां नैं नूवा, अबोट आखरां नैं अरथ देवती, सचोट तीखी व्यंग्य भस्योड़ी, थोड़ा में घणौं कैवण री खिमता राखण वाली औं 'बीजीकावां' जीव जगत रा न्यारा-न्यारा रूपां नैं उकेरती निजर आवै। लक्ष्मीनारायण रंगा री बीजीकावां सरावण जोग है। ओम पुरोहित 'कागद' री 'कुचरणी' में अरथावूं कुचरण्यां रौं मापौ ई कोनी। दौलतराम डोटासरा रा 'टुणकला' ई जूना ओखाणां ज्यूं अरथावै जिणमें सार बात कहीजी है। राजस्थानी में भासाई सबदां रौं औं साव नूवौं प्रयोग है।

इण भात आधुनिक राजस्थानी काव्य साहित्य में काव्य रा नूवा रूपां रौं प्रयोग ई साहित्य भंडार नैं सिमरथ कैरैला अर इण भासा री कूंत करण में आज रा औं काव्य-रूप आपरी सैनरूपता रौं म्यानौं देवैला। आधुनिकता री दौड़ में आगै बधता साहित्य रा पग मंडणा आपरी मंजिल लग पूरैला।

राजस्थानी साहित्य में नारी लेखण री बात करां तौं कई सोध-प्रबंध त्यार होय जावै। मध्यकाल री मीरां सूं जीवण री सीख लेयनै अलेखूं महिला रचनाकार साहिं आवै। सगुण-निरगुण भगती रा सुरां नैं आपरा पदां में अंवेरती दया बाई, सहजो बाई, गवरी देवी, स्वरूपां बाई, राणा बाई, इणां सूं ई पैली सोढी नाथी अर रसिक बिहारी रा नांव भक्तिमती कवयित्रियां में आवै, तौं पतिव्रत धरम, तीज- तिंवार, देसप्रेम अर प्रकृति रा मोवणा चितराम ई भगती नीति रै साथै निजर आवै। आं माय दीप कुंवरी, उमादेवी जैड़ी रचनाकार साम्हिं आई।

आज नारी सामाजिक विडरूपता, अबखायां नैं आपरी रचनावां पेटै उकेरै। सामाजिकता रै ढांचा में दोवड़ी विचारधारा में पीसीजीती नारी आज आपरी लेखणी सूं उण असमानता नैं नकारै। जथारथ वरणन में नारी लेखण आपरी व्यथा री कथा कैवै। 'धर मजलां धर कूचां' रै साथै नूवी सोच, मानवी-संघर्ष, मिनखपणा री दीठ रै लेखौ करती आपरी दिसा में चाल रैयौ है। डॉ. तारालक्ष्मण गहलोत रौं 'कैक्ट्स माय तुव्सी' काव्य संकलन सामाजिक विसंगतियां नैं उकेरै। डॉ. सावित्री डागा, संतोष मायामोहन, डॉ. कमला जैन, वंदना शर्मा, डॉ. अरुणा शर्मा, प्रतिभा व्यास, सुमन बिस्सा, कविता किरण, मोनिका गौड़, राजेश दुलारी सांदू, कमला कमसिन, डॉ. प्रकाश अमरावत, डॉ. शारदा कृष्ण, किरण राजपुरोहित 'नितिला', रीना मेनारिया, ऋतुप्रिया, छैल कंवर चारण, डॉ. लीला मोदी आद अनेक महिला रचनाकारां री काव्य प्रतिभा गीत, कविता, गजल अर छंदां रै रूप में साम्हिं आवै। आज समाज रूपी रथ रौं दूजोड़ी पहियौ ई लेखणी री धुरी बणाय साथै संभग्यौ है। नूवी चेतना रै संचार संचरियौ अर अबै समाज नैं आगै बधण सूं कुण रोक सकैला। राजस्थानी साहित्य रा रूंखड़ां नैं हरियल करणियां डाल्हियां, पानड़, कूंपळ, फूल अर फळां रै रूप में आपरी न्यारी ठौड़ फाबतां सिरजणहारां री साख भरूं तौं म्हारौं सौभाग है। बाल-साहित्य में ई

राजस्थानी लेखन लारै कोनी। टाबरां रै वास्तै हेत-अपणायत अर शिक्षाप्रद कवितावां री बानगी इणमें देखीजै।

आं मांय सुं केर्इ कवि परंपरागत काव्य लिखै, तौ केर्इ जथारथवादी काव्य रै नैड़ा ढूकै। केर्इ पकृति रा प्रेमी इण रा कण-कण नैं आखरां ढाळै, रुँखां री महिमा गावै, तौ केर्इ मैण्ठ रा नारा देवै। केर्इ संस्कृति री रूपाळी छिब तीज-तिंवारा में देखनै उणरा गीत गावै तौ केर्इ नूंवा भाव-बोध साथै अनाम कविता, मिनी कविता नैं सिरजै। मानवी भावनावां साथै जुड़ नै झीणी संवेदना नैं कविता रा सुर बणावै, तौ केर्इ समाज री दसा अर दिसा माथै छीजतौ निजर आवै। कोई विरलौ कविता नैं साचै संचै ढाळै, तौ केर्इ फकत नांव खातर च्यार ओळ्यां मांड नै कवि बण जावणौ चावै। कीं होवौ, आधुनिक राजस्थानी कविता री थिर जातरा करता आगै बधता आं कवियां री कोरणी मंडग्या आखरां में आधुनिक भावबोध, नवजीवण अर नूंवै भावबोध, कथ्य, रचाव, विचार, भासा, बिंब अर सिल्प सरावण जोग अर आपरी निकेव्ही पिण्डण बणावण जोग है।

इण भांत आधुनिक काव्य री खास प्रवृत्तियां में जथारथवादी काव्य, प्रगतिशील काव्य, नवजीवण रै काव्य, नव भावबोध रै काव्य, हास्य-व्यंग्यात्मक काव्य, प्रकृतिवादी काव्य, नूंवां बिम्ब अर प्रतीक विधान में लिखीज्यौ तौ परम्परागत काव्य में भक्ति, नीति, प्रकृति, वीरता, सिणगार रै काव्य इं बरोबर लिखीजतौ रेयौ। गिरधरदान रतनू दासोड़ी जैड़ा कवियां रै पाण डिंगळ रै डमरु छंदां री छौळां रै पाण आपरै नाद गुंजावै, तौ छंदमुक्त कवितावां ई आधुनिक राजस्थानी साहित्य में मोकळ्यायत में रचीजण लागी है।

आधुनिक राजस्थानी गद्य

आधुनिक राजस्थानी गद्य री सरुआत वीर रसावतार कवि सूर्यमल्ल मीसण रा लिखोड़ा कागदां (पत्रां) सुं मानीजै। आप राजनीतिक चेतना अर कर्तव्य पुकार सुं सराबोर पत्र लिखनै देसी राजावां नैं भेज्या। वां कागदां री भासा में नूंवै गद्य रा ऐनान लाधै। आधुनिक गद्य में औं कागद नींव रा मजबूत भाटा बण गद्य रूपी महल नैं ऊभौं करण में पैलौ सैयोग करै। आधुनिक राजस्थानी में ई दूजी भासावां रै ज्यूं गद्य री विविध विधावां में सिरजण होवण लाग्यौ। इण बगत में घणकरा प्रवासी राजस्थानी आपरी मायड़ भासा रै मान बधायौ। इणमें शिवचंद्र भरतिया अेक औड़ी नांव है जिका कहाणी, उपन्यास, नाटक जैड़ी विधावां री सरुआत राजस्थानी में करी। उण पछै तौ राजस्थानी मांय उपन्यास, कहाणी, नाटक, निबंध, अेकांकी, रेखाचित्राम, संस्मरण, बाल-साहित्य जैड़ी विधावां दीठाव में आई। अठै राजस्थानी री आं विधावां री कीं जाणकारी टाबरां नैं करावणी चावूं।

राजस्थानी मांय पैलौ उपन्यास ‘कनक-सुंदर’ मान्यौ जावै। सन् 1903 में शिवचंद्र भरतिया इण उपन्यास में उण बगत री बुरायां रै निवारण खातर सुधारवादी दीठ राखी है। उपन्यासकार इण मांय बालब्याव, दायजौ, अनमेल ब्याव आद नै पाठकां साम्ही ल्यावण रै जतन करियौ है। राजस्थानी रै दूजौ उपन्यास श्रीनारायण अग्रवाल रै ‘चम्पा’ है जिणमें समाज-सुधार री भावना राखीजी है। इण पछै श्रीलाल नथमल जोशी रा ‘आभै पटकी’, ‘अेक बीनणी दो बीन’ अर ‘धोरां रै धोरी’ उपन्यास पाठकां साम्हीं आया। अनाराम सुदामा रै ‘मैकती काया मुळकती धरती’, ‘मेवै रा रुँख ?’, ‘आंधी अर आस्था’, ‘डंकीजता मानवी’, ‘घर संसार’, यादवेन्द्र शर्मा चन्द्र रा ‘हूं गोरी किण पीव री’, ‘जोग संजोग’ अर विजयदान देथा रा ‘तीडौ राव’, ‘मां रै बदलौ’ अर ‘आठ राजकंवर’ जैड़ा लोक उपन्यास साम्हीं आया।

नूंवै जुग मांय नूंवा विसयां नैं लेयनै उपन्यास साम्हीं आया। बी. एल. माली ‘अशांत’ रा च्यार उपन्यास ‘मिनख रा खोज’, ‘बैजू’, ‘अबोली’ अर ‘बुरीगार निजर’ साम्हीं आया। मालचन्द तिवाड़ी रै ‘भोळावण’, छत्रपति सिंह रै ‘तिरसंकू’, पारस अरोड़ा रै ‘खुलती गांठां’, दीनदयाल कुंदन रै ‘गुंवारपाठौ’, सत्येन जोशी रै ‘कंवळपूजा’, भूरसिंह राठौड़ रै ‘राती घाटी’, रामनिवास शर्मा रै ‘काळ भैरवी’, करणीदान बारहठ रै ‘मंत्री री बेटी’, अब्दुल वहीद कमल रै ‘घराणौ’ सुं आगै बधेपै कर उपन्यास साहित्य मांय नूंवा रचाव होया। इण विधा माथै नूंवा लिखारा

भी आपरी कलम सवाई करी, जिणमें सुरेन्द्र अंचल रौ 'सुपना रौ सायबौ', ओमदत्त जोशी रौ 'पाणी पीजै छाण, देवकिशन राजपुरोहित रा 'सूरज', 'कपूत', 'कल्कं', 'धाड़की', 'दातार', देवदास रांकावत रा 'मुळकती मौत कल्पती काया', 'धरती रौ सुरग', 'गांव! थारै नांव', 'होम करतां हाथ बळै', नवनीत पाण्डे रौ 'माटी जूॄ', 'दूजौ छैड़ै', मधु आचार्य 'आशावादी' रा 'गवाड़', 'अवधूत' अर 'आडा-तिरछा लोग', रामेसर गोदारा रौ 'टूण्डौ मूण्डी' आद साम्हं आवै। इकीसवैं सईकै में इन विधा माथै लगोलग काम हुय भी रैयौ है। आज इन विधा नैं परोटण री घणी दरकार है।

कहाणी राजस्थानी साहित्य रै नूंवै जुग री देन है। 'बात' परंपरा सूं अळगी हट नै राजस्थानी कहाणी आपरी नूंवी सरुआत करी। बीसवीं सदी सूं कहाणी विधा पेटै काम होवण लाग्यौ। नूंवा विसयां अर सिल्प नैं लेयनै कहाणीकार पाठकां साम्हं पोथ्यां लाया। 1904 में आधुनिक राजस्थानी री पैली कहाणी कलकत्तै सूं निकलण वाली हिंदी री मासिक पत्रिका 'वैश्योपकारक' में शिवचन्द्र भरतिया री 'विश्रांत प्रवासी' मानीजै। इणरै पछै गुलाबचन्द नागोरी री 'बडी तीज', 'बेटी की बिकरी' अर 'बहू की खरीदी', शिवनारायण तोसनीवाल री 'विद्यापरं दैवतम्', 'स्त्री शिक्षा को ओनामो', ब्रजलाल बियाणी री 'रामायण' अर भगवती प्रसाद दारूका री 'अेक मारवाड़ी की घटना' अर 'अेक मारवाड़ी की बात' छपी। औ कहाणियां उग बगत रै राजस्थानी समाज री सामाजिक बुरायां नैं उजागर करै, इन सारू आं में सुधारवादी सुर दिखै। औ कहाणीकार राजस्थानी समाज मायं रची-पची सामाजिक अबखायां कानी पाठकां रौ ध्यान खींचण री कोसिस करी। औ कहाणियां जूनी राजस्थानी बातां सूं घणी न्यारी ही। न तो इणां में कोई अलौकिक पात्र हा अर न ई कोई अलौकिक घटनावां। इणमें किणी भांत रा राजा-राणी या राजकंवर जैड़ा पात्र नीं हा, आं में फगत जथारथ नैं उजागर करीज्यौ हो। इन कारण कैय सकां कै आधुनिक राजस्थानी कहाणी री सरुआत प्रवासी राजस्थानी कहाणीकारां करी।

आधुनिक राजस्थानी कहाणी री सरुआत मुरलीधर व्यास वि. सं. 2012 (1955) में आपरै कहाणी-संग्रै 'बरसगांठ' सूं करी। आधुनिक राजस्थानी कहाणी परंपरा मायं दो धारावां देखी जाय सकै। अेक धारा तौ सुधारवादी सोच लियां दीखै तौ दूजी धारा मायं तत्कालीन सामाजिक जीवण मायं आवता बदल्याव अर वां बदल्यावां रै कारण जीवण-मूल्यां माथै पड़तै प्रभाव नैं प्रकट करणै री कोसीस करीजी। राजस्थानी रा आधुनिक कहाणीकार भाव अर सिल्प दोनूं स्तर माथै कहाणियां नैं मांजण लाग्या। इणां मायं अन्नाराम सुदामा, मूलचन्द प्राणेश, बैजनाथ पंवार, श्रीलाल नथमल जोशी, नृसिंह राजपुरोहित, डॉ. मनोहर शर्मा, राणी लक्ष्मीकुमारी चूंडावत रौ नांव सिरै ओळ में आवै। आं कहाणियां में 'भूरी', 'कलिं महातम' (बैजनाथ पंवार), 'बोल म्हरी मछली', 'उतर भीखा म्हरी बारी', 'भारत भाग्य विधाता' (नृसिंह राजपुरोहित), 'माटी री हांडी' (श्रीलाल नथमल जोशी), 'आंधै नैं आंख्यां' (अन्नाराम सुदामा) आवै। लोककथावां री सैली मायं राणी लक्ष्मीकुमारी चूंडावत, विजयदान देथा, डॉ. मनोहर शर्मा, नानूराम संस्कर्ता आद रचनाकारां लोक संस्कृति अर लोकचेतना नैं लेयनै कहाणियां लिखी।

राजस्थानी कहाणी आपरी जात्रा मायं आज ताँई केर्द पांवडा भरिया है। न्यारा-न्यारा विसयां नैं लेयनै कहाणीकारां आपरी कथा-कृतियां पाठकां साम्हं राखी। इणां में नानूराम संस्कर्ता री 'ग्योही', नृसिंह राजपुरोहित री 'रातवासौ', 'अमर चूनडी', 'मऊ चाली माळवै', 'प्रभतियौ तारौ', 'अधूरा सुपना', मूलचन्द प्राणेश री 'उकल्ता आंतरा : सीळा सांस' अर 'चस्मदीठ गवाह', बैजनाथ पंवार री 'लाडेसर', 'नैणां खूट्यौ नीर', डॉ. मनोहर शर्मा री 'कन्यादान', अन्नाराम सुदामा री 'आंधै नैं आंख्यां', श्रीलाल नथमल जोशी री 'परण्योडी कंवारी', 'मैंधी, कनीर अर गुलाब', सांवर दइया री 'असवाड़-पसवाड़', 'धरती कद ताँई घूमैली', 'अेक दुनिया म्हारी', भवरलाल 'भ्रमर' री 'तकादो', 'सातुं सुख', दामोदर प्रसाद शर्मा री 'प्रेतात्मा री पीड़', 'रामेश्वर दयाल श्रीमाली री 'सळवटां', बी.ओल. माली अशांत री 'किली किली कटकौ', 'राई-राई रेत', मनोहर सिंह राठोड़ री 'रोसनी रा जीव', 'खिडकी', 'गढ़ रौ दरवाजौ', यादवेन्द्र शर्मा चन्द्र री 'समंद अर थार', मदन सैनी री 'फुरसत', 'भोळी बातां', मालचन्द तिवाड़ी री

‘धड़ंद’, ‘सैलिब्रेसन’, मीठेस निरमोही री ‘अमावस, ओकम अर चांद’, चैनसिंह परिहार री ‘चरकास’, रामस्वरूप किसान री ‘हाडाखोड़ी’, ‘तीखी धार’, ‘बारीक बात’, सत्यनारायण सोनी री ‘घमसाण’, ‘धान कथावां’, भरत ओळा री ‘जीव री जात’, ‘सैक्टर नं. 5’, ‘भूत कथावां’, डॉ. मदन केवलिया री ‘काली काठळ’, बुलाकी शर्मा री ‘हिलोरो’, ‘साच नै आंच’, कमल रंगा री ‘सीधां अर मोती’, रामेसर गोदारा री ‘मुकनो मेघवाळ’ अर ‘वीरे तूं लाहौर वेखण आई’, मनोज स्वामी री ‘कियां’ अर ‘इमदाद’, मधु आचार्य ‘आशावादी’ री ‘ऊग्यौ चांद ढळ्यौ जद सूरज’, ‘आंख्यां मांय सुपना’, डॉ. मदन गोपाल लढ़ा री ‘च्यानण पख’ अर राजेन्द्र जोशी री ‘अगाड़ी’ साम्ही आयी। राजस्थानी कहाणी री इण जात्रा मांय लुगायां भी आपरी कलम सवाई करी है। आं महिला रचनाकारां मांय डॉ. (श्रीमती) प्रकाश अमरावत री ‘हियै रा हरफ’, माधुरी मधु री ‘केसरिया बालम’, ‘तिड़कण लाग्या बांस’, कुसुम मेघवाळ री ‘अमंगली छाया’, मंजू सारस्वत री ‘उजास’ आद कथाकृतियां रा नांव इण कहाणी-जात्रा मांय उल्लेखजोग है। आं रै टाठ सुखदा कच्छवाह, चांदकौर जोशी, पुष्पलता कश्यप, बसंती पंवार, रीना मेनारिया, अनुश्री राठौड़ आद ई मोकली कहाणियां लिखनै राजस्थानी कथा-साहित्य रै भंडार भस्यौ है।

राजस्थानी गद्य विधावां में निबंध री महताऊ ठौड़ है। आधुनिक जुग में न्यारा-न्यारा विसयां माथै निबंध लिखीज्या है। निबंध विचार नैं, भावां नैं अर विसय नैं चोखी तरियां बांधण रौं काम करै। राजस्थानी मांय निबंधां रौं पैलड़ौ सरूप ‘मारवाड़ी भास्कर’ अर ‘मारवाड़ी’ जैड़ा पत्रां में प्रकासित होवण वाला लेखां में देखण नैं मिलै। ब्रजलाल बियाणी रा निबंध ‘मोगराकली’, ‘गुलाबकली’, बड़ी फजर रौं दीवौ आद ललित निबंध ‘पंचराज’ में प्रकासित होया। इण पछै तौ कई निबंध साम्हीं आवै। आगीवांण, ओळमों, जलमभोम, मरुवाणी आद पत्र-पत्रिकावां मांय निबंध प्रकासित होया। आधुनिक राजस्थानी साहित्य रा चावा निबंध-संग्रहां मांय ‘संस्कृति री सोरम’ (डॉ. शक्तिदान कविया) ‘राजस्थानी संस्कृति रा चित्राम’, ‘धर कोसां धर मजलां’, ‘अर्जुण आली आंख’ (जहूरखां मेहर), ‘मणिमाल’ अर ‘रस कल्स’ (डॉ. कल्याणसिंह शेखावत), ‘भल लूआं बाजौ कित्ती’ अर ‘लोक रौं उजास’ (डॉ. किरण नाहटा), ‘पांवडा, पड़ाव अर मंजल’, ‘सोहम चमकत तारा’ (बी.एल. माली ‘अशांत’), ‘बल्हारी उण देसड़े’ अर ‘बुगचौ’ (मूळदान देपावत), ‘डीगा ढुंगर धोळिया’ अर ‘परख सिरजण’ (डॉ. पुरुषोत्तम आसोपा), ‘नाक री करामात’ (बुद्धिप्रकाश पारीक), ‘प्रीत रा पंछी’ (अस्तअली खां मलकांण), ‘अणभूत दीठ’ (नरपतिसिंह सिंधवी), ‘सोनलिया ओळखाण’ (माणक तिवाड़ी ‘बंधु’), ‘इतिहास रौं साच’ (डॉ. गिरिजाशंकर शर्मा), ‘सुरनर तो कथता भला’ अर ‘सूरज कदै बिसूंजै कोनी’ (सूर्यशंकर पारीक), ‘इंदरधनख’ (डॉ. चेतन स्वामी), ‘सिरजण री साख’ (डॉ. मदन सैनी), ‘कवि, कविता अर घरआली’ (बुलाकी शर्मा), ‘सुण अरजुण’ (शंकरसिंह राजपुरोहित), ‘मरुधर री मठोठ’ अर ‘जळ ऊंडा थळ ऊजळा’ (गिरधरदान रतनू दासोड़ी), ‘काव्यशास्त्र री ओळखाण’ (गौरीशंकर प्रजापत) अर ‘कीरत रा बखाण’ (डॉ. नमामीशंकर आचार्य) आद खास है।

राजस्थानी मांय नाट्य परंपरा घणी जूनी है। लोकनाट्य रै स्हरै सूं मन-बिलमाऊ भणाई अर ग्यान बधावण रौं काम होवतौ। इण लोकनाट्य में ख्याल, स्वांग, रम्मत, रासलीला, फड़, टूंट्या आद लोकचावा है। आधुनिक राजस्थानी नाटकां री सरुआत शिववचन्द्र भरतिया सूं मानी जावै। वाँरौ पैलौ नाटक ‘केसर विलास’ सन् 1900 में प्रकासित होयौ। इण परंपरा में दूजा नाटकां रौं लेखन अर प्रकासन अलग-अलग रचनाकारां द्वारा करीज्यौ।

जद बात आपां राजस्थानी नाटकां री विसय-वस्तु री करां तौ सरुआती नाटक सामाजिक धरातल सूं जुड़िया लखावै। आं नाटकां मांय रचनाकार सामाजिक अबखायां नैं सांझी लावण रौं जतन करियौ। ‘केसर विलास’ मांय बदलाव रा सुर दिखें। मारवाड़ी समाज री रीति-कुरीतियां रौं वरणाव इण नाटक में घणौ ई हुयौ है। भरतियाजी रा दूजा नाटक ‘फाटका जंजाल’ अर ‘बुढापै री सगाई’ सांझी आवै। इण पछै भगवती प्रसाद दारुका रा ‘बालविवाह’, ‘वृद्धविवाह’, ‘सीठणा सुधार’, गुलाबचंद नागौरी रा ‘मारवाड़ी मौसर’ अर ‘सगाई-जंजाल’, बालकृष्ण लाहोटी रौं ‘कन्याबिक्री’ अर नारायणदास सारड़ा रौं ‘बाल व्याव को फोर्स’ आद नाटक सामाजिक अबखायां नैं लेयनै रचीज्या।

इणरै पछै केई नाटककार न्यारा-न्यारा विसयां नैं लेयनै नाटक लिख्या। श्रीनारायण अग्रवाल रा 'कलियुगी कृष्ण रुकमणी नाटक', 'अकल बडी क भेंस', 'महाभारत को श्रीगणेश', 'विद्याउदय नाटक', सूर्यकरण पारीक रौ 'बोल्लावण', श्रीनाथ मोदी रौ 'गोमा जाट', गिरधारी लाल व्यास रौ 'प्रणवीर प्रताप', डॉ. नारायण विष्णु जोशी रौ 'जागीरदार', बालकृष्ण लाहोटी रौ 'कन्या बिकरी', मदनमोहन सिद्ध रौ 'जयपुर की ज्योणार', आज्ञाचंद्र भंडारी रौ 'पन्नाधाय', भरत व्यास रौ 'ढोला मरवण', 'रंगीलौ मारवाड़', यादवेन्द्र शर्मा 'चंद्र' रौ 'तास रौ घर', बद्रीप्रसाद पंचोली रौ 'पाणी पैली पाळ', फूलचन्द्र रौ 'बिकाऊ टोरडौ', सत्येन जोशी रौ 'मुगती बंधण', अर्जुनदेव चारण रा 'दो नाटक आज रा', 'धरमजुद्ध', 'मुगती गाथा', 'जमलीला', 'जेठवा ऊजाठी', 'बोल म्हारी मछली इत्तौ पांणी', 'सत्याग्रह', डॉ. ज्योतिपुंज रौ 'कंकू कबंध', लक्ष्मीनारायण रंगा रा 'बहूरूपियौ' अर 'पूर्णमिदम्' आद नाटकां रौ सिरजण होयौ।

नाट्यसास्त्र री चावी विधा है— अेकांकी। इणरै चलन पैली पिछमी देसां में रैयौ, पछै भारत में भी आ विधा घणी चावी होयौ। राजस्थानी री पैली अेकांकी शोभाचंद जम्मड़ री 'वृद्ध विवाह विदूषण' मानी जावै। नाटक मांय कथावस्तु मोटी होवै, पात्रां री संख्या बेसी होवै जदकै अेकांकी इण सूं छोटी होया करै। संस्कृत में इणनैं रूपक मान्यौ गयौ हैं। इणमें कथाक्रम, पात्रां री संख्या अर धेय सरूप मोटौ नीं होवै। अभिनेयता में भी बगत कमती ही लागै, इण कारण इणनै अेकांकी कैवै। श्रीनाथ मोदी री अेकांकी 'गांव सुधार या गोमा जाट' अर सूर्यकरण पारीक री 'बोल्लावण' सरुआती दौर री मानी जावै। इणरै पछै 'सामधरमा माजी' (लक्ष्मीकुमारी चूंडावत), 'देस रै वास्तै' (आज्ञाचंद भंडारी), 'जय जलमधोम (धनंजय वर्मा)', 'डाक्टर रौ व्याव' (डॉ. गोविन्दलाल माथुर), 'तोप रौ लाइसेंस' (दामोदर प्रसाद शर्मा), 'रगत ओक मिनख रौ' (सुरेन्द्र अंचल), 'मिनख' (हनुमान पारीक), 'छोरी फेल कियां हुई बैनजी' (श्रीलाल नथमल जोशी), 'कफन' (नागराज शर्मा) अर 'खाग्या बालणजोगा' (जयंत निर्वाण) जैड़ी अेकांकियां मांय विसयां री विविधता देखण नै मिळै अर वांरै कारण औं आपरै पाठक रै हियै तांई पूगै।

साहित्यकार आपरी कलम सूं जद सबद चितराम उकेर वै आपरी भावनावां पाठकां साप्हर्णी परगटै, उणनैं रेखाचितराम केईजै। जिकौं काम अेक चितेरो आपरी तुलिका अर रंग रै स्सारै सूं करै वौं इज काम साहित्यकार आपरी कलम अर सबदां सूं करै। रेखाचितराम नैं अंग्रेजी में 'स्केच' कैयौं जावै। रचनाकाल विगत री दीठ सूं राजस्थानी में रेखाचितराम रचीजण री परंपरा सन् 1946-47 रै लगैटगै होयौ। भंवरलाल नाहटा रौ 'लाभू काको' इण विधा री पैली रचना मानीजै। आजादी पछै इण विधा माथै सांतरौ काम होयौ है। इणरै पछै 'जूना जीवता चितराम' (मुरलीधर व्यास), 'सबड़का' (श्रीलाल नथमल जोशी), 'बानगी' (भंवरलाल नाहटा), 'उणियारा', 'ओळखाण', 'मिनखां री माया' (शिवराज छंगाणी), 'अटारवा' (ब्रजनारायण पुरोहित), 'बारखड़ी' (वेद व्यास), 'यादां रा चितराम' (डॉ. तारालक्ष्मण गहलोत), 'उणियारा ओळूं तणा' (अस्तअली खां मलकांण) आद रेखाचितरामां री फूठरी परंपरा साम्हं आयी। ओळूं रै आधार माथै जद रचनाकार आपरी भावनावां अर विचारां नैं सहजता सूं पाठकां साम्हं राखै, तौ उणनैं संस्मरण रौ नांव दईजै। संस्मरणां रौ आधार मिनख, घटना, जात्रा आद होय सकै। डॉ. नेमनारायण जोशी रौ 'ओळूं री अखियातां', डॉ. तारालक्ष्मण गहलोत रौ 'ओळूं री आरसी', मनोहर सिंह राठौड़ रौ 'यादां रौ झरोखौं', अन्नाराम सुदामा रौ 'आंगण सूं अर्नकुलम' अर 'दूर दिसावर' जैड़ी संस्मरण सिरै है।

'रिपोर्ट' रौ विकसित रूप रिपोर्टाज साहित्यिक विधा रौ रूप लियौ। कम सूं कम सबदां मांय विवरौ मांडणौ रिपोर्टाज री सफलता मानीज्यौ है। राजस्थानी साहित्य मांय रिपोर्टाज विनोद सोमानी हंस रौ 'अेक दिन आपरौ', कुशलकरण रौ 'आवौ हथाई करां', रामनिवास रौ 'तीन बयान', पुरुषोत्तम छंगाणी रौ 'हाथ करींदौ दिल रौ दरियाव', माधव शर्मा रौ 'बजार पट्टै', 'चौड़ै जेब पट्टै', मुरलीधर शर्मा रौ 'नगर मगरै रौ', 'अजबघर मनड़ै रौ' आद आवै। इणां रै अलावा विनोद सोमानी 'हंस', कुशलकरण अर श्रीगोपाल ई कीं 'रिपोर्टाज' लिख्या है।

‘जीवनी’ अर आत्मकथा रै खेतर मांय राजस्थानी रचनाकारां री कलम सुस्त रैयो। ‘जीवनी’ अर ‘आत्मकथा’ जैड़ी रचनावां घणी कोनी आयी। ‘आपणा बापूजी’ (श्रीलाल नथमल जोशी), ‘शिवचन्द्र भरतिया’ (डॉ. किरण नाहटा), ‘देस रा गौरव’, ‘भारत रा निरमाता’ (दीनदयाल ओझा), ‘महावीर री ओळखाण’ (शान्ता भानावत), ‘महापुरसां री जीवणियां’ (गोविन्द लाल माथुर), ‘भगवान महावीर’ (डॉ. नृसिंह राजपुरोहित) जैड़ी रचनावां साम्ही आयी हैं। मनोज कुमार स्वामी री आत्मकथा ‘खेचल अर खेचल’ आत्मकथा रै लेखै नूंवी पहल कैयी जाय सकै।

राजस्थानी मांय टाबरां सारू भी गद्य-साहित्य रै सिरजण होयौ है। आज इण सारू घणौ ई काम होय रैयौ है। इण पेटै बात करां तौ राजस्थानी बाल-साहित्य री स्थिति ठीकठाक मान सकां। विजयदान देथा री ‘बातां री फुलवाडी’ (भाग-2) में टाबरां सारू पसु-पंखेरुवां री रोचक कथावां हैं। इणी भांत राणी लक्ष्मीकुमारी चूंडावत री ‘टाबरां री बातां’, ‘हुंकारै दो सा’, अन्नाराम सुदामा रै बाल-उपन्यास ‘गांव रै गौरव’, यादवेन्द्र शर्मा ‘चन्द्र, रै बाल नाटक ‘राजा सेखचिल्ली’, करणीदान बारहठ री रचना ‘झिंडियौ’, बी. एल. माली ‘अशांत’ रा बाल उपन्यास ‘बिलाणियौ दादौ’ अर ‘दूधिया दांत’, मनोहर सिंह राठौड़ री कृति ‘म्हरी पोथी’, दीनदयाल शर्मा री कृति ‘बालपणै री बातां’, ‘संखेसर रा सींगौ’, सुरेन्द्रसिंह शेखावत री बाल कथाकृति ‘साची सीख’, जयंत निवाण री बाल अेकांकी ‘खाण्या बालणजोगा’, जेबा रशीद री ‘मीठी बातां’, डॉ. नीरज दइया री ‘जादू रौ पेन’, कृष्ण कुमार ‘आशु’ री ‘माटी रौ मोल’, शिवराज भारतीय री ‘रंग रंगीलौ म्हारौ देस’ अर ‘मुधर आई बिरखा राणी’, हरीश बी. शर्मा रौ बाल नाटक ‘सतोळियौ’, मदन गोपाल लढ़ा री ‘सपनै री सीख’, दुलाराम सहारण री ‘क्रिकेट रौ कोड’, रामजीलाल घोड़ेला रौ ‘जादू रौ चिराग’, मनोज स्वामी री ‘तातडै रा आंसू’, कृष्ण कुमार बांदर री ‘झगड़ बिलोवणौ खाटी छा’, राजूराम बिजारणियां री ‘कुचमादी टाबर’ अर डॉ. गौरीशंकर कुलचन्द्र री बालकथा कृति ‘पछतावौ’ आद कृतियां राजस्थानी बाल-साहित्य नैं रातौ-मातौ करूँयौ हैं। इणरै अलावा केई पत्र-पत्रिकावां मांय इण पेटै सिरजण लगोलग हो रैयौ है।

राजस्थानी में गद्यकाव्य (गद्यगीत) ई लिखीज्या है। जिण काव्य रौ बारलौं सरूप तौ गद्य जैड़ी होवै पण भावां में काव्य रौ रस आवै। इणमें आलंकारिक, चमत्कारी भासा रौ प्रयोग करीजै वौ गद्यगीत कहीजै। दरसन, अध्यात्म अर जीव-जगत रा विसयां नैं अंवेरतौ ‘गद्य-काव्य’ राजस्थानी में ई रातौ-मातौ होय रैयौ है। जूना कलात्मक गद्य री ओळ रा गद्य-गीत, जिणां में भावां री सबलता, संगीत री लय, वक्रोक्ति अर ध्वनि-संकेत (ध्वन्यात्मकता) जैड़ी विसेसतावां इणां में होवै। ठा. रामसिंघ तंवर, विद्याधर शास्त्री, मुरलीधर व्यास अर कुं. चन्द्रसिंह रा नांव गिणावण जोग है, जिकै गद्य-गीतां री रचना करी। राजस्थानी में कैं गद्य-काव्य संग्रह ई प्रकासित होया है, जिणां में डॉ. मनोहर शर्मा रौ ‘सोनलभींग’, कन्हैयालाल सेठिया रौ ‘गळगचिया’, गोविंद अग्रवाल रौ ‘नुकती-दाणा’ अर विक्रमसिंह चौहान रौ ‘आत्म दीठ’ विसेस रूप सूं गिणाया जाय सकै।

राजस्थानी में भारतीय भासावां री रचनावां रौ उल्थौ (अनुसिरजण) ई मोकळौ होयौ है। सरूपोत में ‘श्रीमद्भगवत गीता’, उमर खेय्याम री ‘रुबाइयां’, कालिदास रै ‘मेघदूत’, रवीन्द्रनाथ टैगोर री ‘गीतांजली’ अर वांरी दूजी पोथ्यां रौ ई राजस्थानी में उल्था करीज्या। भारतीय अर विदेसी भासावां री केई कृतियां रौ राजस्थानी में उल्थौ करण रौ जस चंद्रप्रकास देवल नैं जावै। वै फ्योदोर दोस्तोयेवस्की रै उपन्यास ‘क्राइम एंड पनिशमेंट’ अर सैम्युअल बैकेट रै नाटक ‘वेटिंग फोर गोडो’ रै अलावा आठ भारतीय भासावां रै पुरस्कृत कविता-संग्रहां रौ ई राजस्थानी में उल्थौ कर चुक्या है। इणां सूं पैलां राणी लक्ष्मीकुमारी चूंडावत, किशोर कल्पनाकांत, रावत सारस्वत, पारस अरोड़ा, पं. गिरधरलाल शर्मा, डॉ. ब्रजमोहन जावलिया, पं. गिरधारीलाल व्यास, नृसिंह राजपुरोहित, डॉ. मनोहर शर्मा, डॉ. नारायणसिंह भाटी, डॉ. वेंकट शर्मा, डॉ. रामप्रसाद दाधीच, डॉ. मनोहर प्रभाकर, ओंकारश्री आद विद्वान लेखक राजस्थानी पत्र-पत्रिकावां में केई महताऊ रचनावां रौ राजस्थानी उल्थौ करूँ। राजस्थानी उल्था रौ सै

सूं बेसी काम साहित्य अकादेमी, नई दिल्ली सूं होयौ है। साहित्य अकादेमी सूं पुरस्कृत कृतियां रौ राजस्थानी उल्थौ करण वाळा में डॉ. सत्यनारायण स्वामी, रामनरेश सोनी, जेठमल मारू, अर्जुनसिंह शेखावत, उपेन्द्र अणु, मनोहरसिंह राठौड़, रामस्वरूप किसान, आईदानसिंह भाटी, श्याम महर्षि, डॉ. मदन सैनी, शंकरसिंह राजपुरोहित, कमल रंगा, कैलाश मंडेला, दुलाराम सहारण, डॉ. नीरज दइया, पूर्ण शर्मा 'पूरण', चेतन स्वामी, मालचंद तिवाड़ी, जितेन्द्र सोनी, रवि पुरोहित, संजय पुरोहित, डॉ. शारदा कृष्ण, मोनिका गौड़, डॉ. कृष्णा जाखड़, डॉ. घनश्याम नाथ कच्छावा आद रा नांव लिखण जोग है।

राजस्थानी गद्य रौ विगसाव बगत सारू होवतौ रैयौ है। इण बगत गद्य लेखन री परंपरा सांतरी रैयी है। जूनै साहित्य मांय बात अर ख्यात साहित्य मांय खूब लिखीज्यौ है। आजादी रै पछै राजस्थानी साहित्य लेखन में लगोलग इधकाई अर बधेपौ होवतौ रैयौ। जूना बगत सूं लेय'र आज लग नित नूंवा विसयगत, रूपगत बदलाव साथै विकसाव रै मारग बैवती साहित्य-जातरा बधती निजर आवै।

⌘⌘

सवाल

विकल्पाऊ पट्टनर वाळा सवाल

1. डॉ. पुरुषोत्तम लाल मेनारिया राजस्थानी साहित्य रै वीरगाथा काल रौ बगत मानियौ—
 (अ) वि. सं. 835 सूं 1240 (ब) वि. सं. 1241 सूं 1584
 (स) वि. सं. 1585 सूं 1913 (द) वि. सं. 1614 सूं 1857
()
2. 'कान्हड़े प्रबंध' रा रचनहार कुण है?
 (अ) श्रीधर व्यास (ब) शिवदास गाडण
 (स) पदमनाभ (द) वीरभाण रतनू
()
3. आं मांय सूं कुणसी कविता-पोथी ईसरदास बारठ री कोनी—
 (अ) नागदमण (ब) देवियांण
 (स) हाला-झाला रा कुंडलिया (द) हरिरस
()
4. कवि मंछाराम छंद-सास्त्र रौ कुणसौ ग्रंथ लिख्यौ?
 (अ) कवि मत मंडण (ब) रघुवरजस प्रकास
 (स) छंदं री छौल (द) रघुनाथ रूपक गीतां रौ
()
5. फागु, धमाल, रासउ अर ढाळ किण सैली री रचनावां है?
 (अ) चारण सैली (ब) लौकिक सैली
 (स) जैन सैली (द) सामान्य गुणधर्मी सैली
()

साव छोटा पडूत्तर वाला सवाल

1. राजस्थानी भासा री उत्पत्त किसी अप्रेंस सूं मानी जावै ?
 2. राजस्थानी साहित्य रै इतिहास रै कालक्रम नैं कितै भागां में बांटीज्यौ है ?
 3. आदिकालीन जैन सैली री दो रचनावां अर वाँरे रचनाकारां रा नांव लिखौ।
 4. मध्यकाल रै औतिहासिक गद्य री चार विधावां रा नांव लिखौ।
 5. ईसरदास बारठ री दो भक्ति-भाव री रचनावां बतावौ।
 6. सायांजी झूला री कृष्णभक्ति धारा री दो पोथ्यां कुणसी है ?
 7. प्रगतिशील काव्यधारा रै तीन कवियां रा नांव बतावौ।
 8. आधुनिक राजस्थानी साहित्य री पैलड़ी कहाणी अर उणरै रचनाकार रौ नांव लिखौ।
 9. भगवती प्रसाद दारूका रै लिखोड़ा नाटकां रा नांव बतावौ।
 10. आधुनिक काल री च्यार गद्य विधावां रा नांव लिखौ।

छोटा पड़त्तर वाला सवाल

1. राजस्थानी साहित्य रै वीरगाथा काल री विसेसतावां बतावौ।
 2. वीरगाथा काल रै दो जैन कवियां अर वांरी रचनावां रा नांव लिखौ।

3. डॉ. पुरुषोत्तम लाल मेनारिया राजस्थानी साहित्य रौ काल-विभाजण किण भांत कस्यौ है ?
4. राजस्थानी में प्रेमाख्यान परंपरा री रचनावां री ओळखाण करावौ।
5. भक्तिकाल री खास-खास रचनावां रा नांव लिखौ।
6. पृथ्वीराज राठौड़ विरचित 'वेलि क्रिसन रुकमणी री' विसेसतावां बतावौ।
7. आधुनिक काल री प्रकृतिपरक रचनावां री ओळखाण करावौ।
8. राजस्थानी गद्य-काव्य री च्यार पोथ्यां अर वांरै रचनाकारां रा नांव लिखौ।
9. 'डांखब्ला' अर 'हाइकू' रौ परिचै करावौ।
10. रेखाचितराम अर संस्मरण में काँई फरक है ? बतावौ।

लेखरूप पडूतर वाला सवाल

1. राजस्थानी भासा री उत्पत्त अर विकसाव माथै अेक लेख लिखौ।
2. आदिकाल री खास रचनावां अर वांरै रचनाकारां रौ परिचै दिरावौ।
3. “राजस्थानी साहित्य रौ मध्यकाल साचै अरथां में भक्तिकाल है।” इण कथन नै पुख्ता करण सारू आपरा विचार प्रगट करौ।
4. भक्तिकाल रै खास रचनाकारां रौ परिचै देवता थकां वारी रचनावां री विसेसतावां बतावौ।
5. राजस्थानी रै आधुनिक साहित्य री कहाणी विधा माथै अेक आलेख लिखौ।
6. आधुनिक काल री प्रमुख विधावां माथै आपरा विचार प्रगट करौ।
7. राजस्थानी नाटकां री उत्पत्त अर विकसाव री विरोळ करौ।

□काव्य-सास्त्र

काव्य री परिभासा, तत्त्व, भेद, प्रयोजन अर राजस्थानी छंद-अलंकार

पाठ परिचै

इण पाठ में काव्य री परिभासा, उणरै तत्त्वां, भेदां, प्रयोजनां रै सागै छंद अर अलंकार सास्त्र री चरचा करांला। इण चरचा सूं पैलां औ जाणणौ जरुरी है कै काव्य री अरथ कांई है? काव्य मांय दो पख रैवै— ओक तौ अनुभूति या भावपख अर दूजौ अभिव्यक्ति या कलापख। जदपि दोनूं पखां री आप-आपरौ महत्त्व है अर दोनूं ई ओक-दूजै सूं संबंधित है, फेरूं ई घणौ महत्त्व भावपख नैं ई दिरीजै। रस नैं काव्य री आतमा मानण वाळा आचार्य भावपख नैं अर कला-पख नैं थापन करण वाळा आचार्य अभिव्यक्ति नैं महत्त्व प्रदान करै। आपां रै अठै भावपख माथै कीं बेसी बळ दिरीजौ है। भारत अर पाश्चात्य विद्वानां कानी सूं काव्य नैं लेयनै करीजी परिभासावां सूं औ विसय औरूं स्पस्ट होवैला।

काव्य रा तत्त्वां रै मुजब पाश्चात्य देसां मांय कल्पना-तत्त्व नैं खास आसरौ मिळ्यौ है। इणरी वजै आ है कै पाश्चात्य समीक्षा-सास्त्र रा आदू आचार्य अरस्तू कला नैं अनुकरण मानी है, जदकै आपां रै अठै रा आदू आचार्य भरतमुनि रस अर भावां नैं ई प्रधानता दीवी है। सार री बात आ है कै भारतीय मनोवृत्ति कीं मांयली बेसी है अर पाश्चात्य में बारली माथै बेसी बळ है। इणरौ मतल्ब औं नीं है कै पाश्चात्य देसां मांय मांयलै पख री उपेक्षा है। दरअसल काव्य रै मूळ तत्व तौं रागात्मक या भावात्मक ई है, पण उणरै साथै पाश्चात्य देसां मांय कल्पना-तत्त्व, बुद्धितत्व अर शैली-तत्त्व नैं ई मान्यौ गयौ है।

काव्य अर साहित्य में कांई फरक है— इण बात नैं जाणणौ जरुरी है। ‘साहित्य’ सबद आपैरै व्यापक अरथ में सारै वाड्मय रै द्योतक है। मतल्ब औं कै की वाणी रै जित्तौ ई प्रसार है, वौ सब साहित्य रै त्हैत है। इण अरथ में विग्यापन अर सूचना-पत्र तकात साहित्य मांय आय जावै। पण संकुचित अरथ में तौं साहित्य रै काव्य सूं ई अभिप्रेत होवै— काव्य मांय गद्य अर पद्य दोनूं ई आवै। ‘काव्य’ सबद कविता रै पर्याय नीं है, जिकी कै पद्य री बोधक है। उल्लेखजोग औं है कै पद्यबद्ध होवण सूं इज कोई रचना कविता या काव्य नीं बण जावै, पद्य तौं कविता रै आकार मात्र कैईज सकै, उणरी आतमा तौं रस मांय ई होवै। इणी वास्तै आचार्य विश्वनाथ काव्य री परिभाषा दीवी— ‘वाक्य रसात्मकं काव्यम्’ यानी रसयुक्त वाक्य काव्य है। काव्य-सास्त्र रा आचार्या काव्य रचण रा केर्ई प्रयोजन ई बताया है, जिणां री विस्तार सूं चरचा इण पाठ में करीजी है।

इणी भांत छंद-सास्त्र री पारिभासिक रूप सूं न्यारी-न्यारी व्याख्या करीजी है। छंदां रौं जूनौं रूप सायद वेदां री रिचावां मांय अर लौकिक रूप में लोक री जुगां चावी विधा लोकगीतां में निजर आवै। लोकगीतां री भलाईं सास्त्रीय परिभासा कोनी, पण लय, सुर, ताल, यति अर गति रै बिना औं गाइजै ई कोनी। काव्य-सास्त्र रै मुजब वरण, मात्रा, यति, गति, लय, सुर, तुकबंदी रै विचार करनै जिकी सबद-रचना करी जावै उणनैं छंद कैवै। छंद तय कस्योड़ी वरणां अर मात्रावां में रस्योड़ी ओक पद्य रचना है। इणरी व्युत्पत्ति संस्कृत रा छद् धातु सूं मानीजै। इणरौ अरथ आवृत्त करणौ, रक्षित अर राजी करणौ होवै। डिंगळ गीत छंद राजस्थानी छंद-सास्त्र री इधकाई है। इणरी मठोठ न्यारी-निकेवळी है अर इण रा केर्ई भेद-उपभेद है। डिंगळ छंदां री छटा सूं छंद-सास्त्र घणौ सिमरध होयौ है।

राजसभावां में राजकवियां री विरुदावळी रा छंद, जुद्ध रा मैदान में वीरां री हूंस जगावण खातर वीरता रा छंद अर कीरत रा बखाण कै पछै जस-अपजस नैं उजागर करण वाळा छंदां सूं राजस्थानी काव्य भस्योड़ी है। स्तुतिपरक

रचना ई छंद कहीजै। स्तुति आपैरे इस्ट देवता री होवौ चायै आपैरे आश्रयदातावां री, जिणमें उण रा विरद याद करीजै, छंदां री ओळी में आवै।

‘राव जैतसी रौ छंद’, ‘रणमल्ल छंद’, ‘माताजी रा छंद’, ‘गोरखनाथजी रौ छंद’, ‘पाबूजी रौ छंद’ आद रचनावां में नायक रै चरित्र रौ पुरजोर वरणाव होवौ है। ‘पद्म’ अर ‘छंद’ अेक अरथ में ई लिरीजै। छंद रौ अेक दूजौ अरथ बांधणौ (बंधन) ई होवै। छंदां रै नियमां में बंधनै कविता नै ठैराव, वेग, राग अर फूठरापौ मिळै। नदी जिण भांत आपैरे दोय किनारां में बंधियोड़ी वेग रै साथै तौ कदैई उतरती-चढती, मंथर गति सूं तय मारग माथै निरबंध बैवती समदर में रळ जावै, उणीज भांत छंद कविता में रम जावै।

काव्य री परिभासावां

काव्य री परिभासा अर अरथ सारू भारतीय अर पाश्चात्य विद्वानां आप-आपरा विचार प्रगट करुया है। ऊपरी तौर सूं देखां तौ औ काव्य सारू अलग-अलग विचार लखावै, पण सगळा विचारां रौ मेळ इज काव्य रौ साचौ रूप है। काव्य रै रूप अर अरथ री विविध पखां सूं विरोळ इणरौ सखरौ रूप प्रगट करै। आं विद्वानां री आप-आपरे मतां मुजब काव्य री परिभासावां इण भांत है—

संस्कृति रै विद्वानां मुजब

“साहित्य रौ मतलब सबद अर अरथ रौ सहभाव होवै।”

— आचार्य भामह

“साहित्य उणनैं कैवै जिण मांय मंगळमयी अरथ री पदावली सामल होवै।”

— आचार्य दंडी

“जिण मांय सबद गुणालंकार सूं संस्कारित होवै अर फूठरापै रा बीज-तत्त्व सागै होवै।”

— आचार्य वामन

“जिण मांय रस होवै, वौ साहित्य है।”

— पं. विश्वनाथ

हिन्दी रा विद्वानां मुजब

“ग्यान-राशि रौ संचित कोश ई साहित्य है।”

— पं. महावीर प्रसाद द्विवेदी

“साहित्य जीवण री आलोचना है.... उण मांय जीवण री व्याख्या अर आलोचना होवणी चाईजै।”

— मुश्शी प्रेमचंद

आथूणा विद्वानांरै मुजब

“काव्य सूं मतलब वौ अनुकरणात्मक पद्म है जिणरौ मूळ काम शिक्षा अर आणंद देवणौ है।”

— सिडनी

“काव्य कल्पना अर भावां री भासा है।”

— हैजालिट

आं परिभासावां रै आधार माथै आपां कैय सकां हां कै साहित्य अर काव्य अेक सिककै रा इज दो पहलू है। मतलब कै दोनूं लगैटाँ अेक इज है। जिण मांय सबद अर अरथ रौ सांतरौ मेळ, फूठरापौ, अलंकार, रस, ग्यान, आणंद, शिक्षा, जीवण री आलोचना अर कल्पना आद तत्त्वां रौ मेळ होवै, उणनैं काव्य मानीजै। औं काव्य मनोरंजन अर आणंद सागै ग्यान देवै।

काव्य रा तत्त्व

काव्य रा दो पख मानीजै— 1. भाव-पख अर 2. कला-पख। भाव-पख में अनुभूतियां आवै तौ कला-पख में अनुभूतियां नैं प्रगट करण वाळी भासा अर सैली आवै। दोनां री आप-आपरी महताऊ ठौड़ है।

आं दोनां में काव्य रा तत्त्वां रौ सांतरौ मेल मिलै। मनोवैय्यानिकां मिनख रै मनोभावां नैं तीन भागां में बांट्या है— 1. भावना, 2. ग्यान अर 3. संकल्प।

पाश्चात्य विद्वानां काव्य री विरोल करनै इण रा चार तत्त्व सामर्ही राख्या है— 1. भाव, 2. कल्पना, 3. बुद्धि (विचार) अर 4. सैली। आं री विगत इण भांत है।

1. भाव-तत्त्व : ‘भावां बिना किसौ भव’। भाव, विभाव अर स्थायी भाव — औ भावां री दसावां है। आं सूं उवाचित होयनै इज काव्य में रस रौ चरम निगै आवै। भाव रौ मूळ रस है अर रस काव्य री आत्मा रै रूप में स्वीकारीजै।

2. कल्पना-तत्त्व : कल्पना री पांख बिना साहित्य रौ विस्तार अर ऊंची-गैरी उडाण कठै? कल्पना तत्त्व रै सायरै इज काव्य कूँकूँ पगलिया करै।

3. बुद्धि-तत्त्व : भाव ग्यान बिना अडोला। बिना ईधन री गाडी। सगळे जगत, व्यवहार, सास्त्र अर काव्य रै मूळ तत्त्व है— विचार (बुद्धि)। भावां रै विकार नैं साफ करण रौ काम बुद्धि-तत्त्व इज करै।

4. सैली-तत्त्व : भावां री घड़त अर बणगट सैली रै सायरै होवै। भावां नैं नूंवी, ऊजवी अर आकर्षक दीठ देवण रौ काम सैली तत्त्व करै। भाव अर सैली ओक दूजै रा पूरक है, जिका खीर-खांड ज्युं मिळनै काव्य री मिठास नैं पुरसै।

काव्य रा भेद

काव्य रै भेदां बाबत चरचा करतां आ बात ध्यान में राखणी जस्ती है कै इण संबंध में भारतीय परंपरा अर पाश्चात्य परंपरा में फरक है। भारतीय परंपरा में काव्य रौ विभाजन केई आधारां माथै करीज्यौ है। पैलौ आधार इंद्रियां सूं संबंध राख्ये। जिकौं काव्य अभिनीत होयनै देख्यौ जावै, वौं ‘दृश्य काव्य’ है अर जिकौं कानां सूं सुण्यौ जावै, वौं ‘श्रव्य काव्य’ बाजै जदपि वौं पढियौ ई जावै।

दृश्य काव्य

दृश्य काव्य रौ आणंद जनसाधारण ई लेय सकै, इण वास्तै इणनैं ‘पांचवौं वेद’ कैयौं गयौं है। दृश्य काव्य में देखण वाळै नैं कल्पना माथै घणौ जोर नीं देवणौ पढ़ै। उण मांय भूत ई वरतमान री दांई घटित होवता दिखाई देवै। इणमें जठै देखणियां री कल्पना माथै कम जोर पढ़ै, बठै ई रचणहार री कल्पना माथै बेसी भार रैवै, क्यूँके उणनैं प्रस्तुति री सारी बातां रौ ध्यान राखणौ पढ़ै।

श्रव्य काव्य

श्रव्य काव्य पठित समाज सारू होवै। इणमें पढिणिया अर सुणिणिया रौ सीधौ संबंध रैवै। इणमें सबद इज मानसिक चितराम उपस्थित करै, सो इणमें ग्राहक कल्पना रौ बेसी काम पढ़ै। इण काव्य में वरणन अर प्राक्कथन री प्रधानता रैवै। बियां कथोपकथन ई रैवै, पण अलबत कम।

दृश्य काव्य रा भेद

आकार रै आधार माथै दृश्य काव्य रा नाटक, रूपक, नाटिका, भाण, प्रहसन आद 10 भेद करीज्या है। इणां री विस्तार सूं जाणकारी आचार्य राजशेखर रै ‘दशरूपक’ नाव रै ग्रंथ में दिरीजी है।

श्रव्य काव्य रा भेद

श्रव्य काव्य तीन तरै रा होवै— 1. पद्य, 2. गद्य, अर 3. चंपू।

पद्य श्रव्य काव्य मांय संगीत अर छंद री प्रधानता रैवै। बियां आजकाल पद्य में नियम अर नाप-तौल रौ उत्तौ मान नीं रैयौ, जित्तौ सुणण री सुखदता रौ। सो आजकाल छंद विहूण पद्य रौ ज्यादा चलण है। पद्य मांय गद्य री तुलना में भाव रौ प्राधान्य रैवै। बंध रै आधार माथै ‘मुक्तक’ अर ‘प्रबंध’ दो विभाग पद्य रा करीजै।

मुक्तक काव्य रा छंद अपणै आप में पूरा हुवै, वै अेक दूजै सूं संबंध नीं राखै। सो मुक्तक में अेक-अेक छंद री साज-संवार माथै बेसी ध्यान दिरीजै। मुक्तक काव्य रा आकार री दीठ सूं दो भेद हुवै— अेक पाठ्य अर दूजौ गेय, जिणनैं ‘प्रगीत’ ई कैयौ जावै। गेय मांय पाठ्य री तुलना में वैयक्तिकता, भावात्मकता अर आत्मनिवेदन रो पख बेसी रैवै।

प्रबंध काव्य में तारतम्य होवै अर पूर्वापर संबंध रैवै। इणमें वरणन, प्राक्कथन, पारस्परिक संबंध अर सामूहिक प्रभाव री प्रधानता रैवै। जीवण री अनेकरूपता अर अेकपक्षता रै आधार माथै प्रबंध काव्य रा दो भेद करीजिया है— 1. महाकाव्य, अर 2. खंडकाव्य। महाकाव्य मांय अेक तै आकार रै अलावा विसय री महानता अर उदात्तता रैवै। महाकाव्य सारू कों नियम ई होवै जिणां रै पाठ्न सूं ‘महाकाव्य’ बाजै। आकार में वौ आठ सरणां सूं कम नीं होवणौ चाईजै।

खंड काव्य में जीवण रै अेक ई पहलू या अेक ई घटना नैं महत्त्व दियौ जावै।

गद्य

गद्य विविध रूपां में लिख्यौ जावै, सो इणरा अनेक भेद है। गद्य री बियां अठै प्राचीन परंपरा रैयी है, पण पाश्चात्य परंपरा रै कारण केर्द नूंवा रूप अंगेजिया है। गद्य रा औ विभिन्न रूप विसय, आकार, सैली इत्याद रै कारण साम्हीं आया है, जिका विधावां रै रूप में जाणीजै। आज गद्य री केर्द विधावां प्रचलित है, जिया कै उपन्यास, कहाणी, निबंध, व्यंग्य, लेख, आलेख, संस्मरण, रेखाचित्र, जीवनी, आत्मकथा, रिपोर्टज, डायरी, पत्र इत्याद।

इण भांत काव्य यानी कै साहित्य मानव समाज सूं अभिन्न जुङ्गौ थकौ है अर आपै विविध रूपां सूं मानव नैं संतोष-संबल देय रैयौ है।

काव्य रा प्रयोजन

काव्य री रचना क्यूं करीजै? आरिहर काव्य री रचना रै लारै प्रयोजन काँई है? साहित्य रा आचार्या काव्य रा भिन्न-भिन्न प्रयोजन मानै। आचार्य मम्मट आपरै ग्रंथ ‘काव्यप्रकाश’ मांय विस्तार सूं साहित्य रा प्रयोजन बताया है— “काव्य जस सारू, धन सारू, वैवार जाणण सारू, अनिस्ट रै निवारण सारू, आणंद सारू अर उपदेस सारू होवै।” इणां में सूं जस, धन अर अनिस्ट निवारण कवि सारू प्रयोजन होवै अर बाकी रा प्रयोजन पाठकां सारू होवै।

जस सारू : जस या कीरत मिनखमात्र री कमजोरी होया करै। बियां जस अेक प्रधान प्रेरक सगती होवै अर कवि ई काव्य-रचना अमूमन जस सारू ई करिया करै।

धन सारू : काव्य रै भौतिक प्रलोभनां में सैं सूं बेसी धन है। साहित्य रै इतिहास माथै निजर न्हाखां तौ असंख्य औड़ा उदाहरण मिठ जावैला, जिका दरसावै कै काव्य रै कारण कवियां नैं धन हासल होयौ। बियां सगळा ई कवि धन रै लोभ सूं प्रेरित नीं होवै।

वैवार जाणण सारू : काव्य सूं लोक-वैवार रौ ग्यान पाठकां नैं तौ होवै इज है, पण रचणहार नैं ई होवै क्यूंके लिखण सूं पैलां वौ आपै ग्यान नैं पक्कौ कर लेवै। जियां कै किणी प्राचीन काव्य सूं उण बगत रै रीत-वैवारां रौ ग्यान होवै।

अनिस्ट निवारण सारू : अनिस्ट निवारण सारू ई काव्य री रचना करीजै, ज्यूं कै आपरै ‘बाहु’ (भुजा) री पीड़ा रै निवारण सारू गोस्वामी तुलसीदास ‘हनुमान बाहुक’ काव्य री रचना करी। आजकाल समाज अर देस रै कस्ट-निवारण सारू ई काव्य रचनावां करीजै।

आणंद सारू : काव्य री मूळ ध्येय आणंद इज है। काव्य रै आस्वादन सूं जिकौ रस-रूप अर आणंद मिळै, वौ छानौ नीं है। हालाकै औं पाठकां रौ लक्ष्य है क्यूंकै इणसूं उणां नैं आणंद मिळै, फेरूं ई इण मायं वौ अंतस रौ सुख ई सामल है जिण सूं प्रेरित होयनै कवि काव्य री सिरजण करै।

उपदेस सारू : काव्य मायं उपदेस होवणौ चाईजै या नीं, इण संबंध में वाद-विवाद होवता रेया है। उपदेस सारू तौ धरम-ग्रंथ होया करै, पछै काव्य मायं उपदेस क्यूं? पण काव्य रै माध्यम सूं जिकौ उपदेस दिरीजै, वौ व्यंजना-प्रधान होयां सूं सरस होया करै। काव्य री रस उपदेस रूपी कडवी औंखद नैं ई ग्रहण करण जोग बणाय देवै। जियां बिहारीलाल रै उपदेसपरक अेक दूहै सूं महाराजा जयसिंह माथै जादू रौ-सो असर होयौ। दूहौ इण भांत है—

नहिं परायु, नहिं मधुर मधु, नहिं विकासु इहिं काल।

अली, कली ही सौं बंध्यो, आगै कौन हवाल॥

आपरै सुख सारू : गोस्वामी तुलसीदास आपरै काव्य ‘रामचरितमानस’ नैं ‘स्वांतः सुखाय’ कैयौ है। इणमें कोई संदेह नीं कै सत्काव्य ‘स्वांतः सुखाय’ ई लिखियौ जावै, पण इणरौ मतळब औं नीं है कै वौ सुणियां या पढणियां सारू नीं क्वै। काव्य नैं कैवण अर सुणण में सुख मिळै, पण आत्माभिव्यक्ति रौ सुख अभिव्यक्त कर देवण मात्र सूं खतम नीं होय जावै।

राजस्थानी छंद

छंदां रौ मैतव

छंदां रै मायं थोड़ा में घणौ कैवण री खिमता है। गूढ अर गैरौ अरथ समझावण री खेचल औं करै। संगीतात्मकता रौ गुण होवण रै कारण सुणण में आछा पण लागै। गेयता रै कारण वातावरण नैं सरस बणावै। आं छंदां रै मिठास में मानखौ घड़ी भर आपरा दुखड़ा भूलनै सुख री घड़ियां चितारै। केई छंद हियै रा कंवळा, मीठा, निरमळ भावां नैं उजागर करण वास्तै बरतीजै। माधुर्य अर प्रसाद गुणां सूं लबालब होयोड़ा आं छंदां री मानखै नैं घणी दरकार आज ई है। क्यूंकै इण आर्थिक अर भौतिक जुग रौ मिनख सांति चावै। इण अपरोगी दुनिया में अपणायत चावै। अेकलौ बैठौ मिनख रेड़ियै, टेपरिकार्डर सूं औड़ा छंदां नैं सुणं र जीवण री नीरस घड़ियां नैं सरस बणाय सकै।

ओज गुणवाव्या वीर छंदां नैं सुणां तौ आज ई उणियरै माथै वीर-भावां रा सैलाण देख्यां बिना नीं रैवां। छंदां में वा ताकत है, बूतौ है कै जिण रस रौ छंद बोलीजै या पढीजै, उठै उणीज तरै रै भावां रौ वातावरण बण जावै। राग-रागनियां रौ आं छंदां सूं गैरौ जुड़ाव है। सोरठ, मांड, मलहार, राग रा छंद आपरै हेताळू रै हियै में हेत जगावण वाला है। आं छंदां री महिमा बखाण करां जित्ती ई थोड़ी है।

छंदां रा भेद

छंदां रा केई भेद-उपभेद मानीजै, पण मोटै रूप सूं छंद दोय तरै रा होवै—

1. मात्रिक छंद अर 2. वरणिक छंद।

1. मात्रिक छंद

जिण छंद में मात्रावां री गिणती कर छंद बणाईजै, वौ मात्रिक छंद मानीजै। मात्रावां री गिणती सूं छंदां री ओळ्यां में यति, गति अर लय नैं परोटां जिकी रचना करीजै, वौ मात्रिक छंद मानीजै। दूहौ, चोपाई, रोला, उल्लाला, छप्पय, गीत, हरिगीतिका आद मात्रिक छंदां रा उदाहरण है।


2. वरणिक छंद

जिणमें वरणां री गिणती रै मुजब यति, गति बरतीजै अर मात्रावां रै आधार माथै काव्य-रचना रौ सिरजण करीजै, उणनैं वरणिक छंद कैवै। भुजंगी, भुजंगप्रयात, त्रोटक, सवैया, कवित आद वरणिक छंदां रा उदाहरण हैं। आं दोनूं तरै रा छंदां में ई वांरे चरणां री मात्रावां अर वरणां री गिणती मुजब तीन भेद बखाणीज्या हैं—

1. सम छंद : जिणमें छंदां रै चरणां में मात्रावां या वरणां री गिणती बराबर होवै। अेक समान मात्रावां या वरणां री गिणती वाला छंदां नैं सम छंद कैवै। चौपाई सम छंद है।

2. विसम छंद : जिणमें छंदां रै चरणां री मात्रा या वरण न्यारा-न्यारा होवै, अेक समान नीं होवै, वौ विसम छंद है। छप्पय, कुंडलिया विसम छंद है।

3. अरथसम छंद : आं छंदां में पैला अर तीजा, दूजा अर चौथा चरणां री मात्रावां या वरणां में समानता होवै। दूहौ अरथसम मात्रिक छंद रौं चावौ उदाहरण हैं। आं ई टाळ कैई गणबद्ध छंद (भगण, मगण), मुक्तक छंद, साधारण छंद, दंडक छंद रै रूप में ई ओळखीजै। जद छंदां री गैराई सूं व्याख्या करां तौ औ रूप ई साम्हीं आवै, पण मूळ में छंदां रा दोय भेद है, वै है मात्रिक छंद अर वरणिक छंद।



राजस्थानी साहित्य में गीत-छंदां री आपरी न्यारी बानगी देखण नै मिलै। छंद-सास्त्र रा ग्रंथां में गीतां री न्यारी-न्यारी गिणती रा दाखला मिलै। 'रघुनाथ रूपक' में 72 भांत रा गीतां रौं वरणाव मिलै। 'कवि कुळबोध में' 84 अर 'रघुवरजस प्रकास' में 91 गीत-छंदां रा दाखला दियोड़ा है। पाठ्यक्रम सारू तय कर्योड़ा कीं छंदां री परिभासा अठै दाखलै समेत दिरीजी है—

1. वेलियो सांणोर

डिंगळ-काव्य में बरतीजण वाला घणकरा मात्रिक छंदां में 'सांणोर' रा कैई भेद अर उपभेद है। छोटा सांणोर रा चार भेदां में वेलियो गीत अेक है। रघुनाथ रूपककार इण रा लक्षण इण भांत बताया है—

चार भेद तिण रा चवै, कवियण बड़ ओकूब।

समझ वेलियो, सोहणो, पुड़द जांगड़ो खूब॥

इणरै सरूप री व्याख्यां इयूं करै—

सोळै कला विषम पद साजै। सम पद पनरै कला समाजै॥

धुर अठार मोहरा गुरु लघुधर। कहजै 'मछ' वेलियो इमकर॥

वेलियो छंद रै विसम पदां में 16 अर सम पदां में 15 मात्रावां व्है। औं तौ छंद रै सामान्य गुण है। पण कठई-कठई इणरै पैलै चरण (पैला द्वावा में) 18 मात्रावां ई बरतीजै। तुकांत में गुरु-लघु (५) व्है। पिंगल-सास्त्र में इणनैं अरधसम मात्रिक छंद कैवै। बीकानेर महाराजा पृथ्वीराज राठौड़ रचित 'वेलि क्रिसन-रुकमणी री' रचना वेलियो छंद में करीजी है। वेलियो छंद रा दाखला—

सरसती कंठि श्री गृहि मुखि सोभा,
भावी मुगति तिकरि भुगति ।
उवरि ग्यान हरि भगति आतमा,
जपै वेलि त्यां ऐ जुगति ॥
(‘वेलि क्रिसन-रुकमणी सुं’)
दिल अंतर ओह विचार री दसरथ,
धर पदवी जुवराज सधीर ।
सो दैणी विसवा ही वीसै,
राज जोग दीसे रघुवीर ॥
(‘रघुनाथ रूपक’ सुं)

गीत छंद त्रबंकड़े

राजस्थानी रौ औं चावौ छंद है। इणरै विसम चरणां में 16-16 मात्रावां व्है अर दूजा नै चौथा री तुक मिलै। औं त्रबंकड़े गीत रा लक्षण है। कवि कैवै कै छोटा सांणोर रै ज्यूं विसम पद राख नै (जिणमें 16 मात्रावां होवै) दूजा अर चौथा री तुक मिलावौ। रघुनाथ रूपक में कवि मंछा राम इण भांत वरणाव करै—

चरण विसम सांणोर लघुचा, दुवै चतुर पद मोहरा दाखो ।
कहै मंछ कर गीत त्रबंकड़े, भला जिकण में प्रभु गुण भाखो ॥

इण गीत नैं घोड़ादमो ई कैवै। त्रबंकड़े गीत-छंद रा दाखला इण भांत है—

अंगद मेलियो सद दूत अपंपर, वळ अकलां मजबूत वडालो ।
वप सिणगार धूत खळ बैठो, रचे सभा अदभूत रढालो ॥
मुणै जाय हरि मेले मोनूं जड! तोनूं आगूंच जतावूं ।
सीस नमाय सिया ले साथै, वचसी जदां उपाव बतावूं ॥

××

मुगट उतार सुघट दसमुख रा, लेकर उघट धुजाई लंका ।
बाल सुतण्ण रचियो विग्रह, आयो राघव कनै असंका ॥

कुंडलियो छंद

औं मात्रिक छंद है। औं पैली अेक दूहै अर पछै 24-24 मात्रावां रा चार चरणां में पूरौ व्है, जिका रोला छंद व्है। औं दूहा अर रोला छंद रा मेल सूं बणै। चौथा अर पांचवां पद में सिंहावलोकन व्है। पैला पद रा सरुआती वाला सबद अंत में ई आवै। रघुनाथ रूपकार कुंडलिया छंद रा लक्षण नैं लिख्या, पण ग्रंथ में जिका कुंडलिया आया, उणां रा लक्षण लिख्या है। उणां झड़उलट, राजवट, सुद्ध अर दोहाल कुंडलिया रा दाखला देवता थकां इण रा चार रूप बताया है। अठै फगत सुद्ध कुंडलिया रा लक्षण अर दाखलै री बानगी दी जावै—

जीव उधारे जगत रा, किता सुधारै काम ।
भार उतारै भूम रो, धणी पधारै धाम ॥

धणी पधारै धाम, सुजस खाटे जग सारे ।
राज कियो बड रीत, गिणे व्रष सैंस इग्यारे ॥
रह्या जित रघुराव, धरम मरजादा धारे ।
आप पधारत ओक, अवधुपुर जीब उधारे ॥
(रघुनाथ रूपक सूं)

किसना आढा कृत 'रघुवरजस प्रकास' में कुंडलिया री व्याख्या इन भांत है—
पहलाँ दूहो एक पुण, आद अंत तुल जेण ।
पलटै धुर पूठा कवित, तब कुंडलियो तेण ॥

कुंडलिया री दाखलौ—

जपै रसण रघुवर जिकै, अधत्यां कपै अमाण ।
जनम मरण सुधरै जिका, जे बडभागी जांण ॥
जे बडभागी जांण, लाभ तन पायां लीधौ ।
त्यां जिग किया तमाम, कांम सुकृत ज्यां कीधौ ॥
वां व्रत किया अनेक, हिरण दे दे विप्रां हथ ।
ज्यां सधिया अठ जोग, त्यां किया कौटक तीरथ ॥
धन मात-पिता जिण वसधर, कल्हुख तिकां दरसण कै ।
कवि किसन कहै धन नर तिकै, रसण रघुवर जपै ॥
(रघुवरजस प्रकास सूं)

छप्य छंद

औं अेक विसम मात्रिक छंद है। रोळा अर उल्लाळा रै मेळ सूं छप्य बणै। उल्लाळा में कठैई 26 तौ कठैई 28 मात्रावां होवै। छप्य में आं दोनूं छंदां रौ मेळ होवण रै कारण अठै रोळा अर उल्लाळा रै गुणां बाबत व्याख्या देवणी ठीक रैसी। इणां री सरल परिभासा इन भांत है—

रोळा : औं मात्रिक सम छंद है। इण रा चार चरण होवै अर हरेक में 24-24 मात्रावां होवै। 11 अर 13 माथै यति लागै। रघुनाथ रूपक रै परिशिष्ट में रोळा छंद री व्याख्यां इयूं करीजी है—

रोळा छंद सु नाम नागपति पिंगळ राख्यो ।
तुक तुक माहे चतुर कळा चवु विंसति भाख्यो ॥
हिक दस पर विस्राम, सरब जण चिंता हरणूं ।
भणूं सदा इम सकळ, विमळ कवि कंठाभरणूं ॥

उल्लाळा : इण रा विसम चरणां में 15 अर सम चरणां में 13 मात्रावां व्है। इण भांत औं 28 मात्रावां रौ छंद है। किसना आढा उल्लाळा छंद रा पांच भेद बताया है— 1. रस उल्लाळा 2. स्याम उल्लाळा, 3. छप्य उल्लाळा, 4. वरंग उल्लाळा अर 5. कांम उल्लाळा—

रस उल्लाळा तिथ तेर मत। छवीस सम पद स्यांम ।
स्यांमक रस दूहा सहित। मुणतै छप्य नाम ॥
उलटो रस उल्लाळ उण। आख वरंग उल्लाळ ।
दाख त्रिदस फिर पंचदस। तुक बिहुंवै पड़ताळ ॥

अरथात् 15 अर 13 मात्रावां वाल्लै रस उल्लाळा, 13-13 मात्रावां वाल्लै स्यांम उल्लाळा, 13-11 मात्रावां वाल्लै छप्य उल्लाळा, 13-15 मात्रावां वाल्लै वरंग उल्लाळा अर 15-15 मात्रावां वाल्लै कांम उल्लाळा कहीजै।

रघुनाथ रूपककार आपरा ग्रंथ में उल्लाळा री व्याख्या इण भांत करै—

उल्लाळा छंद बसु दोय, कळ विरति पंच दस ऊपरा ।
धर दोय दोय इक तीन, दुव दोय एक दुव धूपरा ॥
कळ तेरह दोहा सम सदा, खट दो-दो इक दोय कर ।
ओ नियम छोड़ पिंगल कहै, आखर पण अेक न उचर ॥

रघुनाथ रूपक रै परिशिष्ट में छप्पय री व्याख्या इण भांत करीजी है—

काव्य छंद सारो कह'र, अंत उल्लाळो आध ।
छप्पय नामक छंद जो, गिण प्रस्तार अगाध ॥
कोई कोई भाखा कवि करै, रोळा पर उल्लाळ ।
तिणनूँ पण छप्पय तवै, चंडालिनि आ चाल ॥

इण भांत रोळा अर उल्लाळा रै मेळ सूँ बणण वालौ छप्पय छंद बाजै, जिकौ विसम मात्रिक छंद है। इणमें चार पद रोळा अर आखिरी दोय पद उल्लाळा रा होवै। औ अेक दंडक छंद ई है। छप्पय छंद रौ औ दाखलौ, जिणमें हनुमानजी, सरस्वती अर गुरु री वंदना करीजी है—

बंदवीर बजरंग कीसबर मंगळकारी ।
समर मात सरसती विमल कविता विसतारी ।
सद्गुण प्रणम किसोर सचिव अमरेस सवाई ।
करे पिता जिमि कृपा तिकण गुण समझ बताई ।
मो मत प्रमाण कवि मंछ कह, सुकवि बांण ग्रंथांण सुण ।
रस गाथ गीत पिंगल रचे, गहर कहूँ रघुनाथ गुण ॥

अलंकार

संस्कृत साहित्य में अलंकार सबद री व्युत्पत्ति अर काव्य में इणरै प्रयोग माथै विचार करीज्यौ, उणीज भांत राजस्थानी में ई अलंकारां रा प्रयोग नैं अंगेजियौ। अलंकार संप्रदाय रा प्रवर्तक भामह काव्य रा फूठरापा वास्तै अलंकारां रा प्रयोग नैं मानै। इणीज भांत संस्कृत रा दूजा विद्वान ज्यूँ कै आचार्य वामन, रुद्रट, मम्मट, दण्डी अर उद्भट ई काव्य में अलंकारां रा महताऊपणा नैं बतावै। काव्य री सोभा बधावण वाला गुण धरम नैं साहित्य में अलंकार कहीजै। जिण भांत गैणा-गांठां पैरस्योड़ी लुगाई फूठरी लागै, उणरौ रूप सवायौ होवै, उणीज भांत काव्य में सोनै जैड़ा आखरां सूँ कविता री बानगी ई रूपाली लागै, उणमें अेक चमत्कार अर आकर्षण आय जावै। काव्य में अलंकारा रौ प्रयोग करण खातर भासा-विज्ञान रा विद्वानां सबद, ध्वनि, रस अर वरणां रै रूपालै मेळ सूँ काव्य नैं संवारण री जुगत करै। जिण भांत गैणा-गांठा अर पैरवास सूँ सामाजिक स्तर अर जातिगत छाप निजर आवै, उणीज भांत काव्य-सास्त्र रा आचार्या रै विचार में ई काव्य रा अलंकारां री न्यारी-न्यारी परिभासावां दिरीजी है। काव्य में अलंकारां रै प्रयोग बाबत कवि री भूमिका महताऊ होवै। अलंकारां सूँ आपैरै विचारां, भावां नैं छंद रूपी रीत में ढाळ्यतौ कवि सिरजण नैं कल्पना सूँ नूंकौ सरूप देय सकै। भावां नैं किण ढालै राख सकै, उण असरदार भावां री खिमता अलंकारां सूँ आवै। भावां री गैराई, कोरणी सूँ परोट्योड़ी झीणी भाव तरंगां, उपमा, उत्प्रेक्षा, रूपक, प्रतीकां अर नूंवा बिम्बां री जड़ाऊ घड़त सूँ कविता नैं सिणगारीजै अर औ काव्य पाठकां नैं घणौ रळियावणौ अर असरदार लागै। राजस्थानी रा रीति ग्रंथां में 'पिंगल सिरोमणि' में अलंकारां रौ वरणन करीज्यौ है। इणरै टाळ दूजा ग्रंथां में या कोई रचना या काव्य-विसेस रै ओळावै ई अलंकार परंपरा री चरचा नॊं रै बरोबर करीजी है।

राजस्थानी रौ निकेवलै अलंकार 'वैण सगाई' काव्य री सोभा बधावै, लारला सगला अरथालंकार अर सबदालंकार संस्कृत साहित्य वाला ई राजस्थानी में परोटीजै। काव्य में अरथ सूं फूठरापौ अर चमत्कार दीखै तौ अरथालंकार, ज्यूं— उपमा, रूपक, उत्प्रेक्षा, भ्रांतिमान, अतिशयोक्ति, अन्योक्ति व्याजस्तुति कहीजै।

जिन काव्य में सबदां नैं सजोरै रूप सूं, सरस या अनोखा रूप सूं परोटेण में काव्य-चमत्कार प्रगटीजै तौ उठे सबदालंकार मानीजै। वैण सगाई, अनुप्रास अर उणरा भेद, यमक, श्लेष, वक्रोक्ति आद सबदालंकारां री पांत में आवै। अठै कीं अलंकारां री परिभासा अर दाखला दिया जावै—

अनुप्रास अलंकार

'काव्यालंकार' में आचार्य भामदृ लिखै कै अेक रूप रा वरणां रौ विन्यास ई अनुप्रास है। आचार्य उद्भट अर दूजा विद्वान अेक जैड़ी उक्ति होवण अर सबदां री नैड़ी-नैड़ी आवृत्ति (अेक सबद रैय-रैयनै या दो बार या दो सूं घणी बार उणीज काव्य में परोटीजै) नैं अनुप्रास कैवै। अनुप्रास रा केई भेद अर उपभेद करीजै—

छेकानुप्रास

इणमें वरण या वरण-समूह दोय बार बरतीजै। इणरौ औ दाखलौ 'हरिरस' सूं लिरीज्यौ है—

महागज ग्राह छुडावण मंत् । सनातन पाळ्क केवळ संत् ।

मुकुंद ! तूं आय वसै जिअ मुकुख । संसार समुद्र तरै वह सुकुख ।

वरणां री आवृत्ति दोय बार होवण सूं औ छेकानुप्रास है। अठै वैण सगाई भी है। वैण सगाई में ई अनुप्रास ज्यूं वरणां रौ मेल देखीजै।

वृत्त्यानुप्रास

काव्य में कोई वरण या वरण-समूह तीन या उणसूं घणी बार बरतीजै उठै वृत्त्यानुप्रास होवै। दाखला सरूप—

(1)

चारिय वाणिय खांणिय चार । वदै जग जीव विचार विचार ॥

लहै नहीं पार कहूं लवलेस । आदेस आदेस आदेस आदेस ॥

(2)

नमो ओम रूप नमो ओंकार । नमो अजरामर सेस अधार ।

नमो अवतार सकाज अधीस । नमो जगताज नमो जगदीस ॥

पैला दाखला में ऊपरली दोय ओळ्यां में छेकानुप्रास अर नीचै वृत्त्यानुप्रास रौ रूपाळौ वरणाव होयौ है।

श्रुत्यानुप्रास

अठै उच्चारण ठौड़ रौ महत्त्व है। अेक ठौड़ सूं उच्चारित वरणां री आवृत्ति होवण नै श्रुत्यानुप्रास कैवै—

नमो वर सीतुं त्रिभूवण वंदु । नमो मुधु कीटुभ जीतुं मुकुंदु ॥

नमो विध लाधण मेटण व्याधु । सरापु भसम्म उतारण साधु ॥

इण पद में ऊपरली ओळी छेकानुप्रास है। पूरा पद में 'नमो' री आवृत्ति वृत्त्यानुप्रास अर अेक ई उच्चारण ठौड़ वाला केई वरणां री आवृत्ति होवण सूं श्रुत्यानुप्रास है। औ सगला वरण अंतस्थ-अल्पप्राण है जिणां रै उच्चारण सूं सांस रौ परमाण सामान्य रैवै। त, द, ध रौ उच्चारण करती टैम जीभ दांतां नैं परस करै।

अंत्यानुप्राप्त

काव्य में सबदां या चरणां रै आखिर में अंतिम दो सुरां री आवृत्ति होवण सूं अंत्यानुप्राप्त होवै। इणमें बिचालै व्यंजन सेति सुरां री आवृत्ति सूं अरथ है। दाखलै सरूप—

नहीं तुव साधक तंत न तंत्र । नहीं तुव जंत्र नहीं तुव मंत्र ॥
सुमेर न सेस पहिलोय सोज । हुतोज हुतोज हुतोज ॥

लाटानुप्राप्त

काव्य में कोई सबद दो या दो सूं घणी बार आवै अर हरेक बार अरथ तौ ओक पण अन्वय बदल जावै उठै लाटानुप्राप्त कहीजै, जियां—

त्रिविध त्रिजग्ग त्रिविक्रम तार । चतुरभुज आतम चेतन सार ॥

त्रिविक्रम=तीन लोक रा स्वामी। त्रिजग्ग=सुरगलोक, भूलोक अर पताळलोक। त्रिविध ताप=दैहिक, दैविक, भौतिक। इण भांत अठै लाटानुप्राप्त होवै।

ध्वन्यानुप्राप्त

जिण सबदां सूं ओक जैड़ी ध्वनि निकलै अर वांरी आवृत्ति होवै उठै ध्वन्यानुप्राप्त होवै। अथवा ओक-दोय ध्वन्यां रौ आपस में संबंध बतायौ जावै या ओक रै साथै दूजी ध्वनि जुङ्होड़ी होवै, ज्यूं—

पड़ड़ पड़ड़ बूंदां पड़ै, धड़ड़ धड़ड़ धर आज ।

बूंदां री ध्वनि रै साथै धरती माथै होवण वाळी ध्वनि रौ जोड़ बैठै। दूजा अरथ में अंत्यानुप्राप्त वालै दाखलै में ई ओक जैड़ी ध्वनि वाला सबद है, पण ओक रौ संबंध दूजे साथै इण भांत है कै आप ई हा, आप ई हौ अर आप ई रैवोला।

यमक अलंकार

औ ओक सबदालंकार है। भरतमुनि कैवै कै यमक सबदां रौ अभ्यास है। ओक सबद दोय या दोय सूं घणी बार काव्य में आवै अर हरेक बार उणरौ अरथ दूजौ होवै तौ उठै यमक अलंकार मानीजै। केई बार पूरौ सबद नं आयनै उणरौ कौं भाग दूजी बार आवै तौ ई उठै यमक ई मानीजै। आचार्य भरतमुनि यमक रा दस भेद बतावै जिका इण भांत है— पादान्त, कांची, समुद्रगक, विक्रांत, चक्रवाल, संदष्ट, आम्रेडित, चतुर्त्य, वसित, माला आद। यमक रौ दाखलौ—

(1)

हरिरस हरि रस हेक है, अन रस अनरस आंण ।

विण हरिरस हरिभक्ति विण, जनम ब्रथा कर जांण ॥

इण छंद में ‘हरिरस’ ईसरदास बारठ रचित काव्य है, जदकै ‘हरि रस’ प्रभु भक्ति सूं मिलण वाळौ आनंद है। इणी भांत ‘अन रस’ संसार रा भौतिक सुख या भोग है, तौ ‘अनरस’ बिना सार रा, सारहीण, ऐहङ्गा है। इण भांत ओक सबद रौ दोय बार प्रयोग अर अरथ न्यारौ होवण रै कारण यमक अलंकार है।

(2)

रण कर रज रज नै रंगै, रवि ढकै रज हूंत ।

रज जैति धर नह दिये, रज-रज क्वै रजपूत ॥

इणमें ओक ‘रज’ माटी रौ कण-कण मतल्ब पूरी धरती नैं रंगणौ है तौ दूजौ ‘रज’ खेह, पगां सूं उड नै ऊपर चढण वाळी धूड़, खंख। तीजै सबद ‘रज-रज’ रौ अरथ है कै क्षत्रिय आपरौ सरीर दुकड़ां-दुकड़ां (बोटी-बोटी) करावै। रजपूत—धरती रौ सपूत या माटी रौ सपूत, इणमें यमक अलंकार रौ नामी प्रयोग होयौ है।

उपमा अलंकार

औं ओक अरथालंकार है। आचार्य भामह उपमा अलंकार वास्तै लिखै—

विरुद्धेनोपमानेन देशकाल क्रियादिभिः ।
उपमेयस्य यत्साभ्यं गुणलेशेन सोपमा ॥

अरथात कई बार देस, काळ, क्रिया रै आधार माथै विरुद्ध उपमान सूं उपमेय री समानता दीखै, वौ ई उपमा अलंकार है। पण जठै कीं सैनरूप, सांपरतेक दीखै उठै ई उपमा अलंकार होवै। इण रा वै 32 भेद बताया है, पण मोटै रूप सूं केई विद्वान इण रा दोय भेद ई बतावै— 1. पूरण उपमा अर 2. लुप्त उपमा। केई विद्वान उपमा रा तीन भेद ई बतावै— 1. पूरणोपमा 2. लुप्तोपमा अर 3. मालोपमा।

उपमा रा औं लक्षण है कै दो वस्तुवां में बरोबरी री बात करीजै। दोनूं में अेक जैड़ा गुणां रै कारण अेक नैं दूजै री उपमा दिरीजै। उपमा में समानता रौं औं सामान्य गुण धरम मानियौ जावै।

उपमेय : जिण सूं किणी वस्तु री समानता बताइजै।

उपमान : कोई खास वस्तु जिणरै बराबर उपमेय नैं बतायौ जावै।

वाचक सबद : उपमेय अर उपमान में बराबरी बतावण वालौ सबद वाचक है।

साधारण धरम : वै गुण या क्रिया जिका उपमेय अर उपमान दोनूं में लाधै, जिणसूं ओपमा दिरीज नैं तुलना करीजै।

पूरणोपमा

पूरण उपमा में उपमेय, उपमान, वाचक सबद अर गुण धरम सगळां रौं मेल होवै। ‘वेलि क्रिसन-रुकमणी री’ में पूरण उपमा रा केई-केई दाखला मिलै। आपरी निकेवली ओपमावां साथै काव्य नैं सरजीवण करण वाला प्रयोग देखीजै—

संग सखी कुळ वेस समाणी, पेखि कली पदमिणी परि।

राजति राजकुंअरि रायअंगण, उडीयण वीरज अम्ब हरि ॥

इणमें सखियां, तारामंडळ, आभौ अर चंद्रमा आद अेक वातावरण री स्फस्टी करै। पदमिणी री बात करतां ई पूरै सरोवर रौं चित्राम साम्हीं आवै। रुकमणी रै मुख नैं चंद्रमा री ओपमा रै साथै कवि आवगै दरसाव नैं सांपरतेक करै।

लुप्तोपमा

इण अलंकार में जैड़ौ कै नांव सूं ठाह लागै कै उपमेय, उपमान, वाचक सबद अर साधारण गुण धरम मांय सूं कठैई अेक, दोय या तीन रौं लोप होवै, उणां रौं लेख नीं होवै उठै लुप्तोपमा अलंकार होवै—

हंस चलण कदवीह जंघ, कटि केहर जिम खीण।

मुख सिसहर, खंजर नयण, कुच श्रीफळ कंठ वीण ॥

अठै हंस उपमान, चाल साधारण धरम क्रिया है, कदवीह उपमान, जंघ उपमेय, ‘मुख सिसहर’ में मुख उपमेय, सिसहर उपमान है, पण पूरा वरणाव में वाचक सबद, गुण धरम रौं लोप होवण सूं लुप्तोपमा अलंकार है। अठै रुकमणी रौं कठैई उल्लेख नीं होवै। आ उपमा किणरै वास्तै है, खुलासौ नीं होवण सूं लुप्तोपमा है।

मालोपमा

उपमेय रा वरणाव में जठै अेक सूं घणा उपमानां नैं परोटीजै, उणमें उपमेय (जिणनैं उपमा दी जावण वाली है) रौं इधकारौं अर आकर्षण बधै वा मालोपमा है। ज्यूं—

गति गंगा मति सरसती, सीता सील सुभाव।
महिलां सरबर मारूवी, अवर न दूजी काय ॥

इणमें मारवणी रै वास्तै गंगा जैड़ी गति, सरसती जैड़ी मति अर सीता रै समान सील-सुभाव, इत्ता उपमान लागण सूं मालोपमा है ।

रूपक अलंकार

औं अेक अरथालंकार है । आचार्य भरतमुनि इणरै वास्तै कैवै कै जद दो वस्तुवां री तुलना नीं करीज नै कीं खास गुणां रै कारण उपमेय अर उपमान में कीं भेद नीं राखनै अेक-दूजा माथै आरोपित कस्तौ जावै । सरल सबदां में औं कै जठे अेक वस्तु नैं दूजी रौं रूप दे दियौं जावै कै दूजी मान लेवां तद रूपक अलंकार मानीजै । रूपक अलंकार रा ई तीन भेद बताया जावै— 1. सांग रूपक, 2. निरंग रूपक अर 3. परंपरित रूपक ।

‘मुख सिसहर’ औं अभेद रूपक है । इणमें मुख नैं पूरै निस्चै रै साथै सिसहर (चंद्रमा) कैयनै अभेद री थरपणा करीजी है ।

रूपक रौं दाखलौ—

वधिया तनि सरवरि वेस वधन्ती, जोबण तणौ तणौ जळ जोर ।
कामाणि करग सु बाण काम रा, दोर सु वरुण तणा किरि डोर ॥

प्रकृति सूं रुकमणी रै जोबन रौं रूपक सरावण जोग है । चंद्रमा नैं देखनै सागर में ज्वार आवै ई है, उणीज सुभाविक रूप सूं जोबण काळ में अंग-प्रत्यंग रौं उभरणौ अर उणरै पेटै आकर्षण होवणौ लाजमी है ।

सांग रूपक

उपमेय माथै उपमान रा अंगां समेत आरोप सांग रूपक है । वीर काव्यां में सूरवीरां रा लूंठा करतबां रा रूपक सरावण जोग है—

घोड़ां घर ढालां पटल, भालां थंभ बणाय ।
जे ठाकुर भोगै जर्मों, ओर किसौ अपणाय ॥
पग पग थटिया पहुणां, खागां सहणी खांत ।
पीव परूसै पांत में, भूले केम दुभांत ॥

राजस्थानी वीर संस्कृति में घोड़ां रूपी घर, ढाल रूपी छात अर भालां रा थंबा बणावण वालौ ई धरती रै वरण करण जोग है । जठे दुस्मियां, सत्रुसेना नैं पांवणा कहीजै, खाग रै झाट री मनवार करीजै । औंड़ा सांग रूपक रा दाखला और कठे लाधै ।

निरंग रूपक

इण रूपक अलंकार में उपमान रौं उपमेय माथै आरोपण करूँयै जावै । दूजा अंगां री बात नीं करीजै—

सखिए ऊगट मांजिणउ, खिजमति करइ अनंत ।
मारू तन मंडप रच्यउ, मिलण सुहावा कंत ॥

अठे ‘तन’ में ‘मंडप’ रौं आरोपण है । दूजा अंग सहायक कोनी, इण वास्तै निरंग रूपक है ।

परंपरित रूपक

इणमें दोय रूपक होवै । अेक रूपक रौं कारण दूजा रूपक में देखीजै—

पंथी एक संदेसड़उ, लग ढोलइ पैहचाइ ।
धंण कंमलाणी कमदणी, सिसहर ऊगइ आइ ॥

अठै मारवणी रा संदेस में वा कैवै कै थारी धण विजोग में कुमुदणी ज्यूं कुम्हव्यायगी है। हे ढोला, थूं चंद्रमा ज्यूं आयनै उदयमान व्है। चंद्रमा री चांदणी में कुमुदणी खिल्या करै। इणमें दोय रूपक है। मारवणी कुमुदणी है अर ढोलो चंद्रमा है। इणरै साथै चंद्रमा (सिसहर) रै ऊगण सूं कुमुदणी खिलैला, इण रूपक माथै दूजौ रूप आरोपित होवण सूं परंपरित रूपक बणै।


तादृष्य रूपक

उपमेय नैं उपमान रौं दूजौ रूप कैवण सुं उठै तादृप्य रूपक अलंकार कहीजै—

चन्द्रिका सुं झरत मधु, ताप सैंग हर लेत।

प्राण वाल्ही मुख बीजो चांद, रात-दिवस सुख देत ॥

वाल्ही रौ मुख बीजौ चांद होवण रै कारण क्यूंके ऐक चांद तौ है इज, इण वास्तै अठै ताद्रूप्य रूपक होवैला।



6

अबखा सबदां रा अरथ

समर=याद करणौ, स्मरण। प्रणम=प्रणाम। तिकण=जिका। बाण=वाणी, बोल। गहर=गंभीर, गैराई सून्। सधीर=धीरजवान, धीरप वाढौ। पदवी=पद, ओहदौ। अंतर=बीच। वीसवा वीसै=निस्चै ही, पक्कायत। दीसे=दीखै है, ग्यात होवै। अपंपर=अपरंपर, अपार। धूत=चालाक, धूरत। रढालौ=रीस वाढौ, बादीलौ। मुणै=कहियौ, कैयौ। जड़=पूरख। आगूंच=पैली, पैलां सूं ई। जदां=जणै। सुघट=मजबूत, उत्तम, नामी। उघट=क्रोध करनै। धुजाई=कंपाय दी। बाल सुतण्ण=अंगद, बालि रौ बेटौ। असंका=निरभय, अडरता। खाटै=अर्जित करणौ, लेवणौ। ब्रष=बरस। सैंस=सहस्र। धरै=धारण करणौ। पथारत=स्वधाम पधारिया, सिधारिया, गया।

सवाल

विकल्पाऊ पडत्तर वाळा सवाल

1. आचार्य ममट रै मुजब काव्य रौ मूळ प्रयोजन कार्ड है ?
(अ) आणंद (ब) जस
(स) धन (द) कांता रौ उपदेस

()

2. काव्य ऐ किण परख नैं सिरै मान्यौ जाय सकै?

- (अ) भाव पख
 (स) नीति पख

()

3. 'छंद' रौ अरथ है—
(अ) नियमां में बंध्योड़ी काव्य-रचना।
(स) गीत, कविता, दूहा।
(ब) स्तुतिपरक काव्य।
(द) तुकबंदी वाली रचना।

()

4. छंदां रा मोटै रूप सुं भेद किया जावै—
(अ) मात्रिक अर वरणिक छंद।
(स) निरस अर सरस छंद।
(ब) गद्य अर पद्य।
(द) इण मांय सूं कोई नीं।

()

5. छंद-सास्त्रीय ग्रंथ रौ नांव है—
(अ) रघुनाथ रूपक
(स) देवियांण
(ब) हरिरस
(द) रणमल्ल छंद

()

6. 'रज जैति धर नह दिये, रज-रज व्है रजपूत' में अलंकार है—
(अ) फगत यमक।
(स) यमक, अनुप्रास अर वैण सगाई।
(ब) फगत अनुप्रास।
(द) वैण सगाई

()

साव छोटा पड़त्तर वाला सवाल

1. काव्य री परिभाषा लिखौ।
 2. काव्य रा कित्ता तत्त्व मानीजै ?
 3. विचार तत्त्व बाबत विद्वानां काईं विचार राख्यौ ?
 4. काव्य रा भेदां री जाणकारी देवौ।
 5. काव्य रै मूळ प्रयोजन काईं है ?
 6. वेलियो छंद किण भांत रै छंद है ?
 7. उपमा अलंकार रा भेद बतावौ।
 8. ‘मुख सिसहर’ औ किणरौ दाखलौ है ?
 9. छप्पय में किण दोय छंदां रै मेल होवै।

छोटा पड़ुत्तर वाला सवाल

1. भाव तत्त्व बाबत आपरा विचार लिखौ।
 2. काव्य प्रयोजन सूं आप काईं समझौ? खुलासौ करौ।
 3. काव्य बाबत आचार्य मम्मट रा विचार काईं हा? समझावौ।
 4. काव्य रै खास-खास भेदां रौ खुलासौ करौ?
 5. रूपक अलंकार री परिभासा दाखला समेत लिखौ।
 6. यमक री विसेसता दाखला देयनै समझावौ।

7. कुँडलिया छंद रा गुण बतावौ।
8. त्रबंकड़े किण भांत रौ छंद कहीजै, उणरी विसेसता बतावौ।

लेखरूप पट्टर वाला सवाल

1. काव्य प्रयोजना री विगतवार जाणकारी देवौ।
2. काव्य रौ अरथ बतावता थकां उणरै तत्वां माथै उजास न्हाखौ।
3. मिनखाजूण में काव्य रै मैतव री विरोळ करौ।
4. अलंकार किणनै कैवै ? अनुप्रास अलंकार नै भेदोपभेद समेत समझावौ।
5. उपमा अलंकार अर रूपक में आपौ आपरी विसेसतावां रौ वरणाव दाखलां समेत करौ।
6. छंदां रै मैतव नै उजागर करता थकां किणी दो छंदां री परिभासा दाखलां समेत देवौ।
7. छंदां रा मूळ रूप सूं कित्ता भेद बताया है ? छंदां रा उपभेद समेत वेलिया छंद रौ वरणन करौ।

□निबंध-लेखण

राजस्थानी निबंध-लेखण

आधुनिक गद्य-साहित्य री विधावां में निबंध लेखण ओक महताऊ विधा है। गद्य रै दूजा रूपां में निबंध लिखणौ अबखौ, आछौ अर कलात्मक मानीजै। इण बाबत हिंदी रा विद्वान लिख्छौ है— ‘निबंध गद्य री कसौटी है’। गद्य रै सांतरै अर कलात्मक रूप प्रगटै। इण मांय भावां अर विचारां रै सांतरै मेल है। ‘सब्दोअर्थो सहभाव साहित्यम्’ री बात साची होवै। विचारां अर भावां नैं पाठकां ताँई पूगावण रै लूँठौ माध्यम है— निबंध।

निबंध रै सबदाऊ अरथ अर परिभासा

निबंध राजस्थानी साहित्य मांय घणौ पुराणौ नैं है। पण इण रा बीज-रूप प्राचीन अर मध्यकालीन राजस्थानी गद्य-साहित्य में देख सकां हां। निबंध सबद अरथात निः+बंध, किणी विसयवस्तु नैं तै अर आछी भांत सूं बांधणौ। दूजै सबदां में भावां अर विचारां रै सांतरै गठण निबंध मानीजै। छोटै अर तै आकार में किणी विसय या वरणाव नैं मौलिकता रै सागै, स्वतंत्र रूप सूं सजीवता सागै लियौ जावै अर जिण मांय भावां अर विचारां री आछी संगती होवै अर लय री खास गति होवै, साचै अरथां में उणनैं ई निबंध मानीजै।

अंगरेजी भासा में निबंध नैं ‘ऐस्से’ कहीजै, जिण रै अरथ है— प्रयास, जतन अरथात जिणनैं घणै जतन सूं रचीजै वौ निबंध बाजै।

निबंध रा तत्त्व

निबंध रा मूळ तत्त्वां में भाव, भासा अर सैली नैं सिरै मानीजै।

1. भासा : टकसाली, व्याकरण रै मुजब, सुद्ध अर पाठक रै मन-मगज नैं परसण वाली अर बात नैं सावळ कैवण री खिमता राखण वाली होवणी चाईजै।

2. भाव : भाव देस, समाज अर साहित्य रै आधार है। निबंध में भाव गैरा, प्रभावशाली, बात नैं सावळ केवटण अर प्रगट करण वाला सांतरा, ओपता अर विसय रै मुजब होवणा चाईजै।

3. सैली : भाव अर भासा नैं परोटण रै लेखक रै निजी तरीकौ। सैल्यां भांत-भांत री पण सैली प्रभावशाली, रोचक-रंजक, पाठक नैं भावां में भीजोवण वाली अर रळियावणी होवणी चाईजै। मिठास अर रुचि पैदा करण वाली होवणी चाईजै।

निबंधां रा भेद

मोटै रूप सूं निबंधां नैं आपां दोय रूपां में बांट सकां हां। ओक व्यक्ति प्रधान अर दूजौ विसय प्रधान। इणरै अलावा भी निबंधां रा अनेक भेद है, जियां— सामाजिक, आर्थिक, वैग्यानिक, मनोवैग्यानिक, औतिहासिक, साहित्यिक, दारसनिक, ललित निबंध आद। मोटै तौर माथै निबंधां रा पांच भेद मानीजै, जिका इण भांत है—

1. विवरण प्रधान निबंध : जीवनी, गाढवाला कामां, जात्रावां, जुद्ध अर औतिहासिक घटनावां आद माथै लिखीजण वाला निबंध विवरण प्रधान निबंध बाजै।

2. वर्णनात्मक निबंध : मौसम रै मिजाज, तीरथ, मेला-मगरिया, प्रकृति रा चित्राम, तीज-तिंवार अर नगर सूं जुड्योड़ा निबंध वर्णनात्मक निबंध मानीजै।

3. संस्मरणात्मक निबंध : डायरी, संस्मरण, रेखाचितराम, जात्रा रै वरणन, रिपोर्टाज आद निबंध इणमें गिणीजै।

4. भाव प्रधान निबंध : गहरै औसास, तेज भावां री अभिव्यक्ति, राग तत्त्व, ललित अर निजूपरक वाला निबंध इण ओळ में आवै।

5. विचार प्रधान निबंध : चिंतन प्रधान, मनोवैग्यानिक दीठ रा, दारसनिक अर अध्यात्म सूं संबंधित, बुद्धि-तत्त्व सूं जुड़ोड़ा विचार प्रधान निबंध बाजै।

निबंध लेखन रा खास अंग

निबंध लेखन री कला नित अभ्यास सूं आवै। इण सारू भाव-भासा अर सैली माथै आछी पकड़ अर सांतरौ मेळ होवणौ चाईजै अर लिखती बगत नीचै लिखोड़ा अंगां रौ खास ध्यान राखणौ चाईजै।

1. मंडाण (प्रस्तावना) : सिनिमा रै टेलर अर पोस्टर दाँई निबंध रौ प्रतिनिधित्व अर महताऊपणौ रोचकता रै सागै प्रस्तावना में प्रगट होवणौ चाईजै। इण मांय निबंध री परिभासा, महताऊपण, पद्य रौ प्रयोग, विवरण अर परिचै आवणौ चाईजै।

2. बीच री भाग (प्रसार) : अठै निबंधकार आपैरे भावां नैं चतुराई अर ग्यान-कौसल सागै प्रगट करै। विसय री सिरै सूं विरोळ करै। आपैरे निजु अनुभव अर विचार नैं सामल करै। निबंधकार री कल्पना, विचारां री खिमता अर लेखन री योग्यता इणी भाग में निजर आवै।

3. उपसंहार (समाहार) : इणमें निबंध रौ निचोड़ जथारथ रै सागै सामल होवणौ चाईजै। मान्यता, विचार, मौलिकता, संभावनावां, भावी आद रौ मेळ करावतां सटीकता रै सागै निबंध रौ सार उपसंहार में प्रगट होवणौ चाईजै।

(1)

देस-निरमाण मांय मोट्यारां री भूमिका

मंडाण

चंगौं मारू घर रयां, तीन अवगुण्ण थाय।
कपड़ा फाटै, रिण बधै, नाम न जाणै काय॥

मोट्यार देस रा करणधार। देस, समाज अर कडूंबै री भावी रौ आधार। पण आज देस अर समाज री दसा अर दिसा सोचण जोग है। देस मांय अेकता, सजगपणै, देसहित सारू चेतना, निज करम रौ बोध, नैतिकता, संस्कार आद री कमी लखावै। राजनीति रौ भूंडौ चैरौ अर भस्टवाड़ा देस अर समाज माथै हावी है। निज हित री भावना देसहित माथै भारी, निज धरम अर करम रै ग्यान रौ तोड़ौ, कोरौ दिखावौ, रुढिवाद अर अंधविस्वास समाज नैं ओक्टोपस दाँई जकड़ोड़ौ है। इण दसा मांय मोट्यारां रौ देसहित सारू जिम्मै अर हूंस री मोकळी दरकार है।

आज री मोट्यार पीढी रौ सरूप

समाज अर देस रै बिखराव अर अव्यवस्था नैं सुधारण री जिम्मेदारी मोट्यारां री ई है, पण आज रै जवानां रौ ढंग-ढाळौ कीं हल्कौ अर स्तर सूं उतस्योड़ौ है। आज री नूंवी पीढी कुंठा, हतासा, तोड़-भांग री सोच, गैर जिम्मेदार अर वाट्सअप, फेसबुक री आभासी दुनियां में काठी डूब्योड़ी अर खुद ताँई सिमट्योड़ी है। समाज रै रीत-रायतै सूं न्यारी आथूणी संस्कृति री हेताळू अर अंगरेजां री खुल्लैपण अर भौंडेपण री रीतियां नैं अंगेजण वाली पीढी नैं अबै देस अर समाज सारू ई कीं विचार करणौ पड़सी। फैसन, फिल्म अर उघाडू संस्कृति में रुचि राखण वाला मोट्यारां रै मन अर मगज में देस सारू कीं पीड़ा राखण री भी दरकार है।

ਮोਟ्यारां रौ फरज

‘दुनियां मढौ उण सूं पैली खुद नैं गढौ’, आ बात सोळै आना खरी। सावचेती सूं चरित नैं ऊजळै राखतां आपरै जीवण नैं कीं ऊंचौ उठावणौ पड़सी। खुद में बदलाव अर सुधार सूं देस, समाज अर परिवार में ई बदलाव आसी। अणभण्यौ अर अणगुण्यौ कोरो—मोरो ढांडौ अर आधौ, इण सारू भणाई री अलख जगावणी ई जरूरी है। पढ्या-लिख्या रै च्याअ आंख्यां। पैलां खुद पढौ-लिखौ, अेक जिम्मेवार नागरिक बणौ, पछै दूजां नैं ई इण सारू आगै लावौ। कोरी नौकरी सारू भणाई फगत अेकलै आदमी रौ विकास है। जिकी भणाई मिनख नैं मिनख बणावै अर देस-समाज सारू टैम आयां खुद नैं सूंपण री सीख देवै, वा साचै अरथां में भणाई है। समाज लाई रैवै तौ आपां कद आगै?

भणाई रै सागै देस री सांयती अर सुरक्षा रौ जिम्मौ ई मोट्यारां नैं निभाणौ पड़सी। समाज रा कांटा किनारै करण रौ काम ई मोट्यारां रौ है। समाज रौ तानौ—बानौ बण्यौ रैवै, इण सारू सांतरी रीतियां अर संस्कारां नैं परोटणा जरूरी है। सगळै धरमां, वरगां, वरणां रौ सम्मान अर वांवै खातर आछी भावनावां भी देस री अेकता सारू जरूरी है। सगळां सूं जरूरी है— चरित्र। बीखौ मिनख माथै ईज पड़े अर अबखी वेळा में जिका आपरै चरित्र नौं खोवै अर नौं दूजां रा खोवण देवै, वै ईज साचै अरथां में देस रौ निरमाण कर सकै। मोट्यारां रौ आछौ चरित्र आछै देस री पिछाण है। देस-निरमाण सारू पैलां चरित्र रौ निरमाण जरूरी है अर इण सारू संस्कार, संगत अर आछौ साहित्य आपां री मदद करै। भूंडै अर कोजै साहित्य नैं जहर रै समान मानौ, उणनैं देस-समाज तांई पूगण सूं रोकणौ चाईजै। चोर-उचक्का, भ्रस्ट अर चरित्रहीण मिजळा मिनखां नैं मोट्यार सजगता सागै संगठित होयनै रोक सकै, औड़ा उपाव करणा चाईजै। निजू लाभ सारू भूंडी राजनीति रै अंटै में फंसण सूं नूंची पीढी नैं बचणौ है। आथूणी संस्कृति रै भोगवाद नैं मन-मगज सूं भगावण री अर उण सूं बचण री जरूरत है।

उपसंहार

चरित्र अर मैणत सागै तकनीक अर भणाई रौ सायरौ लेयनै मोट्यार देस नैं ऊंची ठौड़ पूगाय सकै। देस-समाज मायं सुख-सांयती बापर सकै। देस री गाड़ी री धूरी मोट्यार ई है। आं सूं देस नैं घणी आस अर हूंस है। इण वास्तै इण आस अर विस्वास री कसौटी माथै खरौ उतरण रौ प्रयास मोट्यारां नैं करणौ चाईजै। कैयौ है—

गेंद बणा विघ्नां रा भाखर, होणी री छाती पर खेल
मंजिल चाल्यां ही मिळ्सी, मोट्यारां देसहित हालो रे।

॥३॥

(2)

म्हारी व्हाली पोथी

मंडाण

अेक आछी पोथी हजार हळका बेलियां सूं आछी साथण होवै

राजस्थानी भासा रौ उल्लेख विक्रम संवत री नवमी सदी सूं जैन उद्योतन सूरि री ‘कुवळ्यमाळा’ में लिखित रूप सूं होयौ है। राजस्थानी साहित्य में गद्य-पद्य री हजारूं-लाखूं पोथ्यां रचीजी अर हरेक पोथी में रचारौ आपरी सगळी काव्यकला अर गद्य लिखण री हटौटी नैं परोटी है अर भावां अर विचारां रौ मधरौ मेल कस्तौ है। कवियां अर लेखकां री औं पोथ्यां राजस्थानी साहित्य री अमोलक धरोहर है। जूऱ रौ औड़ा कोई तत्त्व नौं है, जिण मांय लिखारै नौं लिख्यौ। हरेक विस्यां माथै साहित्य री रचनावां मिळै।

‘जठै नीं पूगै रवि, बठै पूगै कवि’ री कथनी यूं ही नीं घड़ीजी है। कवि री दीठ इन लोक सूं भी पैरे अलौकिक, भौतिक, अभौतिक ब्रह्मांड रै कण-कण अर खूणे-खूणे रै बखाण करणौ जाणै। पोथ्यां सूं मोटो अर साचौ मित आपां रौं दूजौ कुण होय सकै है ?

म्हारी वाल्ही पोथी

सगळं री आप-आपरी रुचि अर आप-आपरौ रस। किणी नैं कहाणियां अर उपन्यास में रस आवै तौ किणी नैं बातां में अर किणी नैं छंदां री छौळ में। कविता अर छंदपरक रचनावां री आपरी न्यारी-निरवाळी मिठास अर मठोठ है। म्हनैं सूर्यमल्ल मीसण री ‘वीर सतसई’ सबसूं वाल्ही पोथी लागै। म्हनैं इ क्यूं वीर रस रा सगळा रसिकां नैं आ पोथी घणी दाय आवै। आ राजस्थान री वीर-संस्कृति री साची ओळखाण है। ‘वीर सतसई’ 1857 री क्रांति रौं पैलौ काव्यगत शंखनाद है। इण सबद-भेरी सूं मायड़ भोम रा सपूतां मायं वीरता रा भाव जाग्या। सात सौ दूहा नीं होवण रै उपरांत ई आ सतसई सूं सवाई मानीजै। वीर रस री सांगोपांग झांकी प्रगट करण वाल्ही मानजोग ग्रंथ है। वीर नारी रौं ऊजळी रूप, जूण नैं देस सारू सूंपण अर कायरता नैं धिक्कारण रा भाव जगावण वाल्ही काव्य है। ‘दीपै वांरा देस, ज्यांरा साहित जगमगै’ अर साहित्य रै आंगणियै वीर सतसई रवि रै उनमान उजास प्रगटै।

वीर सतसई री रचना रौं मूळ

सूर्यमल्ल मीसण राजस्थानी साहित्य में वीर रस रा लूंठा कवि मानीजै अर वांरी ‘वीर सतसई’ काळजयी रचना होवण रै सागै राजस्थानी रौं गौरव-ग्रंथ मानीजै। वचना सूं बंध्योड़ी कवि री कलम बूंदी नरेश री तलवार री चाल तांई चालती रैयी। अंगरेजां रै विरुद्ध बूंदी नरेश रौं खांडौ अर कवि री कलम सागै-सागै चालण रौं वचन हो। 286 दूहा तांई कवि री कलम जिका वीर भावां नैं उकेर्या, वै भावी रचना रौं मूळ बण्णया। वीरां रौं जिकौ बखाण आं दूहां में मिळै, वैडौ विश्व रै किणी दूजै साहित्य में नीं मिळै। औं वीर संस्कृति रौं सरावण अर अंजस जोग काव्य है। बूंदी नरेश री तलवार रै रुकण रै सागै ई कवि री वचनां सूं बंध्योड़ी कलम ई रुकगी अर वीर सतसई रा 286 दूहा ई लिखीज सक्या। काव्य रा भावां रौं धरातळ, कवि री मौलिकता अर वीरत्व रौं अद्भुत बखाण इणनैं सतसई रै मानकां माथै संख्यात्मक आंकड़े सूं कम होवण रै उपरांत ई सवायौ थरपै। वीर नारी रै वीर भावां रौं दरसाव देखण जोग है। नारी रौं रूप अबला नीं होयनै सबला रै रूप में थरपनै कवि नारी-शक्ति में आपरी आस्था प्रगट करी है—

इव्या न देणी आपणी, हालरिया हुलराय।

पूत सिखावै पालणै, मरण बडाई माय ॥

वीर सतसई रौं मैतव

आन, बान अर सान लारै प्राण होम करणियां जूझारां री वीर भूमि रौं रुतबौ ऊंचौ करण वाली आ रचना वीरत्व रै सांगोपांग चित्रण करै। वीर रस री आधुनिक रचनावां में आ पैलडी रचना है। आजादी री लडाई मायं परोख रूप सूं धरती-धरम सारू प्राण होम करण रौं अमर सनेसो देवती आ रचना अठै री ‘मरणा नूं मंगळ गिणै’ वाली संस्कृति नैं उजाळै। भाव, भासा अर सैली री दीठ सूं घणी मौजीज रचना मानीजै। आ सूतोड़ा मिनखां में देसहित सारू जागण रौं हलकारौ है। मर्यादा, संस्कृति, परंपरा अर वीर भावां रौं निरूपण इणनैं सबल बणावै। अलंकारां री ओप, छंदां री छटा, रस रौं दरियाव इण रचना में अनुपम है। भाव अर भासा दोनां रौं धरातळ घणौ ऊंचौ है। वीर रस रै उत्साह रौं संचार सतसई में ऊंचै दरजै रौं है। नमक हलाली सिखावतौ औं काव्य देसहित अर मिनख रै चरित्र नैं उजास देवण वाल्ही वीरकाव्य है—

डाकी ठाकर रौं रिजक, ताखां रौं विस ओक।

गहळ मूवां ही ऊतरै, सुणिया वीर अनेक ॥

इण काव्यकृति मायं वीर अर सिणगार रस रौं अदीठ, अलबेलौ अर दुरलभ मेल ई है जिकौ विश्व रै दूजा साहित्य मायं निगै नीं आवै—

करड़ो कुच नूं भाखता, पड़वा हंदी पोळ।
अब फूलां जिम आंग में सेलां री घमरोळ॥

वीर सतसई रौ असर

वीर भावां सूं लबोलब आ सतसई कायरता नैं नैड़ी ई नीं फटकण देवै। मिनख नैं कायरता अर कर्महीणता सूं बारै काढै। इणरै रचनाकाल री वेळा मांय अंगरेजां रै खिलाफ कैवणौ तौ दूर सोचणौ ई मोटी बात ही। जद वीरां री तलवार री धार मगसी पड़े ही उण वेळा आ सतसई जन-जन में वीरत्व रौ संचार कर्स्यौ। वीर नारी रै वीर भावां रौ इसौ वरणाव अर दरसाव दूजै किणी ई साहित्य री पोथी मांय निगै नीं आवै। माता, पत्नी, बहन अर भोजाई सगलै रुपां में अेक वीरांगना कायरता नैं धिक्कारै अर धरती अर धरम री रक्षा सारू प्राण तक होम करण रौ अमर संदेसौ देवै—

सहणी सब री हूं सखी, दो उर उलटी दाह।
दूध लजाणो पूत सम, वब्य लजाणो नाह॥

उपसंहार

आधुनिक राजस्थानी रै वीर रस री रचनावां में वीर सतसई सिरमौर मानीजै। भाव-भासा अर मौलिकता री दीठ सूं आ अेक ओपती, राजस्थान री वीर संस्कृति री रुखानीदार अर असरदार रचना है। कायरता नैं धिक्कारती मायड़ भोम सारू वीरां नैं जगावती देसहित री सिरमौर रचना है— वीर सतसई। औड़ी रचनावां काळजयी होया करै अर होवणी ई चाईजै। वीर सतसई आजादी रै अलख री पैलड़ी चिंगारी री उत्प्रेक रचना है। काव्यगत दीठ सूं ई छंद, अलंकार अर रस रौ ओपतौ अर सुभाविक प्रयोग इण मांय होयौ है। वीर सतसई रा वीरत्व भावां रा दूहा जन-जन रै कंठां जुगां लग रमसी अर जनमानस में अखूट रेसी।

⌘⌘

(3)

कन्या भूणहत्या

मंडाण

मायड़ महनैं मतना मार
हूं थारौ मान, घर-संसार।

परमात्मा री स्सिस्ट में मिनख री घडत सबसूं वाल्ही। जाणै चितारौ खुद चित्राम होयग्यौ। स्स्टी री कल्पना अर्द्धनारीश्वर री है। मिनख अर लुगाई अेक दूजै रा पूरक। अेक दूजै रौ भावी आधार अर दोनां री आप-आपरी महताऊ ठौड़, पछै नारी तौ देस, परिवार अर समाज सारू सबाई है। दया, ममता, सहयोग, त्याग, प्रीत, जुड़ाव अर अनेक संस्कारां रौ स्रोत अर उद्गम नारी ईज है। थाँरै-म्हरै अर सगव्यां रै अस्तित्व रौ आधार कोई नारी ई है। स्स्टी रौ बधापौ नारी करै अर असामाजिक अर अपूरण मिनख नैं पूरण बणावण में नारी रौ योगदान अतुल्य है। पण आज रै बगत में मिनख अर नारी रौ आंतरौ अर ओहदौ कीं भेदगत है। लिंगभेद री मानसिकता पनपी है। छोरी नैं काळजै रौ भार, भाटौ, कलंक रौ बैम, दुरभाग रौ बीज मानण री बीमारू सोच समाज अर परिवार खातर घातक सिद्ध होय रैयी है। कन्या नैं गरभ में ईज मारण रौ पाप चाल रैयौ है। पुरुसवादी पितृसत्तात्मक सोच रौ समाज भावी नैं गरत में न्हाख रैयौ है। कन्या भूणहत्या चिंता रौ विसय है। इण सारू विचार अर उपाव जरुरी है।

कन्या भ्रूणहत्या रा कारण

छोरी जलमतां ई बेटे री भूखवाळा मायत माथौ पीटे अर खुद नैं दुरभागी मान नै कोसै अर पछै छोरी रौ गळौ मोसै, पण औ कठै तांई चालसी ? छोरी नैं छाती रौ भार मानै, उणनैं भणावण अर उणरै ब्यांव नैं मोटी आफत मानै अर अंटी सूं धन जावण रौ भय सतावै। ब्यांव में दायजै रौ दानव टैम सूं पैलां ई मां-बाप नैं सोच में न्हाखै। काळौ मूंढौ होवण रौ बैम आठूं पौर खावै। छोरी परायौ धन मानीजै। वंस बधापै री लाळसा अर छोरी नैं छाती रौ भाटौ मानण रै कारण छोरी जलमतां ई उणरौ घांटौ टूंपण जैड़ा महापाप रौ समाज में चलन-सो होयग्यौ है अर घणकरा तौ गरभ में ईज कन्या भ्रूणहत्या कर न्हाखै। सोनोग्राफी रै सख्त कानून सूं पैली तौ जलम सूं पैलां ई लिंग री जांच हो जावती अर कन्या होयां उणनैं गरभ में ईज मार देवता।

सोनोग्राफी मसीन कन्या भ्रूणहत्या रौ मोटी हथियार है। इणरै सायरै सूं जलम सूं पैलां ई लिंग रौ परीक्षण होय जावै। इण सूं लिंगानुपात रौ तालमेल बिगड़ग्यौ है। देस में 2500 कन्या-हत्या हर रोज औसत होय रैयी है। हरियाणा, पंजाब, दिल्ली आद राज्यां में आ दर सबसूं बेसी है। कन्या-हत्या रौ संबंध, गरीबी, अशिक्षा सूं घणौ नैं होयनै स्हैरी अर स्वारथी मध्यमवर्गीय परिवारां अर समाज री बीमार सोच रै कारण है। औ भेद बीमारी रै दांई फैल रैयौ है।

कन्या भ्रूणहत्या रोकण रौ उपाव

भारत सरकार सगळै देस में सोनोग्राफी मसीन सूं लिंग ग्यान परीक्षण पूरण रूप सूं प्रतिबंधित कर दियौ है अर इण सारू ‘प्रसव सूं पैली निदान तकनीकी अधिनियम (पी.एन.डी.टी.) 1944’ रै त्हैत कठोर दंड रौ विधान ई है। नारी सशक्तीकरण अर स्वावलंबन री केर्ड योजनावा सरकार संचालित करै। छोर्यां सारू निशुल्क शिक्षा रौ प्रावधान है। ओकल पुत्री अर दो पुत्री योजनावां चालै। इणरै अलावा केर्ड पुरस्कार अर योजनावां ई बालिका-शिक्षा रै बधापै सारू चालै। बालिकावां नैं ई माईतां री संपत्ति में अधिकार दिरीज्यौ है। भारत रौ संविधान वाँनै लिंगभेद नैं करण रौ अधिकार देवै। दायजौ (दहेज) आज दंडनीय अपराध मानीजै। छोर्यां रै जलम माथै सरकार वां सारू केर्ड पुरस्कार, प्रोत्साहन राशि अर भावी री सुरक्षा रा इंतजाम करै। छोरी रै जलमण माथै ई अबै थाली बाजण जैड़ी स्थिति आवण में घणौ टैम नौं है। पैलां सूं लोगां री सोच में बदलाव आयौ है। सरकार रौ करड़ौ कानून अर समाज में चेतना आवण सूं परिस्थितियां में पैली सूं कीं बदलाव है। पण ‘अजै लग दिल्ली दूर’ है। आज ई अखबार में नावा, झाड़क्यां अर अकूरड़ी माथै कन्या भ्रूणहत्या रा प्रमाण मिठै।

उपसंहार

जद तांई समाज इण समस्या सूं पूरी तरै नौं ऊबरै अर कन्याभ्रूण हत्या रै सिलसिलै माथै पूरण विराम नौं लागै, उण टैम तांई समाज अर सरकार नैं मिळ्नै इण सारू उपाव-प्रयास करणा पड़सी। लिंगानुपात री असमानता सूं अनेक सामाजिक समस्यावां पैदा होवै। भावी पीढ़ी सारू घणौ मोटी संकट अग्यानता सूं पैदा होय रैयौ है। देस रा आज केर्ड औड़ा राज्य है, जठै छोर्यां रौ अनुपात घणौ कम है। इण सूं समाज रौ ढांचौ बिखरै अर केर्ड सामाजिक अर मनोवैग्यानिक संकट खड़ा होवै।

(4)

राजस्थानी काव्य में पर्यावरण संचेतना

मंडाण

साख संपदा सुख सकळ, बरसौ बरस बधैहै।
धन अन जळ मरुधर धरा, कसर न पड़ै कदैहै॥

सुख-संपत अर उपज में लगोलग बधोतरी होवै अर मरुधरा मांय धन, अन्न अर जळ री कदैई कमी नीं रैवै। इणी कामना नैं अंतस में बसायनै राजस्थानी कवियां हमेस जुग-चेतना रौ काव्य रचियौ। राजस्थानी साहित्य मांय प्रकृति संचेतनापरक काव्य री लांबी अर ऊजळी परंपरा रैयी है, क्यूंकै प्रकृति अर मिनख रौ जुगादु सगपण रैयौ है। इण वास्तै प्रकृति रा फूठरा, कंवळा अर करड़ा सगळा रूपां रौ वरणाव राजस्थानी कवियां कर्खौ हैं।

प्रकृति अर पर्यावरण

प्रकृति रा बदलता रूपां, रितुवां रौ वरणाव, बारहमासा वरणन मांय हरेक महीनै मांय मौसम रै मुजब मिनख री मनगत, आचार-विचार, वैवार सूं ठा पड़ै है आपां रौ जीवण प्रकृति सूं अलायदौ नीं है। हवा-पाणी रै प्रभाव नैं खुद अनुभूत करनै अठै कवियां उण्नै आपरी काव्य-रचनावां में संजोयौ है। मौसम रै परवाण आवण वाळा राग-रंग अर उच्छबां मांय प्राकृतिक सुखां री चिर कामना रै सागै उन्हाळै रै तपतै तावड़े अर लूआं रा लपरका रौ ई सुआगत कर्खौ है। बसंत री सगळी सोभा 'लूआं' री भेंट चढाय दी, क्यूंकै उण विणास रै पछै ईज तौ नूवै सिरजण री बेळा 'बादली' रौ रूप लेयनै आवैला। इण मरुधरा रा वासी री सगळी आसावां बिरखा सूं जुङ्ड्योड़ी है। जिण भांत अठै री लोक नायिका बिरखा री बूंदां में परदेस में रैवणियै आपरै सुगणै सायबा रौ संदेसौ पढ लेवै, ठीक उणीज भांत वा बायरियै सूं कैवै कै थूं उणीज दिस में चाल जिण कानी म्हारा परदेसी पिवजी बसै है। पसु-पंखेरुवां रै सागै मिनख रा मीठा-मधरा संबंधां नैं दरसावतै पूरसल काव्य रौ सिरजण राजस्थानी मांय होयौ है—मोर, पपैया, कुरजां, कागला, गोडावण, हंस, चकवा-चकवी अर बीजा पंखेरुवां साथै आपरी भावनावां रौ ताळ्मेळ बिठावती विरहणियां संवेदनावां रौ सागर उंधाय दियौ है। गाय, घोड़ा, ऊंठ, हाथी, सिंघ, वाराह अर हिरण्यां रै सागै भायलाचार री मानवीय भावनावां रौ उल्लेख काव्य में होयौ है। पसु-पंखेरुवां रै साथै बिरछां रै सरूप, वांरी महिमा, गुण-धरम, रुंखपूजा री परंपरा, लोकजीवण में रुंखां रै मांगलिक विस्वास अर मान्यता, बिरछ लगाईजण रौ लोक माहात्म्य, पौधा लगावण री वैग्यानिक विधियां अर वांरै संरक्षण रा उपाव, प्राणी मात्र सारू रुंखां री उपादेयता अर औषध विग्यान में भांत-भांत रै रुंखां री गुणवत्ता रौ लोक हितकारी बोध राजस्थानी काव्य में होयौ है। रुंख में सगळा देवतावां रै दरसण री महिमा है। रुंख उदार अर परतापी सासक री भांत भूमंडल री रिछ्या करै।

रुंख विनायक रूप वर, रुंख सारादा रूप।

देवां रा इणमें दरस, भू छाजण बड भूप॥

राजस्थानी संस्कृति में काति रै महीनै रौ मोटौ माहात्म्य है। इण महीनै में तुळसी-पूजा, बैसाख में पीपल अर नीम, फागण शुक्ला इग्यायरस नैं आंवळै री पूजा करणौ उत्तम मानीज्यौ है। अठै लोकदेवता गोगाजी रै प्रतीक रूप मांय खेजड़ी री पूजा करीजै। राजस्थानी साहित्य अर संस्कृति में रुंख-पूजा री लूंठी अर लांबी परंपरा अठै री वरत-कथावां, धारमिक उच्छबां, तीज-तिंवारां अर गीतां (भजन, हरजस, सामाजिक लोकगीत) में दीठगत होवै। रुंखां रौ आपणै जीवण में इत्तौ इधकौ महत्व है कै औ आपां री परंपरा रा प्रतीक बणग्या है, जियां खेजड़ी री हरी डाळी रै संकेत सूं जांन (बरात) आवण री सूचना, जाळकी री डाळी सूं ब्याव रै मौके 'तोरण' टांकणौ, मांगलिक अवसरां माथै मूंगधणा (रसोई सारू बरतीजणियौ ईधन) बधावण अर पूजण री परंपरा, मारग माथै लगायोड़े रुंखां नैं पंथवारी रै रूप में सर्वचण अर पूजण री परंपरा पर्यावरण संरक्षण रौ संदेस देवै।

उपसंहार

जीव-जगत री जरूरतां नैं पूरी करण वावा औ सतजुग रा कल्प-बिरछ हैं, जिका सगळां नैं आसरौ देयनै लोकहित रौ काम करै—

जीव विहग पशु जोयलौ, संत देवता सोय।
अद्री रै उपयोग सूं हरख मानखे होय॥

औ इज कारण है कै रुंख लगायनै मिनख पितृरिण सूं मुगती पाय जावै अर उणरी भावी पीढियां रौ ई इण सूं कल्याण होवै—

रुंख आदमी रोपनै, पावै जस बड़ पाण।
पितरां भावी पीढियां, करै अम कल्याण॥
॥॥॥

(5)

जे म्हैं देस रौ प्रधानमंत्री होवतौ

मंडाण

ज्युं तारा मंडल मांय चांदो ओपै
त्युं मंत्रिमंडल मांय प्रधानमंत्री ओपै

हर मिनख रौ मन सुपनां अर आछै भविस सारू कल्पनावां री पांख पसारै। देस नैं अंगरेजां री गुलामी सूं मुगत होयां आज केर्ई दसक बीतग्या अर देस में लोकतंत्र री जड़ां घणी मजबूत होयी है। लोकतंत्र रौ मूळ मतदाता अर मतदाता ईज देस रा विधायक, सांसद, मंत्री अर प्रधानमंत्री बणै अर बणावै। पख-विपख दोनूं देस रै प्रधानमंत्री सारू खेचल अर भागदौड़ करै। म्हारौ मनडौ भी देस रौ प्रधानमंत्री बणण री हूंस अर कल्पना सूं भर्चौ है। म्हैं ई लोकसभा रौ चुणाव जीतनै देस रौ प्रधानमंत्री बणणौ चाऊं। कास, इसौ होवतौ तौ कितौ आछौ होवतौ। म्हारै मन में देस रौ प्रधानमंत्री बणण अर देस सारू कीं करण री मनसावां घर कर्योड़ी है। बियां बहुमत हासिल कर्योड़े राजनीतिक दल रौ नेता ईज देस रौ प्रधानमंत्री बणै अर लोकतंत्र अर संसदीय सासन प्रणाली मांय प्रधानमंत्री देस सारू घणौ प्रभावशाली अर महताऊ होवै। वौ चावै ज्युं देस री दिसा तय कर सकै। प्रधानमंत्री चावै तौ देस नैं विश्वगुरु बणा सकै। देस नैं विकास री नूंवी योजनावां अर भावी सोच सागै ऊंची ठौड़ पूगाय सकै।

देस रौ प्रधानमंत्री बणणौ

देस रौ प्रधानमंत्री बणणौ घणै अंजस री बात है। आपैर दल रै सगळे सांसदां रौ विस्वास अर प्रेम रै सागै समरथन हासिल होयां पछै ई प्रधानमंत्री जैड़ी गीरबैजोग पद मिलै। जे औंडौ होवतौ तौ म्हैं सगळां रौ भरोसौ अर साथ लेयनै आगौ बधतौ। मंत्रिमंडल में सांतरा अर चरित्रवान सांसदां नैं वारी खिमता मुजब ठौड़ देवतौ अर देस रौ सासन आछै ढंग सूं चलावण रौ प्रयास करतौ। जन री पीड़ावां अर वांरी मनसावां माथै खरा उतरणियां, जिम्मेदार अर मैणती सांसदां नैं सासन रौ काम सूंपतौ, जिका देस री समस्यावां अर विकास रै मारग रै रोड़े नैं समझण अर वांसू निपटण री खिमता राखै।

प्रधानमंत्री बण्यां म्हारा कर्तव्य

जे म्हैं देस रौ प्रधानमंत्री होवतौ तौ देसहित सारू जनता री प्राथमिकता नैं ध्यान में राखतां नीचै लिख्या मुजब काम पूरा करण रौ प्रयास करतौ।

1. देस री विदेस नीति नैं असरदार अर भावी देसहित नैं ध्यान में राख्नै बणावतौ।
2. देस री रक्षा-सेनावां रै आधुनिकीकरण, तकनीकी अर सबव्हता सारू रक्षा-बजट बधावतौ।
3. प्रवासी देसवासियां नैं देस खातर योगदान सारू प्रेरित करतौ।
4. विदेसां सूं करजा लेवण री रीत री जग्यां देस रै ईज लोगां नैं आतमनिरभर बणावण सारू योजनाबद्ध काम करतौ।
5. लघु उद्योगां, ग्रामीण उद्योग-धंधां नैं आगै बधावतौ। इण सारू वित्त रौ उचित प्रबंध करतौ। गांव अर स्हैर रा बेरोजगारां नैं उद्योग-धंधा अर रोजगार सूं जोड़तौ।
6. शिक्षा रै स्तर नैं सुधारतौ। भणाई अर गुणाई रै मेळ करण रै उपाव करतौ। देस रा गरीबां सारू मुफत भणाई री व्यवस्था करतौ।
7. वैग्यानिक, तकनीकी अर रोजगारपक शिक्षा सागै व्यावहारिक अर नैतिक शिक्षा माथै जोर देवतौ जकी वैग्यानिक सोच अर संस्कारां सागै आगै बधै-बधावै।
8. देस मांय यातायात री वैवस्था नैं सुचारू करतौ, वांगा नूंवां साधनां नैं बधावण सारू प्रयास करतौ जिका पर्यावरण नैं सागै लेयनै चालै।
9. देस नैं हस्तौ-भर्त्यौ करण सारू घणै सूं घणा रूंख लगवावतौ।
10. सगळा धरमां अर वरगां रा लोग भेल्प अर भाईचारै सागै रैवै, ऐड़ा उपाव करतौ।
11. आतंकवाद, नक्सलवाद अर देस विरोधी तत्त्वां सूं नीति अर पूरी ताकत सागै निपटतौ।
12. भ्रष्टाचार री जड़ां खोदनै लूण न्हाखतौ अर इणनैं जड़ामूळ सूं मिटावण रौ प्रयास करतौ।
13. गरीबी अर बेरोजगारी मिटावण सारू धरातळ री सांतरी योजनावां बणायनै वानै सख्ती सूं लागू करावतौ।
14. विश्व में भारत री भूमिका अर कद नैं बधावतौ अर विश्व-सांति अर भाईचारै सारू भारत रै पेटै विश्व रा देसां री आस माथै खरै उतरतौ।

देस सारू विकास रा सोपान

इण भांत प्रधानमंत्री बण्यां म्हैं देस नैं संगठित, वैवस्थित अर सुचारू विकास सारू योजनाबद्ध तरीकै सूं आगै बधावतौ। भारत नैं विश्वशक्ति अर विकसित देस बणावण रा पुरजोर तरीका अपणावतौ। देस री आंतरिक सुरक्षा-सांति अर भेल्प नैं पुख्ता करतौ। देस री भौतिक, सामाजिक, आर्थिक, राजनीतिक, खगोलीय, वैग्यानिक अर नैतिक प्रगति रा खास उपाव करतौ। नूंवा सोध अर वैग्यानिक आविस्कारां नैं बधावौ देवतौ, जिका प्रकृति अर पर्यावरण नैं परोटता मिनख-मानखै नैं आगै बधावै। आणविक शक्ति रौ बिजळी री उत्पादकता बधावण सारू उपाव करतौ।